




Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.7.19





Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.7.19



Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.7.19




Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.7.19

24 Ab. 2/7.

6689
25



[Faint, illegible handwritten text]



M. ANTONII NATTAE ASTENSIS

Opera.

De Immortalitate animæ libri V.

In Domini Natale,

De Quadragesimali ieiunio,

De pœnitentia,

In festum diem Paschatis,

*De fuga sæculi, & studio religionis, ad No-
uitium Monachum;*

De perfecta vita,

De Poetis,

Metra Poetica,

Oratio.

Oratio.

Oratio.


Oratio.

Liber.

Liber.

Liber.

Liber.



VENETIIS, M. D. LXIII.


M. ANTONII NATAE ASTENSIS

Opera.

De immortalitate animae libri V.	Oratio.
In Domini Natale,	Oratio.
De Quinquagesimali ieiunio,	Oratio.
De penitentiis,	Oratio.
In festum sancti Paschalis,	Oratio.
De fidei facultate & satisfactione, ad No-	Liber.
minum Antonium,	Liber.
De perfecta vita,	Liber.
De Fortuna,	Liber.
Altera Poetica,	Liber.



VENETIIS, M. D. LXIII.



SANCTISSIMO D. N.
PAPAE PIO IIII.

Marcus Antonius Natta Astensis salutem
& humilem sui commendationem.



STAT VETVS consuetudo tibi non incognita Pontifex Maxime PIE, qua hi, qui in disciplinarum & ingenuarum artium studijs uersantur, lucubrationes suas summis dedicant Principibus, qui dam existimantes scripta sua magis suscipi, si ad summos viros missa, & eorum iudicio probata viderentur. alij per hac aditum ad amicitiam & familiaritatem quærentes: alij quemlibet alium fructum de huiusmodi oblatione petentes: nec interesse creditum est, cuius esset materia, quod scriberetur, modo non turpis esset & infamis. Hinc (vt ab Hermolao Barbaro collectum est diligenter) Iulius Pollux ad Commodum Casarem de Grammatica: Vitruuius ad Augustum de Architectura: Oppianus ad Antonium de Piscibus: Diophanes ad Deiotarum Regem de Agricultura scripserunt. Hæc paulo altius repetita, quorsum tendant, iam perspicuum est; manifestius tamen erit, si dicatur, quàm silentio prætereatur: paucis tamen agendum puto. Ego tam & si ab ineunte ætate iuris scientiæ me addixerim, omnemq; ferè ætatem in ea consumpserim, tum respondendo de iure meis ciuibus, tum magistratus gerendo, ta-

A 2 men

Epistola

men nescio quo diuino impulsu (non enim possum aliter dicere) alia ingenuarum artium studia pariter sequutus sum: maxime autem mihi cœlestia sacramenta, & quaecunque ad animæ pertinentia salutem, placuerunt. Itaque ea addiscere cura fuit, nec addiscere modo, sed etiam literis mandare: quod illo modo plenius rem cognosci, & tenacius harere animo arbitrabar: & de his quidem, quos antea ediderim libros, prater eo, ne ambitiosè id facere uidear. Nunc autem, quum aliquot alios libros ijsdem de rebus iampridem confectos emittere in uulgus uellem, uisum est eos ad te mittere, uel maiestati tuæ potius consecrare: ut sub tui nominis auspicijs illustrentur, & fœlicissima tuæ fortunæ flatu prouehantur. Adijce, quod materia quoque ipsa me huc ultro vocare uidebatur. Nam hæc orationes adsunt in Natiuitatem Domini, & in eiusdem Resurrectionem. Item de quadragesima: De fuga sæculi, & studio religionis: De penitentia: De uita perfecta libri singuli: Prater ea de immortalitate animi quinque libri conspiciuntur: Copiosius hoc in argumento uersatus sum propter uarias dissentientium Philosophorum sententias, quorum alij immortalitatem omnino negabant: alij ad tempus concedebant: alij ambigebant. Neceffe igitur fuit argumenta argumentis comparantem ueluti collatis signis dimicare, & quasi ferro uiam sternere ueritati. Lufimus etiam metro quadam pie ac religiosè. Omnia ferè ad Christum spectant, cuius es Vicarius & Clauiger summus: Omnia sub te sunt humana, summa etiam Regum culmina pedibus tuis prosternuntur. Non est alius quisquam inter homines, qui ampliori potestate fungatur: Quodcunque solueris super terram, solutum erit & in cœlis. Vnum & idem facis cum Christo tribunal, omnia iudicans, à nemine mortalium ipse iudicandus. Hinc non absurde uisus dixisse Poeta quidam ad Pium secundum predecessorem tuum tibi cognominem. Non Deus es, nec homo: innuens supra hominis conditionem assurgere, qui talem tantamq; à Christo collatam gereret potestatem. Itaque nulli magis libri

de

Nuncupatoria.

de religione compositi, quàm tibi debentur, quorum etiam censor esse potes, & debes. Nulla quidem à me sententia, sed à sanctis desumpta patribus omnia, ea præsertim, quibus religionis nostræ mysteria continentur: ordinem tamen in dicendo sequutus sum, qualem uolui. Conatus sum etiam nitore uerborum illuminare singula, & ex arte Rhetorum facere aptiora. Nam licet aliorum sententijs (ut Fabius differit) adijcere oratorium robur, omissa supplere, effusa substringere, recipiuntq; omnia (quantum ego sentio) proprietatem & lucem Romana lingua: quem morem magni illi interpretes sacrarum literarum antiquitus tenuerunt Hieronymus, Ambrosius, Augustinus, & is, qui eandem Petri cathedram, quam tu nunc obtines, insedit, Gregorius. Num tamen, quod conatus sum, assequutus fuerim, me latet: hoc unum scio, studium non defuisse, & magnum esse, materiam dicendo exæquare. Sed, ut id se se habeat, spero sub tui nominis auctoritate lucubrationes has nostras gratiosiores multis fore: quod, ut contingat uberius, peto à te atque adeò obsecro, ut eas benigna & hilari fronte suscipias, eisq; tribuas, non quantum earum merita postulant, sed quantum humanitas tua deposcit, quæ quam cordi tibi sit, vel ipsa nominis tui significatione indicatur: non enim frustra Pontificale ascendens solium, Pij tibi denominationem assumere uoluisti. In fine harum literarum, Deum Optimum Maximum comprecor, ut sanctitatem tam feliciter augeat, gregiq; suo diutius conseruet. Vale.



MARCI ANTONII

NATTAE ASTENSIS,

DE IMMORTALITATE ANIMI.

LIBRI QVINQVE.

Procœmium.



EFFLAGITARVNT de me sæpius familiares quidam & amici, ut sepositis paululum his, quæ in fide traduntur, aliqua de immortalitate animorum literis mandarem: nihil sibi hoc munere fore gratius ostendentes. Ego autem & si illis uiris de me optimè meritis omnia cupiebam: utrum tamen præstarem id, quod petebatur, diu multumque dubitavi. Nam & si uniuersarum penè gentium & nationum consensum, omnia religionum iura: legum sanctiones pro immortalitate stare uidebam, ubi tamen ad Philosophos uentum est, qui rationum ponderibus cuncta sibi tentanda & exploranda censebant, uarias & inter se contrarias & repugnantes extitisse sententias, magnisque colluctationibus rem agitatam fuisse, reperiẽbam, unoquoque suam sententiam approbare uariis argumentis & suadere cæteris conante: ita, ut non solum singuli, sed uniuersæ inter se sectæ hac in re dissentirent. Pythagorei, Platonicique, & omnium antiquorum Theologorum manus, alijque innumerabiles immortalitati assentiebantur. Leucippus, Democritus, Epicurus, & huius uiri sectatores, humanos animos caducos esse & fluxos & fragiles statuerunt: & unà cum corporis sensibus tanquàm & ipsi corporeum essent aliquid, extinguere arbitrabantur: Aristoteles ambigè loquutus existimatur. Alexander uerò inter Peripateticos illustris mortem animarum ausus est ponere, & de Aristotelis sententia hoc dicere uult uideri. Quid de Stoicis dicam? qui ueluti quidam arbitri constituti animam quidem ultra corporis uitam protendi, aliquando tamen interire existimant: quod conuenit cum illis, qui Dæmones quidem longæuos, mortales tamen opinantur. Magnis certè contentionibus & prælijs utrinque certatur: cui rei occasionem præbuit ipsa anima, quæ medium quoddam amplecti uidetur: nam dum mortali iungitur corpori, mortalis existimatur: dum autem assimilatur Deo, immortalitatis ostendit imaginem: homo enim utitur sensibus alimenta que & incrementa suscipit, uitamque agit in plerisque

Procemium.

que pecudis ritu, sed & aliud etiam facit, quod diuinam respicit maiestatem, quia & intelligit, & intelligere se nouit, & ueritatem rerum diligenter perscrutatur, & inuenit: & quum terrenum sit animal, instrumenta uaria fabricauit, quibus cœlestium corporum motus comprehendere potuit, & profundo se mari credere, & ad extrema mundi penetrare, remedijs etiam se ipsum multis contra morbos, feras, periculaque alia multa armauit, quæ omnia ad diuinam propè naturam accedere censentur, hinc quum communia habeat aliqua cum beluis, aliqua cum Deo, cæterisque formis cœlestibus, ambiguum illud nascitur, cuius anima ipsa sit magis partis, & unde uis illa intelligendi, cognoscendique oriatur. Præterea quanta imminet illa disceptatio, quam multis sententiarum fluctibus exagitata, ut superstes anima sit corpori suo, quid agat nudata corpore, quid ue patiatur, & quò recedat. Hæc omnia tractare rectè atque examinare, ita ut discussis omnibus, quæ in utranque partem afferuntur, ad ueritatis ipsius demonstrationem perueniatur, quis non magnæ operæ, summæ industriæ, præstantis ingenii esse existimabit? Quæ quum ita sint, ego tamen post diutinam meditationem accinxim me operi, existimans huic mecum laborem utilem multis fore, qui huic immortalitati animorum, aut non omnino, aut imbecillius assentiuntur. Nam si ostendero hanc immortalitatem & auctoritatibus summorum uiroꝝ, & euidentium rationum multitudine comprobari, quis erit tam præsentium rerum illecebris captus, qui dum cogitat se obita hac corporis morte remanere, & pro his, quæ gessit in corpore, uel pœnas uel præmia relaturum, non studeat rectius uiuere, & indies fieri melior, ac non poeniteat secus, quàm decuerit uixisse? quod porro tam acuit in quibusdam insaniam uoluptatum, quàm dum illa subit cogitatio, breui temporis puncto sibi fore uiuendum, post hac omnia extinctum iri, nihil sui superesse. quid tam nutrit hominum audaciam ad facinora, quàm id, quod putant, si impune ea tulerint, fruuntur bonis scelere adeptis. Sin autem deprehensi pœnas capite luant, tamen breui illo suppliciorum spatio se omnibus molestijs liberatos, nec aliquid amplius passuros, sed perinde desinere, ac si nunquam uiuere cœpissent. Hæc immortalitatis meditatio potest hos à uitijs retrahere, & ad uirtutem impellere. Omnium enim Poëtarum ac ueterum Philosophorum ore, uulgi denique opinione celebratum est, malos apud inferos pœnas pendere maleficiorum, qua de re immortalitas animæ celebratur: nā qui supplicio cruciatuque uexatur, is profectò uiuit. Sed quid tam excitare homines potest ad laborum dolorumque patientiam, quàm expectatio post mortem summæ remunerationis pro rebus rectè & ordine gestis, & fortiter toleratis. non enim adeò infœlix est humana conditio, ut mali duntaxat torqueantur, boni uerò non remunerentur, imò tantò magis hoc fiet, quàm illud, quantò uehementius conuenit uirtutes amare, quàm uitia odisse, & fauorabilius est liberalitate, quàm supplicio uti. Hæc licet immortalem se fore sperantem expectare: Sin autem

omni

Prooemium.

omni ex parte occidimus, uix est, ut quisquam laboribus & periculis, asperisque & formidolosis rebus obijcere se debeat, & excipere uenientes. Fuit etiam calcar quoddam & fax mihi ad hanc scriptionem senectus, nam & si omnem ætatem deceat cogitare quid nam post mortem contingat, multò tamen magis hoc cõgruit senectuti. enimuero iuuenis plerumque sperat se diu uicturum, stultè forsitan, sed sperat tamen: senex autem ne illud quidem habet, ut speret: iam iam enim mortem, quæ longius abesse non potest, in foribus esse suspicatur, ad quemlibet leuis morbi strepitum perhorrescit. Itaque uidendum est ei, quis post mortem sit, quò ue euadat, & quum immortalem se cognouerit meliore sui parte, optandum est & curandum, ut postquam hæc deliquerit, tribuat ei uersitatis huius Dominus pro eius clementia & singulari bonitate refrigerij sedem, quietis beatitudinem, luminis claritatem. & quanquam religionis nostræ dogmata hac in re abundè sufficere poterant, nec ab his sit latum (ut dicitur) unguem discedendum: ubi tamen eadem naturali consentiunt rationi, nihil est, quod illustrius ualeat expectari, omnis muscitandi mora aufertur. Non igitur inanem sumit operam, qui immortalitatem fortiter ostendit, quæ tantum utilitatis affert credita, quantum exitij si abijciatur. Mouit me etiam amicorum studium, ut scriberem, cui si defuisssem, ueritus sum, ne superbiæ crimen incurrerem, si eorum desideria contempsissem, uel desidiæ, si id laboris fuga nolle uisus fuisssem. Nam quod ad ingenij mei mediocritatem attinet, satis est unumquenque præstare pro copia, quod potest, quod abundè declarat seruus ille Euangelicus, cui quum à Domino creditum fuisset unum talentum negociandi gratia, fraudi fuit, quod uel unum illud talentum occultasset, ac non penes nummularios usutis subiecisset, nec excusari meruit, quod cæteri conserui, qui superlucrati fuerant, plura talenta ad qua sum accepissent, & ita profecto res se habet, ut inspiciatur magis, quod quisque studij afferat, quàm quod habeat facultatis: inopia enim meretur ueniam, negligentia poenam. Hinc deprecor, ne me quispiam existimet nominis aut gloriæ causa edere hoc opus uoluisse, quasi uoluerim ob hunc odorem cunctorum oculos ad me trahere, quod talia sciam: nihil enim nouum aut recens dicturus sum, nihil quod quisquam iure mirari debeat: alienis institi uestigijs: nec hæc inuenta mea sunt, sed collecta tantummodò & qualicunque dicendi facultate exornata. Itaque hæc doctrina mea non est mea, sed eruditissimorum uirorum, qui multis ante me sæculis floruerunt, & talia sibi inuestiganda duxerunt. Illustrationes tamen quædam & illuminationes à me forsitan proficiantur, quas spero non ingratis eruditis oculis futuras; reliqua ueteribus debentur. De his autem rebus pluribus ante annis cum Athanasio plenè & copiosè disputauim, ideo satis fuerit illius colloquutionis meminisse, quod quum faciam polliceor, me non iisdem uerbis, iisdem tamen sententiis usurum & eundem ordinem seruaturum: hoc enim magis seruiat claritati. Res igitur sic acta est, ut nunc narrabitur.

inmo



MARCI ANTONII

NATTAE ASTENSIS,

DE IMMORTALITATE ANIMI.

LIBER PRIMVS.

Dialogi personæ,

MARCVS,

ATHANASIVS.

MARCVS.



QVVM die quodam domi in Bibliotheca reside-
rem cogitabundus super nonnullis Philoso-
phicis quæstionibus, totusque in illis essem.
Ecce aduenit Athanasius adolescens multis
amicitiæ & familiaritatis uinculis mihi con-
iunctissimus, ingenuarumque artium studio-
sissimus, & utriusque linguæ peritissimus, quem
cum lógo interuallo uidissem, complexusque
essem, tum post primos congressus & mutuam
salutationem assedimus. Tum ille. Mediola-

num (inquit) negociorum explicandorum gratia (ut nosti) profectus
sum, eaque res longius opinione me detinuit: nam uix toto hoc anno
me explicui. Vt autem huc primò adueni, intellexi Andrietam matrem
tuam septimo abhinc die discessisse, & (ut par erat) commotus sum: ea
autem de causa nunc ad te, ut uiserem, quem per annum non uidissem,
simul & illud cogitans, quòd tali tempore amici præsentia, dolorem
quodammodo subleuat, quem alterius discessus intulit. Credo autem
te obitum matris moderatè tulisse. M A R. Rectè existimas mi Athana-
si. Quis enim ego, qui irascat Deo, quòd secum potius eam, quàm me-
cum esse uellet? aut quid omnino succenseam, si amantissima mei ma-
ter ætate iam & laboribus fessa ad optatam requiem peruenit. Fateor me
quibusdam naturalibus doloris stimulis agitatum, quum mihi caren-
dum esse eius consuetudine uiderem, cum qua plures annorum deca-
das, consumpsissem. Ipsa, quum decennis ipse patrem amisisset, uicem
patris mihi & fratribus exhibuit, tum in cura rei familiaris, tum in ex-

B hortatione

De Immort. animi

hortatione ad optimas disciplinas capeffendas, ad quas quotidie incen-
debat suppeditatis magistris: quo autem cultu & ueneratione fuerit er-
ga diuina, non te latet: summa etenim uirtutum omnium pietas est in
Deum: hanc qui habet, cæteras omnes habet uirtutes, quicunque ca-
ret, uirtutum potius nomina & similitudinem possidet, quàm ipsas uir-
tutes. Itaque quum recolo matrem piè iusteque uitam egisse, dolorem
abijcio, & cogor illius foelicitate gaudere, ut pium decet filium: credo
enim illam iam Beatorum sedibus receptam, uel breui receptum iri, ubi
si aliquid exeunti terrenæ sordis inhæserit, purgatorijs flammis delerit.
A T H A. Hoc ualde extenuat (ut dicis) luctum eorum, qui dolent, ob
discessum suorum, dum cogitant pro uita honestissimè acta hinc disce-
dentes non ad eandem, sed ad longè meliorem uitam transisse: non e-
nim dolendum est de eorum commodis, sed potius latandum. Quòd
si mortem illorum nobis incommodam putamus, illud iam erat præco-
gitandum, ne nos cura recens laceraret, homines natos fuisse, & homi-
nibus semel hæc esse relinquenda, & incertum, quo die, uel hora potius:
multos enim inexpectatò mors opprimit. Hoc præclare uidit Ambro-
sius (nam dum Mediolani ago, curæ fuit huius uiri libros perlegere,
qui ea in ciuitate Episcopatum magnificentissimè gessisset) Is in altero
libro de bono mortis, sic inquit. Gentiles Philosophi aduersus mortem
plerumque se consolantur: uel de communitate erumnæ, uel de iure na-
turæ, uel de animæ immortalitate. Denique, quid absurdius, quàm
quod omnibus scias esse præscriptum, quasi speciale deplorare? hoc est
animum supra conditionem extollere? Legem communem non recipe-
re, naturæ consortium recusare, mente carnis inflari, & carnis ipsius
mensuram nescire. Quid absurdius, quàm nescire, quid scis, & affe-
ctare, quod non scis? aut quid imprudentius, quod scias futurum esse,
id ferre non posse? M A R. Sint ista. A T H A. Illud uerò sapientis di-
cunt non expectare, ut dolori medeatur dies, sed quod allatura erat
dies ratione repræsentare, quum doloribus calamitates mutari ne-
queant, & calamitosum nihil incidat, quod non sit è conditione huma-
næ naturæ. Quapropter illa præclare se habent, quæ tali in re à Phile-
mone & Menandro prolata sunt, & à Plutarcho commemorata in conso-
latione ad Apollonium, & ab eruditissimo uiro latinis auribus donata,
ea non refero, quia notissima sunt tibi. M A R. Nôscô Græca: Latina
tamen carmina referri à te uellem, si memoria tenes: delectat enim me
ualde, ubi aliquid bene è Græcis conuersum uideo. A T H A. Geram
tibi morem. Nam memoriæ carmina ipsa mandauì. Illa tibi sunt ex
Philemone.

Si quid remedi lacrymæ afferrent malis:

Minorque semper fieret lugentis dolor,

Auro parandæ lacrymæ nobis forent.

Sed nil here istæc profunt: res ipsæ nihil

Mo-

Mouentur istis: siue tu semper fleas,
 Seu nunquam, eandem pergere insistent uiam,
 Quid his iuuamur ergo? nihil certè: at dolor
 Ut ipsa fructus arbor, sic lacrymas habet.

Audi nunc Menandrum.

Nam si te alumne genitrix quum peperit tua,
 Hac sorte es unus omnium in lucem editus:
 Tibi cuncta, ut euenirent, quæ uelles bona:
 Idque annuit magnorum quispiam Deum:
 Iure optimo indignaris: ualdè enim is tibi
 Fallax repertus, quod, si eisdem legibus,
 Quibus nos omnes (tragicis ut uerbis loquar)
 Aequè patentem cunctis aërem trahis:
 Ferenda sunt hæc leuius, & omnis rectius
 Ratio habenda, denique hæc summa est, puta
 Hominem esse te, quo nullum animantium omnium
 Extolli, itemq; deprimi citius solet,
 Ipsumq; id haud iniuria: minimarum enim
 Id uirium est: & maximis semper studet,
 Plurimaq; secum commoda conterit cadens.

Tu uerò & magna non amisisti, bona
 Et mediocria sunt ipsa ea, quæ pateris mala,
 Ergo & modeste alumne, quod reliquum est, feras.
 MAR. Hæc, quæ Græci hi Poëta monent facere, prudentiæ est summa. Sed tamen minus solantur, propterea quod plerique, uel hoc ipsum lugendum esse dicunt, nos ea natos conditione, ut mala perpeti sit necesse: expediebat enim nulla potius esse mala, quam esse aliqua, & eò confugere, ut æquanimiter ferantur. Tormenta quis optat? nemo, optat tamen sapiens (si patiendum est) pati fortiter, sed mallet illis carere. Itaque minus efficax hæc ad tollendum luctum oratio. Illa uerò consolatio optima meminisse eos, qui ex hac uita excefferunt, alia meliori uita detineri: non esse extinctos, sed uitam ducere, & eam uitam, quæ uerè est uitalis, hoc omnem exhaurire luctum potest rectè cogitatum atque tractatum. A T H A. Et si optima esset consolatio, quam dicis, non tamen effugienda uidetur ea, quæ sumitur ex erumnis, & laboribus, & alijs incommodis, quæ in hac uita frequentissima sunt. nam si misera est hæc uita, harum miseriarum finis in morte reperitur, quæ finis est uitæ. Itaque in laude mortis ponitur, quod nos eruit à præsentibus calamitatibus, quod etiam prosequitur Ambrosius in eodem libro de bono mortis, ubi etiam tradit hoc diuinum esse institutum: Mortem (inquit) Deus homini non pro poena, sed pro remedio dedit, licet & ipsa poenalis sit. Adæ nanque peccanti dictum est pro poena. Maledicta terra in opere tuo, & cetera. Pro remedio autem additum est, donec

B 2 reuer-

De Immort. animi

reuertaris in terram, de qua sumptus es. Mors ergo pro remedio, quasi malorum finis praescripta est. Sed quid est, quod ais Marce ad omnem luctum exhaustiendum nihil tam prodesse, quam si meminerimus eos, qui ex hac uita excesserunt, non esse extinctos, sed alia meliori uita detineri? Sermo hic noster indicat animos hominum esse immortales, quod an ita sit, in dubium reuocari ualet. **MAR.** Imò tu quid ais Arthanasi? quæ te intemperiae tenent, ut hæc proferas? Immortalitas ne animorum, apud te in dubium reuocatur? ecquid te mouet Christus Saluator noster? Euangelium? Fidei symbolum? in quo profitemur expectare uitam æternam. An tibi uita uidetur æterna, si extinctis corporis sensibus nihil ex homine remanet, nihil superest incolume, sed omnia simul & semel intereunt? Vtrum te id facere dicam stoliditate, an incredulitate? neutrum uellem, sed si alterutrum eligendum sit, mallem stoliditate, nunc uereor ne in causa sit incredulitas nescio unde suscepta. **ATHA.** Accusas me uehementer Marce, sed noli quæso indicta causa me condemnare; nam uel te ipso iudice uincam; Christianus sum Marce: scio quid me credere oporteat, ut salutem assequar. Itaque firmiter animorum immortalitatem teneo, quæ est Christiana est disciplina, & sacris undique literis prædicata. Hæc animorum immortalitas fidei nostræ est fundamentum, quod, qui eruit, cætera tollit omnia: hanc ego immortalitatem certissimam habeo, neque me ab hac fide cuiusquam docti, uel indoctrinatio remouebit, sed nunc non agitur de fide mea. **MAR.** Quid igitur nunc trepidas? **ATHA.** Non trepido, nam dubius in fide infidelis est, & ut planius tibi ostendam sententiam meam, non opinione teneo immortalitatem, sed fide: nam hoc ipso inter se differunt fides, & opinio: quod fides assentitur rebus incognitis firmiter: opinio autem ita amplectitur unam partem, ut titubet tamen, ne altera pars aliquando sit potior. **MAR.** At aiebas modò (si rectè percepi) in dubium reuocari animorum immortalitatem. **ATHA.** Aio equidem, sed non penes Christianos, sed penes Philosophos, & alios plerosque ueteres, qui luce Euangelij nondum diffusa inter gentes & nationes uersabantur, & cœcis opinionum tenebris plerunque inuoluebantur. **MAR.** Haud mentiris: nam quondam hac de re inter eos, quos memoras, magnum & bene longum fuit certamen. Veruntamen quum inculcatum tibi sit te esse immortalem, idemque de cæteris hominibus sentias, quid uis amplius? **ATHA.** Dicam planè si potero quid uelim, quoniam hætenus nondum percepisti. Ego fixa fide animorum immortalitatem (ut dixi) complector, sed num naturali ratione ostendi possit requiro propter magnas, & diutinas contentiones, quæ aliquando fuerunt, non quod fides mea ab his rationibus pendeat, sed ex his crescat, augeatur, corroboretur. Sin autem nullæ erunt, uel sint aliquæ inualidæ, quæ tantum pondus nequeant sustinere: fides nihilominus inconcussa manebit.

bit: innititur enim diuino testimonio, quod omni humano ingenio maius est. nec peccare me arbitror, si fidei meæ adiumenta undique con-
 quiro. Vnum esse quendam, qui cuncta hæc condiderit, qui humanis
 præsideat rebus, prouidentiamque gerat omnium, increatum, immen-
 sum, omnipotentem, quem Deum uocamus, immobili dogmate profi-
 temur. Veruntamen quum hoc esset, uoluerunt sapientissimi uiri, ij-
 demque sanctissimi, qui supra nos fuerunt, rationibus è media Philoso-
 phia petitis hoc idem ostendere, & è dignitate sua hoc esse arbitra-
 bantur: non quo fidem eruerent credentium, sed ut corroborarent. Quid
 tam mirum, quàm corporum resurrectio? quæ uidetur nulla humana ra-
 tione comprobari posse? attamen audiui doctissimos homines, qui in
 ecclesia Christi nos præcesserunt, multa argumenta, multasque similitu-
 dines collegisse, quibus istud & diuinæ potentia pronum, & sapientia
 congruū, & clemetia aptum demonstrarent. Semper maiores nostri fidei
 dogmatibus rationes ex humana sapientia fonte deductas aptarunt, ut
 ea firmitus crederentur, si à rebus cognitis, & usitatis non abhorrerent.
 Nunc, ut ad propositam reuertar quaestionem, quæro de te utrius es sen-
 tentia, an eius, quæ immortalitatem animorum posse humanis rationi-
 bus probari contendit, uel alterius, quæ negat: quid horum duorum
 magis placet? quo te confers? quod sequeris? responde quaeso. *MAR.*
 Vis hoc tibi dici. Ego immortalitatem animorum probari posse ratio-
 nibus arbitror, & tam ualidis rationibus, ut conuelli nequeant, habes
 sententiam meam. *ATHA.* Si ita sentis, peto à te pro amicitia nostra,
 proque familiaritate, ut rationibus his, quibus uidebitur, eam mihi o-
 stendas. Fides iam præcessit mea, hanc rationes subsequantur: fac ut
 gaudeam: gaudebo etenim, ubi eam tali uidero instructam comitatu.
 Noli mihi quaeso hanc foelicitatem inuidere. *MAR.* Ita me urges Atha-
 nasi, ut mihi iam tibi denegare sit religio. Itaque negotium aggrediar
 pro uiribus, quod si forsitan re ipsa deficiam, studium tamen in te meum
 perspicias. Solent temeritatis culpam subire quicunque rem suscipiunt
 imparem suis humeris, quamuis laude dignam. At uide Athanasi, qui
 sim, qui malo (si ita contigerit) temerarius existimari ineptè dicendo,
 quàm quicquam de beneuolentia in te mea imminutum uideri tuæ nõ
 obsequendo cupiditati. *ATHA.* Laudo ualde, quod me non spernis,
 sic non te spernat Christus, qui à nemine spernendus ipse, nec cæteros
 sperni iubet. *MAR.* Aggredior equidem studiosè quaestionem efflagi-
 tatam. Vereor tamen aliquando, ne si quod cupis effecero, nimis lon-
 gum sit, nam qui pro animorum immortalitate contendunt, quorum
 magna est copia, tam multiplicia, tamque uaria efferunt argumenta, ut
 si cuncta explicare uoluerò, uix hic dies suffecturus sit. *ATHA.* Si lon-
 gitudinem adducis Marce tui causa, potes, si quid fuerit prætermis-
 sum, in alium diem differre, idque tunc explicare: sed si molesta non fuerit di-
 centi, cur mihi sit audienti? nam quantum ad hodiernum attinet diem,
 mul-

De Immort. animi

mortuum adhuc eius superest, quod si prius occiderit, quam sermo no-
 stet, nihil erit negocij progredi luminaribus allatis. **M A R.** Rationes
 Achanasi uarias habeo, & multiplices (ut dixi) ad ostendendum, quod
 equiris, quarum quædam ita sunt perspicuæ, ut cogant quodammodo
 fateri rem ita se habere: aliæ autem suadent tam efficaciter, ut saluo pu-
 dore resisti non possit. Te tamen admonéo, ut fidei priores partes pe-
 nes te esse patiaris, sicut modo pollicitus es; quamuis enim rationes ip-
 sas magni momenti esse duco, tamen ita statuo posteriori loco, esse po-
 nendas. Fides & scientia, & si in eo conueniunt, quod utraque firmat
 sententiam suam, nec de ea ambigit, differunt tamen, quod fides cre-
 dit inconcussè uerum esse, id de quo audit, quamuis occultum sit, & ue-
 latum: scientia autem iudicat constanter uerum esse, quod perspicit
 tanquam id perspiciat nudatum, & omnibus integumentis euolutum:
 quæ si nutat in eo, quod perspicit, & ulterius quarit, non scientia fuit,
 sed (ut tu dicebas) opinio. Itaque quum humanæ rationes uendicent
 sibi scientiam, quæ tamen in plerisque uacillat, tutius est omnino com-
 mittere se fidei, quæ diuinis innixa oraculis nunquam fallit, quàm hu-
 manæ scientiæ, quæ quamuis si scientia esset, non falleret, nec fallere
 posset, tamen in ambiguo sapius relinquitur, scientiæ ne, an opinionis
 nomen mereatur. Vt autem ad immortalitatem ueniam, de qua agitur.
 Multa sunt hac de re diuinarum literarum testimonia, & tam aperta, ut
 non egeant interpretatione. Illud quoque, quod circa Iob gestum est,
 hanc eandem immortalitatem animorum edocet, sed paulò occultius,
 ut non ab omnibus animaduertatur. **A T H A.** Me quoque inter eos
 numera, qui non animaduertunt. Itaque explana, (nisi molestum est)
 quomodo id se habeat. **M A R.** Quum Deus, Iob uirum rectum & iu-
 stum Satanæ tradidisset, ut eo quemadmodum uellet uteretur, modo
 animam eius seruaret: & Satanæ hac potestate accepta liberos eius in-
 terfecisset, substantiamque omnem perdidisset, postremò ulcere pessimò
 à planta pedis usque ad uerticem percussisset, ita, ut sedens in ster-
 quilinio testa saniem raderet, hæcque omnia uir inuicti animi placidè
 tulisset cum illo præclaro elogio. Dominus dedit, Dominus abstulit.
 Nolens Deus hanc eius patientiam irremuneratam relinquere, dupli-
 cia ei omnia reddidit. Habebat prius (ut scriptum est) septem millia
 ouium, tria camelorum, quingenta bouum iuga, quingentas asinas,
 ac familiam multam nimis, restituta sunt illi quatuordecim millia
 ouium, & sex millia camelorum, & mille iuga bouum & mille asinæ.
 Vt autem ad liberos uentum est, non sic. Restituti sunt septem filij &
 tres filiæ, quot antea habuerat, quasi illos priores in morte corporis
 non amiserit, sed præmiserit: non redditus fuisset duplicatus libero-
 rum numerus, nisi hi, quos prius susceperat, computentur, qui non,
 ut reliqua animalia uiro perierant, sed adhuc manebant superstites.
 Tenes ne? **A T H A.** Teneo, & hoc satis argutè ex historia illa collectum
 iudi-

iudico. **M A R.** Fides igitur nostra pro uiribus immortalitatem complectatur, quemadmodum religionis nostræ iura postulant; sumus enim fidelium, non sapientum nomen consequuti, qui non possumus etiam sapientes gentibus extra positos uideri, ut qui stultitiam crucis (quod magnum est mysterium) prædicamus. **A T H A.** Faciam quod mones Marce, cum sponte mea, tum auctoritate tua inductus, sed scis ne quid me impulit, ut rationes quoque audire cuperem. **M A R.** Si dixeris. **A T H A.** Audi. Ego superioribus mensibus, dum Mediolani agerem, incidi in libellum Philosophi siue Mediolanensis, siue Mantuani (non enim satis de patria hominis memini) In eo libello acerrimè hac de re disputatur. Sed adeò obscurus ille, & tam sordidis uerbis contextus, ut uix millesimam eius partem intelligerem. In summa attentius consideras, collegi, uelle humanam animam in morte corporis non supereffe, sed pariter extingui: sententiæque suæ Aristotelem auctorem facit. Ex eo die exarsi cupiditate, scire quid hoc rei esset, & ad te tunc potissimum respiciebam, quem existimabam huic muneri idoneum fore. Sciebam nanque te inuestigare hæc & similia solere. Opportunè autem accidit, ut sermo, quem ab initio habuimus, huc nos deduceret, & ansam quodammodo huic quæstioni præberet. Ideo occasione hac elatus, non defui huic meæ cupiditati, ut uides. Cognoui iam te contrariam sententiam his, quæ in libello illo dicuntur, inducere. Itaque expecto nunc rationes illas è fonte naturæ deductas, de quibus modò dicebas; magnum sanè earum munus, magnus fructus, si animorum docuerint immortalitatem. **M A R.** Vellem, ut libellum illum, de cuius obscuritate & sordibus conquereris, intellexisses. Nam si te dicente cognoscerem argumenta, quibus scriptor ille innititur, ut animas hominum putet esse mortales, ualidius insurgerem, & ueluti collatis signis dimicarem, & toto (ut existimo) campo fugarem, quanquam non me latet, quæ pro illa parte dicuntur: sed nosti disputantium nonnullorum morem, qui negant suis argumentis esse responsum, etiam quum respondeatur: quid futurum putas, ubi quorundam forsitan, quæ ille scripsit, argumentorum nulla fuerit habita mentio? Sed antequam progrediar, num faciendum id putas, quod in omni sermone faciendum Aristoteles præcepit? **A T H A.** Quid nam hoc? **M A R.** Si unum nomen in multiplici sit significatione, prius inter disputantes conuenire censet oportere: qua in significatione id capiatur, ne diuersitas intelligendi, errorem inducat; animam autem multipliciter capi scire te arbitror. **A T H A.** Scio animæ nuncupatione & aërem significari, & uentum, & flatum, & spiritum. Animam etiam pro aqua posuit Plautus paulò inusitatus.

Ni ego illi puteo, si ocepso, animam omnem intertraxero. At non de hac agitur, sed de ea, quæ uitam tribuit corporibus. **M A R.** Sed ne de plantarum quidem, aut beluarum anima, sed de humana est sermo, ac ne de humana quidem, unde cum plantis & beluis communem

nem

De Immort. animi

nem habemus; hac enim parte extincto corpore interit, ut quæ corpora sit, sed unde rationis est compos, quærimus num intereat, uel perpetuò uiuat. A T H A. Sic habet. M A R. Græcia unum tantum nacta est nomen, quo anima rationis compos uocatur: etenim pſichen illi uocant. Nos duo habemus uocabula, animam scilicet & animum: quæro quid inter ista interesse censeas, quæ tam exiguo distant literarum sono?

A T H A. Si Grammaticis credimus, anima est, qua uiuimus, animus quo sapimus: uel anima est uitæ, animus consilij. hinc dicunt posse uitam sine animo existere, ut in furiosis uidemus, sed non sine anima.

Hæc illi ponunt in suis thesauris, & censent eos, qui castigatius loquuntur, id sequi oportere. Veruntamen ubi ad magnos uenio scriptores, inuenio eos his uocabulis promiscuè uti: nam id etiam, quod rationis est compos, animam uocant. Augustinus in libro de Spiritu & anima, seu quisquis fuit, qui librum illum condidit, censet pro uarietate uirium & actionum diuersa nactam esse uocabula. Dum ergo tribuit uitam corpori, anima est: dum uult, animus: dum scit, mens: dum recolit, memoria: dum iudicat, ratio: dum spirat uel contemplatur, spiritus: dum sentit, sensus: nam inde sensus anima dicitur pro ijs, quæ sentit, unde & sententia nomen accepit. M A R. Quid ergo nunc faciendum censes?

A T H A. Potes uti promiscuè his uocabulis: nihil intererit hoc in sermone animum ne, an animam dicas: re enim intellecta in uerborum usu faciles esse debemus. M A R. Sed num intelligis, quæ animi uires? quanta potentia? nisi fortasse parua hæc existimas, intelligere, meminisse, uelle: quæ tria animo tributa sunt, & eius tam propria munera, ut quum aliquid illorum trium significare uolumus, animi nomine utamur. Et ut ad primum ueniamur, quod intelligentiam animus uocabulo suo comprehendat, hinc disci potest, quod quum auditores rogamus, ut dicendis intelligentiam accommodent, petimus, ut animaduertant, uel animum adhibeant. Accipi etiam animum pro memoria, quæ custos & thesaurus rerum perceptarum esse, dicitur, uel illud Virgilianum indicat.

Omnia fert ætas, animum quoque,
id est memoriam Seruio interprete. Nam postmodum sequitur.

Nunc oblita mihi tot carmina,
& meritò id quidem. Nam primum uulnus memoriæ senectus infligit. Sed animi quoque nomine memoriam significari uulgaris quoque sermo ostendit. Nam, quum petimus ab amico, ut cuiuspiam rei sit memor, dicimus, fac, ut hoc in animo habeas. Restat uoluntas, quam etiam animum uocari dubitat nemo. Vnde illud,

Sin alios fines, aliamque capescere gentem

Est animus, possuntque solo decedere nostro.

Nonne Poëta hic animum pro uoluntate posuit? Sic comœdiæ loquuntur. Nosti Terentiana illa. Mala mens, malus animus. Item. Animus ergo te idem, ac fuit, Et alibi. Timet omnia, patris iram, ac animum amicæ,

amica, ut sit sua. De hoc igitur animo incumbit disputatio, utrum corrupto corpore ipse quoque corrumpatur, uel num abeat incolumis, cum suis tantis diuitijs & facultatibus. Nam haecenus nemo dixit euadere nudum tanquam naufragum, sed aut penitus interire putant, aut incolumen his suis retentis manere. **A T H A.** Vera loqueris. **M A R.** De immortalitate igitur animi loquendum est nobis, unde proprie est animus, id est, unde uult, intelligit, reminiscitur, non unde uitam tribuit corpori: nam haec eius uis & potestas interit ex corporis defectu. **A T H A.** Haec in confesso nobis sunt. **M A R.** At hanc animi immortalitatem à multis agitam olim fuisse perspicuum, alijs eam astruentibus: alijs negantibus. Nec mirum uideri debet rem summis contentionibus inter eruditos fuisse tractatam. Cognitio nanque finis unumquemque maximè sollicitat, nam propter eum cetera mouentur. Quid hac in re putas, quæ proprie ad nos pertinet? Etenim si cum extinctione sensuum corporaliū animus unā extinguitur, finis apparet naturæ nostræ. Sin autem superest, finis huius tantum uitæ ostenditur. Ego uerò quum existimem, postquam homini mors aduenerit, superesse aliquid, idque, quod in illo fuit maximum, quæso, ut patiaris me paulò fufius & uberius de hoc ipso disputantem, aut ne petisses, ut id explicarem: Ego enim me tibi non offerebam. Agitur enim (nimirum) res maxima, spes scilicet immortalitatis nostræ, quam tenentes iucundius uiuimus; cogitatio nanque ea incumbet, nusquam occidere, quod in nobis est optimum, sed meliorem in statum reponi, nos nunc corporibus immistos famulari non morti, sed perpetuæ uitæ, quæ post uarios casus, laboresque plurimos superatos læta aderit alio in sæculo, & beatos reddet. Accedat, quod, ut nuperrimè dictum est, nihil æquè ad mœrorem, quem ex propinquorum & amicorum morte suscepimus, propulsandum pertinet, quàm si intellexerimus illos uiuere, quos ueluti mortuos deploramus. Sed & dolorum præterea mortisque contemptus paratur, quod fortitudinis maxime est proprium, dum hac amissa meliorem subsequi uitam creditur. hinc itur audacius in prælia, & nullum discrimen pro patria, pro ciuibus, pro legibus, pro fide Christi metuitur, imò nec supplicium ullum recusatur. Quòd (ut ceteros omittam) Martyres nostri locupletissimè ostenderunt. Nunquam enim illi eculeos, uncos, sartagines, ardentes laminas, ferreos ungues, bestias, cruces, & alios durissimos cruciatus subire uoluissent, si præsentī uitæ extincta, nullam aliam superesse credidissent. Rectissimè dictum est, principium esse ad iustè rectèque uiuendum animi immortalitatem: contrà uerò occasionem suggerere prauitatis quicumque humanos animos unā cum corporibus ruere, prædicarent. Hoc uidentes Sapientes uiri, qui Respub. legibus instruxerunt, hanc animi immortalitatem ciuibus suis proposuerunt, ad quam natura omnes ferè rapimur: non enim ueram solūmodo, sed utilem etiam ciuitatibus hanc opinionem arbitrabantur. Aggrediar ergo id quærere. Ego

C nanque

De Immort. animi

namque ualde approbo, quòd retento semper religionis nostræ decreto anima uelit noscere (quantum fieri potest) se ipsam, quia id postulat ratio & utilitatis & ordinis. Ordinis quidem, quia, quod nos sumus, primum est nobis. Turpiter quærentur aliena, ubi propria ignorantur. Utilitatis uerò, quia intelligentes immortalitatem nostram, eamque penè oculis captantes, rectè uiuere studebimus. Huc autem respicere debet scientia nostra: multæ sciendi causæ (inquit diuus Bernardus) sunt enim qui scire uolunt eo fine tantum, ut sciant, & turpis curiositas est. Alij scire uolunt ut sciatur ipsi, & turpis uanitas est. Alij, ut scientiam suam habeant uenalem ad pecuniam, uel honores respicientes: & turpis quæstus est. Sed & sunt quidam ab his diuersi, qui scire expetunt, ut alios doceant, & charitas est, uel, ut habeant, quo dirigere uitam suam habeant: & prudentia est. Hanc ultimam causam teneamus, fixamque cordi habeamus. Quicumque enim immortalem se intelligit, & potest illud Poëticum effari.

Non omnis moriar, multa que pars mei Effugiet Libitinam,
Nonne mouebitur, ut magis futura curet, quam præsentia? rationem potius ducat eorum, quæ nunquam, quam quæ aliquando intereunt? Proponere tibi nunc alia ex parte eos, quos spes destituit futurorum: an non illud dicunt? Breuis hæc uita, puncti instar, uel si aliquid puncto potest esse breuius, umbræ est transitus, & ueluti flos hesternus marcescit. Rapiamus ergo, dum licet, indulgeamus nobis, expleamus cupiditates nostras quacunque possumus, donec hac luce fruimur: nam postea non aliud nec maius nec deterius sequetur, nec præsentia manebunt. Hæc incredulorum est oratio, qua impellunt se ipsos ad omnia, etiam cum iniuria sociorum: non enim tantum uerbis, sed (quod est grauius) factis etiam ipsis loquuntur. Et hæc quidem habeo de immortalitate dicere, quantum hæc boni afferet credita & humanis indita mentibus: rursus quantum afferre ualeat mali, si non asseueratur. Veruntamen an id uerè ita se habeat inuestigandum est diligenter: nam ueritas homini sanæ mentis charissima est omnium, & aduersus inimicos eius omni studio, conatuque defendenda: amicitia etiam omni proponenda: præsertim, quum de ea re agitur, quæ uitam totam humanam dirigit. Sciri autem id posse, quod quæritur rationibus inductis, uel tu ipse existimas, qui hanc disputationem efflagitasti: non enim hoc est ex illo rerum genere, quorum impossibilis sit cognitio, & quæ penitus humanæ mentis aciem effugiant: nam si id ita se se haberet, frustra esset omnis inquisitio, & stultè in eo operaretur: fatendum est tamen, quòd rationes, quibus animi immortalitas demonstratur, sapientum magis uirorum, quam rudium, & indoctorum pectoribus elucent. Hi autem nihil altius speculariter, & ob assuetudinem corporum uix quicquam corpore uacans queunt cogitare: illi autem longè acie mentis prouecti res à materia facillè diuellunt, & intelligentes aliquid esse incorporeum, haud difficulter qualis animus positus cor-

to corpore esse possit, meditando consequi ualent: hortandi autem es-
sent hi, qui minus ingenio ualent, & non satis magnarum artium insti-
tuti sunt disciplinis, ut fidem adhiberent illis, qui & inuestigando & ex-
periendo multum in talibus pollent, & oculo acutiore (ut sic loquar) ui-
dent. Nolo hac in re multus uideri. Etenim immortalitatem cognosci pos-
se, uel illud aperte indicat, quod cognoscitur, sicut posterius ostende-
tur. quod autem omnes non æquè demonstrationum sunt capaces, hoc
facit differentia, quæ intercedit magna inter peritos & imperitos: nam
hi ne excogitant quidem, quæ apud sapientes manifestissima sunt & re-
ceptissima. multum potest in cognoscendis rebus exercitatio, multum
uehemens, assiduaque meditatio, nam ubi intenderis ingenium ualet.
Et de his quidem satis. Sed ne longiori utar sermone, ad rem ipsam
propius accedam. contrarias uideo sententias: etenim cum in homine
plus aliquid inesse crederetur, quàm quod oculis capiatur, animus scili-
cet motus habens quosdam, qui ad inueniendum celeres sint, ad exco-
gitandum acuti, ad explicandum uberes, ad memoriâ firmi, ad uolun-
tatem liberi, quæsitum fuit ab antiquis sæpius, num is tali præditus fa-
cultate, unâ cum corporibus occideret, an uerò immortalium conditio-
ne in æternum uigeret. hi quidem aiunt, moritur, illi, non moritur.
hinc acris insurgit pugna & contentio. Et plurimi quidem ingeniorum
uela, ut æternitatem probarent, tenderunt, rationibusque inductis, &
sibi & cæteris illud suadere nitebantur. Nostri uerò, qui diuinis magis
nituntur oraculis, quàm rationibus, tam firmiter credunt durare in æter-
num animas, quàm corpora quotidie uident interire. Quamobrem ita
parati ad istam disputationem accedere debemus, non ut ullæ rationes
fidem nobis procreent, sed ut fides nostra rationes ipsas adiuuet atque
confirmet. Tu uerò asseris, quod nuper quidam magnus Philosophus li-
bello edito multa contrariam in partem satagit astruere, uni præcipuè
innixus Aristoteli, quem sententiæ suæ auctorem facit ac magistrum. Fa-
cilè patior delirare aliquos, tergiuersari, & tanquam de tranuerso incur-
rere, quo plus cæteri, qui contradicunt egregiæ probatæque scientiæ &
uitæ uiri auctoritatis nanciscantur. Aristoteles existimatus est hac de re
suam occultasse sententiam, quod ex eo facilè deprehenditur, quod alij
affirmant, eum tenuisse immortalitatem animarum, alij negant. Hæc au-
tem contentio satis indicat rem esse in ambiguo, quum utraque pars uer-
bis Aristotelis innitatur. Sed quicquid ille senserit, nempe illud liqui-
do constat nobilissimas Philosophorum disciplinas, quæ maxima in glo-
ria uiguerunt, pro immortalitate stetisse. Intelligis iam (ut opinor) me
de Pythagoricis & Platonice dicere, sed ante hos omnes antiquissimus
Mercurius Aegyptius, qui ob admirabilem sapientiæ magnitudinem ter-
maximi cognomen accepit, eiusdem fuit sententiæ. Deus (inquit) ex dua-
bus naturis immortalis scilicet & mortali unam compegerat, atque ita ho-
minem in aliquo quidem immortalem, in aliquo mortalem fabricabat.

De Immort. animi

ut utriusque particeps omnia uidens, omnium fieret indagator, ut utriusque satisfaciens origini, posset mirari atque adorare cœlestia, & incolere atque gubernare terrena. His uerbis uetustissimus ille sapiens damnaſſe illos uidetur, qui hominem totum morte ipsa deleri crediderunt. Thales quoque Mileſius, ut Laërtius refert, idem ſenſit. Adde eodem præter Pythagoram, & Platonem è ueteribus Zoroaſtrem, Orpheum, Socratem, Xenocratem, Xenophanem, Crantorem, Chryſippum. Homerum quoque uetustissimum poëtam, qui non hoc carminibus ſuis tam continenter incluſiſſet, niſi id uulgo creditum, & receptum fuiſſet. Non prætere Phocylidem uetustum & ipſum ſcriptorem, qui mortalium uitam inſtituit præceptis, idque poëticè ſingulis ferè uerſibus, quod temporibus illis ſummæ ſapientię exiſtimabatur. Ille hanc ipſam animorum immortalitatem aſtruxit, dum inquit ad hanc ſententiam.

Corpora morte iacent, animos ſed uiuere credas. Non biſpila uulgo. E Platonis, quanquam id eſſet totius ſectæ decretum, tamen nominatim appellare poſſumus hos, quorum maxima ingenia extiterunt, multaſque ſcriptis tradiſerunt, Iamblichum, Plotinum, Porphyrium, Proclum, Ammonium, Alcinoũ, Plutarchum, ſed ex his etiam, qui Ariſtotelem ſequuntur, præſtò eſt Theophraſtus, Themiſtius, Philopponus, Simplicius (hi Græci omnes) & ex Arabum gente prodiit Auicenna, Algazel, & ſuperans ferè cunctos ingenio & diligentia Auerroes. Et ut ad Latinos ueniam. Cicero immortalitatem animorum aſtruxit in Tuſculanis quaſtionibus latiſſimo illo ſuo ore, quo latinæ eloquentiæ fons exundantiſſimus habetur. Macrobius quoque non ſpernendus auctor, & Seneca pollens acumine ingenij in conſolatione ad Martiam, & in opusculo, quod de diuina prouidentia fecit, nec non Lactantius Firmianus, Conſtantij Cæſaris præceptor, qui riuulus Ciceronianæ eloquentiæ putatur: eadem cõplexi ſunt, Boëtius quoque in Philoſophica conſolatione, & alibi ſapius eiſdem ſententiæ aſſertor fuit. Reliquam Philoſophorum, & Theologorum multitudinem enumerare quis poſſit? ſatis eſt hanc ſententiam, auctoritatibus ſummorum uiroꝝ eſſe munitam. Iſi etiam, qui humaniores ſequuti ſunt literas, nonne idem tenuerunt? quos equidem prætereone ex omni grege aucupari auxilia uidear. Non poſſum tamen prætere clariffimum hiftoriarum ſcriptorem Crifpum Salluſtium, qui in proœmio belli Iugurthini animum incorruptum, æternum, rectorem humani generis uocat, cuncta habentem, neque à quoquam habitum, quum cætera corporis & fortunæ bona fluxa, & fragilia eſſe dicat: illa etiam prædicat magnificè. A T H A. Quæ? M A R. Quemadmodum (inquit) genus humanum compoſitum ex corpore & anima eſt, ita res cunctæ ſtudiatque omnia, alia corporis, alia animi naturam ſequuntur. Igitur præclara facies, magnæ diuitiæ, ad hæc uis corporis, & alia huiusmodi omnia breui dilabuntur. At ingenij egregia facinora, ſicuti anima, immortalia ſunt. Et quoniam Plato furorem diuinitus immiſſum omni humanæ præfert,

præfert sapientiæ, non omitto Pythiam Delphicam, Sibyllas, & alios in-
 numeros uates Græcos, & Barbaros immortalitatem animæ prædicasse.
 Sibyllæ etiam ultimum Dei iudicium in omne humanum genus exercē-
 dum prædixerunt. **A T H A.** Magnas undique collegisse te uideo co-
 pias pro immortalitate. **M A R.** Facio id equidem studiosè: nam pluri-
 mum ad suadendum pollet illustrium auctorum multitudo, quia uerifi-
 mile sit id esse uerius, in quo plurium oculi conspirant. Itaque quod fre-
 quentiori eruditorum calculo receptum est, id ferè omnes sequimur: hoc
 in iurè ciuili obtinet, hoc in naturalium rerum inquisitione, in re medica,
 astrologica, cæteris denique ingenuis artibus. Quid in doctrina Chri-
 stiana? nonne quod communi patrum decreto statutum fuit, id tenen-
 dum est, priuata autem dogmata, qui sequuntur, hos ut hæreticos horre-
 mus? neque cum his mensam, aut sermonem communem habemus, aut
 alia in re communicamus, quod olim penes gentes aquæ & ignis inter-
 dicto fiebat. Plurimum ergo iudicium firmitus, quanto magis uniuerso-
 rum? nam uniuersos homines exceptis paucis immortalitatem tenuisse
 confirmo. Vnde autem emerferit hic error quorundam putantium hu-
 manam animam in morte corporis non euadere incolumem contra om-
 nium gentium opinionem, contra publicarum legum auctoritatem, con-
 tra maiorum cærimonias, omniumq; religionum iura, dicam breui si po-
 tero. Hoc malum in Græcia ortum est ab his, qui primi philosophari cœ-
 perunt, & singula rationum momentis tentare uoluerunt: hi quum nihil
 altius saperent, prouum iter sensuum sequuti sunt, & nihil in mundo in-
 corporeum esse dixerunt; hinc quum de animæ substantia disputatio in-
 cumberet, corpus esse uel aliquam eius partem esse posuerunt: alii æ-
 rem, alii feruidum spiritum, alij cor, alij cerebrum, alij sanguinem pu-
 tauerunt. Quid dicam de his, qui lucem, qui ignem, qui scintillam stel-
 larum, qui spiritum tenuem per totum corpus diffusum astruxerunt? nec
 defuerunt, qui temperationem esse quandam ex quatuor principiis con-
 statam affirmarent, nimirum deinceps si hanc sententiam sequentes mô-
 ri animam existimauerunt, hac Anaxagoras stetit, hac Democritus, hac
 Leucippus, alij quidam, Anaximenes, Heraclitus, Empedocles, Cri-
 tias, Parmenides, demum Epicurus, Dicaearchus, & qui horum discipli-
 nam sequuti fuerunt. Addi his potest è iunioribus Gregorius Nicenus.
 Arabes quoque (ne id tantummodo Græcorum uitium putes) Alphara-
 bius Auampaces, Alubacher sententia sua perimunt animos, & ueluti
 capite mulcant. Eos etiam, qui dixerunt, optimum esse homini non na-
 sci, proximum quàm citissimè aboleri, mortem animarum credidisse fer-
 mo ipse indicat: nam ita dixerunt, quasi post hanc uitam nihil sit, sed
 cum ea omnia extinguantur, & nihil esse, uel in nihilum redigi, quietem
 arbitrabantur, si tamen ulla potest esse quies nihil sentientis. Demonax
 Cyprius arduus & ipse Philosophus, sed minimè arrogans, cuius uitam
 Lucianus in literas misit, interrogatus, quid de animo sentiret, num ef-
 set

De Immort. animi

set immortalis? Respondit, immortalis, sed ut omnia. Sic iste quoque non abire, sed obire animum sensit, nihil animis plus ausus est tribuere quam ceteris, quorum interitum uidebat. Stoici, quod genus erat Philosophorum acutum & uehemens, & in Dialecticis ualde exercitum, animos post corporis mortem diu durare dicebant, aliquando tamen extinguui, non ostendentes tamen quot durent secula: quod de quibusdam animalibus traditum est, quæ diutissime constat uiuere. Himeritò improbandi uidentur, nam quum suscipiant, quod difficillimum est in præsentia controuersia, animos durare post corpora, illud, quod facilius concedi potuit & debuit, durare eos in æternum, negant, quum tamen extinctionis subitæ nullam afferant causam. At nec sanæ mentis hominibus suaderi unquam potuit, animam, unde rationis est compos, in aliquo esse corporum genere, ut quæ sit omni corpore præstantior. Ipsa præterea quomodo corpus? quum non habeat spatio diffusam molem, quod necessariò reliqua corpora recipiunt; non habeat etiam illas primarias qualitates, quæ cunctis insunt corporibus: non enim, quod in nobis facit & intelligit, longum est aut latum, non calidum aut frigidum, & cætera huiusmodi. Sed & illud ostendit animam non esse corpus, quod pleraque intelligit sine corpore, & quod adueniens corpori ipsum non auget, nec recedens imminuit. **ATHA.** Vellem de Aristotele tibi aliquid liberet dicere, quid scilicet eum de animi immortalitate sensisse ipse credas: hunc enim humanæ sapientiæ regulam, hunc admirabilium rerum singularem inuentorem, hunc Philosophiam ab alijs institutam perfecisse exclamant. Itaque non possumus hunc tam magnum Philosophum præterire, ut eius sententia non exquiratur. **MAR.** Magnus sine controuersia fuit hic Philosophus, sed obscurus sermone, adeo, ut magna opus sit cura, ut intelligatur: hac autem in re ita perplexè loquutus est, ut utraque pars Aristotelem sententiæ suæ patronum faciat. Ego (ut ab initio dixi) ambiguum fuisse, & suam de industria occultasse sententiam arbitror. Nam si apertus esse uoluisset, duobus aut tribus uerbis id facere potuisset: diceret simpliciter humanam animam esse mortalem, si ita uidebatur, uel immortalem, si contra existimabat, nunc suspensio gradu incedit, & quædam uerba reliquit, ut utrumque sensisse uideatur. Faciam autem sic. Nam exponam loca, quibus utraque pars pro sua innititur sententia, deinde liberum tibi relinquam, ut iudices quid ille senserit, & in quam partem declinarit. An si id fecero, tibi satisfaciam? **ATHA.** Nihil te commodius facere posse arbitror, quàm si hoc feceris, & liberum unicuique relinquant, re in medium posita, opinari de Aristotele quid sibi uoluerit. **MAR.** Ergo adducemus loca non tamen omnia, sed quæ magis urgent. In primis, quod putauerit animam non diutius uiuere quàm corpus, illud indicat, quod in ethicis ausus est dicere, ultimum terribilium esse mortem, nec post eam uideri bonum aliquod uel malum superesse mortalibus. hoc ille non posuisset, si immortalita-

tem

tem esse placuisset: mors enim potius esset in uotis, si duraret post eam animus, & hac ianua ad potiore transmitteretur uita, quod Cleombrotus quidam fecisse narratur, quem aiunt lecto de immortalitate Platonis libro se de muro precipitem dedisse. Rursus in eisdem Ethicis ait idem fortem uirum exponentem se morti se ipsum orbare maximis bonis, quibus est dignus. Hic si immortalem animam credidisset, nonne illa potius dixisset, forti uiro maxima proposita esse post mortem præmia, ut qui pro æquitate pugnans occubere uoluisset? hanc enim habent omnes fortitudinis acuendæ causam, quod uir fortis non tam amittere uitam, quam commutare uideatur, deteriore scilicet meliori: nam quam ille proponit gloriam, & ea sperat hominum pectora incendi ad fortitudinem, frigidum est solatium: quid enim pertinet ad quemuis post mortem gloria, quam, si totus moritur, non sentiet? Sed & alij huius Philosophi sermones ostendunt ipsum immortalitatem abiectisse, quale illud est, quod asserit uoluntatem esse impossibilem, & inter exempla immortalitatem recenset. Idem in eisdem libris moralibus autumat mortuum non esse foelicem, quia foelicitas (inquit) penes nos est operatio, qua caret mortuus. Cur præterea, quum de hac ipsa foelicitate uerba facit, quod est ueluti signum ad sagittam, ubi omnes collimant: foelicitatem tantum proponit hominis uiuentis, nullo habito sermone eius, quæ post mortem continget? An oblitum rei tantæ dicemus? uel uerisimilius sit nullam putasse? Sed in Oeconomicis ipse quoque ait, homines sola propugnatione assequi sempiternitatem. Et hic quoque oblitus uidetur (si ita dicendum est) immortalitatis. Et hæc quidem & similia afferunt loca, qui existimant Aristotelem contra immortalitatem stetitisse. E contrario autem Auerroes, Simplicius, Themistius, & bona pars Peripateticorum asserit Aristotelem acceffisse animarum immortalitati. Multiplices afferunt locos, in quibus id uoluisse putatur, quos nos consultò omisimus, ne nimis protrahatur sermo. Sed fortissimè id sentire creditur in secundo de generatione animalium, capite tertio, ubi proposita quæstione, quæ sit forma hominis, quo generante, quo in tempore, quomodo insit homini genito, respondet, intellectum extrinsecus accedere, ut qui per se ipsum subsistat, nec actionem habeat à corpore pendente, dicitque eum nullo corporis instrumento fabricari, remque diuinam uocat. Præterea in libro primo de partibus animalium, capite primo, ait animam rationalem esse abstractam à materia simpliciter, ideo à Phisico non esse considerandam. Amplius tertio de anima de utroque loquens intellectu agente ac possibili, affirmat intellectum uerè esse separatum, à corpore scilicet, eaque de causa esse immortalem. Idem septimo ethicorum, quasi in extremo libri, dum inquit, cur nulla res eadem nos semper delectat, quia (inquit) non est simplex nostra natura, sed inest aliquid aliud, quo corruptibiles sumus. His uerbis ostendere uidetur inesse nobis alterum, quod penitus corruptionis sit expertus. Age, uideamus & illud eiusdem

dem

dem in secundo de anima, ubi asserit intellectum, qui in contemplatione uersatur separari à sensu, sicut perpetuum à corruptibili. Adde etiam, quòd in primo ethicorum prospera & aduersa posterorum & amicorum censet ad defunctos quadam ex parte pertinere, ut ex eis uel foelices sint uel infœlices. Sed in policitis Heroibus assignat post mortem insulas fortunatas, ubi Beati exigunt æuum, quin etiam censet eis sacrificandum: Heroes autem uocari animas uiro- rum fortiū nemo negat. Aristotelē etiam composuisse librum quendam, cui titulus est Eudemus, & Laërtius testatur in Aristotelis uita, & Themistius in libris de anima, & Plutarchus in consolatione ad Apollonium: illo in opere apertissimè astruit animarum immortalitatem, ut tergiuersationi non sit locus. Expositis iam, quæ utrinque de Aristotele dicuntur, & perspectis eius sententijs, potes ne mihi dicere, cuius fuerit partis? quo se inclinari? **A T H A.** Difficulter id quidem possem: magnoque opus foret ad cogitandum spacio. **M A R.** Ego quid mihi semper uisum fuerit exposui, cuius quidem sententiæ habeo socios. Sunt enim & alij non ineruditi ui- ri, inter quos Ioan- nem Scotum Theologum primarium numero, qui prospicientes Aristotelem hac in quæstione uariè scripsisse, & modo huc, modo illuc accessisse, ambiguum fuisse existiment, & leuiter utranque opinionem attigisse, nec in earum altera immoratum, ut solet, quum assertionem suam probare, & aliorum improbare conatur, cuius etiam rei suspicionem commouet Plutarchus, qui in libro, in quo colligit Philosophorum placita, dum sententias ponit eorum, qui tenuerunt animæ mortem, & aliorum, qui tenuerunt perpetuam uitam, Aristotelem prætermittit, quum tamen multis alijs in rebus, quid de anima Aristoteles senserit exposuisset. Dubius igitur (ut mihi uidetur) hac in re fuit, nec dici potest, quòd dubitans rei scientiam haberet, illud tantum sciebat se dubitare, & unde ad dubitandum impelleretur. Dubium autem Aristotelem fuisse non tantum ex uarietate scriptorum colligere licet, sed ex eo quoque, quòd libro primo de anima intellectum asserit, nihil forsan perpeti posse: illud forsan non est fidentis hominis uerbum, sed titubantis. Rursus duodecimo methaphisices quæstionem mouet, nec dissoluit, sed posterius dicit determinandam, quasi antea in physicis non determinari. Hæc faciunt, ut unà cum quibusdam alijs Aristotelem ambiguum fuisse opiner. **A T H A.** Quid si tibi uim adhibere possim, & cogam, ut alterutrum pronunties, quid dices? **M A R.** Dicam te Tyrannum esse, si id feceris. **A T H A.** Non id te rogo, sed ut dicas de Aristotele, in quam magis partem inclinari: potes enim id dicere utrisque locis perspectis. **M A R.** Non times Athanasi. **A T H A.** Quid. **M A R.** Ne te parum æquum existimem, quòd mutes multum de conditionibus. Nam ea lege dicere coeperam de Aristotele, ut utrisque locis propositis liberum auditori iudicium relinquerem, quid sibi uir ille uoluerit. **A T H A.** Sic est. Nihilominus potes dicere, quod te flagito. **M A R.** Ego (si dicendum est) Aristotelem magis

gis ad immortalitatem flexisse existimo. Nam loci, qui pro immortalitate faciunt, mihi ualidiores & firmiores uidentur: pluribus autem contrarijs locis hominis compositi statum non simplicis, seu disuncti, qui in intellectu solo consistit Aristoteles spectasse uidetur. Existimant quidam Aristotelem animarum mortem apertè non posuisse, ueritum ne accedente accusatore Iudicum sententijs subijceretur, & poenas daret, quod mihi tamen uerisimile non uidetur. Nam qui illum antecesserant Democritici, & qui postea sequuti sunt Epicurei, idem sentientes, nihil unquam eo nomine à Iudicibus passi sunt. Accusatus postmodum impietatis fuit ab Eurymedonte Hierophanta communi illa Philosophorum inuidia, quòd de Dijs non rectè sentiret; quod sanè iudicium, cogitans, quid simili de causa Socrati contigisset, subterfugit, & in finitimam Chalcidem clam euasit, ubi post triennio extinctus est. Editos libros suos & non editos dicebat, ita, ut ne ipsi quidem sua obscuritas ignota esset, sed eam potius de industria affectasse uidetur. **A T H A.** Omittamus iam quæso hunc Philosophum, de quo multa dicta sunt, uoluit ille non apertus esse hac in controuersia, sed latère, ideò latebras illi suas relinquamus, & ad reliqua progrediamur. **M A R.** Rectè mones: non enim unius opinioni, quanuis præcellentis tantum deferendum est, ut lex naturæ habeatur, uideamus quo nos ratio ducat, & id, quod ipsa suaserit, quandoquidem philosophari cœpimus, putetur esse firmissimum. **A T H A.** Sic agendo censeo.

D. MARCI



MARCI ANTONII
NATTAE ASTENSIS,
DE IMMORTALITATE ANIMI.
LIBER SECVNDVS.

MARCVS.



IRINCIPIO illud officere puto, ne credatur immortalitas animi, quia difficile est admodum homini sensibus prædito, qui ipsis sensibus ducibus assuevit rerum notitiam capere, & corpore assidue corpora noscere, & intra corpora quotidiana consuetudine uersari, cogitare deinceps & meditari qualis sit animus, ubi de corpore exierit: quomodo (inquiunt) sine his corporis partibus, quas semel infedimus, explere poterimus officium intelligendi? hoc, (dicit aliquis) nequeo subijcere cogitationi, hoc explicare mihi durum. Quid de Angelis ipsis, qui nunquam corporibus sociati, num molle dictu, quomodo existant, quo munere fungantur? Ego uero animos ipsos trucidato ac debilitato corpore uigere uideo, quin instrumenta corporis distringere mentium potius aciem, quam acuere dicuntur. Itaque & Democritus & plerique alij oculorum se se orbarunt aspectu, quo plus animo cernerent, & Appius in cæcitæ corpore lumine utens, rationis Senatui Romanum ad accipiendas fœderis condiciones incitatum flexit, fœdamque Pyrrhi pacem & inutilem eximia orationis suæ grauitate diffudit. Ostendunt hæc animum ipsum, unde intelligimus, nihil accipere à corpore, nec ab ullo eius instrumento, si quidem remotis corporis sensibus longè melius speculatur. Quin multa uera astruit cōtra sensuum opinionem, plura etiam percepit, ad quæ sensus non accedunt, ueluti res corpore uacantes. Item & generatim res intelligit ab omni personarum, temporum, locorum conditione auulsas: hæc omnia percepit, quæ ne uana quidem imagine sibi posset effingere. Ego uero etiam hæc, quæ leuiora possunt uideri, arbitror rectius peragi, si corporis sensus uel omnino absint, uel quàm minimum adhibeantur. Nam nec Poëtam puto posse graues sonantesque uersus uoluere: nec Oratorem uberem grandiloquamque eloquutionem fundere, nisi ei rei toto animo seruiat, ablegatis

gatis quodammodo corporis sensibus: licet in Homero id cernere. Nemo hoc Poëta fuit eloquentior, nemo in pangendo carmine foelicior, quia, ut opinor, clausis oculorum fenestris totus intus habitabat, nec externarum rerum uisus illum à carminis intentione poterat auocare. Quum igitur mens, ratio, ingenium, intelligentia, cognitio, & ut uno uerbo amplectar, humanus animus, non sit ulli alligatus corporeo instrumento, sed à se ipso subsistat, & per se opus suum moliatur, quid ad eum pertinet extinctio sensuum? Videmus quòd quanto animus abstrahit se magis à corpore, & ad corpore uacantia attollitur, tanto amplius perficitur, & dicemus eum corrumpi, quum à corpore penitus separatur: & non hoc mouebit, quod nihil ex eo corrumpatur, in quo magis perficitur, non posse eandem rem ad perfectionem simul corruptioneq; tendere? Fatendum est autem, quòd corrupto corpore, corrumpetur quoque is intelligendi modus, quo nunc utimur, sed succedet alius melior & nobilior, quo directo & absque ullo circuitu naturam rerum omnium attinget, nihil differens ab Angelis in hoc intelligendi munere. Similiter animus seclusus à corpore gaudebit, & amabit sicuti corpore inclusus, hoc tamen interest, quòd nunc cum perturbatione, tunc imperturbatus mouebitur. Vnde enim perturbationes animorum, quos nunc in corde patiuntur? nempe ex humorum accessione, uel decessione, quæ tunc nulla erunt, erunt autem tantum affectus in huda uoluntate, nam uoluntatem quoque suam hinc auferet animus tanquam corpori non coherentem ullo uinculo, sed liberam & solutam. Vide autem quàm nihil à prospectu corporum animus patiatur, nam non recipit in se, ut contraria, quæ in rebus ipsis sibi inuicem aduersantur. Contraria sunt frigus & calor, humor & siccitas: nam mutuò se expellunt, sed in intelligentis recepta animo non sunt contraria: nam non se illuc expellunt, imò subsequuntur, quia altero cognito, alterius elucet cognitio. Ergo quum purus sit animus ab omni corporis contagione, nihilq; corporeum secum ferat, cur nò manebit, & proprio fungetur munere, ubi à corpore fuerit dissociatus? Non enim ut destructo oculo amittitur uis uidendi, quia destructum est id unde illa subsistebat, sic uis intelligendi perijt destructo corpore: quoniam hæc de eo non pendeat, definit quidem animus destructo corpore esse illius forma, non tamen definit esse ipse, quod per se prius erat. Et hoc est argumentum, quo potissimum Augustinus innititur in libro, quem de hac re scripsit, nam quum animus (inquit) sit per se ipsum uita, non capit uitam interitum, sicut nec lux obscuritatem, fortitudo imbecillitatem, ueritas falsitatem: corpus autem in eo differt, quòd non à se ipso, sed ab alio sumit uitam, idest ab animo: nimirum igitur si illo recedente extinguitur tanquam à uita deseratur, animus autem, qui uitam per se habet non potest extinguui, quandoquidem nemo se ipsum deserat. Hæc ab Augustino. Cogita quæso Athanasi, tecum sapius reuolue (nihil enim est, quod efficacius dici queat) nam si animus

D 2 in

De Immort. animi

in corpore manens ipsum conseruat & continet ne effluat, ne tabescat, quanto magis se ipsum conseruabit, quum uitam non à corpore pendentem consequutus sit. hoc idem uidit D. Bernardus scribens in cantica canticorum (quid enim illa altitudo ingenij non uideret?) Vita (inquit) anima est, uiuens quidem, sed se ipsa, & per hoc non tam uiuens, quam uita, ut propriè de ea loquàmur. Inde est, quòd infusa corpori uiuificat illud, ut sit corpus de uitæ præsentia non uita, sed uiuens. In hoc autem gerit anima similitudinem quandam cum Deo, quod non solum est uita, sed etiam uiuificans, sequitur etiam, ut sit immortalis, quoniam, quum sibi ipsa uita sit, sicut non est, quo cadat à se, sic non est quo cadat à uita. Hinc summè etiam cogor Virgilium commendare, non solum ob carminis maiestatem, ut multi, sed etiam ob eximiam scientiam; Nam eadem sentiens uocat animas uitæ nomine, ut illud indicat.

Et ni docta comes tenues sine corpore uitas
Admoneat uolitare caua sub imagine formæ,
Irruat, & frustra ferro diuerberet umbras. Et rursus

Vitaque cum gemitu fugit indignata sub umbras.
An quia ex ea parte, qua uergimus ad beluas, occidimus, iccirco interire credendum est, unde sempiternis spiritalibus formis, communicamus? & putandum, quòd quum hominem plurimis eximijsque muneribus ornarit Deus, patiaturs deinde collabi totum? aut uelit subito fato extingui flagrantes animorum faces, quas imaginis suæ nota insculptas terrenæ molis corporibus suapte manu adegisset? Est nanque humanus animus ab omni materiæ sorde purus, & quicquid tale est, id proximum Deum habet auctorem, nimirum igitur si id opus sit perpetuum, quod quicumque diuinum dixerit, rectè nominauerit: id enim non materia aliubi desumpta formauit, sed Dei spiritus. Videmus corporeas res corrumpi ob hoc ipsum, quod è materia rudi, fragili, & commutabili educatæ fuerunt & constat, & (ut sic dixerim) dolatæ: ergo quum, quod in illis est causa corruptionis, cesset in humana mente, quæ ab omni materiæ contagione abest procul, hanc incorruptam inuiolatamque, & ab omni mortis aculeo liberam manere, dicendum est. Non me latet, quòd unumquodque animal simile sui generat, nam & Leo Leonem, & equus equum, & canis canem procreat, non autem aliud diuersi generis alteriusque formæ animal: sic dicerem, quod homo, qui sapiens est animal, generaret alium hominem sapientem, si tanta uis intelligendi, cognoscendi, inueniendi, reminiscendi de seminis potentia gigni confingique possit, nam cor, cerebrum, iecur, sanguinem, bilem, pituitam, ossa, neruos, uenas, & reliquam membrorum formam atque texturam, unde habeamus, & quemadmodum fabricata sint, uideor posse exponere. Illud nanque constat, ui seminis deducta & efficta esse ex his quatuor naturis, quæ principia sunt subcœlestium omnium, sed non pari ratione possum dicere id, quod in homine sapit, intelligit, meminit, uult, esse con-

concretum & confectum. Quomodo autem ualet id, quod est corpus & turgida cōstans mole, efficere illud, quod superius est multo & nobilius, omniūque uacat corpore? Fuit aliquis, qui humanā uocis sonos, qui infiniti uidebantur, paucis literarum notis terminauit. Magnum negocium, foelix inuentum, nam de hoc inuento scribimus, & absentes compellamus, & cuiuscunque rei certiores facimus. sed num id quāso inuenisse illum arbitraris ex eo, quod aliquod in se ipso igneum, uel aqueum, uel stabile, uel terrenum possideret, at horum proprietates nihil tale effecerunt? nam quod igneum est, calorem: quod aqueum, humorem: quod stabile, spiritum: quod terrenum, soliditatem suppeditare potest, non etiam occultæ rei inuestigationem. Aduenit igitur extrinsecus foetu iam in utero matris formato id, quod rationis est compos, & res est diuina, ut Aristoteles dicebat, generans autem tantum disponit materiam, in qua id fieri solet. Maiores nostri multa uitæ adiumenta, ornamentaque inuenerunt: negare non possumus eorum inuentis uitam tutiorem cultioremque non fuisse redditam: nam & fruges, & uestitum, & tecta, & multa contra feras præsidia ostenderunt: uaria præterea artificia, uarias disciplinas attulerunt: quomodo hæc ab illis inuestigata, patefactaque dicemus? Mentis (inquires) agitatione, bene est, sed mens à quo id sumpsit? credo equidem à se ipsa, nam si dicis à corpore: quomodo potuit corporeum aliquod, quod intellectu caret, tantum uim intelligendi cognoscendique creare? si à se ipsa igitur hoc sola potest, neque hanc cum corpore communem habet actionem: quid prohibet igitur igne corporis extincto discedere, discedentemque manere? nam dum etiam in corpore astaret, pensum suum sine ullo corporis instrumento egregie euoluebat. Licet autem scientiam anima in multis imperfectam habeat, & in quibusdam hæsitet, nonnulla penitus ignoret, est tamen tantæ capacitatis, ut etiam infinita intelligere queat. nam uniuerso genere cognito, omnes eius partes, omnia singulæ sub eo contenta intelligentiæ ipsius subiiciuntur, etiam si innumerabilia sint, ueluti quicunque intelligit omne corpus naturale esse mobile, intelligere potest hoc idem in infinitis ualere corporibus: & qui nouerit lineam ex punctis constare, omnes lineas etiam numero infinitas intelliget, cunctas noscens eiusdem esse rationis. Ipsum etiam infinitum, quod sit, intelligit, distinguens ipsum à finito. Animam igitur, quæ quorundam infinitam recipit cognitionem, non maximæ esse uirtutis, & finiri ipsam tempore putabimus? Dixi de scientia, & inueniendi facultate. At memoriæ uis, nonne pariter miranda uidetur? Respice Poëtas, Oratores, Iurisperitos, Philosophos, Theologos, Medicos, & non hos solum, sed leuiorum etiam artium opifices contemplare: quanta hi in suo quisque artificio meminerunt? quàm parata habent pleraque? quàm in promptu? singulari etiam quidam memoria extiterunt, Mithridates, Themistocles. L. Scipio Asiaticus, & qui à Pyrrho missus Romam legatus est Cyneas,

Sce-

De Immort. animi

Sceptius, Metrodorus Philosophus, qui artem etiam memoriae inuentam iam diu à Simonide Lyrico consummauit, & semel audita iisdem uerbis reddebat. Num satam aut concretam ex aliquibus credimus elementis tantam memoriam insitam humanæ menti? uel num fundum aliquem putamus residere in animo capacissimum, ubi, quæ memoria digna esse ducimus, reponantur, & quum opus fuerit depromantur? uel num animum tanquam ceram imprimi credimus rebus his, quas recordari operæpretium est, & deinceps ad recordationem signatarum illarum rerum uestigia inspicimus? Stulta hæc & absurda esse quis non uidet? Vnde igitur ea uis? apparet, si corporale tale aliquid esse non potest, esse incorpoream: quod si abstracta est à corpore, nihil officit ipsi corporis mors, imò proficit, quod soluta corporis uinculis magis perficitur. Illud quoque occurrit mortem nihil aliud esse, quàm compositorum dissolutionem: ubi enim natura opus suum, quod coagmentauit, dissoluit, & partium alia aliud recedit, consequitur rerum interitus, nec aliud accedit, quam in syllaba, quæ dissectis huc illuc & dissipatis literis, ex quibus conficiebatur, interit: sed non ita in animo rationis compote, nam nemo possit dicere, unde & quibus ex partibus separabilibus compositus sit hominis animus: non enim habet figuram, non colorem, non spatiosam magnitudinem, non denique aliquid, quod tractari & diuidi ualeat: simplicissimus est igitur, ex quo conficitur morti non esse obnoxium. Videmus quicquid est in corpore, quomodo unumquodque eorum desinat, quo recedat, nihil manet in suo statu, sed abeunt, retroque cedunt singula: siue terrenum sit illud, siue humidum, siue æreum, siue igneum. Itaque quum quodlibet eorum, quæ in corpore sunt, reuertatur ad suum & aliud interimat aliud, commuteturque in aliud atque disperdat: nihil mirum est, si corporis sensus illis discedentibus, è quorum coniunctione oriebantur, ad interitum deducantur. Animam uerò rationalem, quam nullæ efficiunt compositæ partes, si quis dixerit dissolui, is non satis attentus uidetur. Nam quum contrariorum contrariam oporteat esse rationem, si quod compositum est, dissoluitur, sequitur, ut quod simplex est, non dissoluatur. Non enim quod simplex est, aliorum conuentu formatur, sed per propriam agit formam, & ui sua uiget, idè non dissoluitur, quia nihil se ipsum dissoluit. Ex his sequitur, quod neque commutari, neque (ut dici soles) alterari potest: nam alteratio quum interimit, nihil plus agit, quàm quod formam aufert relicta materia: hoc autem compositæ tantum res patiuntur. Vides Athanasi quot & quales asfero rationes, ut tibi immortalitatem demonstrem. An habes aliquid quod refellas? A T H A. Non habeo. M A R. Vrgent ergo. A T H A. Et ualde quidem, sed hoc præcipuè, quod quum humana anima sit forma simplex, indiuidua, non alligata materiae, habet hoc, ut neque dissolui possit, neque diuidi, neque disperdi. De his dubitauerit nemo, qui rerum naturam perspicere, & rationum consequentiam norit contexere.

M A R.

Liber Secundus.

12

MAR. At nunc adducam aliud, quod non modò tibi, qui uarijs instru-
ctus es disciplinis, sed rudis etià & imperitus quilibet intelligere queat,
ita se rem habere, ut dicimus. Itaque permitte quæso Athanasi, ut fin-
gam me tecum habere sermonem, ut cum rudi quodam & illiterato ho-
mine, qui de hac re doceri uelit. ATHA. Finge, ut libet, nam facilius
id fingere potes, quòd non longè absũ ab homine illo rudi, quem in-
struendum suscipis. MAR. Imò uolo, ut semoueas doctrinam om-
nem reconditam, & ita respondeas interrogationibus meis, sicut quili-
bet plebeius è medio foro arreptus, modò idem sanæ sit mentis & so-
brius. ATHA. Ita ero, ut esse me uis. Sed quid affers? MAR. Dic
mihi. ATHA. Quid? MAR. Agitur de animo seu mauis de anima
rationali, utrum morti succumbat, uel mori nesciat. ATHA. Ita est.
MAR. Vide si de hac re mecum consentis, quòd nihil corrumpitur, ni-
si habeat infestum, & inimicum aduersarium, denique aliquod, quod eo
potentius sit, & potentioris illius uim patiatur. ATHA. Manifestum id
quidem. MAR. Sin autem aduersarium nihil patiatur, incorruptum
manebit. ATHA. Consentaneum id quidem. Sed quid est, quod
aduersarium non patiatur. MAR. Cælum & sidera (ut exempli causa
aliquid dem) non enim inueniuntur contraria quædam, unde illis corpo-
ribus noceri possit, propterea incorrupta sunt. ATHA. Sic est. MAR.
Quid de hominis animo existimas? aduersarium num habet aliquando
uel non habet? Neceffe est alterutrum: nihil potest esse tertium. ATHA.
Quis aliter dicere potest? MAR. Si dicis aduersarium non habere, con-
fecta res est: animus est immortalis: nihil enim se ipsum deserit, nec de-
ferere potest: non reperiatur aliquid, quod se ipsum destruat, nisi in-
tus uel extra immineat contrarium quoddam, à quo hostilia patiatur.
ATHA. Accedo. MAR. Videndum est tamen Athanasi ne aliquo im-
prouidè feramur. Nam forsitan habet humanus animus aduersarium ali-
quem, qui eum morti tradat, & nos id ignoremus. Scrutemur igitur di-
ligenter, si aliquod huiusmodi sit, quod nos turpiter lateat. ATHA.
Scrutemur. MAR. Quis igitur is erit aduersarius? quo nomine? qua
ui? qua figura? Num erit calor, aut frigus, humor, aut siccitas? ATHA.
Minimè: hæc enim uentri, non etiam menti nocere solent. MAR. At for-
sitan animus ferro, ligno, lapide, aut qualibet alia durissima materia per-
cuti ualet, & percussus interit. ATHA. Ridicula narras. Quis enim
unquam frangi, findi, collidi, forari humanam intelligentiam uidit? quid
tu huc corpora affers? certè nullius corporis ictus non pertingit eam na-
turam, quæ nullo corpore se tenet. Quomodo id audiri æquis auribus
ualet exitium & finem animo importare corporeum aliquod, quum cor-
porum potentia sit infirmior, & origo abiectior, & ordo humilior? MAR.
Ergo tenes corpora nullum animo afferre detrimentum? ATHA. Te-
neo firmiter, & utraq; (ut aiunt) manu. MAR. Nec ego dissentio, at-
tamen dictis tuis addendum uidetur. ATHA. Addas licèt. MAR.
Hoc

De Immort. animi

Hoc unum addo, fieri posse, ut corporis aliquod instrumentum, quo peruenimus ad ea, quæ Græci uocant phantasmata (latine uisa Cicero appellat, nos uisitatione uerbo imaginationes possumus nuncupare) sine quibus intelligere non ualemus, uitietur, ac ne tum quidem mens nostra aliquid ipsa patitur, quanuis iter ad intelligentiam ferens intercipiatur. A T H A. Perge porro, nam his assentior. M A R. Si hunc aduersarium non admittimus, quem nam alium habebit animus? Vereor interdum ne rudis ille homo, cuius geris imaginem, inopiam annonæ pertimescat, quæ nunc omnibus impendet populis, & fame tabescere animum arbitretur. A T H A. Quid ais? Ridiculosiora adhuc profers. Nemo est tam rudis, qui non percipiat famem non contingere, nisi animali stomachum & intestina habenti: animal enim tunc interit egestate aridi & humidum, nisi cibo & potu subueniatur. Sed nunc non agitur de animali quopiam, sed de hominis animo, ea in parte, qua intelligit & speculatur. Interroga quemuis etiam indoctissimum uillicum, nusquam dicet, quod intellectus humanus panem comedat uel uinum potet, sed homo ipse unde est animal, hæc sumat, ut inanitatem expleat stomachi & intestinorum, quod nisi faciat, perit. M A R. Ergo fateris animum non posse extinguere fame. A T H A. Quid ni fatear? Quis adeo stultus est, qui contra astruat? Potest fames animal extinguere, sed non lumen ingenij, mentem, consilium, prudentiam, & cætera, quæ nec cibum nec potum requirunt. Posset quidem fames occasionem præbere ad animi interitum, si pariter cum corpore interiret, sed non proxima esse causa. M A R. Vera dicis. Sed quid nunc perspicio? A T H A. Quid est? M A R. Videor nanque perspicere aduersarios quosdam atroces, quos animus quorundam patitur. A T H A. Qui nam hi? M A R. Iniquitates, fraudes, scelera, quæ contrahit animus. An non ea uitia dicimus? A T H A. Quid ni? M A R. Mala sunt ergo, si quidem uitia sunt. A T H A. Sic est. M A R. Num igitur his uitijs animum interire putas? Sic autem cogita, uel potius dic, nū uideas eos, qui adulteria, stupra, sacrilegia, furta, rapinas, peculatus, cædes, proditiones, & alia scelera admiserunt, interire ob hæc animi mala? ac non potius post quædam patrata alijs insistere, & peiora etiam patrare? A T H A. Interire ne putem homines sceleratos post scelus? Non ita est. Nequaquam scelera perimunt, aut latifera sunt. Nam scelerati homines iucundius etiam uiuunt, quàm antea, atque adeo diu post expletam libidinem, præsertim ubi plures aduersarios necauerunt: certè magna undique scelerum redundat copia, quæ coarctaretur, si simulac animus perperam quippiam uel cogitatione uel opere aggrediretur, subito ueluti pestifero iniustitiæ contractu tabesceret: nihil uero minus accidit, quandoquidem plures impios & nocentes floridiorem agere uidemus ætatem. M A R. Quid ergo agunt scelera illa, quibus impletur animus, si interitum non afferunt? A T H A. Id quidem manifestum. Vitiant scelera bonam, (ut sic dixerim) animi habitudinem, ac scelerant pulchritudinem,

dinem, perinde ac si quis in egregiam statuam miro artificio fabricatam ex ebore uel candido marmore deductam, lutum uel sordes iniiciat. Est enim anima imago Dei pulcherrima, quæ sceleribus deprimitur, scædatur, non etiam deletur. **MAR.** Iam ad exitum peruentum huius argumenti, quo rudem etiam quemuis suaderi posse arbitror, nam si propria animi mala animum non dissoluunt, unde porro, quomodo, à quibus dissolutio orietur? num à uirtutibus? si dixerò, absurdiora dicere tibi uidebor, quàm proximè fecerim. Etenim uirtutes, quæ summa sunt in homine bona, & bonum faciunt habentem, nunquam nocerent: necesse est autem malum esse quodcunque rem delet: quo igitur malo animus tolletur, suo ne an alieno? alieno non conuenit, suo non potest, ergo nunquam tolletur. **ATHA.** Inuulnerabilis ergo est animus, ut audio. **MAR.** Inuulnerabilis certè, nam substantiam gerit inuictam, & impenetrabilem & magis inuulnerabilis ille, quàm Achilles, qui aliquo loco uulnerari potuit, magis quàm Cygnus uel Ceneus, qui & si à ferro erant tuti, alijs tamen modis potuerunt extinguì. Omnia, quæ infra lunæ globum refederunt, mortalia sunt, non permanent diu, præter animos summo Dei munere hominum generi datos. Prosequar autem iam sermonem cœptum, te amplius non interrogans, sed perpetua utens oratione. **ATHA.** Gratum id fuerit, nam libentius audio, quàm dico. **MAR.** Si superiora repetere uoluerimus, concludere iam possumus animum esse immortalem. Nam quicquid interit, altero duorum interit, aut ob aduersarij potentiam, aut defectu rei necessariæ. Sed animus aduersarium experitur nullum, à quo soluatur: non etiam interit defectu rei necessariæ, quasi egeat corpore, quum sine eo per se subsistat: facit hoc tamen, dum inest corpori, ut uitam ei præstet, regatque ac moderetur, ueluti mundum Deus, quæ cessant omnia, ubi ab eo separatur. Animaduertere quoque possumus, quòd robur animi immobile manet, & cum tempore semper procedens magis uirescit, contra uerò corpus ægrotat sæpius, & flexu ætatis segnius in dies redditur & uetustate putrescit. Et hoc est, quod Apostolus uoluit, dum inquit. Exterior noster homo quotidie corrumpitur, interior de die in diem renouatur: quem autem interiorem uocet hominem, quem exteriorem perspicuum, nam exterioris hominis nomine corpus significat, interioris animum, & hunc meliorem fieri die, illum deteriore. Argumentum sanè probabile in uno extinctionis, in altero durationis. Nonne perspicis etiam memoriâ rerum gestarum diutissimè manere? id nempe efficitur ingenio humano. Quomodo ergo credibile est, ut decidat illud ipsum, quod alienis rebus lucem memoriæ diuturnam, & uitam sæculorum penè omnium ministrat. Quomodo si gesta animi manent, animus ipse peribit? Incorruptum cœlum, incorrupta putantur esse & sidera, quæ in illo uoluuntur, & nos humanos animos omni cœlo nobiliores corruptioni patere putabimus? Videmus etiam in hac humili angusta que terrarum sede nonnul

E la,

De Immort.

la, quæ in perpetuitatem tendere uideantur. Cogita Riphæos montes, Pyrenæa iuga, Caucasum, Olympum, Apenninum, & de fluminibus proponē tibi Nilum, Istrum, Eufratem, Gangem, Tanaimque niua-lem. Nec præterieris.

Eridanum, quo non alius per pingua culta.

In mare purpureum uiolentior influit amnis.

Hæc ab initio mundi condita cum eodem progrediuntur, nec eorum for- midatur interitus, nisi ubi suprema mundo aduentarit dies, & destruat, qui fabricauit: ergo ita se habent hæc, ut nunquam casura: quod autem in terris maximum est omnium & præstantissimum, & quod unum est no- bis cum alijs immortalibus mentibus cognatum, id breuissimo tempore extinguetur? Et si superior cunctis mundanis rebus est animus, alia ma- nebunt, ipse in nihilum dilabatur, quanto rectius diceretur, quod nullo unquam æuo finietur? Illud etiam quæro, quale aut quantum maneat his locis uirtuti præmium? num in honoribus, opibus, copijs, nomine, glo- ria, uoluptatibus, erit eius præmium? At hæc angusta sunt & caduca sæ- culi bona, quibus contemnendis uim suam uirtus elucere putat, & sæ- pius uideas probos affligi aduerso fortunæ flatu, improbos, attolli secun- do: ergo ubi decumbimus, captumque leto caput ponimus, si tunc ani- mus pariter interiturus, ueluti uapor quidam dissipatur, uirtus inhono- rata relinquetur, nullo optato fine uirtutis opus natura concluderit, id quoniam absurdum est, dicendum post mortem corporis animum per- manere, ut uirtutis suæ præmium, quod hoc non tulit in sæculo, celestis Imperatoris munere alibi consequatur. Quantam præterea ingenuit no- bis natura cupiditatem quietis & beatitudinis perfruendæ? quæ non pa- ratur in hoc sæculo, nam quo plures opes, honores, imperia, diuitias, co- pias ingesseris, tanto uastius hiât humanus animus, ut neque expleri, nec satiari possit. Dicitur itidem uix potest quanta innata sit homini libido intelligendi & cognoscendi, at nunc tanquam in aliena republica pere- grinantes paruam quandam particulam è multis (& quod deterius est) ni- si obscure & inuolutè, nisi per reflexiones quasdam & ænigmata, nec om- nibus modis, quibus cognosci potest, cognoscimus, & rectè dictum est ultimas rerum differentias esse nobis incognitas: si mortalis animus, er- go hic affectus à natura, quæ artificiosè solerterque procedere solet, frustra homini impositi atque iniusti, quod quoniam dici minimè conuenit, im- mortalis habendus est animus: & ut affectus ueteres expleat, necesse est paratum locum, unde corporis uinculis leuatus plena luce spectet, & om- nia in omnibus intelligat, & summa quiete perfruatur. Quid? quod ho- mo ex cunctis animantibus solus ueri Dei notitiam habet? quam non ha- beret, nisi in illo inesset diuinum quiddam, & quod diuinum est, quis morti dixerit obnoxium? solus æternitatem intelligit, intellectæ amore flagrat, quia scilicet hoc naturæ eius præcipuum debetur: solus ad cœ- lum arrectus sublimi corporis statu, quasi nihil illi rationis esse debeat cū terra,

terra, sed superna sint expectanda. Videmus, quod unum quodque animal cognoscit id, quod ad usum suum pertinet, cetera non agnoscit, hinc bruta animalia margaritas & aurum non cognoscunt, quia nihil ista ipsis usui sunt, hæc pretiosa cognitioni hominis subduntur, ad cuius usum & ornatum parata fuerunt. Similiter, quod homo tentat assidue cognoscere Deum, & id maxime expetit, hoc ostendit, quod aliquando Deo fruatur, quasi ad id factus sit, hæc autem fruitio in hac uita non contingit, contingere autem alibi necesse est, ne frustra huius fruititionis sit appetitus: ergo ponendum in morte corporis animum non obire, sed abire. Quod uero non solum Deum nouit, sed diligit etiam atque colit, nonne id fit ueluti impellente natura & ostendente, unde ortus sit meliore sui parte, quo uel sit redeundum, hoc habet lex naturæ, ut unumquodque ad cognatum sibi & simile rapiatur. Sicut enim paruus ignis ad maiorem ignem, & gutta aquæ ad maiorem aquam accedere solet, & ei se adiungere, sic intelligentiæ nostræ paræ Deo coniungere se affectant, quem supremum & infinitum esse intellectum perspiciunt. Sumus (ut sic dixerim) cointellectuales Deo, licet longè impari conditione: hæc omnia, nisi dicamus animam perpetuò uiuere, frustra illic inessent. Illud quoque non leue creditur argumentum immortalis animi, quod sit particeps diuinationis: non enim solum perspicit præsentia, sed etiam quæ futura sunt præuidet, uel in somnio, quum sopitis corporis sensibus magis uiget, uel in uigilia sacro quodam furore correptus, qualem Sibyllæ habuerunt, & filia Priami Cassandra, & ex uiris penes Græcos Melampus, penes Romanos Martij quidam fratres. Multos etiam habuerunt Iudæi diuino afflatos spiritu, qui futura prædicerent, nostra etiam religio utroque in sexu infinitos. Quum igitur capax diuinationis sit humanus animus, diuinus habendus est: non enim diuinaret, quid euenturum sit in incertis casibus, nisi diuinum in se quid possideret, unde diuinationis nomen est ductum: & quod diuinum est, mortem effugere consentaneum. Bruta animantia naturæ acta impulsu applicant se tantum præsentibus, nihil prospicientes admodum in posterum: significant tamen actibus suis futura quædam, non ea præaugiunt, neque præuident, nec exemplo terreor formicæ. nam illa etiam, quæ nondum experta est hyemem, colligit frumenta, & reponit, quod ostendit parsimoniam ibi esse naturalem. Vellem etiam scire ab his, qui animos morte ueluti capite mulctant, an unquam uiderint substantias incorporeas intellectu uigentes interire: Negabunt se uidisse, ego contra uideo substantias huiusmodi non interire tales enim facimus Angelos, & Dæmones, cum his habemus intellectum incorporeum communem: hoc æquè agimus utrique. Quomodo igitur illi immortales, nos mortales? Nam quorum opera sunt communia, communem quoque conuenit esse naturam. Vis ne aliud adjici argumentum? Nam ueritas illuminari etiam atque etiam gaudet. Huc

E 2 mihi

De Immort. animi

mihi pariter specta, quæ sit conditio eorum, quæ in mundo interire dicuntur, nam ita intereunt, ut ex eorum interitu aliud nouum producat. Hinc illud in scholis Philosophorum uulgatissimum, ex corruptione unius sequi alterius generationem. Sed si animus corrumpitur, quid nam ex eius corruptione fiat requiro? Nihil uideo aliud consequi, quod generetur. Ergo non communi corruptionis lege includitur id, quod non habet, quod corruptionem sequi solet. Vltius (ut dictum est, & latius est dicendum) si animos efficit Deus à semetipso nullis intermedijs causis, quæ uia ad eorum corruptionem patet? Nam quicquid corrumpitur, id ex inferioribus istis gignitur causis, quarum defectu ipsum quod gignitur deficit, at Deum immediatum animorum auctorem deficere nemo dixerit. Solum igitur relinquatur, ut corrumpantur animi sola Dei uoluntate, qua & creantur, at id unde docetur? dicendum potius nolle corrumpi animos, quos propinquissimos sibi esse uoluit similitudine sua, & imagine eis inducta. Nam animos referre quandam Dei similitudinem prædicatur ab omnibus, quum animorum substantia sit intellectus: & Deum non alia notione capimus, quam, ut sit intellectus purus ab omni concretionem solutus. Diuini igitur intellectus imago sunt animi, impar illa quidem imago, sed imago tamen. Nullus autem artifex imaginem suam sponte debeat, nisi forsitan in faciendo aberrauit. Durare igitur animos, ut imaginem Dei à Deo ipso conditam dicendum est, præsertim, quum de contraria artificis uoluntate non doceatur. Magnum immortalitatis argumentum putat Plato, hanc quam anima habet cum Deo similitudinem in libro, quem de morte Socratis conscripsit: quærit enim cuius anima sit magis similis, corporis ne, an Dei? quum apparuisset similiorem esse Deo, hinc colligit Plato esse immortalem, quod sanè argumentum Porphyrius latius explicauit in primo ad Boëthum, cuius uerba hæc sunt. Firmam certamque rationem eam Plato putauit, quæ à similitudine aliquorum uim accepit. Nam Deo immortalis similis anima est: quomodo etiam ipsa sicut exemplar suum immortalis non erit? Quum enim duo quædam apertè opponantur: quærit, cui oppositorum adhæreat anima, qui optimus demonstrationis modus in his rebus inuenitur. Et quanuis à prima ætate usque ad senectutem multa contra rationem faciamus peccantes, tamen, quia uerè rationali Deo in multis similis anima est, rationalis esse ab omnibus creditur. Quum igitur duo apertè opponi concedantur, immortalis uidelicet atque diuina natura, & terrestris atque corruptibilis: dubitatur autem à nonnullis, cuius partis anima sit: à similitudine putauit Plato ueritatem esse querendam. Et quoniam non sensibili & mortali corpori, sed uiuo & immortalis Deo secundum operationes similis est: hinc similitudinem etiam insubstantia quandam habere, ac inde immortalem esse ratiocinatur. Nam, ut quæ irrationabilia sunt, statim à diuina substantia, quum sint caduca & instabilia, longè abesse uidentur, sic certè consequens

equens est, quæ operatione intelligendi conueniunt, ea immortalitate quoque substantiæ conuenire. Quoniam enim substantia conueniunt: iccirco etiam operatione conueniunt. Fluunt enim à substantia operationes: ac quædam eius sunt emanationes. Nam si simillima Deo anima est, quid opus est pluribus uerbis ad demonstrandam immortalitatem eius? Non enim diuinis operationibus uteretur, nisi etiam ipsa diuina esset. Nam & si quum in caduco mortaliq[ue] corpore defossa sit, continet tamen & uiuificat illud, diuinam suam ostendens substantiam, nec pondus corporis eam omnino deicere potest. Quomodo si è corpore liberabitur, aurea sua species non perfulget? Aut quomodo ipsa immortalis non erit, cuius præsentia corpus non moritur? Habes rationem immortalitatis, quam à similitudine Dei affert Plato, plenius etiam expositam per Porphyriū. Quid? quod manes apius uisi, auditæ uoces defunctorū?

Ipsa sed in somnis inhumati uenit imago

Coniugis, Et

In somnis ecce ante oculos mœstissimus Hector

Visus adesse mihi.

Sed & Creusæ, & Polydori, & Achillis umbras legimus apparuisse aliquid indicantes uel petentes. Non fingerent hæc Poëtæ, nisi uulgo receptum esset animos eorum, qui uita excesserunt, apparuisse multis, & præmonuisse, & futura prædixisse: animos autem superstites agere quædam & superstites negare, furiosi uidetur. Nec aliter grauissimi uiri, quibus nefas esset mentiri prodiderunt. Supersedeo uti exemplis, quæ infinita sunt in Christianorum literis ueritus longitudinem orationis. Quis enim possit dicere quoties Maria Domini mater, Petrus & Paulus Apostoli, & reliquæ sanctæ animæ de cœlestibus uenientes sese dederint in conspectum mortalibus, eosq[ue] magnis de rebus docuerint: non magis id sermone quispiam persequi possit, quàm numerare fluctus maris, & arborum frondes. Sed apud gentes & nationes eadem fieri contingebat. Et ut mittam cætera, refert Plinius nepos in epistolis idolum senile catenis onustum Athenis uisum esse à multis, & demum Athenodoro Philosopho, quod trepidantibus cæteris imperterritus ipse aspexit, & quid sibi uellet intellexit. Idolum autem uocat umbram animi iam soluti. Notum est illud de patre, qui morte iam obita ostendens se filio, docuit solutionis Chirographum, contra cuius fidem creditor ueniebat, petens iterum, quod fuerat solutum. Plotinus inter Platonicos illustis in libro, quæ de hac rescripsit, censet exempla de historia sumenda, si quem auditorum oporteat, non solum rationibus, sed etiam sensibus erudiri: sic enim fieri fidem ex utroque: historiam autem asserit talibus rebus abundare, ueluti quum Deorum oracula iubent animas quorundam iniuria læsas placari, uel alios meritis honores reddi defunctis tanquam talia sentientibus: multos præterea, qui dum hic agerent, benefici fuerant erga genus humanum, eosdem istis derelictis asserit in eodem benefaciendi genere

nere

De Immort. animi

nere perseverasse. At plerique hæc irrident, nec fidem adhibent. Placet ne igitur fortissimam omnium probationum, quæ experimentis constat, & ab effectu nos ad certam deducit causam tollere? Vnde ergo Phisici hauserunt substantias abstractas orbium motrices, ipsum primum motorem, nisi ab operatione? quæ præterea prudentia eleuare istorum fidem, quæ contingere à grauibus & eruditis uiris testatum est? eadem opera possunt omnem historiæ fidem euacuare: quod si fieret, humana uita ingenti scientiæ parte nudaretur. Sunt quidam, qui ueritate ipsa coacti: hæc uisa negare non audent, sed ea dicunt fieri arte Dæmonum: hi si fatentur Dæmones hæc facere posse, cur non facilius credant eadem posse animos separatos, cupientes opem ferre consiliorum suorum propinquis & amicis, quos uiuentes dilexerant. Ridiculi magis illi, qui atræ id ascribunt bili, quæ, ut ad quædam acria & uehementia hominum disponat corpora, non tamen usque eo attollit mentes, ut præcias faciat futurorum, & per quàm absurdum simul dicere hæc uisa melancholicis duntaxat contingere. Quòd si dicis hos, qui uitam hanc exuerunt, non sæpe apparere, suisque consulere, rem non improbabis. nam si uel unum mortuorum dederis semel apparuisse assumpto umbratili corpore, compelleris dicere reliquos omnes, qui eiusdem naturæ sunt eiusdemque formæ, eandem habere facultatem, ideò fore superstites: satis est his istam causam tuentibus, tale quid aliquando extitisse. Quòd autem rarò apparent, hæc affertur causa, quia tantum animi illi interiores motus perpetuò manentes exercent, nec cura est prima illis extranearum & transeuntium actionum, quia non expedit, non datum est, non lex diuina id requirit: hominibus conuenit homines auxiliari, & ubicunque per substantias separatas agendum est, non desunt Angelorum, Dæmonumque ministeria. Vident Beati illi animi assidue supremum illud & unicum ens, eoque spectaculo saturantur & perficiuntur, & ut demus id non prodesse cæteris, prodest tamen id illis, pertinetque eorum status ad huius uniuersitatis integritatem, & decorem, dominantisque Dei gloriam: si quandoque tamen ipsi ad humana descendunt, uel ob hoc ipsum, ut ostendatur humanos animos post mortem remanere, id sit extra ordinem singulari diuinæ prouidentiae iussu. Mouere etiam quemlibet potest ad immortalitatem animi tenendam, omnium gentium consensus, quæ tot seculis permansit: non enim conuenerunt inter se homines & collocuti sunt, & ut id statueretur decreuerunt. Quòd igitur opinantur homines, qui ubique sunt sponte sua, id uerum censendum est, quoniam non oriretur tanta consensus, tamque diu permaneret, nisi natura, & ipsa profectò euidencia & perspicuitas eo deduceret: hoc etiam ex eo uidere licet, quòd optimus quisque animorum immortalitatem amplectitur. Leues autem quidam & uitij inquinati, corporibusque ipsis immerfi huic sententiæ uidentur diffidere: Thales inter Pphilosophos Epicurus fuit. Sectatoresque eius, qui de magistri præcepto uoluptatis causa omnia moliebantur.

liebantur. Quorum igitur iudicium accipiendum? quis non dixerit eos, qui optima sunt natura optimoq; ingenio, magis uerum cernere & speculari? Videas etiam in sepulchris inscribi uersus, quibus pronuncietur corpora ibi sitorum humo regi: animas uerò in loca piorum profectas, hæc non modo nostri, sed gentes etiam faciebant: italia multa apud Græcos sunt epitaphia, quædam etiam latina: qua in re illud urbanum Demonaetis Philosophi, quod iaculatus est in Admetum quendam malum Poëtam. Is enim cõposuerat carmen unicum, quod latinè sic sonat.

Terra habet inuolucrum hæc Admeti: astra ipse petiuit, ^{et non sup}
Hoc quum recitasset Demonaetis gloriabundus, addidissetq; testamento cauisse, ut post mortem eius sepulchro inscriberetur. Tum ridens ille, tam pulchrum est (inquit) Admete hoc epigramma: ut iam inscriptum esse uelim. Gallos auctor est Valerius in libro de institutis antiquis pecunias dare mutuas consueisse, quæ illis apud inferos redderentur. Stultum uidetur, sed tamen ex eo colligi potest illis gentibus adeò persuasum fuisse animos hominum post hanc uitam superesse, ut in illa etiam stulta exirent. Sed & illud indicat eos putasse animorum immortalitatem, quod post solemnia tumuli quæque peracta uale dicebant, ut Seruius memorat Grammaticus: stultum est enim si dicamus ex animo corpori nihil sentienti dixisse, præsertim quòd iam in cineres & fauillam conuersum uidissent. Tria genera, dum de probabili loquuntur, faciunt Sapientes, unum dicunt, quod est probabile & uerum, & hoc maximè excellit, aliud quod uerum est & non probabile: tertium quod est probabile & non uerum. In primo igitur genere probabilis & ueri ponenda est hæc, de qua nunc agitur immortalitas animi, quam populorum accipit consensus, leges publicæ approbant, maximorum Philosophorum sancit auctoritas, religionum iura confirmant. Hæc, quam spè immortalitatis non tendunt? quis adeò sempiternæ mortis formidine oppressus, ut tot tantisque iudicijs non moueatur, & ad huius rei plenam credulitatem sententiamque non deducatur? Animus etiam ipse humanus de se (ut inquit Cicero) præsentit in posterum, & uenientia sæcula ad se censet pertinere. hinc testamentorum diligentia, hinc instituendi cura hæredem, qui abeuntibus nobis personam sustineat uicariam, hinc liberorum propagationes, qui memoriam nostri nominis diutius conseruent, hinc rectè etiam factis studemus, id agentes, ut de nobis posteritas bene sentiat ac loquatur: multa que alia gloriæ causa molimur, quasi in sempiternum animus tempus spectet, nec sit breui gestorum fama contentus. Impellimur ad hæc natura duce, quæ ostendit quodammodo non omnia nostra unà cum uita effluere, & breui æui spatio diffiniri. Hæc sunt & alia multa, quibus olim præstantissimi & eruditissimi uiri, immortalitatem animi prædicabant, quæ me ualde commouent, non solum quòd à talibus profecta sunt uiris, quos nemo nostrum industria, uigilantia, ingenio, doctrina sequitur, ut proximus esse possit, sed quòd ita rem explicant

De Immort. animi

plicant & demonstrant, ut in hoc argumentandi genere nihil dilucidius & euidentius proferri queat. Et ego quidem sic affectus sum, ut dixi. Tibi uerò quomodo satisfactum sit ignoro. Nam forsitan in artifice est uitium, quanuis materia sit proba. Me iuris ciuilis scientia secernit à populo, & efficit, ut aliquid in turba esse uidear: huic enim à primordio ætatis enixè operam dedi, at Philosophica hæc sero, & non nisi transeundo aspexi. Itaque nihil mirabor, si tibi nunc minus placuero, & perfectius aliud requiras. Nam forsitan minus commodè persequutus sum, quæ uera esse profiteor.

MARCI



MARCI ANTONII
NATTAE ASTENSIS,
DE IMMORTALITATE ANIMI.

LIBER TERTIVS.

MARCVS.



NOLI expectare Marce à me ingenium, eloquentiam, copiam, acumen, uimque dicendi, doctrinam denique tuam commendari: nam si te coram laudauero, non effugiam adulationis speciem, quam turpissimam iudico. Illud breuiter dicam te ita dixisse, ut si ueteres illi, de quorum fontibus hæc manasse dicis reuiuiscerent, potuerint delectari æmulatione studiorum suorum; nec

non in sententia, quam de immortalitate animi habuerunt, eloquutione tua confirmari. Me uerò adeò mouerunt, ut immortalitatem hanc, quæ apud me nunquam dubia fuit, certissimam habeam. Veruntamen, quum considero alios contrariam tenuisse sententiam, existimo huc non sine ratione prouectos. Possent enim illi (si adessent) aduersus te illud Virgilianum proferre.

Et nos tela pater, ferrumque haud debile dextra

Spargimus, & nostro sequitur de uulnere sanguis.

Itaque gratissimum feceris, si exposueris, quæ argumenta pro se illi ad duxerint, quibus inducti cogitationibus illud senserint, & quomodo refellantur ostendas. Interest enim tua id facere, quo plenam referas uictoriam, ordo etiam hoc postulat, ut quum nostræ copiæ fuerint firmatæ aduersariorum euertantur. **MAR.** Si rectè animaduertisti ad ea, quæ antea dicta fuerunt, uisus sum mihi inter differendum quædam eorum argumenta deiecisse. **ATHA.** Ita est, sed possunt esse alia, quibus nondum occurristi. **MAR.** Faciam iam, quòd te uelle uideo, præsertim quum non multum mihi laborandum sit: ex superioribus enim pendunt omnia. Oppugnatur autem hæc animorum immortalitas eo argumento, quòd si immortales sunt animi, consequi infinitam eorundem multitudinem necesse est: si quidem æternus ponitur mundus, & ani-

F marum

De Immort. animi

marum transmigratione de corporibus in corpora, sicut de domo in domū negatur, assumunt autem, ut concessum, infinitatem rerum esse uitandam. Sed hoc argumentum metuant hi, quibus æternitas mundi placet. Nos autem, qui ut mundi generationem cœpisse, ita defuturam dicimus, uim argumenti huius nullam esse concludimus: quanquam si de hoc contendendum esset, uiderem omnino, quàm uitiosum esset infinitatem ponere rerum materiæ cohærentium: at infinitatem eorum ponere, quæ à materia longissimè effugerunt, haud forsitan intolerandum uideretur. Sic enim laudamus Deum, qui sine controuersia incorporeus est, quòd infinitus sit ille, & nullis limitibus circumscriptus. Possum etiam dicere, quòd finem habebit animarum procreatio aduentante magno mundi anno, quem reuolutis multis sæculorum millibus aduenturum traditum est, tum quum cuncta sidera eodem unde semel profecta sunt, redierint, eandemque cœli descriptionem retulerint: necesse enim tunc fuerit sub iisdem stellarum motibus, quæ prius fuerant, iterari, & denuò referri noua generatione cessante, & ut cum Poëta dicam.

Alter erit tum Tiphys, & altera, quæ uehat Argo

Delectos heroas, erunt etiam altera bella,

Atque iterum ad Troiam magnus mittetur Achilles.

Sed hoc non sine causa propugnaculum defero, nam hanc sæculorum in idem redeuntium instaurationem, atque huius magni anni conuersionem, uideo uulgo reijci: quamuis magnorum Philosophorum auctoritate nitatur. Mouet alios quoque, ut contradicant, quòd omnis anima est in corpore, & cum corpore. Non enim exterior præsidet corpori, ueluti figulus rota: eques equo, sed intus residens tanquam in naui gubernator, ergo nulla sine corpore. Fallax argumentum: est quidem anima rationalis (de hac loquimur, quæ proprio magis nomine animus nuncupatur) apta corpori, sed tamen sine illo esse potest, imò (quemadmodum Plato asserit) melius est illi animo, qui extra corpus, quàm ei, qui degit in corpore, quatenus tunc non noxia corpora tardant.

Terrenique hebetant artus, moribundaque membra.

Potest animus dicere corpori, quæ dicta ab Oenone sūt ad Pariden.

Nec me faginea, quòd tecum fronde iacebam.

Despice, purpureo sum magis apta toro.

Non est habendus animus despiciatui: propterea quòd infid eat corpori, nam aptior adhuc est, si exierit, & diuerterit: appetit ille quidem sociati rursus corpori (hæc enim naturalis illi sedes) sed in corrupto corpori, & agili & lucido, & obsequenti, & tali qualem resurrectionis die religio nostra prædicat habiturum. Nec uerò animus abscedens à corpore potest dici imperfectus, tanquam pars, quæ fuerit destituta à reliquis sibi coniunctis partibus, & careat toto: nam & si corporis sensus constituent unà cum anima rationali, animal (ut ita dixerim) humanum, non tamen concurrunt ad hominis constitutionem, sed sola id anima rationalis per-

agit

agit, quæ à beluis ipsum disjungit. Etenim propter unam rationem homo est homo, non propter motum & sensum, quæ sibi communia sunt cum cæteris animantibus. Quapropter ubi deserit corpus, non immittitur hominis dignitas, sed etiam augetur, quandoquidem grauem & importunum relinquit socium multis perturbationibus, procellisq; obiectum, & sibi sapius rebellantem. Ipsa autem ab eo seclusa ualidius & perfectius suo intelligendi fungitur munere: ex quo etiam uehementissimè lætatur. Vt enim homo ex animo & corpore constet, tamèn potentissima eius pars, etiam dum hic agit, in animo existit. Quamobrem quum superfit, quod in eo potissimum fuit, & eum à beluis disjungit, ipse dicitur uiuere: imò dixere quidam, quòd uerus & perfectus homo est ille, quem corpore nudatus animus representat. Iste est, quem Apostolus (ut dictum est) hominè interiore uocat. Nec mirum uideri debet: nam inspicitur in unoquoque, quod in eo ualidissimum est & potentissimum, & ei tribuere nomen & uim totius solemus, ueluti quum maior pars populi aliquid gessit, uel Principes ciuitatis fecerunt, ciuitatè dicimus fecisse. Sed de hoc hæcenus, reliqua uideamus. Anima (aiunt) cum corpore nascitur, & cum corpore intereat, necesse est. O' ridiculum sermonè, quasi uerò inter hæc duo nihil intersit ad id, quod quæritur: corpus enim concretum, & diuiduum, & ex contrariis etiam naturis conflatum, quorum nihil patitur anima, ideò unum subiacet ruinæ, alterum minimè. Ac ne illud quidem concesserim, animam humanam nasci simul cum corpore: id enim quod fingitur in utero, prius est animal quàm homo: corpori iam formato accedit intellectus, mens, ratio, natura ex imperfecto paulatim ad perfectum (sicuti solet) progrediente. Superest, ut aliud refellatur, quo aduersarij utuntur. Anima (inquiunt) rationalis non intelligit, nisi per imaginariam cogitationem seu (ut Græci uocant) per phantasma. Cicero huiusmodi imagines animis signatas atque impressas uisa appellat, quo deinceps uocabulo nos utemur, ut latino. Necesse est (inquiunt) intelligentem uisa speculari. Quid tum? hoc ostendit animam esse mortalem: nam uisum non potest contingere sine imagine: imago non est sine sensu, nec sensus sine corpore: ex quo fit, ut anima extra corpus non intelligat, & non intelligens non fingeretur propria actione, & qui tollit actionem propriam rei, rem etiam aufert, quia nihil ociosum rerum natura esse patitur: ergo non est dare animam extra corpus subsistentem, & uidetur hoc rectè argumentationi (ut aiunt) esse consentaneum, ut quum idolorum spectaculum, sine quo intellectus non agit, nequeat à corpore separari, ne animam quidem esse separabilem. Hæc illi afferunt, quæ facillimè diluuntur. Fateor nanque non intelligere rationalem animam sine imaginibus, sed ea, quæ subiiciuntur sensibus, & quorum sensus sunt capaces: deficiente enim sensu, qui species à rebus acceptas deferat imaginariæ cogitationi, perit omnis scientia: quam sensus ille seu anima illius ministerio percipere poterat: unde, qui natus est in

cœcitate, nunquam colorum discet lumina: deficit enim id, per quod scientia contingebat: sed alia, quæ nullo sensu capiuntur, & incorporea & abstracta uocamus, potest anima rationalis intelligere per se sine ullo sensuum usu & imaginariis actibus, his non eget ad illa percipienda: atque ita ponimus, quod duplem habet anima intelligendi rationem, unam per corpus, aliam per se ipsam: sicuti etiam duo quædam eius intelligentiæ supposita sunt, corpora scilicet, & ea, quæ uacant corpore: corpora, ut intelligat, corporis utitur instrumento: alia corpore uacantia si percipere curat, non est ubi aliò confugiat, quàm ad seipsam: & hac in re non solum sumit sibi ad intelligendum ea, quæ prorsus separata sunt à corporibus sponte sua, sed etiam quædam separat ipsa. Quamobrem rectè Sinesius in libro de Somniis, inquit, quod homo sapere, sed non semper intelligit per uisa: nec inconuenit, quod homo habeat duplicem intelligendi uiam, una, qua utitur ad corporea, altera ad incorporea: quoniam, ut ipse ex his duobus conflat, ita diuersus ad hæc, & illa fertur: & sæpè accidit, ut res egeat pluribus actibus, ut assequatur id, ad quod nata est, quod uno tantum concessio assequi non possit. Et anima quidem sic agit iuncta corpori. Sed quid ubi disiuncta est? intelligit etià corporalia nullis sensibus, nullis uisis commota, quo more? eo scilicet quo Angeli & Dæmones utuntur, nec tunc anima ipsa miratur se ita intelligere, nec à se alienum putat: recolit enim, quod dum obtenebrata esset in corpore, multa & magna per se ipsam percipiebat nullo corporis subleuata ministerio: dispar erit quidem intelligendi modus ab eo, quo nunc utimur, par tamen in eo, quod proprii corporis non egebit auxilio, ut intelligat. Ac mea quidem sententia magis congruit animæ rationis compoti, ut suapte ui & facultate intelligat: nam ille alius intelligendi modus per uisa imaginaria, non adeò naturalis uidetur: illi enim accidit, quia iungitur corpori, quod intelligentiâ in plerisque potius implicat, quàm explicat, nam sensus sæpè fallaces, nec minus cogitationes hominum uanæ: ut non ab re à magnis Philosophis dictum sit, melius fore animæ, si corpori non iungeretur: omnes autem perfectiorem animæ statum extra corpus fatentur, de his loquor, qui immortalitatem suscipiunt, nam alteri unum tantum animæ statum agnoscunt. Magna hæc deliratio. Sed uis ne audire aliud, in quo istius hæresis defensores magis etiam delirant? Nosti inter Philosophos naturalium causarum scrutatores fuisse, qui dicerent sedem humani animi esse cor, alij cerebrum putauerunt. Frequentior pars sanguinem posuit, hinc Poëta dixit de quodam inter prælia occiso, Purpuream uomit ille animam. Vtrum horum uerius non discussio, sed cor uarijs casibus infici, & corrumpi posse conceditur, cerebrum etiam dispergi & scindari, sanguinem effluere & rigescere, & ad extremum omnia hæc interire: quod quum contigerit, dicunt nonnulli animam pariter extinguï. Hæc rectè dicerentur, si substantiam animæ in corde, cerebro, sanguine, uel eorum uno ponerent: sed si uolunt membra

bra illa sedem esse animæ, melius diceretur animam sede sublata illinc
 assurgere, non autem interire. Inter eos, qui animorum mortem tenuerunt,
 Aristoxenus fuit musicus sanè egregius, idemque Philosophus. Ille artem,
 cantusque suos ad hæc etiam transtulit, similitudinemque talem induxit,
 ut ostenderet, unde animus oriretur, & quomodo desineret: Vt enim
 (inquit) in lyra nerui, ad numeros suos aptè intenti concentum efficiunt
 sonorum, quem musici Harmoniam uocant: sic singularum corporis partium
 firma coniunctio membrorumque omnium conspirans in unum uigor,
 motum illum sensibilem elicit, efficitque hæc temperatio, & ueluti
 modulatio quædam, ut animus ipse existat, & sicut in fidibus ubi
 interceptum aliquid est aut relaxatum, canendi ratio turbatur, &
 omnis illa harmonia superior tollitur, ita in corpore, quum membrum
 aliquod ab alijs uitium duxerit, dissident uniuersa, corruptisque
 omnibus atque turbatis sensus occidit, animusque deletur. Hoc concinne
 sanè & musicè, sed impossibile est rem ita se habere. Non enim fides
 sua sponte canentes Harmoniam illam concitare possunt, nisi ipsæ antea
 externa aliqua ui fuerint concitata, at nullo membrorum opus est pulsu,
 ut animus moueatur, qui per se se ipsum quiescentibus corporis partibus
 mouetur, & tanta quidem celeritate, ut uno temporis puncto cælum
 ambulet, maria peruolet, terras collustret, longè lateque summota
 sibi admoueat, ac præsentia reddat. Ergo uana ratio Aristoxeni fuit, qui
 nisi suo artificio tantopere delectatus fuisset, facile peruidere poterat,
 nulla concordia uel compage elementorum effici potuisse, ut intelligeret,
 saperet, meminisset, nisi fortasse ne mentem quidem sensit se se habere,
 qua similitudinem excogitauerat. Tantum profectò abest, ut corpori
 consonare omnino, aut uelit aut debeat, ut sapius eidem dissonet &
 repugnet, uel dum uoluptates, quas sensus affectant, contemnit, uel
 dolores, quos refugiunt, amplexatur. Nonne etiam tanto melius excogitasse
 aliquid, & tanto uerius inuenisse uidemur, quanto magis mentis aciem
 auocauerimus à corpore? segregataque carnis societate animum ipsum
 secum esse coegerimus? ex quo satis apertè colligitur officio membrorum
 conspirante, uim illam intelligendi & cognoscendi non creari, quum
 ea uis retundatur potius terrenis obseptis corporibus, quàm ab illis
 ulla ex parte iuuetur. Est quidem animus harmonia, sed suarum uirium
 & uirtutum, non partium corporis: sicuti etiam non est numerus, licet
 numero, idest, ordine & proportionem constet. Iste est Aristoxenus,
 quem in hoc suo argumento irridet Cicero. Nam quum musicam profiteretur,
 ei quere præcipuè operam daret, hæc (inquit) magistro concedat
 Aristoteli, canere ipse doceat: bene enim illo Græcorum prouerbio
 præcipitur. Quam quisque artem norit, in hac se exerceat. Video te in
 risum commotum: sed meritò irrisus est ille. Etenim si uerè & fortiter
 philosopharetur, uel illud uidisset, quòd anima est substantia quædam
 mouendo & regendo corpori accommodata. Harmonia autem per se nihil

hil

De Immort. animi

nihil est, sed inest alteri, & est ueluti aduentitium quoddam: differunt ergo, & unum & idem esse non possunt. Quæ præterea unquam harmonia aliquod mouit corpus, quod animam facere uidemus? Si diceret, quod anima per harmoniam corporis illi coniungitur, assentirer: sed non ideo efficitur, ut anima ipsa sit illa, de qua loquitur, harmonia corporis, seu temperatio, seu complexio, ut quidam etiam alij præter Aristoxenum uoluerunt: nunquam enim corporalium multorum concursus efficiet aliquod incorporale, nunquam creabit intelligentiam, quam ipsa nulla ex parte habent. Et de cæteris quidem nihil miror, subit autem mirari de Galeno, qui doctissimus extitit, & princeps in re medica habetur. Is enim in libello, quod animi mores temperationem corporis sequantur, de hac animæ immortalitate ambigit, & dicit se non uidere cur larga sanguinis effusio, & epota cicuta, uel nimium frigus, aut immodicus calor in cerebro, aut corde receptus, habeant uim separandi portionem animæ rationalem à reliquis duabus partibus mortalibus. Ego uero dixerim non habere illa uim hanc separandi, sed habere uim tamen extinguendi sensum & motum, quibus anima per corpus utebatur: his autem extinctis sola portio rationalis relinquitur, quum commori non possit: ubi enim tria ad nexum copulata sunt, duobus abeuntibus uel extinctis mutatur numerus, & unum fieri incipit, non destituens priora, sed ab illis destitutum. Illud autem, quod Galenus prosequitur toto illo libro, animi mores sequi ex corporis temperie, ut concedatur id perpetuò esse uerum, tamen hoc animæ immortalitati non repugnat: itaque hæc disceptatio relinquenda uidetur, fatendum est nihilominus quibusdam morbis & corpore malè affecto impediri animam, quominus uiribus suis, quibus prædicta est, utatur. hinc furor & dementia, & dissipantia, & deliratio, & immensa rerum obliuio, & similia quædam fluunt, quæ rationis usum interpellant, excutiunt, obturbant: quemadmodum èo uerso prudentia in plerisque maior est & sapientia ex corporeo quodam bono, siue sit illud tenuitas sanguinis & puritas, siue spiritus caliditas, siue aliud quodlibet. Quapropter non improbo Aristotelem, qui in problematis asseruit carne molles meliori esse ingenio, quam duros: potest enim hæc diuersitas corporum efficere, & corporum quidem multam perspicimus uarietatem, qua inter se differunt. Animarum uero, quæ incorpoream obtinent naturam, qualis aut quanta sit differentia & dissimilitudo inter unam & aliam in sui creatione, haud facile dixerim. A primo quidem anima esse perhibetur, ueluti tabula rasa, in qua nihil est inscriptum, postmodum sociata corpori intelligit sensibus ducibus uarias sibi formans imagines, ex quibus ad rationationem seu cognitionem fit gradus, dum uisa diuidit & componit, & ex assumptis elicit conclusiones. Is autem cognoscendi & intelligendi modus, ubi separatur à corpore, interit, ut iam dictum fuit, alius autem insurgit nobilior, quo tunc utitur: qualis autem sit, posterius (si tempus appetet) forsitane aperie-

aperietur. Veruntamen, dum anima iuncta adest corpori, multa ex corporis affectionibus agit & patitur, & illa consequuntur, ut pro corporis habitu melius, uel deterius uires suas exerceat. Rursus urgent quidam quærentes utrum animus, quem facimus immortalē egeat conseruatore Deo an non? Si negauerimus, absurdum putant: Si etiam quærunt rursus, quomodo natura sua immortalis existat animus, qui alio eget conseruante. Respondetur, animum consequi immortalitatem non à se, non enim se ipsum genuit: sed ab eo, qui illum condidit, nec repugnat aliquid è conditione naturæ suæ esse immortale, & conseruatore indigere, quia illo modo conditum sit: sicut cœlum, quod natura incorruptibile est: adhuc tamen eget Deo, qui quod dedit, conseruet. Omnia namq; creata, sicut prius non fuerant, ita esse desinerent, & in nihilum, unde sumpta sunt, reuoluerentur, nisi præsentia facientis asisteret, & eadem ui, qua sunt condita, tenerentur. Vrgent adhuc nec remittunt, & simulant mirari, quòd immortalis animus iungatur mortali corpori. Debuit enim & ipsum immortale creari, quod futurum erat habitaculum immortalis animi. nam simili argumento ostenditur, cœlum esse æternum, quod æternarum sit habitaculum substantiarum, sic locus ipse respondet æternitati eius, quod recipitur, nunc uidetur natura animo non longæuo, sed (quod auctius est) immortalis, subiecisse corpus breui periturum: ut eo diuerneret, non ut commoraretur, quod quoniam existimatur absurdum, conijcitur animum cum corpore unà interiturum, ut par ei locus assignatus uideatur. Hæc illi latissimis explicant uerbis, adeò locus iste magnum occupat in dicendo locum: nos autem paucioribus egimus, nihil tamen, quod ad rem attineat, prætermittentes. Sed tamen hæc non rectè obijciuntur. Etenim, ut concedam animum esse in corpore, non tamen corpus illius esse propriè locum concedo, quandoquidem non sustinetur animus à corpore: sed ipse illud sustinet, & ei regendo præsidet & moderatur, & is est animus, qui corpus informet. Cur autem quod immortale est, iunctum fuerit mortali, cuilibet occurrere potest id esse factum, ut plena ratione mundus conderetur. Creauerat summus rerum opifex immortales Deos (ut ueteres loquebantur, nos Angelos uocamus) sola mente & intelligentia constantes. Creauerat quoque bruta animantia mortalia, sensibus corporis congruis prædita. Restabat ad plenæ generationis cumulum, ut tertium quoddam formaretur, quod neutrum foret, utriusque tamen esset particeps, idest, quod partim immortale esset, partim mortale. Itaque formatus est homo, medius inter Deos & bruta animantia, utraque complexus extrema: nam datum est illi habere cum dijs communem immortalem mentem, & cum animantibus brutis commune corpus mortale, ut nodus quidam è diuersis duobus colligatus. Ex hoc perspicitur uis etiam diuinæ potentiæ, quæ res inter se maximè distantes copulauit. Quid enim tam distans esse potest, quàm corporeum ab incorporeo, quàm uisibile ab inuisibili, quàm ter-

renum

De Immort. animi

renum à coelesti, quàm tenebrosum à luminoso, quàm denique, quòd materiæ pollet densitate ab eo, quod omni caret tumore? At hæc duo inter se disiunctissima tam suavi uinculo, tanta pace, concordiaque Deus agglutinavit, ut nunquam cupiant (si fieri posset) diffociari. Etenim (ut ait Apostolus) Ipsi nos primitias Spiritus habentes ingemiscimus, & nolumus expoliari, sed superueſtiri. Succedit nunc argumentum aliud, sed leue uel nullum potius, quo Lucretius utitur.

Quòd si immortalis nostra foret mens.

Non tam se moriens dissolui conquereretur.

Sed magis ire foras uestemque relinquere, ut anguis Gauderet. Equidem commemorare possum multos pios & sanctos religionis nostræ uiros, qui faustum sibi & iucundum illum diem auspicabantur, quo ueluti aues è cauea liberum in cœlum emitterentur: non enim decet, nec fas est, nisi iussu supremæ potestatis exire, nec gaudent uestem relinquere (ut ait Lucretius) sed cupiunt se superueſtiri (ut ait Apostolus) quod sperant sibi aliquando contingere maxima cum gloria, tum scilicet quâ ultimo iudicij die resurgent. Quot præterea ueterum infidelium mortem forti animo contempserunt in bello, & in morbis, & in carcere, & ubicunque hæc se eis obtulisset? Vulgus autem hominum fortasse dissolutionem hanc perhorrescit, non quòd animus de se non præfagiat in posterum, sed quia eos mouet hæc uita magis, quàm altera: hæc enim uidetur, illa creditur: hæc in usu est, illa in cogitatione tantum, huic assueuimus, illam nunquam experti sumus: hæc mouent humanos sensus, quos exuere & penitus deponere libenti animo, ubi usus tulerit, rationem, ut optimam ducem sequentes summæ est prudentiæ, quæ plerisque non contingit. Illud etiam scrupulum iniicit religionis nostræ hominibus sumptum ex Apostolo, qui ad Timotheum scribens, & de Deo uerba faciens, solus (inquit) habet immortalitatem. Si solus: ergo nulli alij immortales sunt: ergo ne animi quidem erunt immortales: repugnant enim hæc nullos esse immortales, & quosdam esse immortales. Hoc turbat aliquos, qui non intelligunt, quòd Deus dicitur solus habere immortalitatem, quia à se ipso habet immortalitatem, cætera, quæ immortalia existunt, non habent nisi eo largiente. Sicut enim si uiderem in urbe hac (liceat sic fingere) quendam summum uirum, qui opes affluè fluentes & inexhaustas possideret, & eas quotidie ciuibus suis & aduenis diuideret, solum hunc diuitem uocarem, cæteros dicerem mendicos, non quo ipsi non essent diuites, sed quia diuitias haberent alio largiente, essent autem quantum in eis esset pauperes, & quia non sufficientes haberent diuitias, quas omnibus possent impartiri. Sic dicendum est de Deo, quòd solus habet immortalitatem, quia non aliunde suscipit, sed à se ipso habet: unde non tam immortalis ipse esse, quàm æterna esse immortalitas dicendus, à qua cæteræ immortalitates fluunt: nostri animi participes sunt huius immortalitatis illo dante, & non sunt si-

ne

ne immortalitate, sed non sunt ipsa immortalitas: hinc propriam quidem habent immortalitatem, sed alijs largiri non possunt. Clamant quotidie Sacerdotes in templis ad Deum, dum rem faciunt diuinam. Tu solus Sanctus, tu solus Dominus, tu solus Altissimus. Si solus ille sanctus: ergo inter homines nulli sancti? fuerunt & sunt plures huiusmodi; & latè patet sanctorum numerus, sed non sunt ipsa sanctitas, sicut ille, sed huius tantum sanctitatis alieno munere participes. Sunt autem, qui soli Deo tributam immortalitatem putant ab Apostolo, quia solus est immutabilis ille, qui ait penes Malachiam Prophetam. Ego Dominus & non mutor: nihil enim illi naturæ accedere, uel decedere potest, ut proficiat in melius, uel deficiat in deterius, uel ut incipiat habere, quod prius non habebat, & desinat non habere, quod prius habebat. Vnus est ille solus, nullas in se recipiens partes, non habet in se, quæ ad numerum diuidat, nec quæ simul componat: uerè unus, non unicus: & quod est uerè unum, necesse est, ut immutabile sit. Sed quantum sint mutabiles animi nostri, dum manent in corpore, quid attinet dicere, quod in se unusquisque quotidie experitur? incurfant enim animos cupiditates, spes, gaudia, terrores, dolores, multiplices uirtutes, & uaria uitia, memoria & obliuio, ex alijs ad alia fit assidue transitus: ubi autem quid mutatur, perit id, quod prius erat, & ingreditur aliud, quod non erat. Itaque si tot mortes, quot mutationes, ubi immortalitas? Vera nanque immortalitas sicut mutationem non habet, ita nec finem. Agnoscant itaque animi hinc manentes, non modicam sibi deesse immortalitatis partem: soli Deo cedant integram perfectamque immortalitatem, apud quem, ut utar Apostoli uerbis, non est transmutatio, nec uicissitudinis obumbratio. Quum autem exeuntes è corporibus in beatam illam cœlestem peruenerint patriam, si immutabiles sunt, id magno Dei contingit munere. Similiter si qua sunt alia, quæ non mutantur, non id illis propria tribuit natura, sed aliena indulget gratia, solus igitur immortalis Deus, quia solus undique immutabilis est à se ipso, nullo largiente, solus ille summam & absolutam habet immortalitatem, cætera quandam habent suis finibus circumscriptam. De hac summa & absoluta immortalitate loquutum Apostolum existimamus. Exposui ferè omnia, quæ ab aduersariis obiiciuntur, & quibus illi pro sua causa potissimum innituntur: his responsum fuit, ut uides: nonnulla etiam alia adducunt, quæ prætermisi, quoniam leuiora existimaui. En tibi immortalitatem, de qua quærebatur, & quam ostendi posse, disputando diximus. Omnia autem, quæ dicta sunt, referantur ad unam notitiam conditionis nostræ. Quid igitur sumus? Corpore sumus fragili, animo stabili, hoc quod uidetur, paruo finitur tempore, aliud, quod non uidetur, nullo: demum in uasis fictilibus thesaurum incorruptibilem gestamus. A T H A. Tu uerò pro immortalitate acriter pugnaisti ueluti collatis signis, ita, ut toto aduersarios campo fugasse uidearis. Cogor autem mirari, unde id fit, quod quum tam firmæ

G effica-

De Immort. animi

efficacesq; rationes animi immortalitatem ostendant, & quæ contra obiciantur, tam ualidè refellantur, quòd plures reperti fuerint etiam ex Philosophantibus, qui contrarias partes sequerentur. *MA R.* Ego quidem initio dixi id malum à primis Philosophis inductum, qui magno nomine in Græcia extiterunt: hi enim, quum omnia corpora esse putarent, animam quoque humanam in eorum numero posuerunt: hinc quod erat cōsequens, tenuerunt, eam finiri, quum homo è uita excederet. Sed alias quoque causas asserere possum, quæ magis propriè ad quosdam pertinent, ut minus mirum sit multos deinceps esse sequutos. Nam ut omittam diuinæ prouidentia instituto errorem, latè uagari, quo ueritas aduersarios habens magis illustraretur & enitesceret, & captiuam ueluti ducēs falsitatem triumpharet: ut hoc inquam omittam, quod aliàs latius attigimus, ruditas ingeniorum & infirmitas plerunque in causa huius erroris fuit: nam plerique, & si principio uera uident, tamen ubi ad disceptationem uentum est, & contraria audiunt, nescientes ea dissoluere, quòd in genio suo sint superiora, à ueritate desciscunt, quod non rectè fit: stultum est enim si nequeas obiecta refellere, sapientum opinionem relinquere: & quolibet linguæ uentilabro circumferri. Talis fortasse Plinius exitit naturalis conditor historia, ubi contra hunc perpetuum animorum statum plura garrit. Affectus etiam in alteram pendens partem non finit hominem liberè iudicare. Putas ne Sardanapalum opulentissimum Assyriorum Regem de immortalitate aliquid cogitasse? qui assidue Veneri & Baccho indulgebat, qui lasciuiam, qui delitijs fœminas omnes superabat, qui iussit in eius sepulchro inscribi, Ede, bibe, lude: & quum te mortalem noris, exple præsentibus delitijs animum, post mortem nulla uoluptas: huic, qui similes sunt, rident ubi audiunt.

Esse aliquos manes, & subterranea regna.

Hi sunt, qui (ut uerbis utar Catonis penes Sallustium) falsa credūt, quæ de inferis, memorantur diuerso itinere malos à bonis loca tetra, inculta, fœda, atque formidolosa habere: dicunt enim mortem omnia dissoluere, ultra neque curæ, neque gaudio locum esse. Itaque præsentibus fruuntur quantum possunt: nec mirum est ita illos sentire: pecorum uitam degunt, & humanam animam nihil ab ea, quæ in pecudibus est, differre existimantes, utranque pariter in ipsa morte euanescere, arbitrantur. Quosdam disciplinæ, cui se addixerant, uis rapuit. Itaque quicumque ex Epicuri grege fuerunt, aut ijs interitus animæ tenendus, aut susceptæ Philosophiæ nomen amittendum. Non mirum, Lucretium mortem animæ tenuisse, non etiam Lucianum, ambo ex eodem poculo biberant, ambo magistrum Epicurum sequebantur. Nam si tenuissent discessum animæ à corpore esse in alia loca migrationem, non extinctionem, maximo & grauissimo præceptoris oraculo repugnassent, quo mortem censuit nec ad uiuos, nec ad mortuos pertinere, quoniam alteros non attingeret, alteri non essent. Illud tamen in praua sententia Luciani egregiū, quod

quod ne uolens quidem obliuisci possum: Nam dum Dialogos fingit mortuorum, illa, quæ uulgo credebantur, de Minoe, de Charonte, de Coccyto, de Stigia palude, portenta sanè poetica, irridet uel potius gentium ea in re erroribus insultat. Quid? si quis Aristotelicæ se ipsum dediderit disciplinæ, admirans huius Philosophi ingenium, acumen, facundiam, eruditionem, & audierit Aristotelem extinctionem animi potuisse, non auctoritate tanti uiri, atque adeò tanti nominis gloria adductus eodem trahatur? quod Alexandri Aphrodisei contigit temporibus, qui floruit Antonino Imperante. Is enim quum placita Aristotelis ià diu occultata & incognita, tum primùm protraxisset in medium, & prædicaret animam humanam apud Aristotelem morti esse obnoxiam, multorum mouit assensum, ut eadem crederent. Accipiebant enim ab Alexandro, qui unicus tunc Aristotelis interpretis habebatur, eam esse Aristotelis sententiam, & Aristotelem, ut ueritatis Iudicem amplectebantur. Obest igitur plerunque auctoritas, nam ubi incidit in errorem, alios etiam incautos errare cogit. Et hæc quidem nunc occurrunt, quibus existimem, cur olim multi crediderint humanam animam unā cum corpore pereuntem. Placet etiam mihi, quòd Iulius amicus & familiaris noster in hac peripatetica philosophia, quæ propè sola hodie celebratur, multum diuque uersatus, idemque medicus nobilissimus existimabat. Is namque assererat priscos Philosophos atræ bilis uitio captos in maximis & notissimis rebus errasse & delirasse: ueluti eos, qui non plura, sed unum tantum in mundo ponebant. Item eos, qui nihil esse in mundo, sed uideri tantum prædicabant, & alios, qui nullum esse Deum astruebant, & illos quoque, qui continuum infinitam pati sectionem negabant: atram enim bilem, tam & si ingeniosos faceret, tamen dum plusquam satis est premeret, concitare in opinionum insaniam: nec sinere eundem à suscepta semel sententia diuelli. In horum numero (si bene recolo) etiam eos reponebat, qui ut pecudis, ita hominis animam euanescere asseuerabant. A T H A. Festiuum est sanè, quòd amicus ille noster censet, incidere homines in opinionum insaniam atræ bilis uitio. Sed num tu id sequeris? M A R. Sequor equidem, nolim tamen huius sententiæ ueritatem periculo nominis mei præstare, sed ad ipsum te dimitto auctorem: ego enim tibi suadeo, ut quamprimùm conuenias uirum, ut te planius doceat, quod & quantum sit hoc atræ bilis uitium, quod coniicit in insaniam doctrinam etiam eos, qui ætate sua opinione sapientiæ clari fuerunt. Est ille non solum Philosophiæ, sed etiam medicinæ literis instructissimus. Quamobrem poterit tibi cunctas atræ bilis actiones copiosè & dilucidè effari. A T H A. Optimè mones, itaque id exequar captato temporis articulo. Nosti enim, quàm sit ualdè in ægrotorum curatione occupatus. M A R. Noui quod dicis: nam ad eum confugiunt omnes tanquam ad medicinæ quendam Deum, & ego foelicem eius operam in me meisque aliquando expertus sum. Itaque obseruato hominem, ut

De Immort. animi

vacuum aggrediaris. Interim uenit in mentem Carneadis Academicus, qui aduersus Zenonis Stoici libros scripturus helleboro se ipsum purgasse dicitur, helleboro autem constat atram bilem expelli: hanc ille existimasse pariter uidetur posse hominem in falsas & ridiculas opiniones incere, si corrupta & uitiosa esset, Porphyrius quoque de se tradit, quum aliquando in meditatione semetipsum interficiendi esset, id animaduersum à Plotino præceptore fuisse, ac dixisse illud mentis sanæ non esse studium, sed animi atra bile concitati furorem, iussuque ab urbe discedere, quod quum fecisset, loci mutationem sibi profuisse. Traditum est quoque de Eurylocho Eliense ingenij accerrimi Philosopho, qui Pyrrhonem audierat, miris modis atra bile uexatum fuisse, aliquando autem sic percitum eo morbo, ut quum in Elide uarijs & diuersis multorum quæstionibus agitaretur, ac respondendo esset fatigatus, pallium abiecerit, & Alpheum fluuium tranauerit. Ferunt quoque sic indignatum interdum aduersus coquum, ut arrepto ueru cum carnibus usque in forum fuerit illum persequutus. Existimant quidam Phauorinum Academicum sequuti hanc affectionem asse Heroicam, proferunt in exemplum, Herculem, Aiace, Alchemæonem, Athamantem, Bellorophonem, qui omnes furentes inducuntur. Mihi furor ita placet, si is contingat, qui in Phædro à Platone laudatur. Sed de his satis superque dictum sit.

MARCI



MARCI ANTONII
NATAE ASTENSIS,
DE IMMORTALITATE ANIMI,
LIBER QVARTVS.

MARCVS.



NUNC ergo Marce postquam animorum immortalitatem præclara oratione, & docuisti, & defendisti, & causam erroris eorum, qui contrariam sententiam complexi sunt, aperuisti, uellem, ut reliqua persequaris. MAR. Quæ tandem reliqua? ATHA. Quia hic quæri posse uideo, qui sit animorum status recedentium, quæ uita, quæ conditio manendi, quæ in loca profectio, nam mors contingit homini diuisione duarum primarum partium, quæ coniunctæ illum constituebant, hac corpus, illac animus. Et corpori quidem, quid contingat ex animo, nihil attinet dicere: palam enim sunt omnia, iacet illud immobile, & mox reuertetur in terram, & reliqua elementa unde sumptum fuerat. Sed illud scire uellem, nunquid aliquid referat sepulchrum habeat nec ne. Dixit enim Poëta quidam non ignobilis sepulchrum corporis esse portum. Existimabant antiqui eos, qui inhumati iacebant, ubi inferos petiuissent, errare per multum tempus circa Stygiam paludem, nec prius quiescere, quam propinquorum & amicorum ope nacti essent legitimam uel imaginariam sepulturam: erat autem imaginaria, quæ absente corpore fiebat eisdem cœremonijs seruatis: tunc enim transmissa palude ad quietis loca proficiscebantur. MAR. Fabulosa hæc sunt Athanasi, quæ memoras à prudentibus nunquam credita, quanuis Poëtarum ore suauissimè canerentur. Ego nihil interesse puto, sepultus quis, an insepultus iaceat. Quod si aliquid interesset, malè actum fuisset cum Martyribus nostris illis temporibus, quibus hæc religio omni tormentorum genere oppugnabatur, nec poterat expugnari. Tum enim Martyrum corpora laniata, & lacerata uel feris obijciebantur, uel in mare proijciebantur, uel flammis adusta & in cineres conuersa uentorum flatibus permittebantur; ipsos autem morte iam obita nihil incommodi tulisse,

De Immort. animi

tuisse, perspicuum, quin nec ethnici ipsi solliciti uidentur fuisse de sepulchro. Hinc illud Poëticum memoratur.

Facilis iactura sepulchri. Et illud

Tegitur cœlo, qui non habet urnam.

Demonax Philosophus, cuius aliquoties in superioribus memini, quum in extremis ageret, & discipuli quærerent de sepultura. Nolite (inquit) de hoc esse curiosi: odor me sepeliet. Sic ostendit uir prudens se de hoc genere non laborare. Vehementius & longè fortius Theodorus Cyrenaicus Philosophus, cui liberius loquuto, quum Lyfimachus Rex crucem minitaretur. Horribilia ista (inquit) minitare purpuratis tuis, Theodori quidem nihil interest, humani sublimè putrescat: pertinet hoc ad propinquos & amicos superstites, præcipua autem cura hæredum esse debet, ut reddatur terræ corpus, & quasi operimento matris obducatur. Tantam autem dignitatem putatur habere humanum corpus, quodd sibi coniunctum habuit animum, rem sanè sacram, cœlestem atque diuinā, ut illud mandare sepulchro, ne à uolucris & feris diripiatur, inter pietatis opera numeretur. Hinc fabula illa notissima de eo, qui quum humanum cadauer proiectum uidisset, humareque uellet, dum effodit sepulchrum, inuenit, thesaurum, quasi Dijs pro mortuo gratiam referentibus. Et humanitas quidem tumulari mortuorum corpora postulat, quamobrem fufis prælio hostibus reddebant uictores occisorum cadauera suis repetentibus ad sepulturam, idque adeò peræquè ab omnibus obseruabatur, ut si secus fieret, uiolari ius gentium existimaretur. Ipsa admonet natura parcendum esse ijs, qui iam fato suo functi sunt, & amplius nocere non possunt, & ut Poëta inquit.

Nullum cum uictis certamen, & æthere cassis.

Illud tamen tenendum, si intumulatus quis iacuerit, nec nocere id corpori, quod caret omni sensu, nec animo, qui illud relinquens aufugit, nec mouere debet corruptio, quæ etiam rite conditum, multisque obuolutum integumentis sequitur. A T H A. Audiuisse tamen & legisse potes quosdam inimicorum sæuisse in cadauera, eaque laniasse, nec passos sepulchro mandari. M A R. O magnam stultitiam: quid enim proficit cadaueris laniatio? quid in cloacas proiectio? Etenim quicunque ulcisci illatam contumeliam cupit, id potissimum agit, ut quàm acerrimum inimico inurat dolorem, sed in laniatione cadaueris ubi dolor? ubi gemitus sentientis? non enim si dolet animus sine corpore, ita è conuerso dolet corpus sine animo: quid igitur iuuat sæuire in mortuorum cadauer? quod L. Sylla fecit, C. Marij cadauere exhumato, num ut miserum faciat? sed ubi nullus sensus est, ibi miseria contingere non potest.

Ter circum iliacos raptauerat Hæctora muros, quem Hæctora? uerius, quod Hæctoris fuit rapta. Nam ipse Hector iam deseruit locum, longè hinc auolauit. Imprudens ergo Achilles, si tunc se lædere Hæctorem putabat, qui tamen insimulatus à Græcis, quodd Hectorem

Hectorem Priamo reddidisset, sapienter respondit penes Pacuuium: Corpus Priamo reddidi, Hectora abstuli. Ciceroni immissi ab Antonio milites post auulsum humeris caput, manus etiam absciderunt, eas in, Antonium scripsisse improperantes. adeo stolida crudelitas, ut scuiat, etiam si nihil proficiat. Quid enim? num diffingi abscissione manuum aliquid potuit eorum, quæ scripta fuerunt? Imprecatur Virgiliana Dido iam moritura Aenæ plurima. Extremum illud est. Sed cadat ante diem: hoc cadere ante diem potest aliquid habere pœnæ: nam eripitur uita, & cum ea cætera omnia, quæ delectabant, at illud, quod sequitur uanum. Mediaque inhumatus arena. quid si humatus esset, num melius haberet? idem Poëta

Scilicet ut Turno contingat regia coniux,

Nos animæ uiles, inhumata infestaque turba.

Sternamur campis.

Vt enim sterni campis miserum sit, num inhumatū projici erit miserum? aut etiam infestum relinqui? quasi uiuentium lachrymis possit mortuus excitari. Præclare Lucanus in Pompeianæ necis descriptione. Nam quum occisus Pompeius fuisset ab Aegyptijs, ad quos bello uictus à Cæsare, auxiliij gratia confugerat: & arthra post mortem, (ut ille uoluit) conscendisset.

Vidit quanta sub nocte iaceret

Nostra dies.

Erat enim ingenti Stellarum lumine circumfusus: at iacet insepultus in littore abscisso etiam capite, non ille quidem, sed eius truncus: at molestè fert minimè, ideo subditur.

Risitque sui ludibria trunci.

Ridenda hæc potius sapientibus uidentur, quàm flenda: quid enim attingit inferre uim cadaueri? Primum sensu omni caret: deinde si cupis corruptum uidere, expecta paululum, iam ipsum natura dissoluet cum odore etiam tetro, nec secus tuo accidet corpori, quàm illius. Natura affectum est corpus friuolum & tabidum, ut hominibus potior esset animi cura quàm corporis. Simul & illud perspice, si humana corpora essent incorrupta, quomodo omnia plena essent cadaueribus, nulla sepulchra eorum multitudinem capere ualerent: aut si insepulta manerent, omnem terræ superficiem occuparent. Ineptè autem quisquis dixit, sepulchrum corporis esse portum. Nam, ut in eadem perstem similitudine, quæro num portus ad nauem pertineat potius, an ad nauigantes? Ego existimo potius ad nauigantes pertinere. Similiter dixerim, portum, id est locum quietis & securitatis ad animum potius pertinere, dum in corpore refidet, & eius præsidet regimini, & in eo quodammodo nauigat: sed ubi abiit de corpore, non magis corpus inanimatum curat sepulchrum, quàm nauis portum, cuius eadem est causa, siue in portu maneat, siue iactetur fluctibus, & mergatur: sensu enim omni uacua est. Improbatur igitur rectissimè, quod in corpus mortuum quisque ad eius iniuriam molitur:

tur:

De Immort. animi

tur: quanto autem magis conuenit omni in cadauera fungi benignitate?

Et tumulum facere, & tumulo superaddere carmen?

Exequijs præterea, ludis, canticis, certaminibus, & omni reliqua funebri pompa, quam mos patruus requirit, memoriam defunctorum decorare? quod etiam pertinet (quod multo est faciendum magis) ad acueendam uiuentium uirtutem. Magnum est enim gloria incitamentum laborum. Olim extruebantur sepulchra in uijs publicis, nunc Christiano ritu teguntur defunctorum corpora in cœmeterijs ecclesiarum uel tēplis: quæ loca sanè sunt consecrata. Cur id fiat; à Theologis nostris requires, ne uidear, quæ illorum sunt usurpare. Credo autem id factum fuisse, quia locus ipse sacer admonet, ut pro defunctis fundamus preces ad Deum, quo citius illi à purgatorijs pœnis exoluantur. Imaginaria autem sepultura, quam Græci Canotaphium uocant, idest inane, uel uacuum sepulchrum, quo ueteres frequentissimè utebantur, in usu penes nos esse desit: sed quid ago? Nescio enim, quomodo ab immortalitate animorum, de qua propofita fuit quæstio, defluxit sermo ad corporum sepulturam. A T H A. Ego in caussa: nam dum expecto scire quid contingat corpori post mortem, & an aliquid incommodi suscipiat, si intumulatum iaceat, huc delapsi sumus, ut de corporum sepultura loqueremur. Sed sit hæc, si ita uidetur, digressio uel aberratio ab instituto. Ex hoc tamen colligitur mortem pio bonoque uiro non esse metuendam, quæ malum non afferet, sed mali finem: nam ubi præstituta die hæc aduenerit, non patietur corpus aliquid omni sensu emortuum: animi etiã uires acrius uigent. Verum, ut redeamus unde defluximus, postquam damnata est eorum opinio, qui mortalem faciunt animum, & nihil homini putant post supremum plus esse, quàm fuerit ante primum diem, immortalitatemque complectitur pro uiribus: superest nunc, ut dicas, quod immortalitati est proximum, uel connexum potius & coniunctum, ubi excefferit animus à corpore, qualem agitet uitam, qui sit eius status & potissimum explicandum tibi diligenter, ad quæ loca proficiscatur. M A R. Rectè mones: nam plerique ab hac sententia immortalitatis fugiunt, quòd nullum esse locum in hoc orbe putant, quo animi, si post mortem corporis manent incolumes, recipiantur. Absurdum est enim, si animorum seiunctorum nullus est locus, dicere, quòd supersint, quandoquidem nihil sit, quòd alicubi non existat: quomodo autem id colligant, exponam, nisi tibi molestum sit. A T H A. Imò hoc maximè cupio audire. M A R. Necessè est (inquiunt) animum ubi à corpore decesserit, aliquo esse loco, nam nullo dici non potest, nam, si tunc existat de corpore fugiens, agit aliquid, nam aliter esset ociosus, quod non admittitur: agit autem, ergo alicubi existit, agens nanque agit ubi existit. Non etiam possumus tribuere substantiæ finitæ, quod propriè conuenit infinitæ: Deus nanque, quia substantiæ est infinitæ, est omni in loco & extra omnem locum, hoc, quod tanti est, animo non competit: quo igitur

tur erit in loco? Hic ego si tergiuersari uellem, possem dicere me nescire, quod interrogatur: Multa enim rerum ignorantia, multa caligo nos premit, ut non omnia, quæ cupimus, ea ueluti scientes absoluamus: Dicis necesse esse animum disiectum alicubi uel nullibi existere: concedam necessarium id esse, non tamen posse de loco decernere, satis mihi ad immortalitatis demonstrationem, quod existant exeuntes: stellas has, quas fatemur esse, necesse est pares esse aut impares. Roga utrum horum sit, dicam me non numerasse, nec numerari à quopiam mortalium posse, ideo nescire pari ne sint, an impari numero, nec sequi continuò me nescire stellas, imò scio: non enim si non omnia, quæ in re sunt, & uellem scire, teneo, ideo adimendum mihi est, quod ut certum scio. Ego tamen hac in re respondere uolo, quod maiorum tradit auctoritas, & ratio omnis suadet: alicubi igitur animorum esse stationem dicendum est: ita tamen, ut non sedeant tanquam in loco, sed diffiniantur tamen loco: nam ita est eorum aliquis ibi, ut non sit alibi: non enim infinitam tribuimus eis substantiam & uirtutem. In qua ergo uniuersi parte locamus? Sunt qui dicant extra cælum hoc, quod perspicimus, non extare, quia forsitan nullum locum cælo superiorem arbitrantur, & hanc extremam oram, determinationemque mundi habent. In cælo autem, ubi uoluntur sidera, ne hinc quidem animos hos collocant: ad quam enim rem ibi collocentur? habent enim orbes illi motores proprios & sibi congruentes: at propter stellam, ne hoc quidem dici potest, quum habeat stella quæque duces suos, nec animis sibi coniunctis quicquam decoris, aut perfectionis acquirat: ergo illic frustra erunt, nihil agent, nihil molientur, quis hoc dixerit? non enim si nobilis sit locus, ideo ociosos recipere debet, imò tanto minus debet, quanto nobilior: nam quodcunque opus non habet proprium, sine caret, qui mouet agentem, ideo ociosum manet, sed in rerum natura nihil esse ociosum omnis Philosophia exclamat, ergo illic superuacaneè animi non erunt: at in regione sublunari. Si damus his igitur igneum uel aëreum locum, non rectè faciemus. ille enim Dæmonum locus, ut Philosophorum etiam placita sequamur. Differentia nanque & distincta substantiarum abstractarum conuenit esse habitacula: non etiam illic manerent propter aliquod uniuersi bonum, quod ostendi possit, nam ad omnia inferiora Dæmonum possunt supplere ministeria. Hoc argumento commoti quidam, quum non reperirent locum congruum, in quo animos collocarent, huc adducuntur iterum, ut immortalitatem negent, nam si sunt, aliquo morari loco putant sibi concedendum, sed nullum habent locum, nullum habitaculum, quod haberent, si essent immortales, igitur ne sunt quidem. Hæc illi obiectantes num tibi nihil, uel aliquid dicere uidentur? A T H A. Mihi uerò aliquid, itaque expecto quid ad ista. M A R. Mihi uerò ita loqui uidentur, quasi sit quisquam, qui immortalitatem animis tribuat, & non eisdem locum assignet, intra quem uersentur. Variæ autem hac in re extitere sen-

H tentiæ,

De Immort. animi

tentiæ, non solum Doctorum, sed etiam indoctorum, nec paucorum tantum, sed nationum quoque & populorum, nec in Christi ecclesia modo, quæ animorum immortalitatem præcipue complexa est, sed uetustissimis quoque temporibus res agitata est, & penes alios diuersarum religionum ritibus imbutos. Illud modò uidendum & diligenter inquirendum, quæ uerè, quæ falsò proferantur, ut unis dimissis, altera teneantur. Et uulgò quidem olim credebatur, animos post corpoream hanc functionem subterranea habere habitacula, ibiq; malos pœnis cruciari ingentibus pro sceleribus, quibus uiuentes se se contaminassent, si qui tamen expiabiles & debiles contraxissent labe, hos purgari, necesse erat.

Ergo exercentur pœnis, ueterumq; malorum supplicia expendunt: alia penduntur inanes

Suspensæ ad uentos, aliis sub gurgite uasto Infectum eluitur scelus, aut exuritur igni.

Vt Virgilius noster memorat. Vbi autem purgati essent, transmittentur tunc ad Elysium, idest, locos lætos & amœna uireta.

Fortunatorum nemorum, sedesq; beatas, Largior hinc campos æther & lumine uestit

Purpureo, solemq; suum, sua sidera norunt.

Hæc etiam loca incolebant hi, qui honestè & laudabiliter æuum transegerant, & ut idem Poëta inquit.

Hic manus ob patriam pugnando uulnera passi,

Quique sacerdotes casti, dum uita manebat,

Inuentas aut qui uitam excoluere per artes,

Quique sui memores alios fecere merendo.

Nec tacuit Poëta actiones eorum: nam prioribus indicat teneri studiis: dum inquit,

Quæ gratia currum

Armorumq; fuit uiuis, quæ cura nitentes

Pascere equos, eadem sequitur tellure repositos.

Eadem canit Ouidius quarto transmutationum libro.

Errant exangues sine corpore & ossibus umbræ,

Parsq; forum celebrant, pars imi tecta tyranni,

Pars aliquas artes antiquæ imitamina uitæ

Exercent, aliam partem sua pœna coërcet.

Eodem descendere omnes è cunctis Orbis partibus testatur, nam describens loca illa inferna, quo recipiuntur animæ, ita loquitur.

Mille capax aditus, & apertas undique portas

Vrbs habet, utq; fretum de tota flumina terra,

Sic omnes animas locus accipit ille, nec ulli

Exiguus populo est, turbam uè accedere sentit.

ATHA. Quoniam de Elysio incidit sermo, uis ne quid de illo legerim penes Homerum exponam. MAR. Me utaris licet ex uoluntate.

ATHA.

A T H A. Elyfium hunc campum beatarum animarum sedem, promittit Proteus Menelao, ubi uitæ huius stadium decurrerit penes uetustissimū Poëtam Homerum, cuius uersus ita latinè sonant.

Elyfium in campum mittent extremaq; terræ

Te superi magni, sedem fortis Radamanti.

Illo uita loco facilè traducitur æuo,

Non ibi tempestas, non nix, non frigus imber.

Sed Zephyri blandè spirant, aurasq; salubres Oceanus mittit.

Arbitratur Strabo Homerum posuisse Elyfium in extremis Hispaniæ partibus, unde Zephyrus spirat. Plures tamen apud inferos posuerunt.

M A R. De Homero tu dixisti. Sed quomodo altisonam Pindari non Iyram, sed buccinam omittimus? qui & ipse uetustus piorum animis apud inferos existentibus, non longè dissimilia, imò ferè eadem tribuit, ut à Plutarcho relatum est in cōsolatione ad Apollonium. Dicam autem soluta oratione, Poëtici tamen utens illius uerbis. Illis (inquit) fulget deorsum Solis, quando hic est nox, iubar, & rosea prata illorum sunt suburbium, turiferis arboribus umbrosum, & aureis onustum fructibus, & hi quidem equestribus ludis, illi pedestribus se exercent, alij tibiis oblectantur, illic omnis florum pullulat opulentia: odorq; optatissimarum rerum per totum effunditur campum perpetuò. Ipsi uaria etiam odora menta miscentes & ualde splendido igne incendentes Deorum altaribus imponunt. Vides quæ Poëtæ afferunt non longè à sensibus discedentes, quamuis scirent disunctos à corpore animos corporeis carere sensibus: transferunt humanas delicias ad latebras inferioris terræ. Nec deerat inferis niger Rex, hunc Plutonem uocabant, uxoremq; eius Proserpinam Cereris è Ioue filiam, & Canem illi assignabant tricipitem Cerberum, iudices Aeacum, Minoen, Radamanthum Iouis filios: nauitæ stigiæ paludis Charontem: flumina Phlegetonhem, Cocythum, Lethen, Acharontem, Furias tres speculatrices & uindices scelerum, Aleæto, Thifiphonem, Megæram, quas etiam Eumenides nuncupabant. Sic gentes olim inferorum regna se habere arbitrabantur: quorum tamen pleraque sunt Poëtica: nec à grauib; uiris credita. Illa uulgaris erat opinio, cui assentiebantur ferè omnes, animas humanas finita uitæ huius militia tetram illam petere inferorum lacunam, non autem ascendere aliò arbitrabantur, quod maxime ex his, quæ sepulchris inscribebantur, conicere datur. Lege epigrammatum Græcorum, quæ in mortuos condita sunt, libellum. Illic plurima de inferis mentio, quasi locus ille esset animis ex-euntibus destinatus, de cœlo aut altera regione uix sermo. Lege Poëtas, & alios scriptores latinos, non alia ferè loca inuenies defunctorum manibus, quàm inferiora terræ tributa. Si quos tamen antiquitas ob eximiam uirtutem, uel præstantia erga genus humanum merita, uel ob ambitionem in Deos retulit, hos supra sidera collocabant, hisq; templa, & statuas & sacrificia statuebant, hinc Hercules, & Bacchus, & plerique a-

De Immort. animi

lli in cœlum uenerunt, & diuinos honores meruerunt, quod etiam fecit in Daphnide suo Virgilius, notum est etiam, quemadmodum longo post interuallo Imperatores suos uita functos Romani consecrabant, & diuorum nomine nuncupabant, eadem omnia illis tribuentes, quæ dijs celestibus solebant: & (ut summatim dicam) neminem in cœlum recipiebant nationes & populi, nisi qui, aut in æternorum Deorum essent ordine, aut è mortalibus procreati, diuinitatem postmodum adepti fuissent, qui sanè exiguus erat numerus, reliquos inferiorum regna colore arbitrabatur. Hic Clazomenius quidam rogatus ab amicis, Athenis ne mallet ubi diuersabatur, an in patria sepeliri. Nihil (inquit) mea refert, nã ad inferos tantum est uia. Nota etiã illa uox Leonidæ Regis Thermopylis. Prædite Spartani apud inferos cœnaturi; atque hæc ad eos dicuntur, qui pro uniuersæ Græciæ libertate pugnabant, ut intelligatur apud gētes nullā cœlestis domicilii cogitationē fuisse. **ATHA.** Quid de Iudæis dicis? quid sentiebant? **MAR.** Hoc quod interrogas facit, ut minus mirum sit de alijs gentibus, quandoquidem. Iudæi ueteres, quibus uera erat cognita religio, eadem asseuerarent. Non loquor de impijs tantum, sed de his etiam, qui iustitiæ opinione clari erant. Vnde enim illa Iacob uox? Descendam ad inferos si lium meum lugens? Ezechias quoque Rex denuntiata sibi à Propheta morte, nonne illud protulit? Ego dixi in dimidio dierum meorum, uadam ad portas inferi: nondum enim Agnus cœlestis profusione sui sanguinis aulam illam supernam gaudiorum plenissimam patefecerat. Credo naturæ factum instinctu, ut homines ommissis fabulosis consentirent animos post mortem subterranea petere loca, quia ita ueritas, quam nos sequimur, ferebat. Philosophi autem, qui sapientiæ opinione elati incedebant, in falsas iere sententias. Horum acutissimi Stoici summum bonum in una uirtute statuentes, imperitorum animos corporis reliquijs oblitos, & ea de causâ imbecilliores redditos humi uolitare. Sapientum uerò animos, quales Philosophorum sunt, in sublimem euadere locum, & ad igneam usque regionem penetrare: illicque non semper, sed diutissimè, tamen permanere asseuerabant. Quicumque autem Pythagoræ & Platonis disciplinam sequuti sunt, malos in terræ infimo ingentia persoluerunt supplicia, sicut ceteri, dixerunt, & eos pariter, qui sordibus fœdati sunt mediocribus, purgatorijs subiiciunt poenis, donec concreta labes eximatur; tunc purgatos aiunt ad ætheream peruolare regionem, & usque eo ascendere, donec leuitatem & calorem naturæ suæ congruum inuenerint, tum consistere ueluti paribus examinatos ponderibus, magnarumque capere spectacula rerum, ingentibus gaudijs perfusos: eodem peruenire rentur illos, qui minimum contagionis cum corporibus habentes, & à societate carnis, quantum fieri potuit, discedentes puri mundi que hinc exierunt. Hac à sententia non ualde aberrat ille, qui in Senecæ libris consolationem scripsit ad Martiam, quæ unicum filium adolescentem amiserat, siue is Seneca, siue alius auctor fuit. Nam in extrema

trema pagina his ferè uerbis mulierem alloquitur. Non est Martia, quod ad sepulchrum filij tui curras. Pessima enim & illi molestissima istic iacent ossa, cineresque non magis illius partes, quàm uestes, tegumentaque alia corporum. Integer ille nihilque terris relinquens fugit, & totus excessit, paululumque supra nos commoratus, dum expurgat uitia, situmque omnem mortalis æui excutit, deinde ad excelsa sublatus inter foelices currit animas, excipitque illum cœtus sacer noua luce gaudentem. Miratur uicinorum siderum meatus, nec ex coniecturis, sed ex uero peritus in arcana naturâ progreditur, iuuatque sapius profunda terrarum & iam relicta ex alto despicere. A T H A. Verè iste sequutus est (quisquis fuit) in hac consolatione sententiam Pythagoreorum & Platoniorum, sed nescio quomodo uideatur corpus mortuum ualde negligere, & ossa, quæ uocat pessima & molestissima. M A R. Magno in errore uersati sunt Philosophi, quamuis studio flagrantissimo essent & ingenio politissimo, sed nihil miror. Intumuerant illi opinione sapientiæ suæ, & quæ maxima sunt mysteria, à sapientibus abscondit Deus, & reuelauit paruulis. Hanc Philosophorum sententiam sequutus est etiam Cicero Latinorum omnium eloquentissimus. Ille in Scipionis somno animos censet à Deo datos hominibus ex sempiternis stellarum ignibus, atque eos, qui patriam conseruarint, adiuuerint, auxerint, ubi è corporis uinculis euolauerint, in cœlum reuerti, & peruenire in circulum splendidissimo splendore inter flammæ præditum, quem Graij Lactæum orbem nuncuparent, tanquam in naturalem sedem, & suam dômum, idque ocius facturos eos, qui dum essent corporibus inclusi eminebant foras, & ea, quæ extra erant, contemplantes à corpore se abstraxissent: alteros uerò, qui uoluptatibus se dedissent, earumque se quasi ministros præbuisissent, & impulsu libidinum iura Deorum & hominum uiolauissent, corporibus elapsos circum terram uolutari, nec in cœlum, nisi multis sæculis exagitatos reuerti. Hæc ibi ille, & eadem ferè dicit in Tusculanis quæstionibus Platonem suum imitatus. Luculentissimè etiam eadem reuoluit in consolatione de obitu filia. Non omnibus (inquit) ijdem illi sapientes arbitrati sunt eundem cursum in cœlum patère. Nam uitij & sceleribus contaminatos deprimi in tenebras, atque in cœno iacere docuerunt: castos animos, puros, integros, incorruptos bonis etiam studiis atque artibus expolitos leui & facili lapsu ad Deos idest ad naturâ similem sui peruolare. A T H A. Hæc Philosophica Lucanus poëta dissentiens à Virgilio prosequutus est etiam uersibus. M A R. Quid hic Poëta? A T H A. Miror te esse oblitum, nam partem huius carminis paulò ante memorasti, dum de Pompeij trunco loquereris. Carmen ipsum integrum teneo, si uis audire. M A R. Dic si libet dicere. Nolo hunc omitti, quem secundum Poëtam quidam faciunt, & clarissimū sententijs Quintilianus uocat. Interfectus (ut non debuit) à Nerone fuit adhuc iuuenis, hinc opus suum inemendatum imperfectumque reliquit. Sed quid tandem ait iste

De Immort. animi

iste secundarum partium in cantico poetico auctor? A T H A. Ille haud dissimilia superioribus enuntiat, Stoicorum tamen sententia propinquius. Ecce do tibi carmina. Nam describens locum, quem Pompeius post necem petijt, sic inquit.

Sequitur conuexa tonantis.
Qua niger astrigeris coniungitur axibus aer,
Quodque pater, terras inter, lunaque meatus
Simidei manes habitant, quos ignea uirtus
Innocuos uita patientes aetheris imi
Fecit, & aeternos animam collegit in ignes.
Non illic auro positi: nec thure sepulti
Perueniunt. Illic postquam se lumine uero
Impleuit, stellasque uagas miratur, & astra
Fixa polis, uidit quanta sub noctu iaceret
Nostra dies, risitque sui ludibria trunci.

M A R. Video hunc Poetam eadem sensisse, quae Philosophorum antea quique praecipui. A T H A. Dici aliter non potest. M A R. O mi Athanasi, quam ualde uereor, quae illi huic sententiae subiiciuntur, eloqui. A T H A. Quid uereris? M A R. Vereor inquam ne si quod addunt dixerero, non uideatur uerisimile haec illos dixisse: absurdiora enim proferrunt. A T H A. Quae? Num quae ab eisdem ponebantur de transmigratione animarum, nam peractis aliquot annorum millibus humanas animas transire in beluarum corpora, & beluinas in humana tradebant, atque ita demum e uiuis mortuos, & e mortuis prodire uiuos. Haec sunt illa absurdiora, quae ab his proferri putas. M A R. Ista ipsa. Nam quid absurdius fingi potuit? Quid minus uerisimile dici, quam qui nunc sunt homines beluas fore: & quae nunc sunt beluae, homines futuros? quis credere possit uiros sapientiae studiosos, tam excellentibus ingenijs armatos in hunc errorem incidisse, nisi legisset? A T H A. At haec sententia, si neminem alium legissem, mihi incognita esse non potuit ex Ouidio, qui illam luculenter expressit uersibus. M A R. Dic quae uersus, postquam inter Poetas uersamur, & ueluti in Senatu exquirimus eorum sententias qualescunque sint: delectant enim illi in absurda etiam sententia, tantum ualet compositis pedibus fluere. A T H A. Inducit ille ultimo transmutationum libro Pythagoram sua praedicantem dogmata cum exhortatione ad mortis contemptum: inquit enim sic.

O genus attonitum gelidae formidine mortis,
Quid styga, quid tenebras, quid nomina uana timetis,
Materiam uatum, falsique pericula mundi?
Corpora siue rogi flamma, seu tabe uetustas
Abstulerit, mala posse pati non ulla putatis,
Morte carent animae, semperque priore relicta
Sede nouis domibus uiuunt, habitantque receptae,

Omnia

Omnia mutantur, nihil interit, errat, & illinc
 Huc uenit, hinc illuc, & quoslibet occupat artus
 Spiritus, æquè feris humana in corpora transit.
 Inque feras noster, nec tempore deperit ullo.
 Utque nouis facilis signatur cera figuris.
 Nec manet, ut fuerat, nec formam seruat eandem.
 Sed tamen ipsa eadem est, animam sic semper eandem
 Esse, sed in uarias doceo migrare figuras.

MAR. Vides in quàm intolerabilem errorem inciderint præclara ingenia. Sed num uno falso posito, plura absurda sequuntur? ATHA. Sic dicitur. MAR. Ergo ex hac transmigratione animarum humanarum in beluarum corpora, sequitur illa abstinencia animalium, nam prohibebant uesci alijs animalibus, ne fortè quis aut parentes suos, aut amicum, aut familiarem, aut colonum manducaret, seu animas eorum ex illis corporibus deturbaret. ATHA. Hoc non tacuit idem Poëta Ouidius. Nam in commemoratione illius Pythagorici dogmatis, hæc subiicit

Ergo ne pietas sit uicta cupidine uentris,
 Parcite (uaticinor) cognatas coede nefanda
 Exturbare animas, ne sanguine sanguis alatur,
 Quumque boum dabitis cæsorum membra palato,
 Mandere uos uestros scite & sentire colonos.

MAR. Argutè id quidem, quòd uoluerint animas colonorum transire in boum corpora, quæ curabant uiuentes, atque præ agricolandi studio magnificiebant. ATHA. Irrides ista, sed hoc non irridendum uidetur, quod prohiberent homines à carniū esu, quia per hunc pinguescere animas & tardiores fieri arbitrabantur: pinguis enim uenter (ut est in Græcorum prouerbio) non gignit sensum tenuem. MAR. Non reprehendo, quòd iusserint abstinentiam à carnibus, sed quòd huius rei causam attulerint, ne inciderent fortè homines carnibus pecudum uescientes in propinquorum hominum comestionem. Quid autem irridere tibi hæc uideor: non ego primus id facio. Nam, ut alios omittam, nonne Labe-rius mimographus illud in scena protulit? audire mala multa ex bonis, deinde in Philosophos.

Ut nunc de mulo hominem, & de muliere colubrum
 Faciant, & ex diuersis diuersa alia.
 Sed ut omittam de hac ridicula transmigratione animorum dicere, & ut transeam ad reliqua, ego, quæ de animorum immortalitate, de eorum poenis & præmijs Pythagoræ & Platonis sectatores dixerunt, ea paulò ante uideo expoluisse. De Pythagoræ autem ipsius libris nihil possum sumere. Ipse etenim nihil scripsit, & suis præcepit ne quid scriberent, sed memoriæ mandarent, occulta nanque esse cupiebat, quæ de diuinis inter sapientes agitabantur, quin etiam ea, quibus uita hominum ad rectius uiuendum instruebatur, figuratis loquutionibus uelabat, qualia sunt.

sunt. Hirundinem sub eodem tecto non habeto. Stateram ne transilto. Ne per uiam publicam ambulo, & similia. Et iste quidem sic habebat. Ipse autem Plato existimatur Pythagoram in diuinis sequutus. Nam Architam Tarentinum Pythagoreum iam antea audierat. Multa autem scripsit, & ut ueniam ad id, de quo agitur, sparsim plurimis locis scriptorum suorum humanas animas ab omni interitus iniuria liberat, maximè autem hoc agit in decimo de Repub. & in Gorgia, & in libris legum sancit legem contra eos, qui hoc audent inficiari, quin etiam proprium de hac re confecit librum, qui Phædro inscribitur. Socrates enim ibi inducitur, qui in carcere eo die, quo sibi moriendum uidebat, hanc in partem acerrimè disputat astante discipulorum cœtu. Quàm multa autem de grauissimis iniustorū pœnis, & de maximis iustorū præmijs differit? nusquam autem omittit purgari eos, qui leuiter deliquerint, donec patientes, ea quæ tales pati oportet, meruerint purgati melioris loci mutationem, eos uerò, qui extrema iniustitia detinentur, ut qui animum suum periuriis, fraudibus, stupris, cœdibus, rapinis, undique & profūdus cōquinauerint, quod maximè reges & tyranni, & in imperiis positi facere cōsueuerunt propter peccandi licentiam, nunquam tristissimis illis & horrendissimis pœnis liberari, ut potè, qui sanari non possunt. Nonne hæc apud Platonem legisti? AT HA. Non memini me legere, sed posthac diligenter huius uiri scripta lecturū spero.

Extat Dialogus incerti auctoris, qui falsò Platoni inscribitur. Illic idem Socrates inducitur assistere cuidā morituro, & id ipsum ægrè ferenti, quòd moriatur, quem ut animaret ad mortem Socrates, uitæ primùm narrat incōmoda, deinde, quæ cōtingūt animis, ubi corpus exuerint apud inferos, de campis elysijs, de Plutonis regno, de Sisyphi saxo, Danaïdum urnis, & alijs sceleratorum pœnis, eadem ferè omnia, quæ Poëtæ: ea Socratis dicit se à quodam Gobria mago didicisse, qui uiderat ipsa insculpta Deli in tabulis æneis, quum præpositus fuisset ad custodiam Insulæ per id tempus, quo Xerxes magna manu Græciam inuasit: ad extremum ea dicit Socrates se non affirmare: illud unum certò scire, quòd omnis anima sit immortalis: & quicumque piè uixerit, ubi ab his locis discesserit, siue infra, siue supra feratur, fœlicem fore. Hæc eadem Plutarchus Chæronensis, qui eiusdem scholæ sectator fuit, non dubitat asseuerare, quanuis aliis imaginibus id effinxerit, in libro, quo de Deorum in sceleratos ultione disputat, eamque nunquam feram fuisse, nec esse, mirabiliter edocuit. Inter cætera uerò ait pœnas, quæ hîc impijs hominibus emendationis gratia imponuntur, similes esse Barbarorum pœnis. Nam apud Persas eorum quos emendari dignos censent, uestes & tiaras uellicant & flagellant. Illi autem lachrymantes finem sibi suppliciorum orant. Sic hæ, quæ infliguntur pœnæ in pecunia, uel corporibus, tactum non habent acutum, nec ipsum apprehendunt uitium, sed sunt earum plurimæ, ut ipsi opinantur & sentiunt. At ubi ad inferos intemperans impurusque proficiscitur, nudatam afferens animam omnibus

bus inuolucris atque in tegumentis : nec habens unde se subtrahere, & scelera tegere ac uelare ualeat, sed omnino ab omnibus & per omnia cognitus, hunc diuina ultio apprehensum ostendit primum parentibus & progenitoribus bonis, si qui tales sunt, tanquam uilem & degenerem. Sin autem prauis fuerint, tunc conspiciens illos in tormentis & conspectus traditur doloribus & suppliciis, quæ magnitudine & uehementia tantum hæc exuperant, quæ in carne perferuntur, quantum res uera à somniis differunt perspicuitate. Hæc Græcus ille penè ad uerbum dicit. Nec aliter religionis nostræ alumni sentiunt. Pone (inquit Chrysostomus) (si placet) ignem, & ferrum, & bestias, & si quid est his crudelius, attamen hæc neque umbra sunt, imò ludus & iocus ad illa tormenta : hæc quæ hîc patimur, quando uehementissimè intentantur, tunc maximè leuia fiunt, celeriterque liberant corpore non sufficiente ad tantam uehementiam ac prolixitatem pœnæ. Illic autem non sic, sed summa erunt supplicia : nec imminuetur animæ substantia ob suppliciorum grauitatem. Immortalis ipsa in immortales cruciatus proijcitur. Quæ si uera sunt (ut ipse existimo) optandum est, ut quemadmodum inter Persas suis induti uestimentis percutiebantur homines, ideo uerba leuius affligebant : sic dum sumus in corpore, pœnæ in nos influant pro flagitijs, quæ admisimus : potiusquam cum anima nuda eas luamus : hoc enim pertinet ad magnitudinem suppliciorum subleuandam. nam quin culpam par pœna sequatur (nisi Dei misericordia aduenerit) uitare non possumus. **ATHA.** Tu quidem fortis es animo, qui pœnas nunc tibi pro sceleribus tuis infligi à Deo exoptas. **MAR.** Ea quidem de causa, quam dixi, nā scitum est illud.

Terre minora uolo, ne grauiora feram. Hoc optans non tam fortis, quam sapiens existimari debeo. Sensus repugnant, & præsentaneum recusant supplicium, quia minus, quæ longè absunt, speculantur, at ratio huc deducit : nam ita nunc indignatur Deus aduersus delicta, ut misericordiæ etiam suæ recordetur, imò ipsa indignatio misericordiæ est : nam castigat omnem filium, quem recipit, punit, ne durius puniat, irascitur, ne uehementius irascatur. Ego igitur sic opto. Si qui autem differri uolunt, timendum est, ne illa pœnæ dilatio ueluti foenerato capiatur. Sed de his forsitan posterius. Sed quid prætereo uetustissimum horum omnium magnaue olim auctoritate magistrum ? **ATHA.** Quem dicis ? **MAR.** Mercurium Aegyptium. **ATHA.** Eum ne, qui ter maximi nomen adeptus est ? **MAR.** Illum ipsum. Antecessit iste multis ætatibus cunctos Græciæ Philosophos. Miror in tanta illa uetustate sæculis adhuc rudibus & nōdum expolitis, tria in illo maximè, ut hoc respondeat illi cognomento ter maximi. **ATHA.** Quæ tria ? **MAR.** Miror ingenium, eloquentiam, & in plerisque arduis ueritatis inuentio-nem : nam omnia uera uidisse nunquam dixerim. **ATHA.** Quid igitur ille hac in re ? Iuuat enim uerba eius (si tenes) audire. **MAR.** Audisti ab initio, quemadmodum immortalitatem animi posuerit. Repetit idem in

I libro,

De Immort. animi

libro, qui Aesculapius inscribitur, addens quo fine hæc immortalitas claudatur. At quæ uerba torquet in incredulos? quas sententias effundit? Ita enim ibi ipse loquitur. Multos (inquit) spes, timorque mortis ueræ rationis ignaros excruciat. Mors enim efficitur dissolutione corporis labore defessi & numeri completi, quo corporis membra in unam machinam ad usus uitales aptantur: moritur enim corpus, quando hominis uitalia ferre posse destiterit, hæc ergo est mors, corporis dissolutio, & corporalis sensus interitus. De qua homines sollicitudinem sumunt super suam: aliam autem necessariam prætermittunt ex ignorantia, uel incredulitate. Hic quum Aesculapius colloquutor interrogasset Mercurium, quid ignorant homines, aut esse diffidunt. Tum ille. Audi igitur ò Aesculapi. Quum fuerit animæ à corpore facta discessio, tunc arbitrium examens; meriti eius transliet in summi Dæmonis potestatem, isq; eam, cūpiam, iustamq; præuiderit, in suis competentibus locis manere permittet. Sin autem delictorum illitam maculis, uitiiisq; oblitam uiderit, desuper ad ima deturbans, procellis, turbinibusq; aëris ignis & aquæ sæpius discordantibus tradet, atque inter cælum & terram mundanis fluctibus in diuersa semper æternis pœnis agitata, raptabitur: ut in hoc obsit animæ æternitas, quod sit immortalis sententia æterno iudicio subiugata. Ergo ne his implicemur, uerendum, timendum, cauendumq; esse cognosce. Increduli enim post delicta cogentur credere, non uerbis, sed exemplis, nec minis, sed ipsa passione pœnarum. Habes, quæ de malorum suppliciis contra incredulos scribit Mercurius; subdit postea de iustorum præmijs in hunc modum. Iusto (inquit) homini in Dei religione, & in summa pietate præsidium est. Deus enim tales ab omnibus tutatur malis. Pater enim omnium & Dominus, qui solus est omnia omnibus, se libenter ostendit, non ubi sit, nec qualis sit, nec quantus, sed hominem sola intelligentia mentis illuminans. Qui discussis ab animo errorum tenebris, & ueritatis claritate percepta, toto se sensu intelligentiæ diuinæ commiscet, cuius amore, à parte naturæ, qua mortalis est, liberatus, immortalitatis futuræ concipit fiduciam. Hoc ergo inter bonos, malosque distabit: unusquisque enim pietate, religione, prudentia, cultu, & ueneratione Dei clarescit, quasi oculus uera ratione perspecta, & fiducia credulitatis suæ in tantum inter homines præstat, quantum sol cæteris astris lumine suo antistat. Hæc ab illo sunt, quæ (ut opinor) non longè absunt à Christiana disciplina. Infinita omnia sunt in Deo, ideò non possumus, nos, qui finitam habemus substantiam, infinitatem eius percipere. Videbimus tamen eum sicuti est, & non iam in ænigmate, sed facie ad faciem, sicut sacris literis continetur, de quo latius scripsi in libris, quos de Deo confeci, & aliquid etiam postmodum dicitur, ut hic sermo iusto fine claudatur. Hæc eadem affert idem Mercurius alio in loco, quemadmodum penes Petrum Crinitum relatum est, iuuat autem huius uetustissimi auctoritate uti, ut qui tanta in re nostris non credunt, credant satis alienis.

Nostri

Nostri enim, quibus iustias erat credendum, diuinitus afflati illa protulerunt, quæ illi lumine tantum mentis perspexerunt. A T H A. Recta est hæc ratio, ita faciendi. Sed quid is ait? M A R. Animantium (inquit) corpus ex quatuor elementis constitutum est à Deo. Habet enim aliquid in se ignis, aliquid aëris, aliquid aquæ, aliquid terræ: neque tamen ignis est, neque aër, neque aqua, neque terra, quæ facile probari possunt: nam terræ ratio in carne est, humoris in sanguine, aëris in spiritu, ignis in calore uitali, sed neque sanguis à corpore secerni potest, sicut humor à terra: neque calor uitalis à spiritu, sicut ignis ab aëre: adeo rerum omnium duo sola reperiuntur elementa, quorum omnis ratio in nostri corporis fictione inclusa est. Itaque ex rebus diuersis ac repugnantibus homo factus est, sicuti & mundus ipse ex luce ac tenebris, ex uita & morte. Quæ duo inter se & in homine pugnant: ut si anima superior euaserit, quæ ex Deo trahit originem, sit immortalis, & in clara perpetuaque luce uersetur: sin corpus euicerit animam, suoque imperio subiecerit, in tenebris sempiternis, atque in obitu delitescat. A T H A. Quum hunc audio Aegyptium rectè iudico fecisse Empedoclem, Democritum, Pythagoram & postea Platonem, quòd ad Aegyptios profecti sunt, ut eorum sapientiam audirent. Nam quæcunque apud illos didicerunt, uidentur postea in Græciâ retulisse, sicuti hæc, quæ præ manibus sunt, ostendunt. M A R. Non solum rem philosophicam, sed cæteras quoque disciplinas Græci à Barbaris susceperunt, comptiores tamen ingenio suo reddiderunt: pleraque autem corruerunt, sicut Aristoteles fecit, qui mundi inuenit æternitatem contra ueterum sententiam. De immortalitate animi, quid dixerit, superius expressimus. De reliquis uerò, quæ immortalitatem sequuntur, non uidetur aliquid dixisse. Inueni Aristotelicum quendam, qui differens de statu animi à corpore seiuncti mira quædam ex Aristotele referebat, sed pudet me illorum, quum in Aristotelis libris, qui proculdubio ab eo elaborati sunt diligentissimè, nihil illorum reperiatur. A T H A. Ignosci potest, si imprudens illa dixit. M A R. Mihi magis impudens uidebatur, sed non unus mihi ille talis occurrit: quoties me incidisse putas in istos Aristotelicos, qui ex Aristotele proferebant, quæ nunquam Aristotelis fuerunt. Iam Athanasi uarias & diuersas uides fuisse quondam de animorum separatorum statu sententias, quas qui perspexerit, non ne incertus reddetur? & conuersus ad humanæ sapientiæ studium, seu (ut Græci uocant) philosophiam, illud dicat?

Belua multorum es capitum, nam quid sequar? aut quem?
O' Christi disciplina, quantopere ueneranda es? te non hominum opinioniones induxerunt, sed ueritas ipsa fundauit. Deus Deus inquam hæc arcana nobis patefecit & reuerauit, ad huius disciplinæ regulam tanquam ad lapidem Lydium examinabimus quæcunque Philosophorum dogmata, ut quæ huic consonant ueluti uera teneamus, quæ dissonant tan-

I 2 quam.

De Immort. animi

quam falsa abijciamus. Dicemus autem de impiorum pœnis prius, postea de piorum præmijs, ut in meliora desinat oratio. An non ita faciendum censēs? A T H A. Nihil melius fieri potest. Itaque id uehementer expecto, nec expectaueris, ut medium me inseram sermonibus tuis, & interrumpam cursum orationis tuæ. Video enim te ad ueritatem totius disciplinæ tendere: quam nullis decet interloquutionibus turbare. Itaque, ut continenter dicas non amplius interrogans me & spectans flagito. M A R. Ita ne uerò mihi imperas? nunquam defugiam auctoritatem tuam. A T H A. Facis more tuo: tuus enim mos de amicis bene promereri.



MARCI ANTONII

NATTAE ASTENSIS,

DE IMMORTALITATE ANIMI.

LIBER QVINTVS.

MARCVS.



DOSTQVAM falsa coarguenda, & uera docenda sunt ad examem Christianæ doctrinæ, opto eam mihi eloquentiam dari, quæ tantæ rei par esse possit. Dicturi iam sumus de iniustorum pœnis, & iustorum præmijs, qui uidetur esse immortalitatis finis. In superioribus recordari potes me inter immortalitatis argumenta hoc posuisse: quod hîc & boni patiuntur aduersa, & mali fruuntur iucundis, ideo immortales animos effectos, ut post corporis mortem utrisque ex uitæ ante actæ merito, quod debetur persoluatur: debetur enim uirtuti præmium, iniquitati supplicium. Est enim homo actionum suarum dominus, flectere se potest, quam in partem uelit. Libertas concessa eligendi bonum aut malum unâ cum mente, quæ inter hoc & illud discernere ualeat. Cætera animalia carent utroque, & libertate eligendi & iudicio discernendi, sensu aguntur, feruntur impetu, rapiuntur appetitu. Nesciunt quid uirtus, quid uitium sit. Non datum est iudicium, quo sibi ipsis legem statuere & moderari queant. Quapropter non præmio nec supplicio beluas dignatur Deus, ideo animæ eorum unâ cum corpore extinguuntur: non enim conueniebat uocari illa ad iudicium, quæ iudiciû non habuerunt, nec ab his rationem exigere, qui non acceperunt. In homine secus accidit, qui arbiter sui ipsius constitutus in potestate habuit bene an malè ageret: ideo cum immortalis animo natus est, ut quum is hanc lucem deseruerit, exhibeat se ante iudicis iustissimi tribunal, & quid meruerit in corpore hîc agens excipiat, quodcunque illud sit, siue ad præmium spectans, siue ad supplicium. Certum quærimus quem statum teneant animi defunctorum. Certos reddit Saluator (cuius testimonio quid potest esse maius?) peccatores finito uitæ huius spacio ad inferna detrudi. Nam epulonem illum diuitem facit apud inferos cruciari ardenti flamma, guttamque petere à mendico Lazaro aquæ frigidæ, ut paululum

lulum

De Immort. animi

Iulum recreetur. Noli Athanasi putare Saluatorem ficta tunc usum similitudine docendi gratia, sicut cæteris locis facere consuevit. Vbi enim nominatim appellantur homines, illic historia in exemplum proponitur. Illic uides Lazarum, Abraam, Mosem, & quinque fratres illius diuitis nuncupari, quod fidem facit rem gestam narrari. Indicat etiam alibi tenebrosus esse locum, dum proponens similitudinem quandam, inducit Dominum, qui seruum nequã proijci iubet in tenebras exteriores, ubi erit (inquit) fletus & dentium stridor: hunc etiam locum, in quo peccatores torquentur nouo uocabulo appellat gehennam, cur ita appellauerit, ab alijs quærto, existimamus hunc esse in medio terræ: nam is infimus in rotundo locus, distans æquali spacio undique ab extremis, Græci centrum uocant. Illic miseri peccatores pœna plectuntur acerbissima uel ignis nimij, uel frigoris, uretque pariter eos malæ conscientia fax, dolorque eosdem tanget acerrimè dum uident se exules in perpetuum factos à cœlesti patria, ubi plena sunt gaudia, & summi tonantis (ut poëtice loquar) rutilat cœlicolis omnibus facies. Demum consentiunt omnes quicumque animorum immortalitatem crediderunt, eos, qui hinc nequiter uixerunt, pœnis illic plecti maximis, siue naturæ instinctu id dicerent: siue quod consentaneum rationi putabatur, quod iniquus contraria patitur his, quæ fecerat, hoc est, ut qui antea uolens gauisus fuerat in flagitijs, postea nolens doleat in supplicijs, & æternis torqueatur pœnis, qui nunquam uoluerunt carere peccatis. Hæc dicta sunt de his, quos peccatores mors inuenit: hi autem, quos pœnituit peccasse, reconciliarique se studuerint Deo, cuius mandata neglexerunt, si nondum pœnam, quanta flagitijs eorum debebatur, hoc in sæculo persoluerint, durior conditione apud inferos persoluent, pœnasque damnatorum sustinebant; in hoc tamen differentes, quod illorum sunt perpetuæ, pœnæ, horum temporariæ, donec scilicet ab omni sorde & labe fuerint mundati, & nitidiores facti meruerint Angelis comitantibus in patriam reuerti. Differunt, etiam hi alia ratione à peccatoribus, quod ipsorum pœnæ, ueluti purgatoriæ possunt supplicationibus, ieiunijs, elemosynisque uiuentium amicorum subleuari, quod non illis contingit, quorum culpa perpetua est atque indelebilis. Sic tamen habeto utrorumque pœnas adeo esse infestas, quod dicuntur, excedere sui grauitate supplicia, quæ hac in uita quisquam passus est, aut pati posset: maxima & intolerabilia quodammodo nonnulli ex Martyribus pro Christo pertulerunt, inferiora tamen illa fuerunt, quàm quæ alio in sæculo pro peccatis persoluntur, sicuti grauissimi auctores tradiderunt, quæ sanè omnia facilius credi debent à nobis, quibus hæc diuinitus innotuerunt, quum nonnullos Philosophorum, & hos, qui inter eos fuere præcipui, lumine tantum utentes rationis, eadem uidisse cognouerimus: nam & purgatorias quoque pœnas induxerunt, & uehementissimas esse existimauerunt, dum tunc animos nudos, nunc uestitos, flagellari dixerunt. Nèc renuo
tamen

tamen quin possit ille, qui infinitam habet sapientiam, paremque potentiam, eruere ab inferorum poenis quoscunque uelit, & alio loco alijs poenis affligere: nullis enim astringitur legibus ille, qui sibi lex est: cuius uoluntas iustitiæ est regula: hoc tamen, quod dictum est, si non semper, at frequentissime contingit, si modò diuinis statueris literis, magnisque earum interpretibus. Dices, quid paruulis fiet, qui nondum sacri unda Baptismatis abluti fuerunt, & tamen nullum habentes rationis usum delinquere non potuerunt, sed eos tantum culpa comitatur originis, num & hi torrentur igni, uel num ab omni poena uacui? uel si eos poena tenet, quæ & quanta in illis est? damnatos esse certum est, (nam, ut inquit in Euangelio Saluator) qui non crediderit, iam damnatus est, & nisi quis fuerit renatus ex aqua & Spiritu, non potest ingredi regnum cœlorum. Cruciantur ergo isti, qui per se non deliquerunt cum peccatoribus, & sempiternis pariter tradentur incendiis? durum uideretur. Itaque frequentiori Theologorum nostrorum calculo inferna quidem illos habitare receptum est, sed superiore loco, quam damnati, nec affici poena ulla, quæ percutiat sensum, sed sustinere illam duntaxat, quod priuatur bono, quo sanctæ animæ in cœlestibus saturantur: uolo uti hac in re illorum uerbis, quæ nequaquam absurdè se habent. Perferunt isti (inquiunt) poenam priuatiam, quod est damni, non posituiam, quod est sensus. Augustinus autem in enchiridio mitissimam omniū asserit esse poenam in infantibus, qui nullum aliud præter peccatum ferunt originis, ita ne à poena quidem eos liberat, nisi fortasse mitissimam uocat poenam bono summo carere: quam nos nuper damni poenam nuncupauimus: quam tamen poenam quidam acerbissimam esse, & omnes alias superare dixerunt. Sed quid de his dicemus, qui pueritiam egressi, nati rationis usum Christo non agnito cum uirtute uixerunt, si tamen uirtus esse ulla potest sine pietate? Attamen rectitudinem quandam uitæ tenuerunt, naturalem sequentes æquitatem, quales è Philosophis extitisse nonnullos traditum est, & quosdam rerum pub. Rectores? Num ipsi quoque poenas, quibus sensus affligitur euadunt? durior horum causa, quam infantium non ablutorum, nam hi per ætatem peccarunt, quum nullius uita immunis sit à peccatis, & inter honestos numeretur ille, qui minimis urgetur. Sed quomodo illa minima abolere poterunt, quum non contingat remissio peccatorum, nisi in fide, qua illi carent: in sanguine agni, quem non agnoscunt: in ecclesia Christi, quam non ingrediuntur? Multi tamen asserunt eandem istorum esse conditionem, quam diximus esse puerorum. Sunt, qui putent impios etiam nullas sentire poenas in inferis ad sensum permanentes. Nam si ibi est (inquiunt) ignis, necesse est, ut corporeus sit: quomodo autem corporeum aliquid potest quicquam in incorpoream naturam? nam non possunt se mutuò tangere, quorum extrema non iunguntur. Verè hæc dicerentur, nisi de Omnipotentis Dei iudicio, carcere, poenis, tortoribus ageretur. Ille enim penes se naturam ualere non patitur,

tur,

De Immort. animi

tur, ubicunque uisum est, nec mirum, quia ipse cunctam condidit naturam, & is potest tollere, qui condere potuit. Quod tam contra naturam, quam ignem refrigerare; attamen tres illi pueri, qui contempserant adorare auream statuam Babilonici Regis, missi in caminum ignis ardentis senserunt in medio flammæ uentum roris flantem, sicut in Daniele legimus. Inspice Heliam, qui quum in contentionem cum Prophetis Baal uenisset, composito ex lapidibus altari imposuit super ligna holocaustum & quum iterum & tertio perfudisset omnia aquis, ita ut current circum altare, & fossa aquæ ductus repleretur. Ecce de cœlo orante Helia cecidit ignis, qui (ut scriptum est) uorauit holocaustum & ligna & lapides, puluerem quoque & aquâ, quæ in aquæ ductu fuerat lambens. Sic ignis Infernus diuino iussu potest acumine suo penetrare in animas incorporeas, & creare dolorem, qualem nemo hominū hîc experitur. Nescio hac in re an testimonia desiderentur, sicut in iudicijs fieri solet, sed si quis ea querat, multos inueniet sanctissimos uiros, quibus Deo sic disponente animæ defunctorum igne uallatæ apparuerunt: aliæ pœnas suas ostendentes, & de damnatione sua confitentes: aliæ opem orationum ab his suppliciter postulantes: hæc plerique irrident, & sibi nimis arguti uidentur, dum nungantur, quis unquam inferos uidit? quis è mortuis reuersus est, ut renuntiare potuerit, quæ illic fierent? quem unquam legatum uiui misimus ad mortuos? quem exploratorem habemus? O stultitiam singularem, non credere Prophetis, non Apostolis, non Martyribus, qui Euangelij ueritatem non nudis uerbis, sed profuso sanguine testificati sunt, non sanctissimis uiris, qui paupertatem duritiemque uitæ sequuti, solis se inferuerunt diuinis. Quod si hæc eos non mouent, quæ sunt maxima, moueat omne ferè gentium & nationum opinio, quæ ab initio usque orbis conditi huc usque perducta est, & in posterum mansura uidetur, quæ nam hæc? malos apud inferos malè torqueri. Nolint credulitatem hanc in id tempus differre, quo rem ipsam experientur, tū quum id credere nihil illis sit profuturum, nam hoc ipso mali sunt, quod non credunt, ut mereantur credulitatis huius extorquendæ gratia illis proijci tormentis. Et de impiorum quidem pœnis hætenus. Restat, ut de piorum dicamus præmiis. Nam de his iucundior fuerit sermo. In primis cogitandum, quod hoc, quod præmia nobis largitur Deus, non id bonitati nostræ, sed suæ ascribere debemus: nos enim nunquam illa promeriti fuimus, quæ amplissimè nobis sine ulla (ut sic dicam) auaritia dilargietur, & ipse quidem Deus magis se liberalem dici, quam iustum amat, nam liberalitas, qua in bonos utitur, magis illi conuenire naturæ putatur, quam iustitia, qua fontes flagellat, quanuis in illo paria sint omnia, sed ita tamen dicimus, quia dum liberalitate utitur, facit, quod se est dignum: dum punit, quod dignum est peccatis nostris: finis liberalitatis est summa illius bonitas, finis iustitiæ hominum sunt delicta: utrunque tamen ab eodem fonte profisciscitur. Non puto autem te existimare piorum esse præmia Elysium campum, aut alias

alias fortunatas insulas, in quibus illi degant ludicra quædam exercentes, & odoribus, aliisque uitæ huius delitijs incumbentes, nā quum summi grauesque uiri hæc contemnant, seu paruifaciant, quomodo illis exutis iam corpore summa bona uideri possunt? hæ enim uoluptates ad corporis sensus propriè pertinent, quibus carent, & acriori tunc sunt iudicio quàm quum mole corporis premerentur. Pulchrum ne est igitur dicere, quòd sapientiores effecti desiderent & magnifaciant, quæ ad corporis pertinent uoluptatem, & quæ corporibus obsepti non curarunt; aut si hæc ipsi non amplectuntur præmia, incusabimus Deum, qui aut nolit, aut nequeat amicis maiora tribuere: agitur non de quorumlibet hominum præmijs, sed iustorum præstantiumque omni uirtute uirorum, his pro laboribus & erumnis exanclatis & toleratis, quibus alios iuuerunt, proque eo, quòd mores suos ad iustitiæ regulam composuerunt, & aduersus irrepentia uitia, nequitiasque cœlestes acriter Deo duce pugnaverunt, & nunquam à iure ad iniuriam protrahi potuerunt, his inquam talibus uiris uiuentia prata, frondosa memora floridos hortos, fontes uino & lacte scatescentes tanquam summa præmia proponemus, quasi hæc, quæ suauia sunt sensibus, faciant scelicem, uel ipsi in priori uita hæc prima habuerint, aut etiam sine ullo corporis instrumento his perfrui possint. Ignosci potest ueteribus Poëtis illa fingentibus, quia uidebant uulgus, cui canerent, ne in mortuis quidem ullum bonum, nisi quòd de corpore penderet, ponere, quanuis corpora eorum cremata, aut humata scirent, quapropter ne Heroës & alij magnanimi uiri in inferis positi omni essent orbatibono, quod uirtuti eorum parum conuenire uidebatur: his corporeis delitijs eos refererunt, quia uulgus impotens sensus deferere, ita etiam sentiebat, & Poëtis seruire populi auribus oportebat. Res demùm ita temperata est, ut nescias, utrum Poëtæ magis uulgus, an uulgus Poëtæ deprauarit. Sed nolo de his plura, quanquam si, contra has ineptias dicerem, facundus esse possem. Illud magis uidendum, an uera sit Pythagoreorum, Platoniorumque sententia, animos corporibus elapsos ad ætheream regionem ascendere, ibique locum naturæ suæ congruum, comparumque stellam nactus conuiescere. Sed hanc sententiam superiori improbauimus sermone: ueriti ne animi illic agerent ociosè, quum ipsi à stella nihil accipiant momenti: nec stella ad motum illis egeat. Nam quòd subdunt animos illo loco sublimi positos capere spectacula cœlestium terrestriumque rerum, ea cognitione plurimùm oblectari, hic uidendum est, quid sit ultimus humanarum actionum finis. Vltimum uoco, qui non habeat posteriorem. Ego homines omnia agere & moliri existimo, ut beatitudinem nanciscantur: nemo est, qui non omnibus optet uotis beatus effici, idque adeò perspicuum, ut non necesse sit interrogare aliquem cur hoc uelit. beatitudinem autem diffinio, ut ueteres, statum ex bonorum omnium congregatione perfectum. nam si uel aliquo malo, quantumuis minimo quis attingitur, uel aliquo careat bono, mi-

K fer

De Immort. animi

fer est, nec beati nomen illi couenit hanc beatitudinem non posse cuiquam in hac uita contingere, ijdem Pythagorei Platoniciq̃ue, quibus cū hęc disputatio suscipitur, aperto ore fatentur.

Sed scilicet ultima semper

Expectanda dies homini est, diciq̃ue beatus

Ante obitum nemo, supremaq̃ue funera debet.

Multa enim inscitia, plurimi dolores, assidui labores, nonnulli casus fortuiti, non sinunt optatam foelicitatem in humanis uersari. Nemo possit promittere sibi foelicem uitam: nam, ut priora rectē, ceciderint, posteriora incerta sunt: & in metu futurorum non potest absoluta contingere beatitudo. Itaque exspectandus est obitus (ut Poēta inquit) iustis pijsq̃ue hominibus & summa uirtute præcellentibus, ut beatitudinem cōsequantur, ne frustra natura parens hunc affectum humanis mentibus indiderit. Sed num (obsecro) cognitio mundanarum rerum hanc tribuet beatitudinem? fac aliquem scire creata omnia nullo præterito, nouerit numerum stellarum, arenæ, fluctuum maris.

Quæ sunt, quæ fuerint, quæ mox uentura trahantur.

Num ea cognitio eum faciat beatum? Illud quidem manifestum, beatitudinem, si qua contingere nobis potest, in ea parte uersari, quæ in nobis sit optima: ea porro posita est in animo, unde cognoscimus, intelligimus, iudicamus. Sed quomodo mundanarum rerum cognitio beabit nos, quum ea omnia longē hominis animo inferiora sint? nam quod beat alterum, necesse est, ut superius atque adē longē omnium beatissimum sit. Nam magna beatitudinis pars alium facere beatum. Stultissimum est ab irrationabilibus, & nihil intelligentibus rebus ob earum cognitionem expectare beatitudinem, qui nobilitate intelligendi diuinum (ut quidam dixit) genus & origo sumus, qui dignitate creatis omnibus antestamus: exceptis Angelis, quibus aliquando in patria erimus compares. potest quidem ordo rerum, qui est admirabilis, earumq̃ue species, quæ longē est pulcherrima, oblectare animos, ubi his intenderint, sed non usque eō attollere, ut reddant beatos. Sunt humani animi capacissimi, adē, ut eorum appetitus nequeant rebus creatis exhauriri. Possumus pulchriora quædam nobis effingere, quàm hęc, quæ perspeximus, possumus huic mundo, qui certis circumscriptus est limitibus, longiores addere cogitatione limites, & iterum atque iterum producere: possumus alios optare mundos, nec mirum sit optare, quum Democritus mundos etiam dixerit esse alios innumerabiles. Ille etiam Macedo urbium expugnator, populorum raptor, in membris adhuc situs mortalibus, alios quærebat mundos, non quos cognosceret, sed quos gladio superaret: unde dictum est.

Vnus Pelleo iuueni non sufficit orbis,

Sicut igitur nec honores hi, quos cernimus, multiplicati, & alij super alios ingesti, sic, ut nec multitudo opum, diuitiarum, potentia, gloria, assidue affluens unquam potest profundissimam illam humanæ cupiditatis

tatis lacunam implere, pari ratione nostram hanc sciendi cognoscendiq; aueritatem nequaquam poterit, mundi huius cognitio explere: quum animus extra hunc mundum cogitatione sua progredi, & ulteriora ad cognoscendum petere possit. Nullus enim numerus, nulla mensura, cui humana mens non adijcere, nullum finitum, quod cogitatione non ualeat augere: ex quo colligitur non ultimā subministrare nobis tunc quietem, quæ certis finibus conclusa sunt, quum in alia progredi & cognitis addere optando possimus. Illud præterea considerandum, quàm manca & debilis sit cognitio hæc, quæ de rebus habetur, ut habeatur de omnibus, nam non modo omnia, sed ne multa quidem simul & uno (ut aiunt) conspectu cognoscere ualeamus: nisi multa illa cohæreant, & ueluti partes referantur ad totum. In reliquis uerò distractis & separatis accedimus seorsum ad singula, & unum post aliud ad cognoscendum arripimus. Quo circa non potest hæc cognitio, quæ paulatim fit & succedaneo motu contingit, beatitudinem suppeditare: beatitudo enim tota simul aduenit & firmiter commoratur, aut beatitudo non erit: de uera enim & perfecta loquimur, non de qualicunque beatitudine. Plato ipse uniuersales quasdam posuit singularum rerum species, quas ideas uocat, has æterna uoluit esse exemplaria eorum, quæ naturaliter fiunt, incorporeas ponit, immutabiles, inuiolabiles; ex his fluere reliqua omnia arbitratur, ueluti ab unico sigillo impressa: has solas res ueras esse putat, deteriora uerò esse hæc, quæ similem formam ab his suscipiunt. Harum contemplatione idearum censet animos, ubi exierunt, esse beatos, quasi ueritatis inspectionem tunc suscipiant. Hoc dicit eo in libro ubi de immortalitate animi agit, & alibi sæpius, quæ tamen omnia incurrunt in eodem scopulos & cautes, quæ modò superiori cognitioni obieiebantur. Nescio enim uidere quomodo beatitudinem præstare magis queat idearum conspectus, ut eas esse concedamus, quàm cætera, quæ ad earum similitudinem finguntur, præsertim quum ideæ non propter se ipsas, sed propter illa sint. Quid? quòd extra mentem artificis nullæ sunt? improbatæque ab Aristotele, & ut intelligatur non tam ambitiosè, quàm uerè ideas abijcere, exclamat: Amicus Socrates, amicus Plato, sed magis amica ueritas. Quod igitur erit negocium animorum ubi fuerint dissociati? quæ illorum opera? ubi beatitudo? nam si ea est, suscipit ipsam intellectus, qui præcipua pars animi est: nam memoria & uoluntas intellectum subsequuntur: non enim meminisse possumus, nisi intellecta, nec uelle nisi cognita: intelligat ergo animus necesse est, ut sit beatus, sed quam rem intelligit? quid ei obieciatur ad contemplandum, quòd ubi intellexerit, intelligat se pariter beatum esse? Dixi cognitionem rerum creatarum non posse beatitudinem præstare. Reliquum est, ut ad Creatoris cognitionem confugiamus, nam hanc nondum attigimus. Illic (ut meam dicam sententiam) necessariò inuenitur, aut nullibi est. Sic enim dico necessariò illic inueniri, quia res perinde est, ac si in amici domo

De Immort. animi

rem nobis à Domino promissam esse sciamus, & inuenire cupiamus, ut eam auferamus. Dominus autem domus patefactis foribus per conclauia omnia, per cubicula, undique demum quærere arbitratu nostro permittat, si peragratis omnibus domus partibus non inuenitur: reliqua adhuc una sit, ubi scrutari oporteat: nonne dicemus necessarium fore, ut quod quæritur, illic sit? Et ut planius res adhuc intelligatur, alio utemur exemplo, de loco ad personam transeuntes. Fingamus gemmam pretiosissimam annullo inclusam aureo nobis charissimam multis astantibus uiris ac mulieribus ablatam fuisse: & in alicuius eorum sinu delitescere: si omnibus excussis præter unum non inuenerimus, nonne necessario sequetur unum illum, qui nondum excussus est, habere? Similiter quum beatitudinem esse constet, eamque nobis promissam, & pro ultimo fine expetitam inquirere oporteat ubi sit, ut inuentam nanciscamur: & quum eam non alia re, nisi intellectu apprehendere queamus: non inueniatur autem in cognitione creatarum rerum, nonne dicemus necessarium fore, ut in altera rerum parte inueniatur? reliqua autem pars est creator, quæ in diuisione opponitur creatis. Intelligis (ut opinor) me Deum dicere, in Dei dico cognitione beatitudinem nostram consistere. Certissimum autem est, ita se rem habere. Nam Saluator in Euangelio fidelibus promittit uitam æternam. Hæc autem uita (inquit) æterna: ut cognoscant te Deum uerum: beatitudinem uocat uitæ nomine: quasi illa carere mors sit. Nunc opto, ut adsit mihi ille spiritu oris sui, de cuius magnificentissima dignitate, & gloria dicturus sum. Nam si ne hæc minima quidem sine Deo explicare non ualeamus, Deum ipsum sine Deo, quomodo explicabimus? nec tamen me fallit, quod nullo sermone digne explicari potest; satis forsitan possumus, quando de mundo, & de his, quæ ille continet, tractandum est, ea, quemadmodum se habeant, sufficienter exponere: at ubi huc uenitur, ut de diuinis mysterijs, deique ipso Deo dicendum sit, tunc omnis angusta & muta quodammodo redditur oratio, gerere se nimis sordide, nec habere dignitatem aut gratiam ullam uidetur. Transcendit illa tanta Maiestas amplitudine sua cuiusunque eloquentiæ facultatem. Quamobrem ueniam peto, si non omnia explicaro, satis erit quædam indicasse, per quæ appareat ex tantæ Maiestatis conspectu plenam animis nostris beatitudinem parari. Quid enim ipse est? & quantus? ipse se quadantenus manifestauit famulo suo Moysi, dum ei in rubo apparuisset, & mandata ad alios dedisset, & quærenti quis esset, & à quò se missum diceret. Ego sum (inquit) qui sum, hoc docuit, hoc uoluit responderi. Vocat se ens, quasi cætera non sint, sed ita se ipsum uocat, quia solus absolutum ens, non ens aliquod, solus habet ueram substantiam, quum per se subsistat, cætera, quorum ipse est conditor, nec per se subsistant, sed per ipsum. Quemadmodum enim ficta, sculpta, cœlataque omnia differunt à fingente: sic & eo amplius creata hæc omnia differunt ab eo, qui ea condidit & effinxit: quid sunt hæc, quæ animis

animis solis corporumque sensibus prospicimus, nisi parua & tenuia simulachra fabricantis Dei? statua hominis uera est statua, non tamen uerus homo. Similiter mundana entia sunt uera simulachra, non tamen uerum ens, quamuis eius referant imaginem, sed imperfectissime uerum est ens, qui illa effinxit, sicut uerus est homo fingens hominem, non qui effinctus est. Sed non modò uerum ens est Deus, sed etiam ens est infinitum. nam quum non se ipsum genuerit, sed sponte sua extiterit ex omni æternitate, relinquitur, ut sit infinitum: nemo enim se ipsum certis coarctat limitibus, nemo circumscribit: omnia præterea in se continet bona, imò ipse omne supereminens bonum. Est igitur ueritas, iustitia, sapientia, uita, potentia, clementia, liberalitas, amor, magnanimitas, pulchritudo, & alia denique bona, quæ fingi, cogitarique possint, & ea omnia in se ipso, & ipse in omnibus. Ipse principium rerum omnium, & finis, carens omni principio & fine. Si tam summi perfectique entis frui contingeret spectaculo, quis non arbitretur summam illam esse felicitàtem, qua nulla possit esse maior? Vt enim quædam sint bona, quæ faciāt possessa felicem, quæro quid hoc bono possit esse melius, quid hac felicitàte felicità? Tum plena erit felicità, quum ei, quod optimum est in nobis, obijciatur, quod optimum est in rebus, ita ut coniungantur: nihil autem melius in nobis, quàm intelligentia, nihil in rebus, quàm Deus, ergo applicatio intelligentiæ nostræ ad Deum operabitur nobis pacem, quietem, gaudium, suauitatem, uoluptatemque immensam, eam denique felicitàtem, quam uotis omnibus expetimus. Vt enim oculi mulcentur colore, aures sono, sic intellectus noster ueritate. Quid quum Deum contemplantur, qui summa est ueritas, à qua quæcunque uera fluunt: quid aliud de tali conspectu sperare quis potest, nisi mellisuo beatitudinis torrente undique inundari? summam possidet ille beatitudinē, imò ipse est illa perfectissima beatitudo. Quis autem beatitudini copulatus non efficiatur beatus? Plura autem se offerunt, quæ impediunt ne animus noster in cognitione creaturarum rerum quiescat, de quibus antea dictum fuit, quæ in contemplatione diuinæ naturæ absunt omnia. Primum est, quod oportet id esse superius, quod alteri beatitudinem præstare queat. Deum uerticem tenere rerum, imò supra omnia creata sedere longissimo interuallo nemo dubitauerit. Alterum est, quod ficta sunt mundana omnia referencia qualencunque effigiem diuinæ substantiæ, ex eo, quod sint. Nemo autem æquè fictis ac ueris oblectatur. At quicunque ad conspectum illum beatissimum accefferimus. Deumque uiderimus non uelatum, ut nunc, sed manifestum, & diuitias gloriæ suæ pandentem, ueram uidebimus substantiam, quam nunquam antea uidimus, nec qualis sit possumus cogitare. Certum est illud, quod quæcunque uel oculis uel acie mentis conspiciamus, fines habent certos, & finitis adijcere possumus cogitando, & auctiora reddere, uel forma, uel modo, uel numero, uel mensura: quo circa mouetur adhuc appetitus animi & in ulterio-

ra

De Immort. animi

ra ire pergit, tanquam nondum sit in termino. At non uereor, ne quis in supremi Dei cognitione, quæ uerissimum erit & suauissimum animorum nostrorum receptaculum, quum infinitum sit ille bonus, & nunquam ad extremos beatissimæ illius naturæ fines perueniatur: quærat alia mens, in quæ tendat, quum infinito bono fuerit repleta. Etenim infinitum, nec transcendendi, nec augeri potest. Saturabimur ergo, nec saturitas hæc afferet fastidium, sed ibidem simul habebitur & desiderabitur. Prohibet quoque illud, ne cognitio mundanarum rerum plenam afferat quietem, quod ea paulatim sibi ipsi succedit, nec undique semel omnium uno conspectu scientia arripi potest, sed unū post aliud se se intelligentiæ nostræ offert. Sed quum Deum spectabimus, & si sola illius cognitio foelicissimos faciet, tamen si hæc etiam inferiora spectare uoluerimus, omnium uno tempore erit perfecta cognitio. Illic & rerum genera; & partes singulis generibus subiectas, uimque & proprietates rebus ipsis inditas, ipsum denique uniuersi ordinem clarè perspicimus: nec ea multiplici & uariato aspectu, sed unico, eoquæ assidue manente complectemur: quod ex eo continget, quia omnia in arte, in qua facta sunt, conspiciuntur. Vbi beatissimum illum Archetypum uiderimus figuratorum simul omnium erit cognitio, nisi quod unum prius, quàm aliud fabricatum fuisse, intelligemus. Stultum est si dicam dolorem & laborem & molestiam aliquam illuc ascendere, quum ne imperfectum quidem ascendet aliquod, uel si ascenderit non imperfectum remanebit, sed perficietur. Omnis ille ciuium cœlestium conuentus, ut purus fuerit, & sine ulla macula & ruga: ita & ab omni asperitate & defectu securus. Hæc omnibus non contingent, sed electis tantummodo Dei, qui dum hîc agerent, Deum sequuti sunt, & dilecti dilexerunt, & quos ille ab æternitate sua dignatus est ad tam immensa præmia uocare. O quantum illuderit gaudium, quàm dulce pabulum illuc ascendentibus? Iunget enim se Deus illorum aspectibus. Ille amantis in morem dilectos suos in sinum recipit, fouet, amplexatur, nudatumque se ad intuitum apprehensionem quæ præbet: ea denique dilargitur, quæ (ut dicam cum Apostolo) ne oculus uidit, nec auris audiuit, nec in cor hominis ascendunt. At non modo intellectus fuerit foelix, sed etiam uoluntas: hæc enim quicquid uult potest, quoniam illi Deus potentiam suam communicat. nam sicut Deus uoluntatem suam implet per semetipsum, sic sancti animi suam per coniunctissimum sibi Deum. Intelligendum est etiam humanas animas non posse uiribus naturæ suæ assurgere ad sublimissimam illam Dei uisionem nisi quod in illas lumen quoddam transfundit Deus, quo sublata habiles tanto sunt spectaculo: & quum lumen id à Deo nullo intermedio proueniat, Deus est. Deus igitur, & quod uident, & quo uidetur. Si quæ-ratur ergo, quid agant animi soluti? Responsio manifesta est, operantur suam ipsorum beatitudinem diuino intuitu se ipsos assidue saturantes: nullo utuntur motu, nisi intimo, quod quietem illorum sanctam non excludit.

cludit. At quo in loco? Respondetur paucis: in Empireo cœlo: hoc cœlum, quid, & ubi, & quomodo, & quando creatum, & quæ causa nominis, declarandum est: sic enim auferetur argumentatio illorum, qui negant animos esse immortales, propterea quod ubi piorum animi constant, non inveniunt. Possumus mundum hunc totum contemplantem mortalia omnia & immortalia in tres diuidere Orbes facilioris demonstrationis gratia: unumquenque eorum à situ nuncupantes. Erit igitur primum infimus orbis, deinde medius, postremò supernus. Infimum ponimus, qui infra lunam est, quacunque illa progreditur usque ad terræ imum locum, quod centrum nuncupatur. Medium facimus à Luna sursum usque ad summum illius cœli uerticem, à quo initium uitæ & motus ducitur. Supernus sit iste, quem cœlum empireum uocamus, in quo Rex cœlestis & suum & Angelorum & sanctarum animarum habita cultū collocauit. Quanquam Deus nullo includatur loco, sed ubique sit, certis tamen rationibus illic potius dicitur sedem suam aulamque collocasse. Ferunt sacri Theologi, quibus talia indagare curæ fuit, Deum initio quatuor simul creasse, cœlum empireum, Angelos, materiam primam, tempus, reliqua postea interuallis dierum: huius cœli ueteres Doctores uix meminerunt. Meminit penes nos Strabus, & Beda: & penes Græcos Basilii, & sequuti hos Theologorum recentiorum quique præcipui, omnes tamen intelligebant cœlum esse quoddam sublime & luminosum, quod habitaculum esset præcipuum Dei & eorum, quos secum esse uellet, quanuis illo nomine empirei non uocarent; hoc uolunt esse corporeum: sublimitate, amplitudine, immobilitate, luciditate, magnificentissimum. De corpore ambigitur, nam plerique lucem tantum putant intelligibilem, sed frequentior sententia recipit esse corporeum, si quidem Beatorum corporibus, quæ resurgendo assumuntur, locus corporeus debetur, & hunc paratum esse à constitutione mundi conuenit. Circuit alios cœli orbes oberrantes immobilis ipse & superior, ex quo amplitudo eius & sublimitas dignoscitur. De luciditate autem nomen sortitur. Nam empireum uocatur, idest, igneum seu flammeum. Inferioris cœli huius orbes non ita luminis & fulgoris pleni, sicut ille est totus. Nam nonus orbis, qui primam mouetur, & causa motus est cæteris, nulla fulgens luce circuitum suum peragit. Reliqui octo partim lucent, partim minimè, propterea quod raris locis radiâtia continent sidera, quæ illinc eminent, non secus, ac in ligno clauus uel modus. Vnum hoc cœlum; quod cæteris supereminet, cunctis sui partibus circumfulget, idque probabili ratione factum, ut locus ipse suo fulgore responderet Beatorum claritati: sicut etiam è conuerso infernus locus tenebrosissimus conuenit tenebrosis animis damnatorum. Non tamen hoc cœlum in subiacentes alios cœli huius orbes lucis aliquid transmittit. Nam ad eam tantummodo rem ædificatum, ut cœlix esset Beatorum habitaculum, non ut quicquam inferioribus corporibus conferret: & simul si id fieret, lumine illo suo micantissimo

cantissimo noctem de rebus auferret, qua terrena ad sui generationem & incrementum egerent. Supernus ille orbis lucidissimus sacrorum illorum intellectuum est sedes. O' quam gloriosa dicta sunt de te ciuitas Dei? quam plura dici possent, nisi excederent humani ingenij captum? Nam frustra exclamat Propheta. Domine dilexi decorem domus tuæ, & habitationem gloria tuæ. Hæc parria est Sanctorum, hæc domus, ubi (ut dictum est) operantur beatitudinem suam. An non hæc magna operatio? quæro, quæ possit esse maior? At ocij est (inquiens) operatio: optime: non enim uituperatur ocium, sed commendatur, ubi pugnando ad uictoriâ uentum est, & ingenti transmissio pelago portus iam tenetur: motus fit gratia quietis, quæ ubi contingit, ea fruendum est: quemadmodum enim artifex præstituit sibi quendam finem operis sui, sic sancti uiri hinc positi laborum & curarum suarum unum sibi præstituant pro fine Deum: hunc sequuntur, cum hoc esse quamprimùm, cum hoc consistere cupiunt, hinc illæ uoces audiuntur. Cupio dissolui & esse cum Christo. Et in psalmorum uolumine. Heu mihi, quia incolatus meus prolongatus est. Et. Sitiuit anima mea ad Deum fontem uiuum, quando ueniam & apparebo ante faciem Dei? Et. Beati, qui habitant in atrijs tuis Domine: in sæcula sæculorum laudabunt te. Ne putes sanctas animas nihil illic agere, consonis cantant uocibus laudes Domino coronati, ueluti milites in triumpho. Idem propheta suspiciens supernè, & de maximis illis præmijs differens. Inebriabuntur (inquit) ab ubertate domus tuæ, & torrente uoluptatis tuæ potabis eos. Quis ergo iam bonorum dissociationem animi & corporis, quæ mors dicitur, perhorrescat, ac non potius optet? & non magis sit in uotis, quàm à plerisque morientibus uita soleat rogari. In ista dissociatione corpus, quod uarijs fortunæ ictibus expositum est, quod proprijs morbis pulsatur, quod turbat omnia mœroribus, terroribus, falsis lætitijs, uanis libidinibus, tunc omni carens sensu, iacet immobile, nec ultra quicquam molitur, ueluti terrena moles in sua principia unde uenerat soluendum. Nihil à se ipso, nihil ab alio patitur asperum, nec pati potest. At id, quod familiare est uirtutibus, amicum disciplinis, studiosum pietatis, sequax recti, subditum Deo, auolat in sublimi uiuaci agilitate, maximoque & eminentissimo illi cohæret bono, quo nihil maius, aut melius dici, aut cogitari potest: Cum hoc consistit à quo cognationem ducit, cuius genus (ut inquit ille) sumus: hoc unum amplexatur tanquam exundantissimum fontem, qui cœlicolis omnibus effundit torrentem uoluptatis, largiterque potos prouocat ad cantandum tantæ beatitudinis præconia. Dixi ab initio sermonis huius immortalitatem animi magnum esse solamen in obitu propinquorum & amicorum, dum eos non extinctos esse, sed uiuere arbitrantur. Hoc magis atque magis confirmandum est, postquam cognitum est, cuiusmodi uitam uiuant. Ergo Christianus uir spem habens futurorum, ubi uiderit mortuum ante oculos iacentem, qui rectè & è uirtute uixerit, non lamentatur,

tatur, nec afflicatur, ut multi, sed gratias latus agit Deo, quod à miseris illum eripuerit, & ad se reuocauerit: mortem illam non putat esse mortem, sed migrationem & cursum ad meliora: reputat secum præmia, coronas, bona ineffabilia, quæ non modò sensibus ullis, sed ne cogitatione quidem percepimus, his se ille solatur, his attollitur, his armatur, ut dolorem mœroremque omnem abiciat, quem incutere absentis desiderium conatur. Sed uis ne quanta sint illa bona, quæ sanctæ fidelesque animæ in cœlo percipiunt, aliquo modo contempleremur? Omittamus, quæ explicari nequeunt, & quorum non est cognitio. Illud scire possumus, quid optent omnes, optant sanè gaudium sine mœrore, requiem sine labore, dignitatem sine obrectatione, opes sine amissione, sanitatem sine languore, copiam sine defectione, robur sine imbecillitate: hæc in patria uberrimè contingunt, ubi summi Regis Maiestas conspicitur, cuncta sui latificans uultus lumine, sic illic agunt sanctæ animæ, ut nihil detestari possit, quin absit, nihil optari quin adsit. Eodem optant peruenire quoscunque Christo renatos, quibus solis patet illud atrium: cupiunt eos socios habere gaudiorum, quos fidei eiusdem uident commilitones: non enim illa imminuitur beatitudo, si plures accesserint, imò potius augetur, quoniam quo plures eam capiant salutem, eo magis lætatur, & is rex est, qui benemeritorum ciuium frequentia delectatur. Cohortemur igitur nosmetipsos inuicem, & eos, qui familiaritate nostra & amicitia fruuntur, ut supremum Deum pio cultu & omni mentis affectu uenerentur, sanctissimaque eius mandata studeant custodire. Substantiam quidem Dei, quæ beatos facit, cognoscere non possumus; possumus tamen quadam ex parte potentiam, sapientiam, bonitatem, clementiam, uoluntatem. Hæc si ignorauerimus, num spes erit salutis Deo ignorato? Minimè, nam nec amare, nisi eum cognouerimus, nec habere, nisi amauerimus, possumus. Cognitio igitur huc tendit, ut amemus, nam hoc faciet, ut nos ille post exitum huius uitæ beneuolè quoque excipiat, & ut dilectos suis ornèt donis. immortalis est profectò animus, ut superiora apertè lateque docuerunt, uiget uigebitque semper in utranque partem, & ad præmia, & ad supplicia. Sed quomodo de immortalitate animi gloriari possunt, qui supplicijs destinantur, re, loco, tempore ingentibus? Immortalis quidem natura animus est, sed efficiamus eum quodammodo mortalem sceleribus proprijs atque peccatis, sicuti sonat illud, quod scriptum est. Anima, quæ peccauerit, ipsa morietur. & illud quoque ex Euangelio. Sinite mortuos sepelire suos mortuos. Hinc corpora peccatorum non absurdè dicuntur sepulchra esse mortuorum. Nam animi uita Deus est: desertus igitur à Deo, mortuus est habendus, & hæc eius prima mors est. Altera deindè succedit, quum ad inferna dimittitur supplicia qualibet morte duriora. Cupit se extinguere, nec potest, natura non deficiente. Mors autè hæc est atrocissima mori uelle nec posse: erit ibi (ut sic dicam) mors sine morte, ideo grauior erit illa mors, quia peccatum

L tum

De Immort. animi

tum eam facit, non natura: melius esset non uiuere, quàm sic uiuere: melius nunquam fuisse, quàm in præsentia sic adesse. Heu uitalem mortem, quàm misera es? quanto digna luctu fores, si diuinæ iustitiæ reluctari liceret? Hanc secundam mortem admonet Saluator noster, ut caueamus, dum præcepit discipulis, ne terreantur ab his, qui occidunt corpus, & post hoc non habent amplius quid faciant. Ostendam (inquit) uobis, quem timeatis. Timete eum, qui postquam occiderit, habet potestatem mittere in geennam: pluris est humana anima, quàm uniuersus mundus: hinc eodem illo beato ore dictum est. Quid prodest homini si uniuersum mundum lucretur, animæ autem suæ detrimentum patiatur? aut quam dabit homo commutationem pro anima sua? Non igitur gaudere possunt impij de immortalitate animorum, ideo nec eam plerunque credunt. Hoc piorum est gaudium, qui uident, quòd ubi elapsi fuerint corporibus, uiuebunt, & alteram adipiscuntur uitam hac longè potiorem: uiuent enim in Deo, qui uera est uita: hic multa aduersa, illic læta omnia. Enimuerò quum Deus se ipsum pijs mentibus patefaciet & uideri attrectarique permittet, tunc uerè uiuemus nulla interpellante molestia: omni gaudio, quod intellectu percipi possit, affluente. Nescio autem quomodo Christiano uiro uenire possit in dubium animi immortalitas, cui resurrectio corporum credenda proponitur, res sanè admirabilis, & quæ omnem superat humani ingenii facultatem: attamen diuinis oraculis prænuntiata, quæ maiora sunt humanis testimoniis: nihil impossibile Deo, cuius immensæ potentie inditum est, quòd stellæ condidit, sapientiæ, quod non aberrans uocat suo unamquamque nomine: charitatis, quòd eas commodis nostris seruire uoluit. Multa alia admirabilia eius opera commemorare possem, ergo uitam corporibus elapsam reddet in fine sæculi, sicut pollicitus est, nec dubitare decet, quia nobis cum tam potente, sapiente, amante Domino futura res est. Animas uerò quomodo perire patitur, qui extintorum etiam corporum curam habiturus est? Magnum certè præbet documentum immortalitati animorum, hæc clara, & toties prædicata corporum resurrectio. Quid porro sibi uolunt, qui se totos morituros arbitrantur? Quid dicam ceteros talem orationem inuitos audire? necesse est, ut sibi ipsis aliquando displiceant, quum cogitant se quandoque ad nihilum esse deducendos: insuauis uel horribilis potius cogitatio non existentie ei, qui in aliquo tolerabili sit statu. Animis certè uim naturæ suæ præslagant indidit Deus, ut de se ipsis præsentirent in posterum: augurioque futurorum sæculorum acti melioris uitæ cupiditate flagrarent: sed fuerit istorum, qui mortem animorum tenuerunt, non probanda sententia. Nos autem immortalitatem eorum tenentes, studeamus ita uitam ducere, ut corporibus elapsi superno in orbe æuum agitemus, ubi æterna est felicitas, maxima præmia, ingentia gaudia. Hoc, quod nunc speramus talia, iucunditate



MARCI ANTONII
NATTAE ASTENSIS,
IN DOMINI NATALE
ORATIO.



VANQVAM inter ingenuas artes & egregias disciplinas à pueritiæ finibus ad hoc usque ætatis meæ robur, studia semper nostra cucurrerunt, nullumque tempus sine optimarum literarum cura atque labore præterfluere mihi paterer. Nunc tamen quum temporum nostrorum calamitates, scelera, flagitiaque recorderer. Viderem ecclesiam undique impijs hæreticorum dogmatis oppugnari, populos his ferreis afflictos bellis, quæ compulsantibus se Gallis & Hispanis geruntur, spectaremque insuper inter has contentiones effero Turcarum Tyranno locum datum, ut opportuna oppida interciperet, & Italiæ claustris armatus immineret, decreueram silere, nec in tanta rerum acerbitate Christiano populo summis difficultatibus affecto oratoris uocibus, sed luctu & gemitu utendum putabam. Nihil denique noui operis moliendum mihi arbitrabar. Fregit hoc meum consilium huius diei eximia pompa, insignisque lætitia, quæ Christianorum omnium mentes peruadere meritò debet, quandoquidem illius temporis memoria renouatur, quo Deus ipse mortali hoc nostro amictu graui solidoque se contexit, qui quòd humanos animos clarissima suæ diuinitatis uoluit esse specula, colendus perpetuò nobis atque peramandus: sed non minore gratulatione excipi debet effectum hodie fuisse, quòd quemadmodum diuinam homines antea, ita humanam Deus formam postmodum ostentaret. Voluit hodie cum seruis Dominus non mensam, non domum, non familiam, sed naturam habere communem. At qui Dominus? cui incredibilis Maiestas, infinita potestas, summa fœlicitas, singularis æternitas, qui denique supra omnia est, à quo pendent uniuersa. Nunc pauper fieri uoluit, deiectus, uilis, mortalis. Quid ita? ut paupertate sua nos ditaret, deiectione sublimaret, uilitate honoraret, morte uiuificaret. Possumus Propheticum illum uersiculum ouan
ti

ri gutture canere: Rex noster Deus ante sæcula operatus est salutem in medio terræ: salutem operatus est in medio terræ, dum terrena apprehendit membra, & in eis cunctis gentibus & nationibus æternam uitam salutemque profudit. Denique eo deuentum est, ut ille, qui unus est increatus, qui generat omnia & nascendi leges cunctis præscribit, ipse quoque (quod indignissimum est) sub generationis leges ueniret, & de femina natus iure diceretur; sed nullam ille indignitatem nostri causa recusauit. His de tantis tamque magnis mysterijs, quæ hodiernus dies tulit, quum deinceps mihi uideam esse differendum, proponendum primò uidetur distinctius, quibus potissimum rebus immorari uelimus, quòd audientibus gratum, dicenti etiam aptum. Ita enim dilucidius accipientur omnia & facilius enucleabuntur, si terminis & ueluti cancellis quibusdam circumscripta oratio huc, illuc temerè haud fluat, sed certa quædam spectet, quæ sequatur: ordine autem quantum collustrare mentis acie possum, hæc quærenda & inuestiganda uidentur. Primum quomodo Deus uenerit, humanamque carnem diuinæ glutinari substantiæ. Deinceps quibus ad id causis ac rationibus impulsus, si tamen contingere potest, ut tanta numinis æterni Maiestas causis ac rationibus impellatur, ac non potius impellat. Postremum erit, postquam duos idest Deum & hominem in una carne positos dicimus, atque ita effectum fuisse, ut Christus nasceretur, cuiusmodi natiuitatis huius pompa fuerit, ac species. Hæc quæ tria sunt numero, si quis secum, aut cum aliò rectè cognoscere instituerit, inueniet in primo expressa Deū infinitæ potentiæ signa dedisse. In secundo, uim caritatis suæ maximam effudisse. In tertio, incredibilis eius sapientiæ exempla Orbi intulisse. Mihi in hac tripertita uarietate non uno modo de omnibus dicendum uidetur, propterea quòd in quibusdam fides mihi uestra imploranda erit, qua fixa mihi opus fuerit & tanaci ad credendum ut uera, & tenendum ut certa, quæ sanctarum scripturarum nobis tradidit auctoritas. Quod ubi facillimè à uobis impetraro, quippe à Christi cultoribus, in reliquis procliuius curret oratio in quibus tum pietas mentium uestrarum poterit incendi, tum uiuendi ritus, mos, disciplina exornari. Igitur recurrente annua temporis huius uice magni hodie nobis memoria sacramenti renouatur. Pronum dictū sed cogitatu arduum, iunxisse se homini Deum, idest in unam eandemque personam diuinam humanamque substantiam conuenisse: non enim de finebat esse Deus, quum utique fieret homo, sed maiestatem retinens suam, humilitatem attrahens alienam, naturali formæ aduentitiam copulauit: ita ut utraque unum essent, & neutrum esse posset sine altero; non quòd substantias confunderet, sed quòd glutino cohærere uellet sempiterno. Sed quo nam nodo fortitudinem imbecillitati, copiam inopia, immensitatem exiguitati, uitam morti, lucem caligini, innexa dixerim? quibus uinculis? quo fabro? Maxima nunc rerum miracula aperiuntur, quum Deus nullis circumscriptus finibus tantulis se intulerit huma-

næ

In Domini Natale

nae formae spacijs. Idem tamen, dum haec agerentur, stabilis & immotus orbem moderabatur: non enim dum humana membra suscepit, diuina opera deseruit, potuit ille matris uterum assumpto corpore fecundare, & de sinu patris non emigrare: hinc ad oculos humanos exire, inde mentes Angelicas illustrare; hinc ad terras procedere, inde coelos extendere, hinc homo fieri, inde homines facere. Incredibilia ne haec sunt? Incredibilia prorsus, si hominis ingenio facta dicerem, non Dei, cuius omnipotentiae nihil clausum, nihil non facile ac paratum. Vrgent Prophetarum oracula, Euangelij, Apostolorumque testimonia, ut haec facta credamus. Itaque credimus: quomodo autem, & quibus itineribus progressa fuerint illa omnia, ne quaerendum quidem uidetur. Quid enim quaeramus super his, quae non minori potestate, quam facilitate à Principe Deo gesta naturae regulas exorbitare conspiciamus? Nam magna in domo serui, & si sciant quae gerantur, tamen per quos, aut quomodo, grandioribus praesertim in rebus saepius ignorant, neque ulterius exquirunt, contenti sunt eo, quod uident: non enim in consilio adhibentur à Domino. Eadem nostra est causa: quis enim supremo Deo tanta in re consiliarius fuit? quem ille aduocauit? cuius hominis ingenium prudentiamque requisit? Vix scimus, ac ne scimus quidem quomodo humanus animus tantam uim ferens ingenij & rationis illigetur corpori, ut persona hominis inducatur, & cogitabimus intelligi posse quomodo Deus iunxerit se homini, ut excellentissima fieret persona Christi? Tantum enim id est miraculum tamque stupendum, ut alia miracula facta fuerint, ut id unum crederetur: non enim aliud pertinent, quaecunque gessit mirabilia in Euangelij praedicatione Christus, nisi ut se Deum ostenderet, nam hominem esse omnes uidebant, quorum sane miraculorum rationem, si quis quaerat, nullam inueniet, propterea, quod naturae huius nobis notae longè terminos excedunt. Eodem pertinent, quae de Virginis salutifero foetu traduntur. Foemina Israelitica pubis absque uirili contactu, nullo semine, puro utero diuinam sobolem concepit, & infractis pudoris claustris in lucem effudit. Magnum, quod nasci uoluerit Deus, nam quod de Virgine, tam et si mirum, congruebat, scilicet Dei uerbum, cupiens hominem induere mutuam corporum duorum libidinem, ac non potius sua ui, suo spiritu intra materna uiscera fingeret sibi & fabricaret, quod esse cupiebat? Quomodo porro Mariae uterus sanctitatis templum sanctissimo in opere esse potuisset, si uirum experta Virginitatis florem posuisset? quomodo mater Domini delibata dux & princeps ceteris ad perpetuae castitatis delectum fuisset? datum hoc igitur parenti diuini uerbi, ceteris cunctis altius praehonorandae, ut indeflorata mater inueniretur. Datum hoc etiam coelesti Patri, ut uerus eius & naturalis filius non alium haberet patrem, quam ipsum, qui ab aeterno aequalem eum sibi genuisset. Datum Filio, ut absque carnis peccato conciperetur, qui peccatum facturus non erat, & per quem peccata omnia tollerentur. Datum temporibus nouae legis, ut Spiritu sancto auctore

re

re conciperetur, qui eundem esset spiritum largè orbi illaturus, & qui plures filios non ex sanguinibus, neque ex uoluntate carnis, sed ex Deo Ecclesiæ suæ creaturus. Ergo nouo more nullo exemplo uirginitatis candori puerperium idest, laus & decus nuptiarum arrogatum. Non est quodd obijciatur de reliquis matribus, quoniam unam hanc tantum excipimus puellam, sanctam fide, sanctam opere, sanctam ab omni iniuria concubitus: hanc decuit de Deo concipere, quæ Deum meruit procreare. Quodd si fortasse nondum cernitis, quid tali in re faciendum fuerit, fingite, quo melius doceamini, quodd adeat Deus ipse mortalem foeminam, & ab ea petat, ut uiri iungat se amplexibus sui causâ, quo scilicet illa opera formatum hominem suscipiens, ipse utranque copulet naturam, hominis & Dei. Etenim indigna Deo hæc esset postulatio, iureq; responderit mortalis: Quid me captas æterne Pater? Non sordè ulla candidos mores meos infecero. An gratior tibi fuero uiolata posito Virgineo pudore? Tu deornamento postulas esse parenti, hoc Virginis nomine, quo nunc sum tanta erepto? Tu sanctissimus matrem habere potes pollutam? Dei genitrix fuerit, cuius utero uitium additum sit? Cur non potius efficis, quodd potes, ut uirum sine uiro concipiam? Iusta & officij plena expostulatio. Dicitur uirile semen esse in primis uiuificum, & maximè animale summusq; artifex & sapiens architectus foetus ipsius, id absuit modò, & nihilominus uirgo hæc concepit & peperit, quodd tam mirum uideri debet, quàm si tellus ab omni cultu uacua, atque, ut ita dicam, casta frumentariam segetem efferret, uel flores stirpes, gramina daret Solis, & Lunæ, & cœli ipsius efficacibus motibus repressis. Sed hoc præstare posset Deus, qui de nihilo creauit omnia, & nunc quid mirum hominem ab illo sine semine conditum, qui sine seminibus ipsa condidit rerum semina. Non ratio, non pietas, non fas ullum permittit, ut naturæ scita impingamus Deo, quæ ille nobis non sibi creauit. Itaque firmiter tueri, uel uenerari potius diuina acta debemus, & eo enixius, quo maiora clariora que sunt. Ita enim Euangelica prodit lectio, Deum sapientissimè spirantem concipiendi uim & foetificandi puellæ præcordijs intulisse, id sepositis naturalibus causis extraordinaria Dei potestate perfectum. At uide-te quàm sapienter. Oportebat, quodd, qui nascebatur Christus ostenderetur, quomodo uerus erat Deus, uerus homo, hoc ostendit eum esse uerum hominem, quodd è communi hominum consuetudine natus est ex foemina: illud ostendit Deum, quodd supra naturæ humanæ conditionem natus est de Virgine: hoc consilium uidetur fuisse Dei, ut in unitate personæ copulans sibi utranque naturam solita sublimaret insolitis, & insolita solitis temperaret. Si enim omnia ageret ut Deus, non ostenderetur ueritas humanæ naturæ, sin ut homo, non crederetur esse Deus: ergo in Natali hoc & reliqua uita omni sic egit Christus diuina opera humanis, & humana diuinis miscendo, ut utriusque naturæ copula in eo eluceret. Considerate illud insuper, quàm mirificè ex eo, quodd Christus natus est

ex

In Domini Nantale

ex foemina, uterque sexus fuerit exaltatus, uirilis in ipso: foemineus in tre. Illud uero, quod ex foemina Virgine natus est, praestitit, ut omnis generationis humanae diuersitas compleretur. Nam primus homo productus est de limo terrae sine uiro & foemina. Eua producta est ex uiro sine foemina, ceteri homines nascuntur de uiro & foemina. Quartum, quod supererat nascendi genus, quasi proprium relinquebatur Christo, ut produceretur ex foemina sine uiro: Putate ex persona Spiritus sancti uerba illa ab Esaia prolata. Accessi ad prophetissimam, & concepit, & peperit filium. Cui etiam illud Hieremiae congruit. Nouum creauit Dominus super terram, foemina circundabit uirum, & de humana quidem generatione, quam suscepit Deus, Deo natus: haec dicta sint, diuinam autem eius generationem (ut dicam cum Propheta) quis enarrabit? nam, quum Dei Filius usque eo sese dimiserit, ut pariter fieri uoluerit hominis filius, sortitus est utrinque parentes admirabili modo, nam quum duplex iam sit & biformis id est homo & Deus, duplex quoque illi obtigit generatio, unde Deus est, Deum habet patrem, unde homo, hominem matrem, patrem in coelis, matrem in terris, patrem sine foemina, matrem sine uiro: à patre, cui par aeternitate est, genitus ante saecula, à matre, cui impar a uo fuit, in saeculo natus, unde patrem refert, anterior matre, unde matrem, posterior patre. Illud quod Dei filius fuit, naturae suae ascribitur, hoc quod hominis fuit filius, utilitati nostrae fuit tributum: unum necessitatis fuit, alterum uoluntatis. De his egregie Ioannes Damascenus. Duas (inquit) Christi natiuitates ueneramur, unam ex patre ante saecula, quae est super causam, & rationem, & tempus, & naturam: & unam, quae in ultimis temporibus propter nos, & secundum nos, & super nos: propter nos, quia propter nostram salutem: secundum nos, quia natus est homo ex muliere & tempore conceptionis, scilicet nouem mensium: super nos, quia non ex semine, sed ex Spiritu sancto, & sancta Virgine supra legem conceptionis. Ex his manifestè liquet geminam Christi esse natiuitatem, Christum bis esse natum. Hoc uidit Apostolus Ioannes, atque adeo hinc Euangelij sui duxit exordium, nam ut Chærintiorum, & Ebionitarum hæresim refelleret asserentium Christum non fuisse priorem Mariam, nec eum natum Deum, sed hominem tantum, postea meritis diuinitatem adeptum. In principio ait fuisse uerbum apud Deum, & hoc uerbum fuisse Deum, & per hoc uerbum omnia facta fuisse: deinde concludit hoc uerbum ad nos uenisse & carnem fuisse factum. De hoc uerbo, de quo Euangelij auctor tanta dixit, si libentibus animis audire uolueritis, planius aliquid disseram, ut huius Euangelistae dicta in ecclesiis hodie reuocata melius percipere ualeatis, simul ut etiam de diuina Christi generatione, quam ille paucis attigit, latius aliquid dicatur. Sed quibus uerbis unicum illud uerbum effari potero? est enim ineffabile, nihil tamē prohibet uel rudibus lineamentis id utcumque effingere. Verbum non illud solum significat, quod humani oris uoce effertur, sed id multo magis,

magis, quod intra se mens concipit, & inductis cogitationibus secum e-
uoluit. Hoc manifestum esse potest cuique in se ipsum intuenti, sed sacra-
rum quoque literarum testimonio (si quis id cupit) satis ostenditur.
Nam in libro sapientiæ capite secundo legitur. Dixerunt apud se impij
cogitantes non rectè. Exposuit quid sit, dixerunt apud se, cum addidit
cogitantes. Huic simile est in Euangelio, quod quidam Scribæ, quum
audissent à Domino dictum paralytico: Confide fili, remittuntur tibi
peccata tua: dixerunt intra se, hic blasphematur. Quid est enim, dixerunt
intra se, nisi cogitando? Denique sequitur: Et quum uidisset Iesus cogi-
tationes eorum dixit: Vt quid cogitatis mala in corporibus uestris? Sic
Matthæus; Lucas autem hanc eandem rem narrans apertè posuit cogita-
tionem. Coeperunt (inquit) cogitare Scribæ & Pharisei, dicentes: Quis
est hic, qui loquitur blasphemias? Et de illo diuite, cuius ager uberes at-
tulit fructus, ait ipse Dominus. Et cogitabat intra se dicens. Gaude ani-
ma mea & cetera. Hoc igitur uerbum, quod intra cordis penetralia fit,
fons & origo huius exterioris, quod sono uocis effunditur, habet etiam
Deus. Sed operæpretium est Dei uerbum nostro conferre, non ex æquan-
di causa, stultum id enim & temerarium, sed, ut quum cognouerimus
quanto intervallo disjuncta sint, tum demum nostri uerbi humilitate per-
specta alterius excellentiam & dignitatem magis miremur. Ac primum
illud quidem animaduertere licet, quod humana uerba, & dum uolunt
tur interius & exterius erumpunt, oriuntur in tempore, & tempore com-
plentur, & una cum ipso tempore effluunt, & alia alijs obruuntur, & ua-
rias mutationis patiuntur uices: quiescunt sæpe numero, & in obliuio-
nem transeunt & silentium. At Deus unicum tantum habet uerbum, im-
mutabile, eodem modo se habens semper, quo ille loquitur assidue: est
hoc uerbum illi coæternum, ita, ut quibusdam ociose nimis quaritanti-
bus, quid ante ortum mundi ageret Deus, respondere uerissimè possi-
mus, quod beatissimo illo sermone secum loquebatur. Quid deinceps?
Num nos, qui multis cogitationibus, pluribus etiam uerbis abundamus,
ueritatem rerum satis assequimur, aut eloqui ualemus? minimè uerò:
nam primum acie mentis haberi utimur ad res perspicendas atque in-
telligendas: non enim intimè res ipsas cognoscimus, sed ex causis earum
& euentis iudicamus; non etiam ultimos earum fines perspicimus, ut
quid inter unum & alterum intersit, exactè teneamus. Rectissimè quo-
que illud dictum caligare humanæ mentis oculos ad ea, quæ in rerum
natura, prima sunt ac præcipua, non secus ac noctuæ ad clarissimam solis
lucem. Quantulum est præterea, quod notitiæ nostræ (qualiscunque sit)
subdatur. Quis unquam hominum terrestria cœlestiaque se nosse om-
nia opinatus est? An non illud etiam rectissimè dictum maximam eorum
partem, quæ scimus, minimam esse eorum, quæ ignoramus? hanc tan-
tam nostram ignorationem multi sæpius deslerunt. Sed illud quoque in-
faustum nobis contingit, quod cogitationes, quas de rebus habemus

M (qua-

In Domini Natale

14

(qualescunque sint) non sermone sufficienter exprimere ualemus. Additur hoc ad imperfectam cognitionem, quod ne pluribus quidem dictionibus eam aptè repræsentare ualemus: melius cogitamus quàm dicimus. Itaque inepti Oratores nos ac penè nihili sumus. Quid illud? Num semper nostrum uerbum de scientia procedit? Minimè, nam sæpius ea dicimus, quæ falsa sunt, uera tamen esse opinantes: sæpius etiam dubitamus cogitationibus huc illuc fluctuantibus, & quicumque dubitat, fateatur se uerum nescire: hoc tantum scit, quòd dubius est, quod non satis est ad ueritatem percipiendam. Quid dicam nunc de Deo? quàm magnus eloquutor ille? quanta pollet uerbi latitudine? qui quicquid est, fuit, erit, ad ueritatem naturæ uniuscuiusque unico hoc tantum uerbo nulla interpellante quiete recenset, ne capillus quidem humani capitis ipsum latet, quippe, qui etiam numerum arenæ teneat, & stellas suo uanamquaque uocet nomine. denique quum uniuersa, ut dixi, recenset præsentia, præterita, futura, qualia sunt in se ipsis, summam illi & perfectissimam rerum omnium cognitionem concedimus, & intelligimus, quàm magna sapientia afflueret, qui orationem Dei unico illo conceptam uerbo inspectare posset. hoc etiam habet Dei uerbum, quod non potest falli nec fallere: ut potè, quòd summa sit ueritas, neque hoc, quod non potest, putanda est infirmitas, sed firmitas. Potenter non potest mutare formam, & se ipso deterius fieri. Sed & illud conceditis mihi aliud esse hominem, aliud hominis uerba, siue de externis loquamur uerbis, siue etiam de internis: non enim quicquid animus noster intelligendo concipit, est ipse animus, imò ne res quidem uera est, quam concipit, sed rei similitudo. Itaque homo intellectus non est uerus homo, sed quasi quædam similitudo hominis ueri intelligendo apprehensa. Fingamus tamen effici arte quadam posse, ut uerba essent similia his, qui ea proferrent seu conciperent, tunc uerba ab hominibus prolata, seu concepta, homines essent, & quot quisque uerba diceret seu conciperet, totidem numero filios effunderet. Hic quanto eum crederetis donatum munere, qui assequutus fuisset, ut animantia uerba sui simillima posset effingere, & hoc modo liberorum fieri pater. At Deus hoc, quod tantum esse diximus habet, quia uerbum illud, quod protulit, sui simillimum per omnia effundit potestate, bonitate, æternitate. Itaque Deus Deum genuit, & Dei uerbum merito Dei filius nuncupatur. Verbum autem illud gignit Deus se ipsum intelligendo, nihil à generante distans, nisi sola origine: non enim aliud in Deo intelligere quàm esse Deum, ita ut intellectus à se ipso Deus sit uerus & unus Deus. At non ex superioribus tantum, sed uel ex eo pernosci maxime potest, quàm uerba nostra iaceat collata huic supremo uerbo, quia illa à factis plurimum differunt, & iusta, fortia, temperata dicere cuiuslibet hominis est, opere uerò explere non iam cuiuslibet, sed magni tantum & potentis atque prudentis, demum ocij uidentur esse uerba, uirtutis res gestæ. Itaque his honorem deferimus, illis non

-sup)

M

mul-

multum tribuimus. At non ociosum Dei uerbum, nec à facto recedens: quicquid hoc uerbo profatur Deus statim apparet. nam quum antea res nullæ extarent in mundo, ac ne mundus quidem esset, nihilque Deus inuenisset paratum ad eius fabricam, statim hæc tanta apparuerunt uerbo diuino ea fieri iubente. Quale hoc uerbum? per quod coeli sublimitas, terræ fecunditas, maris mobilitas, æris tenuitas, ignis leuitas, siderum luciditas emicuit? Hæc uidentur. Quid illa, quæ non uidentur? Angelos dico, sedes, dominationes, potestates, reliquas substantias spirituales, nonne & ea per ipsum condita? Nulla forma, nulla compages, nullus motus, nullum tempus, nullus locus, nullum pondus, nullus numerus, nulla mensura, nulla denique res, quod hoc uerbum non efficiat, effecerit. Quomodo igitur maius aliquid excellentius ue hoc uerbo inueniri potest, quod à Deo genitum unà cum generante unus est Deus, immensum, omnia condens, instaurans, regens, componens, quid sublimius aliquis excogitabit? attamen hodierno die se ipsum deiecit & humilem ire uiam institit, Deus inquam hodie uerbum suum reddidit uile, & uerbis nostris propemodum exæquauit: nam mens hominis uerbum cogitando gignit & effingit, id corpore uocis per membra syllabarum digesto includit, & auribus illud insinuat, scribendo etiam literis alligat, & quasi uideri permittit, idque dum fit, uerbum ipsum, quod intra mentis penetralia è dignitate sua illic manebat, tum ueluti corporeum redditum uilescit. Similiter Deus uerbum suum formam suscipere hominis, & concretum etiam corpus induere uoluit, & hæc ratione spectandum omnibus audiendumque præbuit. Verbum (inquit Ioânes) caro factum est: non est illud uerbum in carnem conuersum, sed carnem assumpsit manens id, quod erat, & attrahens ad se, quod non erat: sicut nec uerbum uostrum, quod interius in animo uersatur, ubi foras apparere nititur, uox fit, sed in sua manens sede uocis sonum assumit. At quod Dei uerbum nostram carnem assumpsit, id præter dignitatem tanti uerbi factum esse dignoscitur. Hinc magna insurgit admiratio. Venit ad nos Dei uerbum, Deus ipse. Cur nos non potius ad illum? nos enim egemus illo, non ille nobis, sed nec consuetudo est, ut maiores inferiorum petant limina, si quid impetrandum fuerat, id ab eo precibus erat postulandum, qui & habet quod det, & dat nemo largius; attamen iste tam magnus tamque potens, ut ostenderet quanta sit illi cura de nobis, & ut præberet indelebile charitatis suæ documentum, humillima quæque suscipere, & ad uilia & angusta nostra descendere non recusauit. Et nunc quidem causas ipsas, cur nam id factum sit, quod secundo orationis meæ loco dicturum posueram, ingredior. Quis enim non nouit quemadmodum Adam stirps generis nostri, dum diuinis iussionibus obuiam ijt, prolem tanta macula & reatu illo infecerit, hinc delicatissimo de hortulo in inferiora hæc detrusus loca infelicitatis exuias secum attulit, idest, eruminas mortalis huius uitæ: parum hoc, nisi quod post corporis mortem den

supra

M 2 sissimæ

In Domini Natale

24
 fiffimæ tenebræ, triffiffimi mœrores animis ingruiebant, obftructo aditu
 ad diuinæ claritatis & lætitiæ loca. Nam ubi iniuncta confregiffet A-
 dam affectans exaquare fe Deo, audire meruit. Abi, quoniam melli-
 flua bonitate Dei: cuius potentiam fœde nimis petebas, haud frueris. Ta-
 buerat humanum genus hæreditario illo malo, & quid faceret, quomodo
 mortifera eriperet fe ex plaga nõ habebat. Voluit homo per arrogantiam
 ad diuina conscendere, quod remedium præter illud, nifi ut deiiciens
 fe ad humana descenderet Deus: ergo uerbum Dei æternum coæquale
 parenti, exhaustit fe fe & exanimiuit, imbecillitatis noftræ appingens fi-
 bi formulam, deiiciens fe non minus, quàm quantum ille generis noftri
 parens intumuerat. Magnæ illi arrogantia, quæ de terris ad folium uf-
 que Dei fe ipfam inflauerat, reddita par humilitas, quum de diuino fo-
 lio ad terram ufque depreffit fe Dei filius, & homo factus obedientia iu-
 go recepto acerbiffima quæque & duriffima perpeffus eft, fed gratior hæc
 humilitas cœlefti parenti fuit, quàm odiofa illa fuerat superbia. Itaque
 reddidit hæc, quod altera abftulerat. Adam ab humo eodem artificio
 excitat Deus, quo hæc cœleftia, terreftriaque fpectacula perfecerat.
 Illum ingenii magnitudine armauerat, multarumque uirtutum dote il-
 luflrauerat. hic eft, à quo fylua omnis humani generis descendit, quis
 primi parentis eluere culpam, quis Adæ magni uiri peccata corrigere de-
 beret, nifi qui maior illo multò excellentiorque foret? Ergo homo iſte
 prodijt, qui pariter erat Deus, maior excellentiorque perfona prodire
 nõ potuit? reddita eft per hunc nobis falus, æternæque uitæ felicitas.
 nam quo dependerentur fupplicia culpæ debita, mortale corpus pœnis
 quibuslibet obiecit, labemque genti inuſtam tali tantaque ſine labe ui-
 ciſſima in ara crucis expiauit. O quàm immenſas & immortales gratias
 agere debemus huic puero, puero inquam, qui & ſi nondum re, animo
 certè crucem iam tollit. Enimuerò ab eo die, uel ab eo potius temporis
 puncto, quo ſe carnis noſtræ ſeruitute obuallauit, ad illam inſignem pœ-
 narum ſumam ſemper affectu tetendit: nec ullum interfluxit tempus,
 quo non ſitienter appeteret patibulum, ſeu potius Trophæum, quo ante
 lato humanâ prole cœlefti Patri cõciliare parabat. Itaq; deſideriorũ cru-
 cem hauſit animo alterâ, dũ uera crux abfuit à corpore, hæc deinceps cru-
 cem tempore ſuo cupidè utraq; manu cõplexuſeſt, & quàm cupidè fuerit
 cõplexus, illud oſtendit, quòd clauis etiã inſigi illic uoluit. nã illũ ſpõte
 ſe ſe offerentem, pietas ſua & miſeratio noſtri infixit, nõ Iudæorũ furibun-
 da proteruia, quæ fruſta aduerſus diuinam potèſtatem inſultaſſet. Quis
 contagionem iam ullam humano generi imputer, fluuiò diuini cruoris
 tanta charitate erumpente, undique inundante, turpia, fœdaque cuncta
 diluente? Quis humanos animos à cœlo arcere, ab æternis illis templis
 depellere audeat, quorum ſalutem & uitam uideat tanti ſtetiffe, tam ma-
 gno redemptam. Non iam Adæ amplius mentionem perhorreſco,
 non iam uulnus horreo tunc inſlictum, poſtquam tanta fuit medici medi-
cinaque

cinaque nobilitas. Erat unicus ille Dei patris natura filius, attramen, ut nos, qui nihili sumus, filios Deo faceret adoptione, & in coelistis hereditatis portione secum coniungeret, (non enim uerebatur angustias etiam si plures possedissent) humillima quaque subire uoluit usque eò, ut sanguinem animamque pro nobis profunderet, non sine grauissimo cruciatu. Versantur in hominum uita flagella, sputa, irrisiones, uulnera, spinae, crux. Hæc mala nostra suscepit ille, ut nos bonis suis ditaret. Magna Dei clementia, qui hominem per se, & tot per poenas seruare proposuit. Magna hominis dignitas sic seruati. Si gloriari uoluerit nunc homo, iure id licet, non quod sit aliquid à se ipso, sed quod tanti eum fecerit, qui fecit. His cognitis minus mirandum est, de his, quæ hodie gesta recolimus. Infantulus est enim hodie Dei uerbum nobis. Ita ne uerò tam tenax est, qui est omnium fortitudo? quomodo antea nouem mensium claustra in aluo pertulit materna is, qui nullos unquam nouit fines? Quomodo lacte nutritur, qui cibum solidum præbet cunctis animantibus? Quæri item potest cur sustineat paulatim progredi ætate, & ab infantia ad pueritiam à pueritia ad adolescentiam, ab adolescentia ad iuuentutem prouolui, qui æternitatem habet, & summa rerum omnium est perfectio? Sed hæc minus iam mira uideri possunt cogitantibus, quod sponte nostri causa iste tam magnus uoluit se attenuare, hæc tam uilia & abiecta excipienda illi è naturalium institutorum ratione fuerunt, aut ne ut homo uenisset, quomodo tamen ueniendum duxit, ut quod unius uitio contractum fuerat offensionis, alterius officio lueretur. Illud magnum & omni admiratione plenum, quod qui Deus erat, homo fieri uoluit. Reliqua iuxta ordinis consequentiam succedunt. Nihil ne præterea aliud inuenire possumus muneris, quod attulerit Deus carni nostræ sociatus? Fortasse enim quibus iter ad supera patefecit: nullis præceptis datis uiuere permisit, quod abest à diuinorum operum perfectione plurimum, ut hominibus ad tam magna præmia excitatis non plenissima ratione lex conderetur. Narra obsecro, qui religionis cultus ante Euangelicæ legis prolationem, Erigebantur inter gentes fictiles dii, ad hos uenerationis causa adibant homines, non excordes minus & examines, quàm simulachra, quæ colebant. Nam si illa sensu & mente uiguisent, nunquam tulissent homines sibi genu posito supplicantes, sed talem hominibus honorem ipsa ultro habuissent, quod sese expoliuissent, & è rudi materia ad insignem ornatum & eximiam pulchritudinem deduxissent. Homines profecto miseri qui quæ essent ipsi uiuacia Dei simulachra, inania signa mortali manu fabricata uenerarentur: at foelices fictores, qui artificio digitorum Deos gentibus faciebant. Statuas enim suas Deos uocabant, idque adeò huius artificij putabatur esse proprium, ut quoscunque statuarios Græca dictione *θεομοι*, idest Deorum factores nuncuparent. Hinc olim conductus Phidias nobilissimus arte fingendi, ut Atheniensibus ciuibz suis Deam faceret Mineruam, & certatum tunc fuit in populi concione, an

ebur-

In Domini Natale

eburneam faceret, uel marmoream. Ipse marmoream malebat, quia mar-
mor splendorem diutius retinebat, uicit tamen ebur, & uisum sui nobi-
litate dignius, quod coleretur. Hæc nos scilicet ridemus, sed non minus
ipsi ueteres Deos suos irridebant, quorum unus Iouem aduocantem si-
bi concilium Deum omnium atque etiam semideum facit in re commu-
ni dubia atque trepida, eo in confessu diligenter obseruatur à Mercurio,
cui id muneris iniunctum fuerat à Ioue, ut aurei dii argenteis præpone-
rentur, & isti æneis, & qui opera erant Praxitelis uel Phidiae aliis, qui igno-
bilium artificum manu fuerant dolatu. Quod si ceteros credere uolue-
rimus, uel ingenia opificum, uel rerum pretia insulse miratos statuas pul-
cherrimè fabrefactas diuino cultu dignas putasse, nihil temerè aut per in-
scitiam fecisse uidebuntur. Scythæ, qui Martem solum Deum habentes,
enses pro simulachris colebant, nimirum si deinceps apud huiusmodi si-
mulachra humanis hostijs litabant, quod pigeret asseuerare, nisi magno-
rum auctorum literis fuisset comprehensum. Erant nonnullæ nationes, quæ
reiectis simulachris omnibus, ea tantum pro Dijs habebant, quæ oculis
cernerentur, reliqua aspernantes. Ergo erat illis præcipua Solis & Lunæ
ueneratio, quæ una ex omnibus maximè uidetur, nec erat cur lippitudo
oculorum alicui immunitatem diuini cultus præberet. Mitto Aegyptios
qui crocodilum, felem, canem, & nonnullas alias bestias sibi consecraue-
rant, sed Romani urbis suæ conditorem Romulum propriè colebant, qui
in Deorum numerum non uenisset, aut certè minor fuisset Deus, nisi fra-
trem regni consortem interemisset: ijdem Deæ febri templa posuerunt.
O rem furiosam habere pro Deo uitiosum motum sui corporis: quid ti-
mebant? ne noceret, quomodo? quum duos medicos patrem & filium
haberent, quibus pingues uictimas immolabant: quid Apolline, & Aesc-
culapio præsidentibus medicinæ à febre timendum fuit? Cybele mater
Deorum omnium dicebatur. An hæc etiam Aegyptijs Deum peperit cæ-
nino capite? & Afris alium taurino uultu? porro quale illud est, quod ex-
cui huic Deæ sacra facerent, quum per innumeros concubitus tantam ip-
sa Deorum prolem genuisset. At enim tellus, propter sui fœcunditatem
colenda est, quis negat? sed ferro colenda est, non thure, & ceruicæ bo-
uium, non quæ collisa securibus templa cruore spargat: sed quæ aratrum
intra glebas traijciat, hoc enim modo redditur fœcunda. Nullam diuini-
tatem habent elementa mundi, quæ si instituta sunt propter homines, de-
bent illa humanis usibus seruire, non homines ea adorare. Quapropter
non mediocriter etiam illi errarunt, qui uidentes uana Deorum esse si-
mulachra, ea ad naturæ significationem reuocabant, ut Vulcanus ignem,
Iuno aërem, Neptunus aquam exhiberet. Sed quorsum hoc? nam sicut
non in statuis, ita nec in elementis illis ulla inesse potest diuinitas. Hic
forsitan obijciat aliquis illos è gentibus uiros, non adedò rudes fuisse, ut
colerent simulachra, sed coluisse Dæmones, qui simulachris infederāt. Ita-
ne uerò Dæmones colebantur? O rem pessimam, mitior fuerat uacua si-
mulachrorum

mulachrorum ueneratio. Videre iam licet caliginem temporum illorum, quum de tam detestabili Dæmonum cultu non uulgares homines, sed qui prudentia uidebantur excellere, gloriarentur. Nam Mercurius Aegyptius, qui æuo ueteri speculum habebatur sapientiæ, & ob eam rem ter maximi cognomen accepit, sicut (inquit) Deus Dominus ac pater omnium Deos fecerat æternos sui similes, ita homines illius imitatione Deos sibi facere ex sui uultus similitudine effictos, sed homines, quum animas facere nequeant, Dæmones euocare, & illos sacrorum ritibus & obsequijs delinitos corporibus simulachrorum ad humanam speciem fabrefactis illigare, atque includere, ut conferre bona mortalibus placati & dubijs rebus salubria petentibus responsa efflare possint. hoc enim modo Deos ab hominibus fieri interpretatur, & ea de causa propter statuas animatas præcias futurorum imbecillitates hominibus facientes easque curantes, gaudiorum & ægretitudinum pro meritis importatrices, censet Aegyptum imaginem cœli præ se ferre, imò uerius cœlum in Aegyptum descendisse, nullum pulchrius humanum opus uideri uult, quàm hoc Deos sibi faciendi, quod tum ueluti temporis huius præfagus sublatum iri aliquando ingemiscit. Retuli huius Aegyptii sententiam suis penè uerbis, quam sequuti sunt Pythagorei primum, mox Platonici, quorum inter Philosophos nomen magnum olim atque illustre fuit. Etenim istarum familiarum duces Pythagoram & Platonem Aegyptum lustrasse & illis disciplinis imbutos ad propria remigrasse constat. Hi Dæmones medium quoddam genus inter Deos & homines posuerunt, eosque colendos censuerunt his ritibus, sacrificijs, nominibus, quibus se coli mandassent, ne nocerent irati, & bona propitij suppeditarent. Hæc faciunt ut credã facilius, quæ de Numa Pompilio Rege Romanorum secundo tradita sunt, nam hunc Pythagoreum quoque fuisse fama circumtulit. Lucus erat asper ac densus arboribus, cuius in medio fons. Huc traiciens Numa ac stans in fontis margine Dæmones fertur euocasse, eorumque imaginibus in aqua relatis accepisse ab eisdem sacrorum ritus, per quos illi humano generi bona traderent, mala remouerent, & tunc quidem Rex ille sacrorum institutor celauit po. Romanum quid ageretur. Veruntamen his de rebus confectos libros diligentissimeque obliuatos altius humi condidit, quos multis post sæculis aratro patefactos Senatus censuit ad publicas religiones dissoluendas pertinere. Ita eius consulto uix lecti in concione publicè exusti sunt. Certè ille nobilis è gentibus Poëta hunc Numam narrat carminibus Iouem elicuisse de cœlo, & ea de causa a posteris elicum uocitatum; quem Iouem obsecro, quæ Elicium? quæ fabula? nam si ad ueritatem accederet, Dæmoniacum diceret spiritum elicitum cæteris nequiorem in arce statem æris huius caliginosi: hunc enim incolunt illi mundi locum: hinc Iupiter ille ne suis mendax sit insignibus, fulmina uibrat, tempestates contorquet, quanquam huius nepos Aesculapius ueritatis etiam aliquid habuisse dicitur. Noluit, quoniam

niam

In Domini Natale

44
 niam medicina erat prapositus fallere. Ex Epidauo Romam accersitus
 anguina specie ostendit se legatis: atque ita circumuectus ab illis & Ro-
 manis moenibus illatus. Etiam ne eum, qui ut anguis uenerat colere e-
 portebat? sed nihil Aesculapio obijci poterat quando dignissimam natu-
 ra sua formam susceperat, hunc si reliqui dii imitari uoluissent, minus
 erroris fuisset in causa, sed illud argumentum certissimum fuisse illos fœ-
 diffimos Dæmones, quod Deorum illorum, quorum personas induerant,
 proelia, cædes, sacrilegia, stupra, fraudes, libidinem, Poëtarum car-
 minibus celebrari uellent, quod sacra ipsa obscænis & uocibus & ritibus
 peragi cuperent, quod humano nonnunquam cruore irata numina pla-
 cari mandabant: qui hi quæso spiritus, qui talia ab hominibus exhiberi
 sibi cupiebant, habent sanctitatis? quid non potius fœditatis? at quanto
 cum tumore, arrogantia, nequitia, humanos sibi animos prostituiebant,
 dum ab eis exigerent religiosum illum cultum uni Deo deditum, hi ni-
 si perditissimi fuissent spiritus, homines nunquam à uera religione
 auertissent, & ad se colendos conuertissent? Ita siue gentes simula-
 chra colerent, aut beluarum, aut hominum mortuorum, nihil stultius, si-
 ue Dæmones in illis, nihil inquinatius, è quorum duorum altero opta-
 bile magis fuerat uanam ridere stultitiam, quàm improbam superstitionem
 accusare. Hic dies omnia ista pessundedit, hæc uana, fallacia ini-
 mica discussit, errepti ex errorum uoraginibus homines & in portum ue-
 ritatis relati, nec pauci quidem illi, sed infiniti. nam ubi nouæ legis sa-
 cratissima mysteria de Iudææ finibus euecta externarum gentium oras pe-
 ragrauissent, confluere undique mortales ad illa præclara, & gregibus ad-
 uentare contractis idolis, damnatoque impio Dæmonum cultu: & quam
 uis illis primis temporibus ui atque armis notaretur Euangelium, tamen
 disciplina ueritate aduersus truculenta omnia constitit, inuictumque se
 præbuit, demùm potentissimorum populorum & regum sibi colla sube-
 git. Hanc legem, quæ inter cædes stragesque fidelium excreuerit, tan-
 quam illo ipso resecta sanguine, qui interceptus erat, quæ tam paruo fe-
 mine effuderit se tam latè, quæ aduersus uim, pericula, formidines ste-
 terit, omnia perfregerit, uicerit, quisquam putabit excogitasse homi-
 nem & induxisse, ac non infantuli huius humeris delatam, in quo una
 opera, diuina humanaque omnia coaluerunt. Neque uerò institutis gen-
 tium deiectis insultare Iudæis permiserim: illis enim exempla tantam ue-
 ri quædam prodita, ideo cæteris altiores, nobis bistanto atque etiam am-
 plius humiliores, quod exemplaria tenemus. Illi rem hebet cum um-
 bris, nobis cum re res est. Quantum interuallum inectum est inter duas
 leges, & si illis ineest germanitas quædam atque affinitas? Quid enim est
 lex uetus, nisi uerbum iræ, doloris, perditionis, edictum iudicis in reū,
 poenarum aduersus peccata intentatio, inquietudinis præconium. Quid
 Euangelium? nempe indulgentiæ paternæ uox, salutis pollicitatio, pec-
 catorum dimissio, ianua Paradisi, pabulum & resectio sanctarum anima-
 rum

rum. In lege ueteri præcepta cum Hebræis ueluti cum seruis ponebantur, quorum custodia poenam tunc effugiebat, at in Euangelio à nobis fides, ut ab amicis quæritur, cuius meritum spe nunc ingentium præmiorum ornatur; terrena, mortalia, imbecilla bona carnis obsequio indulgentiæq; accommodata illac uideo facere, hîc cœlū, hîc uitæ æternitas, hîc ad speculā Dei aditus, hîc spiritus erigens se quotidie inexplicabili gemitu libertas. Merces rerum terrenarum dabatur euestigiō Hebræis rectè facientibus, perinde ac si cum eis, ut famulis uel operariis ageretur, quibus diurnum persoluitur salarium. Nobis uerò nunc non terrena pollicetur Deus sed aduocans à presentibus futura iubet bona exquirere, in quibus cum unigenito cohæredes facit, ea potissimum ostentans præmia, quæ deceat eos accipere, qui filij Dei facti sunt. Memorant Hebræi se Deo quondam auctore Aegyptum deseruisse. Mosemque ducem in solitudinem sequutos. Illum de monte Syna digredientem colloquutum ipsi Deo tabulas lapideas ab eo retulisse duas, in quibus legis iussa adnotata fuissent. Hæc uerè proferunt: non tamen cum his, de quibus nunc agitur conferenda. Tunc mortalis homo descendit de monte referens Dei mandata, nunc de supremis cœli oris, de medio diuinitatis sinu Dei sapientia, fulgor, proles defluxit sua afferens iussa. Audiendus olim erat Dei Legatus, nunc Deus ipse præsens spiritu, præsens uerbo, præsens & corpore. Ille diuinam legem multa præcipientem atque mandantem tabulis insculptam protulit. Hic monita æternæ salutis cordibus fidelium impressit. Multum autem inter hæc duo interest, & res longè alia est hæc ac illa. Nam litera legis externæ prolata nunquam homini iustitiam traderet, sed iustitiæ opera poena, uel præmio extorquet: at ubi fidem suā humanus animus obtulerit Deo, tunc ueluti ceris præparatis digito illic Spiritus sancti diuinæ gratiæ lex inciditur, qua ducente superans cupiditates carnis implet diuinis mandata studiosè: non enim timore contreritus ille quisquis est, sed amore Dei ardens, ob idque iustus redditus ad opus accedit, ideo quæcunque fiunt, magna & præclara & cœlo digna habentur, quicumque autem metu poenæ peccare metuit, huic non peccatum, sed poena displicet. Is autem uerè peccare metuit, qui peccatum ipsum peius poenis omnibus odio habet. Hoc perfectum peccatorum odium flagrantemque illum amorem diuinæ iustitiæ non legis præbere potest scriptura, quæ minis tantum agit & terroribus, uel ostentatione præmiorum, sed rectissime talem affectum imprimit humanis cordibus spiritus gratia diuinitus immissi, quem auctor nouæ legis Deus ubertim effudit, quum in ueteri lege penes paucos tantummodo fuisset. Sed dura quoque & aspera multa fuerant seruitio prioris populi imperata, ueluti circuncisio, ciborum delectus, sabbati custodia, septimi anni quies, tot festidies, tot uictimarum oblationes, & plura alia cæremonialia, quæ quoniam posita fuerant in figuras & signa eorum, quæ temporibus nouæ legis uentura erant, ideo illius aduentu cessauerunt, quia non est opus fig-

N mento,

In Domini Natale

mento, ubi res uera apparet; abierunt illa omnia & nos à graui illo & rigido caeremoniarum iugo Legifer noster liberauit; uerùm non quomodo caeremonias depulit, ita in his, quæ ad mores pertinent, quicquam remisit, imò arctiora posuit præcepta, quàm antea fuerant, quia ea magis ad uitæ faciunt sanctitatem. Iubemur nunc non solum à cæde, sed ab omni contumelioso uerbo, nec solum ab adulterio, sed ab impudico quoque conspectu, nec à periurio modò, sed ab omni iuramento temperare, nec amicos tantum, sed cum his inimicos quoque diligere. Nò uxores plures ducere permittitur, sed unam tantum, nec hanc unam repudiare licet, quoties libet, imò omne repudium improbatum; indignari nò possumus iure uel terreri, quòd districtius præcepta fuerint nunc quædam longioresque cursus propositi nobis, quàm olim ueteribus, quia maiora quoque adsunt subsidia & maior celestis spiritus afflatus, sic melior reddita uita sanctioribus præceptis, nec difficultate onerata addito celesti præsidio. Hæc non dicerem, tam & si plurimus de his multorum esset sermo, si uerba tantum ac non res gestæ loquerentur, nam innmeri reperientur uiri, postquam lumen gratiæ huius refulsit, qui non modò superiora illa, quæ fuerant iussa impleuerunt, sed alia quoque longè excelsiora, quæ ad perfectioris uitæ culmen tendentibus tantummodo suadentur. Hoc quo melius doceatur inspiciendum est, quomodo se res humanæ haberent ante Euangelicæ legis prolationem, & quomodo postea se habuerunt, & nunc habent. Olim ieiuniorum usus uix cognitus, at post cognitum Euangelium quot mortales quotidiana ieiunia per omnem uitam duxerunt? non apud nos tantum, uerùm apud Scythas, Thraces, Persas, Indos, & Barbaros omnes. Quando unquam relicta urbium frequentia, ablegata ciuili societate homines tanto studio & tam magno numero antea, rupes, nemora, arenas tenuerunt, nisi ubi Euangelium orbi resplenduit? hinc Monachorum illustre nomen, quibus tam acris paupertatis curâ fuit, ut nihil præter tegmen haberent, nec habere uellent, idest uestem è palmarum folijs intextam, & casulam luteam, nam hæc quoque ad tegendum spectat, supellex ferè nulla uel librorum aliquot tantum sacrorum, hanc forsitan copiosorem habebât, cibum omnem lautiozem aspernabantur, pane aut oleribus uictum transigentes: nam de potu minus laborabant, quem facîle de fonte & riuulo quolibet sumebant, rara olim tanta pauperies fuit, quæ in Christi grege per innumerabilia capita tam latè cucurrit. Pauci quondam religionis studio uitam profuderunt. At pro Euangelio quot millia procubuerunt ex omni ætate, sexu, ordinè in omnibus urbibus & agris, non studiosè modò, uerùm etiam sitienter. Non possumus numerum Martyrum æquare dicendo, nec ardorem: illud breuiter dici potest, quòd hæc una religio plura absumpsit corpora, quàm multa Regum & populorum bella in unum collata: sed illa inuitos rapuerunt, hæc uolentes & sponte se se offerentes perdidit. Vnde hæc tot & tanta, quæ in Christiano populo abun-

abundarunt, & penes alias nationes & gentes uix apparuerunt? Nempe horum omnium semen, auctor, causa illud fuit, quod postquam Deus in societatem uenit humanæ fortis, Spiritum suum hominibus largius impartitus est, quo correpti nihil pensi habebant, modò Christo se commendarent, legemque ab illo datam explerent. Ille ille Spiritus fuit, qui rararum magnarumque uirtutum feraces animos tulit. Virginitas antiquis ignota temporibus uel potius neglecta, quanto hodie in dominatu locatur. Maximum sanè opus & omnium difficillimum hominem in carne locatum aspernari carnis suaues iucundasque motiones, & tanquam spiritale animal sit absque corpore, solo spiritu gaudere: perfundit illecebris corporeos sensus intestina uoluptas, titillatque blandè membra, his haud acquiescere motibus turpibus & indecoris, quin potius ingemiscere, detestari, repellere, uiri est impolluto calle fœda transmittentis. Cætera externa, ueluti opes, dignitatem, potentiam, facilius abijcere possumus, at intestinum pudicitiae hostem cum eximia serpentem suauitate frangere, raræ cuiusdam uirtutis tanquam hominem de homine tollas. Verùm hac animorum munditie, quæ inter ipsas pugnas magis enitescit, quid præclarius, magnificentius, ornatius? Virginitas Angelicam uitam hominibus reponit, cœlique, (ut ita dixerim) mores exhibet terris. Itaque uirginum choros ducere instituit, quis? ille ipse, de quo antea audistis, qui in cœlesti generatione caruit matre, in terrena, patre: cuius pater fœminam, mater uirum ignorat; quem enim alium putatis? an non ueniebat etiam in mentem Virginis matris, quæ huius propositi Dux & princeps fuit? Hos duos Iesum scilicet & Sanctissimam eius matrem miro studio emulati multi, uel innumerabiles potius ex utroque sexu uirgines extiterunt, quod ante illos uel nullum, uel rarum decus fuit. Nondum tantæ rei dignitas innotuerat gentibus, quæ postmodum in ecclesia perspecta est, postquam sola uirginitas uisâ est digna, quæ Deum pareret & sæculo portaret. Sed quid perspectam dico? parum id esset, nisi addere possem ab innumeris cœlesti fauore innundante certatim fuisse appetitam, quod eo magis admirabile est, quia nemo ad id cogitur. Virginitas enim suadetur, non imperatur: quicumque huius militiæ uoluntarius professor est, accedat, nemo inuitus dat nomen: si tantum tueri munus potest, summa uirtus, magna præmia: sin grauat, aut etiam apertè detrectat ueritus oneri succumbere, nemo ei molestus est, habet quo confugiat, unde inferiorum ordinum signa sequatur. Hinc cogitandum est utrum aliquando lex ulla fuerit hac melior, quæ maxima quæque partim præcipit, partim suadet, & nihilominus utraq; implentur à legis cultoribus, quoniam is legis fuit auctor, qui non monstrare tantum, sed etiam uires ad implendum commonstrata poterat subministrare. Deinde illud magnum, quod is eam tulit, cuius sapientia dubia esse non potest; antea homines pleni Dei uerbo loquebatur, nunc ipsum Dei uerbum nobis profatur. Dissentiebant inter se olim mor

In Domini Natale

tales de bonorum malorumque finibus, alijs summum bonum uoluptas, alijs uirtus, alijs scientia, alijs indolentia uidebatur, & summa mala horum contraria. Opinabantur denique uaria homines, non rudes modò literarum, sed etiam periti, ueluti Poëtæ, Oratores, Philosophi, Legum latores nulla certa scientia, aliud alijs uidebatur, quodlibet hominum genus de istis non sermone modò, sed moribus certabat. Maxima uerò illa erat ambiguitas utrū humanus animus superesset post mortem, & quæ superstiti uita, & quæ ad loca proficiscendum esset, optabant in tantis tenebris aliquando nonnulli, qui erectiores erant animo, Dei aliquod audire uerbum, quo innixi ueluti cymbula quadam firmiori uitæ huius truculentissimos fluctus tutò transmeare possent, humanis iudicijs diffidebant: inter hos Plato fuit, qui inter Philosophos maximè emicat. Is difficillimis in quæstionibus nihil ferè diffinit, sed innitendum dicit diuino uerbo, si quod haberi possit, idque tenendum. Ecce nunc tibi maiora optatis, non Deus extrinsecus aliquod uerbum effudit, quo doceret, sed unicum illud uerbum, quod erat apud Deum, & Deus est, ad nos uenit humana carne assumpta: & ore (ut aiunt) ad os hominibus loquutus est, ostendit rectam semitam, quæ ad ueræ felicitatis & beatitudinis fines perducit, ostendit: nulla iam subesse potest captio. Habent nunc homines aliorum dogmata, quæ uarijs diffusa sunt sermonibus & literis, ad quod referant examen, ad diuinæ scilicet legis institutiones, quæcunque cum his conueniunt, approbare oportet, quæ minimè, reijcere: imparat quippiam diuinus sermo faciendum: uetat, abstinendum, minatur, extimescendum: suadet, credendum: pollicetur, sperandum. In omnibus denique sequi oportet, quid enim obijciat quispiam cur Deum non sequatur rectè loquentem, nisi forsitan illud, quod recta loqui facillè sit, præstare difficilè: qui sermò, & si cauillatius est: non enim iusta causa est, non aggredi rectam actionem, propterea quod, qui præcipiunt, ab ea recedunt, hunc tamen sermonem Dei filius non alio sermone, ne adhuc diceretur id esse facillè, sed opere ipso, quod difficilè putabatur, refellendum putauit: nam quæcunque alijs ostendit facienda, ipse princeps largiter expleuit. Verbum hoc summi æterni patris deposuit se de coelo, non, ut loquendo tantummodo præciperet, sed ut faciendo præiret. Tradiderunt ueteres Philosophi, inter quos idem Plato Deum esse in medium, uirtutum omnium exemplar, præclara sententia, quam inuenerunt homines naturalium rerum studiosi, usque eò progressi, quò ad humani ingenij facultas ferebat, attentissimè illos multa uideo speculatos; nec sanè obesam mentem, uentremque habebant, ut profuturi sanguinis sagina foret leuanda. Itaque, ut in alijs multis, ita & in hoc ualde mihi extollendi uidentur. Illud tamen assero, si sententia hæc ueri fidem unquam habuit, nunc eò deductam, ut uel conuiuentibus oculis perspicere cognoscique possit. Nam postquam Deus in humanis egit, uelut unus è nobis uestigiis instit

tit

tit perfectissima uita, induxitque saeculo charitatis, obedientiae, humilitatis, patientiae praclarissima exempla, uita omnis doctrinae eius admirabili consentanea fuit, quia, ut nemo docuit meliora, sic nec sanctiora gessit, nec acerbiora tulit. Contempsit omnia terrena bona, omniaque terrena sustinuit mala, ne in alteris quareretur foelicitas, & in alteris infaelicitas timeretur. Natus est de matre inopi, natus in exiguo oppidulo, ne quispiam ob generis aut patriae claritatem multum sibi sumeret. Pauper factus est, cuius sunt omnia, ne beatiore ceteris uiderentur, qui diuitias possiderent. Noluit Rex ab hominibus creari, quum posset, ut humilitatis iter doceret, & honorum curam & solitudinem auferret. Exuriuit, qui omnes pascit, sitiuit, qui cunctis potum ministrat. Fatigatus itineribus, qui rerum omnium terminus est & quies. supplicia sustinuit, quae ceteris debebantur, exoluens, quae non rapuerat. Mortuus est, qui mortuos suscitauit. Hic est ille, qui peccatum non fecit, in cuius ore non est inuentus dolus: qui quum malediceretur, non reddidit maledictum: quum percuteretur non percussit: quum crucifigeretur, pro crucifixoribus orauit. Nullum maius infaelicitatis genus, quam si ubi iustissimus sis, omnium à iniustissimus habere, & eo magis si id circa diuina contingat. Hoc tum per se grauissimum est, tum ex alijs, quae necesse est ferè consequi: talem enim sequentur infamia, opprobria, flagella, uerbera, mors foeda, horribilis cruciatus. Istud, quod diximus pessimum esse infaelicitatis genus, Christus perpeffus est cum confectariis poenis. Ostendit non esse aliquod iniustitiae genus subeundum, ut mors euitetur, sed pro iustitia durissima quaeque & asperrima (si res ita ferat) silentio subeunda. Ceteros mortales imitari periculosum forsitan uideretur, de quibus inferri posset quaestio, utrum imitatione digni. At de Deo ne dubitatio quidem relinquitur, quin eius gesta imitanda sint. Est hoc pulcherrimum sanctitatis signum, quod sibi habent proponere, & ad id se exercere: quicumque ad ultimam rectè uiuendi speciem animo contendunt: sed non tantum his, qui summa capessere student, signum id per utile, uerum etiam alijs, qui infra supremum gradum cogitant consistere secundo aut tertio loco, quia intelligunt se à perfecto uitae genere tanto recedere longius, quanto id deterius imitantur. Postremum illud est, ideo de caelo se deorsum ducere, paremque se nobis forma facere uoluisse Deum, ut coram & proprius contemplati honestatis salutisq; nostrae rationem habentem magis magisque diligeremus, totamque animam in aeternum benefactorem effunderemus. Poteramus forsitan existimare, Deum remotum esse à coniunctione hominis, humana negligere uel contemnere excelsa incolentem mundi loca à tetriss tam procul, nisi ille tantus & homo fieri, & terras incolere uoluisset; sed dico illud à nobis credi forsitan potuisse, quasi non antea id fuerit creditum à plurimis & asseueratum, non esse curae Deo humana. An non Democriti omnes & Epicurei olim tales? à quibus illud Poeticum natum.

Nec

In Domini Natale

Nec curare Deum credis mortalia quemquam. Et illud
Scilicet is superis labor est, ea cura quietos
Solicitat
Videte caliginem temporum illorum, existimabāt plurimi Philosophan-
tium Deum se ipso contentum, non respicere aliena, ipsum nihil habere
negocij, nec alteri exhibere: non esse apud eum ira, nec gratia locum.
Sed Auerroim nouimus ferē omnes, (magnus enim fuit Philosophus) qui
putauit diuinum uilescere ingenium, si ad hęc inferiora cognoscenda
descenderet. huc pertinet, quod ausi sunt etiam ē uetustioribus quidam
intonare, quod Deus homini non miscetur, non quia uellent excludere
hodiernum diem, quem uenturum, ne per somnium quidem suspicati
sunt, sed illo sermone significabant Deum humanis non interesse nego-
ciis. Elisa nunc hęc est oratio, & euerfa funditus, nam quomodo dici po-
test Deum humanis non interesse negociis, qui hominum causa ipsam
etiam humanam animam carnemq; suscepit: pudet nunc dicere, non re-
spicere Deum ad mortalia, qui mortaliū causa mortalis factus est. Deus
non miscetur homini. Quid ais? imō miscetur retenta etiam propria uer-
borum significatione. Mitto afflatus diuino Spiritu, intremus magis. Iste
qui diuinę naturę humanam addidit seruata utriusque proprietate, is
tibi non uidetur homini Deum miscuisse: ille altus, nos humiles, quid
tum? non enim ui deiectus est à nobis, sed illum sponte charitas sua ad
nos usque deiecit, ut nobis cœlum imō se ipsum, in quo summa foelicitas
nostrę consistit, restitueret. Quæremus etiam, cur Deus homini se co-
pularit, quasi non pateat illum hoc facto spem nostrę quoque beatitudi-
nis armasse, altitudo cœli à terris nunquam prudentes commouit uiros,
quin crederent diuina moderante prouidentia inferiora hęc omnia gu-
bernari. Illud magis poterat terrere, quod maximo uel infinito potius &
immenso spacio distare utranque naturam uidebamus diuinam & hu-
manam, attamen illa sola foelicitas est homini, si Deo in cœlesti regno
iungatur, beatificoq; illo conspectu fruatur. Hanc coniunctionem non
omnino impossibilem fore, ut ostenderet pariter Deus, se ipsum prius
homini iunxit: Noluit nos interstitium naturarum metiri, sed quid ipse
uellet, & quantum posset, huncq; dedit potentia suę & uoluntatis ar-
rabonem, quod ipse prior suę naturę nostram agglutinauit, nunc sic li-
cet meditari: Si Deus humana, cur non homines eodem Deo auctore di-
uina capefcere ualebunt? O miram diuinę charitatis flammam, se humi-
lem ille tantus reddidit, ut quantum nos amaret, iam oculis propē uide-
remus, proximus sit nobis nullo armatus terrore, sed ab omni munitus
benignitate. Ferunt gentes quondam, quum nimbos, tempestates, gran-
dines, procellas, terremotus, uastitatem, pestilentiam perspexissent, & sæ-
pe fremitus quosdam occultos, sæpe hominum pecudumq; porten-
ta, tum faces cœlestes, tum telluris hiatus animaduertissent, his & simili-
bus de causis suspexisse numen diuinum atque horruisse: hinc Deorum,
quos

quos colebant alium fulmine, alium fuscina, alium arcu, alium alio teli genere armauerant, unicuique potestatis suæ insignia arrogantes. Sed quid gentium memini, quas falorum Deorum cultus occupauerat? Ipsos inspiciamus Hebræos, quibus luculētam sui cognitionem induxerat Deus. At quā terribilem se ijs ostendit, dum legem ferre, & præcepta dare uellet, quis uocem ferre poterat loquentis? quis consistere proprius audebat? Videbant & audiebant mira quædam & horrenda in monte Syna, quo descendisse dicebatur, uoces scilicet & fulgura & tonitrua & clangorem buccinæ paulatim crescentem in maius & prolixius se extendentem, totumque montem fumantem. Tremefactus & pauore concussus populus obtestabatur Mosē, ut personam ipse adeundi ad Deum fusciperet. Loquere (inquiunt) tu nobis & audiemus: non loquatur nobis Dominus ne fortē moriamur. Tanta illos formido inuaserat, tam terribilia erant, quæ tunc fiebant. At quas mandatorum notas Moēs detulit ad illos? quā horridas, quā seruales, quā cæcas & obscuras? testaceæ quædam formæ illis præbitæ fuerunt, quibus uterentur, alimento solidoque cibo introrsus recepto atque celato. Idem Deus quā iræ paratus? quā subitus facinorum uindex, ut heri imperio obsecundari sibi in cunctis uolebat? Nunc uertisse rationem omnem uidetur, non metū, sed amorem exculpere de cordibus nostris meditatur, quia non quā potens imperio, sed quā ardens charitate ostendit, non imbecillitatis illum nostræ, non deiectionis tædet, quid est hoc? Deus, ut homo hominum causam tractauit, breuiter quidem perstrictum, & certis uocabulorum rationibus, quicquid est, succinctè diffinitum, sed si paulò latius explicare sententiam, & rerum pondera exquirere uoluerimus: inueniemus Omnipotentem imbecillorum causa imbecillum: immortalem mortaliū causa mortalem: quietum laborantium causa laboriosum factum fuisse: eum denique, qui semper fuerat, eorum gratia, qui quandoque non fuerunt, aliquid, quod non erat sumpsisse. Quemadmodum enim uehemens amor homines sui iuris esse non permittit, sed mente illos excedere cogit, & extra se rapit in ea, quæ amant transferens, sic Deus ob maximam erga homines charitatem à supremo illo statu se dimisit, & (si fas dictū) extra se quodammodo factus est, dum ueluti oblitus altitudinis suæ humana nostra assumpsit; sic tanta illa Maiestas bonitate pariter & amore concitatur. An forsitan illud quoque poëticum uerum est.

Quid deceat non uidet ullus amans. Et rursus
Non bene conueniunt, nec in una sede morantur

Maiestas & amor.
Sic est, nec tamen huc rem traho, ut intelligi uelim indecens quippiam fecisse Deum, quod omnino illi naturæ impossibile est. Illud tamen dixerim, maiestate sua retenta & in sua sede manente, impulsus fuisse charitate nostræ, ut infimam humilemque naturam nostram fuscipere non de
boup dignaretur

In Domini Natale

dignaretur. Quid deinde quum humanam indutus est speciem, quæ gesta sunt? gregi applicuit se nostro, cominus & ueluti ex æquo præcepta hominibus salutaria dedit, nec sermonibus solum beatissimi oris, sed uitæ etiam exemplo commonebat, Spiritu itidem sancto dimisso præceptor noster erudiebat, legis ueteris obscura aperuit, umbras discussit, sacramenta expleuit, & ex illo fumo, qui multis annis antecesserat, lucem insolitam extricauit: denique simulationem ueritate, seruitutem libertate, formidinem charitate mutauit: sed quid in ipsa morte? Nonne tunc maxime declarauit, quantum amaret, quum ad illam crucem orbis liberatricem tam cupide tetendit, quid hic egit illud, nisi, ut genus nostrum non modò à suscepta peccati labe & infesta Dæmonum tyrannide liberaret, & ueluti ingenti onere depressos subleuaret: uerum etiam ad cælorum regna reduceret, immensisque præmiis collocupletaret? At una resoluit plaga? imò cruentus & lacer totus in crucis distentus patibulo, hoc tanto uulnerum suorum dolore quanti nostram salutem & incolumitatem fecerit, assidue testificatur. En telum, quo Deus noster armatur, quo sanè telo non minatur, sed solatur, imò minatur piorum animis, quod eo telo amoris uulnus ipsis infligit. Quis enim non cominoueatur ad peramandum eum, quem pro se tam dira uideat tolerasse. Nihil beneficio suo de mortalibus emere habebat. Quid enim supremæ beatitudini cum nostra imbecillitate? quid illi Maiestati addi à nobis, aut corradari poterat? Verum quos gratis condidit, eisdem gratuitum salutis beneficium impendit. Ostendens hoc facto quantum ardeat ex amore, nos ueluti iniecta manu compellit amoris iugum secum pariter ducere. Etenim si amore amor elicitur, quemadmodum ignis igne, hanc Deus artem diligentissime est persequutus, dum nullum tempus aut locum fructu uacuum beneficio sterile abire permisit: nam quæcunque erant in eo maxima hæc ad nos detulit. Omnipotentia est de nihilo creare, creati sumus, summæ sapientia præceptis instruere, instruxit: magnæ charitatis collapsos seruare, seruauit: egregiæ benignitatis ad præmia pulcherri-
ma uocare, uocauit: eximia liberalitatis ingenti donare munere, seipsum munus dat, quo nihil est ingentius. Si maiora sunt alia, concupiscamus sed non inueniemus: hæc quorum magnitudo æstimari nequit, ad nos ultro delata inflammare singula gelidum pectus queant: collecta uerò & in unum commixta, quem non mouerint, nihil unquam mouebit. Satis superque docuisse uideor, cur Dei unigenitus splendor & figura substantiæ paternæ humanam uoluerit carnem induere, & mortalitatis nostræ fieri particeps. Ita enim se contulit, primùm, ut salutem conficeret nostram cælo reddito: id enim antiquissimum illi fuit, deinde, ut uitam nostram muniret præceptis, præcepta domestico uitæ suo testimonio roboraret: postremò ut humana corda ad se pelliceret tam larga beneuolentia suæ erga nos significatione. Hæc enim omnia diligenter oratione prosequutus sum. Superest nunc, ut natalis ipsius contemplemur speciem, quod

quod in diuisione mea posueram tertium. Non possum narrare aptius, quam ipso declaratur Euangelio. Non satis, quod Dei filius tantum se deposuit, ut filius hominis pariter fieri uellet. Mater (inquit) pannis eum inuoluit, non auro aut purpura. Quid deinde? in præsepio reclinauit, non atriō regali, quibus astantibus? iumentis (inquit) duobus, Asino & Boue. Quid expectamus aliud dignum tanta pompa, nisi ut pastoralis conuentus ueluti amicorum beatorum cohors ad gratulandum concurrat, ne id quidem defuit, ne qua humillimi ortus solemnitas desiderarentur. Vbi sunt hi, qui paruulos eorum census quotidie querelis laceffunt? Ille mundi Dominus, rerum imperator in nullis diuitijs inuenitur, pauperiem tulit, ac ne tulisset quidem, nisi quod appetiuit. Magnum uideo exemplum mortalibus propositum egestatis haud detestandæ, quæ tanto fuerit affectu comprobata, quanta hæc humilitas? Mitto iam hoc, quod Deus ad homines uenit, & hominum causa homo factus est. Quid illud? quod per pauper delecta est familia, ex qua carnem traheret. Diuersorium, stabulū, præsepe, iumenta, panni, pastores, quibus nascens excipitur, quid aliud sunt, quam summæ exiguitatis & inopiæ nomina? Quod enim aliud Angelus dedit pastoribus indicium nati Saluatoris, nisi quod eum pannis inuolutum, & in præsepe iacentem inuenirent. Ita ne uerò, qui mundum hunc uario uestit ornatu, hic uilibus obuoluitur pannis? Cuius sedes est cælum, terra scabellum, hic in angustissimo iacuit præsepe. Non uenit huc horribilis tremefaciens tellurem, sidera concutiens, & fulmina uiibrans, sed non nisi summam indutus humilitatem: licet hoc loco meditari, quam dissimillimus hic noster fuerit Adæ, illi primò humani generis parenti. Ille beatissimis in hortis locatus, diuinis obedire mandatis neglexit. Hic obedientiæ gratia nullas locorum angustias recusauit, & tamen Adam simulac exortus est, adeò facundus apparuit, ut singulis rebus nomina traderet. Verbum Dei, quod omnes gentium linguas disertis facit, nunc mutum iacebat, ac ne matrem quidem suo nomine salutabat. At uixit postmodum laute, cuius quum propria essent omnia, si Deum cogitemus, non habuerit, ut ipse dixit, unde caput reclinaret: occubuit etiam gloriose, qui crucem in morte inuenit. Poterat ab initio ad calcem usque uitæ plura sibi commoda parare, & externis bonis sese munire quantis uellet, neque hanc facultatem sibi concessam ignorabat. Is enim est ille, qui ea habentibus dilargitur. Attamen paupertatem, inediam, labores, supplicia, contumelias delegit, hæc uilia & ingrata adipisci metarique uoluit, quò nobis sublimia & grata forent. Magna est enim serui gloria iisdem calcatis uestigijs Dominum comitari. Ac ne fortasse Dominum omnino proiectum putetis, Scitote natale istud humanis quidem ornamentis caruisse, at diuinis abundasse. Miramini licet, puer iste hodie natus (ita enim recolimus) sapientiæ omnis plenissimus est undique, siue ipsum ut Deum, siue ut hominem spectemus, sed non ostenderit, donec ætate progressus uirile robur membris

O indua-

In Domini Natale

induatur; Quantis præterea miraculorum insignibus corruscauit? ut de-
tur intelligi pro diuersa conditione parentum iactatum & subleuatum
fuisse, quorum alter terrenus & mortalis tenui & inopi, at immortalis &
cœlestis locuplete præclaroque cultu nascentem excepit. Primùm qui-
dem eius aduentus per multam sæculorum seriem exoptatus fuerat at-
que prædicatus. Illum longus Prophetarum ordo clarissima percinen-
tium buccina antecessit. Simulachra etiam futuræ eius uitæ de ueterum
patrum expressa gestis prælata fuerunt; nec inter Iudæos modò, sed in-
ter gentes quoque prænuntiata noua de cœlo uentura progenies, quæ
auream gentem terris inferret, & cuncta humani sceleris uestigia abole-
ret. Hoc deinceps, quod de Virgine nascitur, quantum est? Quis enim
non intelligat esse plus homine aliquid in illo, cui illo modo nasci con-
tingit præter naturæ fas atque leges. Ille mundissimus ortus, qui sine ul-
lo fœdo pudoris tactu, sine ulla originis labe contingit, perhonorificus
fanè fuit. Ad hæc quum inter medias noctis tenebras de materni uteri
angustijs in auras prodisset, finitima puero loca noua luce canduerunt:
Angelus demissus è cœlo pastores excitauit, ut natum orbis Saluatorem
conspicerent & adorarent. Ignobiles attraxit uiros, quid aliud in eis se-
quutus, quàm innocentiam uitæ & cordis simplicitatem? An potius ad
opes & honores respiceret, & tumidam sæculi sapientiam, quæ Christus
nunquam sibi sumpsit, hoc modo de Angelicis cohortibus unus, Quid?
reliqui ociosè cessarunt? non ne nato Dei filio hymnum apertissimè &
natalitia eius cecinerunt? Intelligebant enim ad pacem humano generi
conciliandam mitti, qui à mittente patre nunquam potest dimitti. Sed
natale hoc quoque extitit per id tempus, quo omne mortale genus fœ-
licitate quadam præcipua pacem agitabat. Iam enim Cæsar Augustus
pacatis cunctis gentibus, quæ Romano imperio suberant, septingentesi-
mo ab urbe condita anno Iani Fanum clauserat, quod indicium erat om-
nia undique bella compressa fuisse. Finitimæ prouinciæ armis positæ pa-
ce gaudebant: eadem erat conditio longinquarum? Nulla gens, nulla
natio contra Cæsarem. Quin etiam ad eum Scythæ & Sarmatæ extrema
terrarum incolentes miserant amicitiam petentes. Traditum est etiam
Indos ab ipso cœli torrido feruore diuulsos, eadem de causa uenisse cum
gemmis & margaritis, Elephantos quoque inter munera trahentes, &
dignos se Cæsaris amicitia censentes, non solum quod priores, uerùm
etiam, quod de tam longinquis regionibus eam appetiissent: quadrien-
nium enim iam impleuerant in uia, & hominum ipsorum color ab alio
penè orbe eos uenisse arguebat. Parthi quoque ultra Eufratem sine bel-
lo relictæ rapta Crassiana clade signa ultro retulerant. Sic ubique per ter-
rarum orbem pax fuit, aut pactio. Hac pacatissima tempestate natus ille,
qui supra omnes pacificus fuit, cuius insigne dilectio, qui uenerat, ut
ima summis conciliaret, qui pacis præcepta suis posuit, qui pacis secta-
tores sui præsentia inuisere dignatur. Denique pax illius sæculi resulget
in

in ortu Saluatoris, siue, ut aduentum eius ornaret, seu potius, ut ab eo ornaretur. Hoc iam prædictum Esaia ore. Conflabunt (inquit) gladios suos in uomeres, & lanceas suas in falces. Non leuabit gens contra gentem gladium; Psaltes quoque diuinus. Orietur (inquit) in diebus eius iustitia & abundantia pacis. Sed quid istis immoror? Ecce tibi noua è cœlo flamma emicat cœlestis uiri ortum denuntians, cunctis illustrior, pulchriorque sideribus, & quæ interdum etiam rutilaret nulla obruta solis magnitudine, cuius præuio fulgore attracti tres Magi, idest tres insignes sapientiæ nomine uiri, & eo tanquam duce uia usi de longinquis regionibus ad pastorem casam perrexerunt, & infantulum cōspicati adorant corporibus, honorant muneribus, uenerantur officijs; non illic ebur, non aurum, non purpura, non diadema fulgebant, nulla famulantium pompa, nullus armati exercitus terror, ac ne ætas quidem ea erat, quæ sentiret obsequium. Cur ergo colebant? An stella, quæ perduxit, eloquuta fuerat de cœlo illic inesse Deum? qui potuit stellæ unius radius id efficere? ac ne multa quidem sidera in unum collata id facere potuissent. Igitur uidentur & antea sacro afflati spiritu, quid stella noua portenderet intellexisse, & tunc in re præsentis eodem spiritu magistro, qui illorum mentibus omni fidere splendidius relucebat, sic cogitauisse. Iacet angusto in stabulo, quis? Ille scilicet cui elementa cuncta obediunt, cui astra famulantur, qui solo nutu orbem temperat, intra quem cœli uoluntur. Vilibus obuolutus est hic pannis, idem tamen, quicquid diuitiarum est, habet in potestate, & cæteris erogat, omnia sciens dare, quicquam nesciens accipere, at natus de fœmina matre, uerum sed de fœmina uirgine, & matrem suam ipse creauit. Hæc cogitasse illos uiros apparet, propterea quod genu flexi auro, thure, myrrha coluerunt, professi his oblati muneribus uidentur mortalem esse factum, qui Rex summus esset & sacerdos: quoniam myrrha humanis apta corporibus, thus sacerdotali ministerio, aurum regali conuenit dignitati. Sunt tamen, qui uoce stellæ commotos putent. Tradunt namque Magos animaduertisse in stella flammeam pueri formam & ab eo admonitos Regem sæculorum in Iudæa natum, quod proficisci deberent, ut adorarent. Variant etiam sententiæ unde uenerint. Euāgelium, dilucidè ab Oriente uenisse tradit. Veruntamen Orientis nulla est per se positio, nam quod unis populis oriens est, alijs erit occidens, alijs meridies. Quamobrem non desunt, qui astruant à Perside Caldæa uenisse, quæ mari contigua est, & ab oriente Iudæam spectat, ubi etiam magorum nomen celebre, & unde Camelis ascensis paucis diebus iter illud conficere potuerunt. Afferunt alii stellam hanc in Perside longè ante Christi ortum illuxisse, ita ut de longinquo mouentes illi possent ad diem occurrere, puerumque recenter natum sub Tugurio lo uidere & adorare. Horum magorum factum prælusit quodammodo gentibus, quæ postmodum intraturæ erant ad Christum, & ut huius ingressus omen suscipi potest. Ipsi nanque primi è gentibus crediderunt,

O 2 &

In Domini Natale

& se ipsos ueluti primitias gentium Christo consecrarunt. Et de miraculo quidem hoc præstantissimo magorum satis dictum. Fontem Romæ crasso ac tanquam oleario liquore illo die longè lateque stagnasse ferunt. Tēpla & simulachra falsorum Deorum, quibus exitium parabatur, multa multis locis fœde corruisse. Horum & plurium aliorum miraculorū, quæ tunc emicuerunt, semen ac origo maius illud miraculū fuit, quod Deus homo fieri dignatus est. Hic enim naturæ leges in immensum retrocesserunt, nam qui antiquior fuit omni æuo, posterius natus est, puella auctorem suum genuit: Filius matrem creauit: sed quid matrem hanc fecisse putamus ubi filium peperit? Licet enim mente contemplari, quod oculis non possumus, quod inquam erupit? quid gessit? quæ mens fuit? cogitatio? uoluntas? genuflectit, adorat. Quid agis Habrææ gentis mulier, Virginum semper gemma? Si filius hic tuus est, cur adoras? si Deus, quomodo genuisti? responsum dato. Arridet, & se non diuinitatem quidem, sed eum, cui annexa fuit diuinitas, genuisse contendit. Per tibi hunc (inquit) castissimum uterum deitatis templū, Deus est hic, quem genui, penè dixi, qui genuit, quoniam utrunque pariter conuenit mihi genitrici & filiæ. Credimus tibi. Sed quid agis inquam mulier? tollis gremio, quem cœlum sustinere nequeat, oscularis, cuius uultum infera trepidant, supera uerentur, ah cohibe lacertos, quid ulnis innectere uis secum omnia trahentem? quomodo portas eum, à quo totus orbis portatur? Vbera nudas, cur? an ut alas eum, qui cunctis animantibus alimenta subministrat, tacentem contemplaris. O rem quoque miram, tacet ille, & est tam magnum uerbum, nihil ille de te haurit nisi suum; tractas enim & componis his manibus, quas tibi formauit, lactis suggeris fontes, quibus ubera tua irrigauit; hæc tibi facere dulce est, & nullum gaudio imponis modum: hodie nanque occupasti titulum altissimæ mentis tuæ deiectioni delatum, quem uotis petijs se nimium fuerat, ut sancta Dei Genitrix habearis & dicaris: & nunc etiam fortasse tibi subuenit ad cumulum lætitiæ, quod susceptus tibi iste pudori non fuit, nec gestatus oneri, nec effusus dolori. Fœlix Maria, quæ uirginali utero Christum, fœlicior, quæ intimo cordis affectu plus omnibus gestasti. Nos uerò & tuo nomine multum & nostro non mediocriter gaudemus. Intelleximus enim quantum Creatoris bonitas humanam naturam magnificerit, quantum eius laudi & gloriæ indulserit, quum eam diuinitati suæ copulauit. Hanc tantam tamque nobilem coniunctionem esse factam non statim celebratum, sed non nisi multos post annos in ipsius Euangelij prædicatione, nam tunc Iesus, ut ex Iosepho natus uulgo cernebatur tanquam ex altero mortali parente: ita, ut Maria quoque mater compellans illum duodecimum iam agentem annum diceret. Ego & pater tuus dolentes quærebamus te. At ubi effulsit tempus nouæ legis dandæ, præmissus tunc Ioannes, qui palàm prædicaret, Deum humana assumpta specie inter homines uersari. Ille (inquit) qui post uenturus est,

ante



ante me factus est, cuius non sum dignus soluere corrigiam calciamenti. Ipse Unigenitus est Dei filius. His & talibus uocibus sanctissimus Ioannes Dominum nostrum Iesum mox pandendum indicabat, ueluti auro-
 ra solem præcurrens. Ipse postmodum sequutus Iesus in Euangelii præ-
 dicatione, nunc de se humilia loquitur quale illud est, Pater maior me
 est. & tristis est anima mea usque ad mortem. hæc de se ipso, ut de ho-
 mine fatur, quandoque usque eo attollit sermonem, ut nihil possit esse
 sublimius, ueluti quum dicit. Ego & pater unum sumus, & omnia, quæ
 habet Pater, mea sunt. Idem factis quoque ueritatem utriusque naturæ
 in se ipso subsidentem astruxit: nam quod fleuit, infrenduit spiritu, tri-
 status est, timuit, esuriit, fatigatus est de uia, & uulneratus, & demum
 mortuus; in his se hominem esse testatus est. At quod propria potestate
 languidos curauit, defunctos suscitauit, uentis & fluctibus imperauit
 Dæmones de humanis corporibus excussit, & letho datus reuixit, & ad
 extremum coelos conscendit: in his & talibus se Deum esse apertissime
 denuntiauit. Copulatus igitur Deus homini glutino sempiterno: nam
 quod semel Deus apprehendit, id nunquam dimisit. Nunc indissolu-
 bilem hunc Dei atque hominis nexum spectantes, & quia quicquid hu-
 manum est in Christo, substat in Dei uerbo, dicere possumus, hominem
 coelum & stellas condidisse. Nunc demonstrato Christo uel aliter intel-
 lecto dicere possumus illum hominem esse omnipotentem. Præclare
 Dionysius in libro de diuinis nominibus. Propter mutuam (inquit) pro-
 prietatem communionem Deus erat infirmus, & homo infinite potens.
 Delectare nos plurimum debet quod non ex Angelicis cohortibus, sed
 ex hominum numero unus tantum euectus est, ut sedeat solus ad dexte-
 ram Dei Patris cunctam possidens in coelo & terra potestatem: unde ue-
 niat in mundi clausula uiuos omnes & mortuos iudicaturus, & unicui-
 que pro meritis redditurus. Iudicium quoque illud extremum cuncto-
 rum gesta complectens, pijs uenerabile, impijs terribile, ante hominis
 tribunal exercebitur, quanquam non purus ille homo, sed homo tamen.
 Hanc tantam attulit hominibus gloriationem hodiernus dies, quod
 Deus suæ nostram naturā idest potenti & sublimi infimam inualidamq;
 adiunxit. Nunc penè fraternitatis cuiusdam cum Deo iunctæ gloriari
 ualemus. Audite nunc aliud. Nemo est, qui non intelligat quanta sit
 excellentia in Christo, qui Deus & homo est. Sed quid ex hoc sequa-
 tur, non omnes fortasse animaduertunt: dicendum igitur fuerit quo-
 rundam causa, & ut in laudatione eius finiatur oratio, qui supra est om-
 nem laudationem. Sæpius est dictum, idque uos audisse arbitror, ho-
 minem esse nodum & copulam rerum omnium: nam quod cætera possi-
 dent separatim, ut proprium possidet ille in se uno collectum mixtim, ha-
 bet communem cum Angelis mentem, cum brutis animantibus sensum,
 cum stirpibus & arboribus alimoniam, cum coelo, lapidibus, & alijs ui-
 ta carentibus creationem. Nunc quod ex Deo & homine compositus est
 Christus,

In Domini Natale

Christus, est copula ille non solum creaturarum rerum, sed etiam increa-
rarum, non temporalium duntaxat, sed etiam aeternarum, non finita-
rum modò, sed etiam infinitarum: Vna denique persona Christi, om-
nia, quæ dici cogitarique possint complexa est, nihil scrutari possumus
in rebus, quod ibi non inueniatur. Explicui proposita, plurima euol-
ui, terram iam ex magna iactatione prospecto, si languidi fuimus & re-
missi, si non satis parati instructique processimus, si non ex dignitate
tantæ rei eloquuti sumus, quæ uestra est facilitas atque humanitas igno-
scetis. Nunc de te bone I E S V, Superest, ut precemur obtestemurque;
omnes, qui adsumus supplicibus uotis, uberibus, cordis lacrymis, per
sanctum illud Natale tuum, ut exaudias. Tu è finu dilapsus parentis
mortale genus tibi ipsi summo Deo conciliaisti, foedus cruore tuo sanxi-
sti. Effice (potes enim) ut in unum confluant Regum ac populorum uo-
ta, ne prouinciæ tuo nomini deuotæ hostilibus odijs se se mutuo insequa-
tur. Vides collectam discordiarum rabiem in loca nostra efferuescere,
huc ex omnibus oris & gentibus innumeras armatarum copias confluxisse.
Italiam agros esse, qui diripiantur, exhauriantur, incenduntur, nec sa-
cro sanctam ullis esse perspicis corporum nostrorum libertatem. Fac ama-
re nomen tuum, non fraudes libeat: fraudes enim interpretamur, quic-
quid tuum, non est, & à te aliò deducit. In primisque illud præsta ne spu-
ria Turcarum proles ualida & audaci manu hæreditaria legitimorum bo-
na inuadat. Mitto iam Italiam, sed ne Ecclesiam tam ualide tibi dilectam
opprimat atque disperdat. Si sine præsidio tuo ne leuiores quidem possumus,
quomodo te remoto tam efferatas bestias poterimus coercere? præ-
sertim quum altera ex parte immineant hæretici, qui cum falsis eorum
dogmatibus, propter quæ ab ecclesia fuerunt eiekti, in ecclesiam irrum-
pere conantur: intus & foris hostes, quorum hi corpora ferro, alteri tru-
culentius animas perdunt malæ doctrinæ ueneno: utrique in te contu-
meliosi: alteri te non agnoscentes ex professo sunt impij, alteri agniti
sub specie pietatis produnt. Reuoca errantes utrosque, & in uiam deduc
salutis: homines enim à te conditi. Tu altissimus quum esses, hominum
caussa humillimus fieri uoluisti. Tu homine assumpto germanitatem
quandam nobiscum inire dignatus es, quo fit, ut ad te, non ut ad Domi-
num tantum, sed ut ad Dominum Fratrem confugiamus. Respicias nos
igitur, nec te omnino implacabilem præstabis aduersus delicta nostra,
quorum ut obliuiscaris rogamus. Tua te nobis propitium reddat beni-
gnitas. Tua hæc pro nobis suscepta commendet natiuitas. Quam sanè
natiuitatem dilectissimi fratres, ut ianuam humanæ salutis, ut clarissimum
monumentum diuinæ erga nos charitatis, ut insigne humilitatis exem-
plar, cum cæremonijs alijs multis, tum solerti animorum uestrorum pie-
tate perpetuo celebrate.



MARCI ANTONII
NATTAE ASTENSIS,
DE QVADRAGESIMALI IEIVNIO
O R A T I O.



QVADRAGESIMA iam adest, quæ superanda est nobis, nunquid tristes estis? non opinor ad rationem rem reuocans: debemus enim constanter ciborum delicias contemnere, nec sanè causa est, cur aliquis nostrum ullius rei uentri gratiam faciat, quando ille nunquam accepti gratiam habet, sed assidue plus poscit, ideo ueluti ingratum quendam creditorem substringere & coërcere debemus. Si qui autem sunt qui carniū esum nulla idonea de causa intermittere nolunt, his uenter nimis curæ est, & ea quoque forsitan, quæ uentri adiacent. Volunt pleni & distenti Paradisum ingredi, non cogitantes, quod primus ille parens generis nostri de eo deiectus fuit satur, dum cibum uetitum sumpsisset, qui, ut poenam uidit, malè secum actum illo cibo arbitratus est, & maluisset ieiunus fuisse: ille enim inauspicatus cibus nō ipsum solum, sed & posteritatem cunctam pessumdedit, & in tanta detruxit incommoda, quanta nunc experimur: quod si meminerimus, erit causa cur cunctanter & circumspectè ad cibum accedamus, neque temerè in quaslibet epulas irruamus. Et profectò seu mores animi rectos, seu ualitudinem corporis secundam spectare libeat, ad utranque rem omnino inutilis nimia facietas, quæ expellitur nunc procul indicto ieiunio, de coquis conqueratur è iuuentute? quandoquidem in ediam aptissimè ferant mediæ ætates, mensæque frugalitas uegeta magis corpora, ingeniaque reddat. Magnæ certè auctoritatis hoc quadragesimale ieiunium, quod ab Apostolis, (ut aiunt) traditum, tot sæculorum successione in Christiano populo seruatum est, & à sanctissimo quoque rigidissimè. Ignatius tertius Antiochenæ ecclesiæ à Petro rector Ioannis Euangelistæ discipulus ad Philippenses scribens quadragesimæ meminit, nec non maioris hebdomadæ, qua Christi passio celebratur, hortaturque eos, ut quadragesimale ieiunium diligenter seruent, quoniam continet imitationem eius, quod olim Deus agens in terris gessit. Vult etiam eosdem quarta & sexta

De Quadrag. Ieiunio

sexta feria ieiunare, reliquias pauperibus porrigentes. Sunt qui hoc quadragenarium ieiunium, quod ante dies Paschales in ecclesia ducitur, institutum fuisse dicant Telesphori, qui annum centesimum circiter, & septimum post Christi mortem Romæ Pontificatum gessit Antonino Pio imperante. Veteres Monachi, qui Aegypti Syriæque vastissimas incolebant solitudines, & assidue tenui uictu agebant, ita ut tota eorum uita continens ieiunium dici posset, attamen quadagesimæ temporibus aliquid atque adeo multum pristino uitæ rigori addebant, quod nunc etiam (ut opinor) religionum ordines obseruant. Incumbunt enim his diebus in corporis afflictionem toto studio, & maioribus propositis cursibus continentia uela laxantur. Nobis autem detrahere quicquam naturæ necessitati non præcipitur, sed moratum tantum indictum ieiunium, de quo tamen est, quod disceptari possit. Sunt enim qui putant in die pluries cibum capi posse, si id parcè fiat & exigue: & id facere omnino uirtutis est specimen. Arbitrantur tamen alij ecclesiam, quum pro diuersa hominum ætate & ualitudine non posset quantum, quoties edendum esset præscripsisse: & ita non geometrica, sed arithmetica ratione statuuisse, ut semel tantum comedatur, quod mihi saluberrimè institutum fuisse uidetur, ne plus quam semel quolibet die cogitatio nostra ad curam corporis referatur, subtrahit igitur sibi prandium, quicumque ieiunat, & ita ad coenam accedit, ut post eam ab omni abstineat ferculo usque in crastinum, quod si quaeratur, cur coena potius quam prandium conceditur, nam nisi decantatis uesperis non licet epulari, aiunt, id inductum fuisse, quod ecclesia cupit nos undique Christi uestigiis (quantum fieri potest) insistere, nec ab hoc exemplari desistere. Ille autem quadraginta dies, & totidem noctes ex ordine uacuas ab omni cibo & potu peregit, sed quoniam quod uis ipse dinina perfecit, id nos moliri natura non sinit humana, quæ quotidiana refectione sustentanda est & regenda: quod in illo uerè factum fuit, id nos ficta imitatione explicamus, sicut possumus: nam noctu comedendum non est, in die duramus ieiuni usque ad uesperas completas, post quas, dies intelligitur extinctus, quum nullum aliud in ecclesiis officium restet diurnum. Sic ista simulatione non improba Christum dominum referimus ieiunantem, eximentes à die postremam eius partem, in qua ieiunium soluimus, sumentes aliquid de mensa frugaliter & sobriè ad refectionem uirium: nam unica tantum coenula contenti esse debemus. Sic enim ecclesiastica lege sancitum est, ut semel tantum & non iterum cibus à ieiunante assumatur, atque ita determinatum est, quoties, quali etiam cibo utendum sit, id quoque non relictum, sed determinatum fuit, at non quanto, sed id in arbitrio cuiusque relictum, ita, ut æquum & moderatum debeat esse arbitrium, & quale à bono uiro proficisci solet. nam in legem committit, qui ieiunans una tantum absumit coena, quantum antea solebat in prandio & coena: hoc enim non est relinquere luxum, sed mutare. Non equidem dico periclitandum esse fame, sed nec refer-

tis

ris epulis infarcire uentrem, nec largifluo potu uenas irrigere oportet,
 nostro nobis nunc succo uicētitandum est. Cur enim carnes animalium?
 Cur lac, quod alio colore sanguis est? Cur oua, quæ liquidæ sunt car-
 nes, nunc à mensis remouentur? nisi quia illis plurimum firmitatis in-
 est, & plurimum alimenti. Hac de causa etiam Gregorius marinas be-
 luas, quarum exuberantia sunt corpora à mensis constitutione sua detra-
 xit; quod tamen usu receptum non est. Itaque adhiberi possunt: magna
 est enim uis consuetudinis, cui facile obsisti non potest, attamen istis
 leuiter immorandum est. Quid de his dicemus, qui ieiunant, ut rumus-
 culos hominum aucupentur? quorum nonnulli uultus quoque suos ex-
 terminant & demoliuntur, ut officiosiores cæteris propter magnam ie-
 iuniorum uim uideantur, certè operam perdunt. Quid enim attinet uen-
 tri subducere, quod non Deo, sed inani gloriæ præbeas. Nullos ne re-
 perire datur, qui rixando ob uentris ingluuiem dies digerunt? at quàm
 multos? qui magis essent in officio, si saturi quiescerent, ac de oblatiis
 Deo gratias haberent. Magnum uideor dicere quin aspiciat quàm sim-
 morosus, nam quum debeat ieiunans, parcè admodum cibum capere,
 ne si hæc illi parsimonia prosit, uideatur nouam quæstus rationem insti-
 tuisse, uelim quod ori suo subtraxerit, id proximo præbere, neque nunc
 dico proximo, qui iuxta accumbat, sed (ut Christiani moris est) alteri,
 qui egeat, cuius misera fortuna nos proximos illi faciat, atque aded ui-
 sceribus pietatis includat. Non est iniquum te ipsum esurire, & abste-
 lium saturum discedere, imò nihil æquè conuenit, quàm quenquam si-
 bi esse parcum & rigidum, ut largus aliis & benignus esse possit. Etenim
 hoc tempore, quo delicta nobis à Deo remitti postulamus, eleemosynam
 ualde opportunam duco: quomodo enim ferri potest, ut te hominem
 peccatis sordentem respiciat Deus, si tu ipse homo hominem alium ege-
 state laborantem despexeris? at ubi pauper in Christi gratiam beneuolè
 excipitur & misericorditer tractatur, credo quòd Christum tunc ungi-
 mus, mirum si deinceps delinitus non se uel peccantibus propicium præ-
 beat. Sit ergo sobrietas nostra egenis lucrosa. Verum, ut omnia ista fiât,
 & ieiunet quis parcè, studiosè, liberaliter, haud scio an non ieiunium
 pondus habeat, nisi maius illud & generale uitiorum ieiunium interce-
 dat; nihil attinet perexiguo cibo attenuare corpus, si immensa superbia
 animo intumescimus, non prodest non calere uino, si ira incendimur,
 non opus est pallore ieiunii, si inuidiæ liuore corripimur. Omni tempo-
 re à peccatis cauere debemus, & quotidie hoc uitiorum ieiunium persol-
 uendum est, à quo nemo immunis, non ætas, non sexus, non morbus,
 non peregrinatio, non operis labor excusat, semper & omni loco absti-
 nendum à uitijs: sed nullum tempus, quo moneamur magis hoc facere,
 quàm hoc quadragesimali, in quo quum prohibeamur à carnibus, quæ
 cæteris temporibus permittuntur, quid credimus à uitijs, quæ nunquam
 conceduntur? Hoc uitiorum ieiunium præcipua cura nobis amplecten-
 dum.

De Quadrag. Ieiunio

dum. Etenim si sola gula peccauit, sola ieiunet. Sin autem & reliqua membra pariter peccauerunt, cur non & illa ieiunent? ergo ieiunet oculus à petulanti conspectu, manus à rapina, lingua ab obtreptione, aures ab inanibus fabellis. Denique abstineamus à qualicunque opere, quod uel paululum læserit officia membrorum, quò minus sancta habeantur. Et ne quispiam fortasse possit dicere. Nescio an hæc mihi agenda sint, ideo dum res fiet diuina, hæc Iohelis uerba ex persona Domini prolata cantari audiemus. Conuertimini (inquit) ad me in toto corde uestro, in ieiunio & fletu & planctu. O aurea uerba: Conuertimini ad me. Si nihil aliud dictum fuisset, poterat quispiam corpus statim conuertere, & libere respondere: Factum est, iam aliud propone mandatum, sed subditur, in toto corde uestro: quaritur enim totius cordis conuersio, quæ non una aut altera die, imò ne tota quidem uita rectè expletur. Attamen quoniam etiam in his, quæ ad corporis uictum pertinent, aliquid conuersatione fuerit agendum, ut qui antea largis epulis fuerant excepti, nunc inopiam sentiant: sequitur, in ieiunio, sed est cibus quidam, quem nolo uos præterire, imò quo uos eximiè oblectari decet, cibus unquam lacrymarum & ecce subinfertur, in fletu & planctu uestro. Vult nos Dominus hoc omne tempus in luctu traducere: non satis habet si à cibo abstinentes uentre lugeamus, nisi etiam ingens eruperit lacrymarum uis de corde deque oculis recordatione peccatorum, quæ confiteri nunc faceretis oportet, recordatione quoque acerbissimæ passionis suæ & mortis, quam tulit ipse, qui uita erat, ut nos cunctos, qui morti addicti eramus, uitæ redderet. Quum olim Iudæi ieiunarent, iidem tamen in sceleribus permanerent, nec ad meliora uerterentur. Non est hoc (inquit Dominus Esaia ore) ieiunium, quod elegi, etiam si in circulum caput circumduxeris, etiam si cinerem & saccum prostraueris, non erit gratum id ieiunium. Quale igitur uis? Dissolue (inquit) uincula iniquitatis, noli cum aduersario contendere iurgiis & clamoribus, noli impiè pugno percutere, noli cupiditates tuas implere: debitores ne repete, & eos, qui confracti sunt libera: nemini oneri fueris, frange esurienti panem, egenos uagosque in domum inducas: quum nudum uideris operi eum, carnemque tuam ne despexeris. Hæc & his similia olim Iudæis Dominus. Nos tamen non illis tantum, sed nobis quoque dicta putabimus, cauebimusque prudenter à quibuscunque peccatis, ne postea conqueramur quemadmodum illi, nos in ieiunio non fuisse auditos à Domino, sed despectos, imò & magnis calamitatibus affectos: disputans enim tunc Dominus ostendit se iure iratum fuisse, nec huiusmodi ieiunia recepissee. Ipse qui offensus est (O mansuetudinem incredibilem) ipse inquam, quem tot contumelijs affecimus, uocat prior ad reconciliationem. Conuertimini conuertimini ad me (inquit) Si hæc uox mansuetudinis paternæ parum mouet, moueant minæ. Nam, ut cantor diuini spiritus cecinit, Nisi conuersi fueritis, gladium suum uibrauit, arcum suum tetendit,

tetendit, & parauit illum. Conuerſionis autem modum Paulus Apoſtolus breuiſſimè depinxit, ad Romanos ſcribens illis uerbis. Sicut (inquit) exhibuiſtis membra ueſtra ſeruire immunditiæ & iniquitati ad iniquitatem, ita nunc exhibere membra ueſtra ſeruire iuſtitia in ſanctificationem. Hodie de more ſacroſanctæ Eccleſiæ aſpergit ſacerdos diuinis iam peractis uniuſcuiusque caput cinere cum illis uerbis. Memento homo, quia cinis es, & in cinerem reuerteris. Quum hæc uerba, tum factum ipſum, admonent nos officij noſtri: nam meditatio mortis abducere facillimè poteſt à peccatis: Scriptum eſt enim. Memorare nouiſſima tua, & in æternum non peccabis. Quòd cinere caput aſpergimur, id admonet nunc nobis in gemitu & luctu eſſe uerſandum, & poenitentia arma induenda. Olim ſub ueteri lege homines ubi graue quid & triſte imminabat, & ira Domini uidebatur placanda, in ſacco & cinere uolutabantur. Sic Heſter in magno totius gentis discrimine legitur pro uarijs unguentis caput cinere & ſtercore impleſſe, & in ieiunijs humiliare animam ſuam. Sic in metu Holofernis, qui cum ingenti exercitu aduerſus Hieroſolymam profecturus uidebatur, quicumque in templo holocauſta offerebant, præcinti cilicio id agebant: & erat (ſicut ſcriptum eſt) cinis ſuper capita eorum. Iob autem illa dicebat. Ago poenitentiam in fauilla & cinere. Et idem alio loco. Saccum conſui ſuper cutem meam, & operui cinere carnem meam. Rex quoque Niniuitarum audita Ionæ prædicatione, quæ ciuitati extrema minabatur, ſurrexiſſe de folio ſuo legitur, & ſacco ſe induiſſe, & in cinere ſediſſe. Signum doloris id erat maximum, aſperſiſſe ſe ipſum cinere. Hinc illa inuitatio Hieremiæ prouidentis uenturam perniciem. Filia populi mei (hoc enim nomine Hieroſolymam appellat) accingere cilicio & conſpergere cinere: luctum Vnigeniti fac tibi planctum amarum, quia repente ueniet ualſator ſuper nos. Et rursus. Vlulate paſtores & clamate: & aſpergite uos cinere optimates gregis, quia completi ſunt dies ueſtri, ut interficiamini. Et in lamentatione idem Propheta. Sederunt in terra: conticuerunt ſenes, filia Sion conſperſerunt cinere capita ſua, accincti ſunt cilicijs. Multa ſunt huiusmodi in lege ueteri, ſed quid illa memoro? Quum ipſe in Euangelio Saluator de Tyrijs & Sydonijs dicat, quòd ſi inter eos factæ fuiſſent uirtutes, quales & quantæ in Iudæa, iam olim in cilicio & cinere poenitentiam egiſſent. Aptus igitur conuerſis & poenitentibus cinis, quo tamen nos, ut ſigno utemur, quaſi eo indicetur humilitatem animi hoc tempore ſummendam, & ingentem luctum de peccatis tollendum. Nō enim magnum eſt cinere ſordidari, ſed bene magnum ea peragere: quæ illo cinere ſignificantur. Vocatur autem hic primus quadageſimæ dies, cinerum dies de more Chriſtiani populi. Cur autem ita uocetur mediocriter arbitror demonſtratum fuiſſe. Verum, ut ad corporum ieiunia reuertamur: de quibus inſtitutus fuerat ſermo. Sunt nonnulli, qui ſeu quòd uentrem male moratum circumferant, ſeu quòd ita ſentiunt, aiunt hoc quadagenarium

rium ieiunium non rectè & ordine institutum fuisse: nam quum in eo abstinentum sit à carnibus, lacte, ouis, caseo, & huiusmodi robustioribus cibis, qui pinguius corpora & plenius alunt, & confugere hoc tempora ad olera, poma, legumina oporteat, hortus denique summo in honore sit habendus, nisi forsitan piscina, aut proximus fluuius auxilietur suggerens pisculenta obsonia. damnant illi hanc ciborum discretionem, quæ hoc attingere licet, illud non licet, quasi per hæc ad Iudaicæ legis seruitutem reuocemur. nam illi populo ciborum quædam genera præscripta, quibus uescerentur, alia penitus interdicta, & horum altera, ut munda, altera, ut immunda habebat. Quum autem Christus morte sua antiquæ legis ceremonias soluerit, ac ociosas reddiderit, non debuisse populum Christianum similibus institutis onerari, quem iam Dominus liberasset, præsertim quum ipse Dominus iam dixerit, quod intrat per os, non coinquinat hominem, sed quod exit ex ore. Et Apostolus Paulus Dominum sequens. Regnum Dei (inquit) non est esca & potus. Et rursus. Omnia munda mundis, & nihil reiiciendum, quod cum gratiarum actione percipitur. Idem quasi diuinans futura hæc, quæ nunc fiunt, uel ceu è specula prospiciens impendentia, denuntiat uenturos in nouissimo, qui prohibeant nubere & uesci cibis, quos Deus creauit ad utendum. Et hæc quidem à nonnullis iactantur, qui quoniam non rectè loquuntur, peripicuum est eos non intelligere scripturas, quas proferunt: non enim fieri potest, ut scriptura rectè & qui eas intelligunt perperam loquantur: admonendi sunt igitur, ut rem diligentius explorent, deposita omni contentione. Etenim quæcunque in lege ueteri dicta sunt de mundis & immundis animalibus, ea ad significationem quarundam rerum dicta, imò & iussa fuere, quod ne ipsi quidem Iudæi inficiantur, qui symbolicè legem eorum conscriptam affirmant, sed Iudæos omittamus. Ipse Apostolus Paulus, qui melius cæteris legem intellexit, & cuius dictis istorum causa potissimum inniti uidetur, hoc euidenter expressit, cuius hæc sunt uerba. Ne quis ergo uos iudicet in cibo aut potu, aut in parte dici festi, aut neomeniæ, aut sabbathorum, quæ sunt umbra futurorum. Ecce quomodo cibum & potum, unà cum reliquis ueteris legis umbram uocat futurorum, quæ iam discussa est luce uenientis Saluatoris. Ea enim, quæ illis præceptis & obseruationibus fuerunt adumbrata, euauerunt, postquam pleno ueritatis lumine cuncta perfusa sunt, cessare habet imago ubi res ipsa inducitur. Si quis igitur nostrum credat aliquid esse immundum de cibis, quos Deus humanis usibus creauit, cum Iudæis faceret, imò & in hac parte Iudæus esset, si credit obseruationes legis antiquæ necessarias ad salutem, hoc uetat nos facere domini uox negantis hominem coinquinari cibo, & uox illa facta ad Petrum, quæ ostenso linteo animalium pleno iussit, ut manducaret, nec quicquam illorum immundum putaret. Contra hoc uigilant Apostolica litera clamantes, omnia munda mundis, & nihil reiiciendum, quod cum gratiarum actione percipitur

& regnum Dei non esse escam & potum. In nullo æquè uidentur laborasse Apostoli initio nascentis ecclesiæ, quàm, ut obseruationes illas Iudaicas populo nouo non necessarias deicerent, reluctabantur enim tunc hi, qui à lege ad Christi fidem se conferebant, quos magnum erat à legis litera & à pristina consuetudine reuocare, & ad Euangelii uiuificum spiritum adducere: sed futuri quoque erant postmodum in Christi grege nonnulli, qui eorum sententia abstinentiam quorundam ciborum tanquam necessariam saluti indicerent, quales Taciani fuisse dicuntur, Seueriani, Manichæi, Priscillianistæ, hos tanquam digito prænotauit Apostolus, dum uenturos ait in nouissimo, qui prohibeant uesci cibis ad utendum creatis: quorum omnium dogma ecclesiæ tanquam pestiferum & sanæ doctrinæ inimicum reiecit. Sed si quæ lex nunc prodeat, aut iam prodierit, quæ continere iubeat à nonnullis cibis, non propter immunditiam, quæ nulla est, sed, ut homines mente magis consent, & à uitiiis cautius declinent, non debet similis uideri Iudaicæ legi, quæ ad significationem quorundam nonnulla ciborum genera statuit esse immunda, & his uescientes uoluit contaminari. Licet enim utraque lex idem iubeat, abstinentiam scilicet quorundam, non tamen eadem mens utriusque legis, nec eadem uetandi causa nec idem modus: hæc enim cibum, à quo contineri iubet, non damnat, ut malum & impurum, quod altera facit. Demum in animalibus terrestribus inspicere fissa ne sit ungula, & animal illud ruminet, & in aquatilibus pennas ne habeant & squamas quis non meritò irriserit hanc tam tenuem ciborum differentiam? quòd nisi Iudæis id iussu esset ad prænuntiandum mysteria quædam, & ideo habitandum illis etiam tunc fuisset in corpore literæ, puderet me, (ut uerbis utar Origenis) dicere hanc legem à Deo datam. Videbuntur enim, (ut ille inquit,) magis elegantes & rationabiles hominum leges uerbi gratia Romanorum, Atheniensium, Lacedæmoniorum. At ubi abstinentia iubetur à carnibus & uino, quia nimis alunt, & ad uitia procliuiores reddunt, nemo reiicere ualeat hanc legem tam prudenti consilio prolatam, digna certè lex, quæ à quibuslibet populis suscipiatur. Causa igitur & diuersa iubendi ratio & præcipiendi modus has duas separat leges, ut nequaquam similes dici possint. Vide si Iudæum adducere possis, ut cibum uetitum sumat, nunquam adduces, morietur citius, quàm suillam edat aut leporinam: nihil enim habet dicere, cur si immundum diglutiuerit, ipse immundus non sit, nulla est in lege exceptio, quæ eum protegat. At lege hac, qua interdicitur carniū esus, non alligatur ætas puerilis, aut senilis, & mala uoletudo, his enim personis opus est pleniori alimento: sed si quis ui hostili compulsus edat his diebus carnes, uel ut mortem euitet, uel aliud magnum corporis malum, peccaturum non arbitror, quoniam quæ uenia datur comedenti carnes si malè sit corpore affectus, eadem debetur ei, qui iuste timet, ne si carniū esum fugerit, uis eius uitæ afferatur, & incolumitas corporis amittatur. Cur hæc ita? quoniam non dam-

nat

De Quadrag. Ieiunio

nat lex hoc tem pore esum carniū, quia immundæ sint carnes, nec quia bonum corporis habitum auferre uelit, sed quia superfluum alimentum demere uult relicto necessario. Ipse Apostolus Paulus, qui clamabat omnia munda mundis, à carnibus tamen & uino temperabat. Dixit enim bonum est homini non comedere carnes, nec bibere uinum. nam quod cæteris proponebat ut bonum, proculdubio ipse præstitit. Nec quisquam nostrum struere nunc calumniam Apostolo potest, quòd uinum reiicerit, ut immundum: non enim, quia immundum, sed in uino inquit, est luxuria. Itaque Timotheo discipulo præcepit ne aquam ad huc bibat, sed modo dico utatur uino propter stomachi imbecillitatem & ægritudines frequentes: hoc nunquam mandasset, si uinum, ut impurum quiddam detestatus fuisset. Sic ualde refert, an uitetur cibus aliquis ac potus uirtutis studio, & ut magis cautum sit nobis, an quia immundus sit. Hoc non cadit in Christianos mores, ut aliquid credatur alimenti genus esse animis immundum. Illud uerò aptissimè cadit, ut credatur prægrauari anima solidiore & pleniore alimento. Quamobrem quum Apostolus dixerit. Bonum est homini non comedere carnes, nec bibere uinum, ex his duobus alterum, quod dixit de carnibus, inclusum est lege ad breue quoddam tempus finitimum Dominicæ passioni: alterum de uino relictum, nec fortassis expediebat de illo in his frigidioribus regionibus idem decerni. In dicitur nunc ecclesiæ decreto multorum dierum ieiunium, sed non id decretum passim quemlibet apprehendit, sed considerari permittitur quali quisque sit corpore, ualido ne & succulento, an tenui & infirmo, & ex eo æstimari uires & colligi, superesse ne possit tantum ex ieiunio, quòd corpus commodè sustineat. Itaque nimia alimenti detractio in corporibus etiam ualidis uituperatur, quia non inutile & tanquam emortuum corpus sed modestum magis & quietum præstare ieiuniū debet. Nemo puerum ad ieiunium uocat, nemo senem, non etiam grauida mulier huc uocatur, cui uni duo corpora sustentanda sunt, non etiam nutrix, cuius eadem est causa, quæ grauidæ mulieris. Aegrotati quodlibet permittitur, imò eum cibum sumere iubetur, quo citius conualeseat, ita ut reddita uale tudine redditum sibi quoque ieiunium putet: hoc effecit, ut stultum uideretur propter abstinentiam alicuius cibi in ægritudine diutius hominem detinere: qui eo cibo sumpto ualidior factus, posset deinceps melius & fortius ieiunare: non enim tam faueret abstinentiæ, qui sic faceret, quàm aduerfaretur. At nec ieiunare compellitur agricola, nec metallorum fossor, non ferrarius aut tignarius faber, non nauta, non uiator, quo uires sufficere operi & labori possint. Et sunt, qui ob hæc ieiuniorum instituta, ecclesiam non ut parentem piam erga fideles honorent, sed ut impiam nouercam in sectentur, quum ea non exigat plus, imò ne tantum quidem, quantum facere possimus. Duabus de causis (si uerum exquirimus) ieiunium præcipitur, una ut uitia frænentur: non enim solum, ut est penes Comicum, si ne Cerere & Baccho friget uenus, sed friget quoque iracundia, obtrectatio,

tio, lior, petulantia, fastus, & multa alia ad perturbationes animorum facientia: sed præterita quoque peccata ieiunio redimuntur, nedum futura supprimuntur, quò fit, ut utrisque & peccantibus, & peccare metuentibus aptum sit ieiunium. Ergo hæc una ratio instituendi ieiunij, altera, ut mens solutior & liberior efferatur ad contemplationem supernorum: pinguis enim uenter, ut est in Græcorum prouerbio, non gignit sensum tenuem. Si quis autem nihil imminuens de pristina eius uitæ consuetudine uitiosa imminuit sibi tantum cibum ac potum, is fateatur, oportet, quod nescit ieiunare: si ideo tantum ieiunat, ut ieiunet, nec respiciens longius cogitat, quò ieiunium ferre eum debeat. Non enim adeò immitis & asper Deus, ut delectetur afflictione corporis nostri, si ex eo nihil sit maius prouenturum. Defectatur ieiunio, non quia ieiunium est, sed quia instrumentum uirtutis. Illi probatur ieiunium, de quo efflorescit frequentior oratio, mens purior, syncerior in Deum affectus, contemptus sui, & sæculi, cœlestiumque amor, humanitas in proximum, atque clementia. Hæc ut assequamur maxima & diuina bona, inopiam cibi atque potus persequimur, nam ubi de nimia cibi & potus copia corpus redundat humoribus, tunc prægrauata mens nihil spirare potest purum atque cœleste, sed uergit ad corpus, ei que maxime inhæret: tunc enim confirmatur & corroboratur, id, quod in nobis est mortale atque irrationale per huiusmodi luxum & abundantiam ciborum: ea autem pars animi, quæ rationis particeps, debilitatur atque conficitur. Hinc omnis sensuum libido armatur. Hinc cupimus, irascimur, inuidemus, gestimus, efferimur, dolemus. Hinc opes & honores, hinc & sanguinem sapius ciuium & cædem sitimus. Appetitus enim animi ualidior effectus his ciborum delicijs, rapit nos undique per inuia & deuia, nec fræno reuocantis rationis cohiberi potest. Hoc non modò nos Christiani uidimus, sed & omnis antiqua sensit Philosophia, quæ semper maciem saginæ, abstinentiam luxuriæ, in mediam saturitati prætulit, omni autem studio esum carniū reijciebat: arbitrabantur enim, quòd pinguefactum corpus animum quodammodo redderet corporeum, ita, ut non possit deinceps spirare in liberas auras, perque sublimia se attollere. Itaque augeri nolebant corpus; per quod impediretur iter ad mentem, ne proprio fungeretur munere in perspicendis, contemplandisque diuinis, quapropter foelicem uocabant eum, qui ad minimum ac penitus necessarium alimentum redigeret corpus, atque utinam (inquiunt) ne minimo quidem egeremus, quo statim rebus optimis coniungamur, neque ab his unquam discedamus. Vetus est, animum habere se ad corpus quemadmodum ad equos aurigam. At equos cernimus nimia carne fluentes, difficiles habere motus & multa aurigæ præbere negocia. Sic intelligi pariter datur carnosum hominis corpus ad omne uirtutis opus reddi penè inutile, nec facile regentis animi gubernaculo parere. Iam uerò ad sanitatem nihil melius facere probauerunt, quàm superflua in corpore non congregare. Itaque non natura alimentum ualentius

De Quadrag. Ieiunio

lentius assumendum, sed id tantum, quo ipsa natura fiat ualentior. Et hæc quidem à ueteribus Philosophis habemus, qui sermonem quoque hunc uita prosequuti sunt. Nam Pythagoram, Pythagoreosque omnes, item & Aegypti sacerdotes, item & Persarum magos, item & Indorum gymnosophistas animalibus abstinuissè palàm est, nolentes alienis car-nibus corpus suum prægrauari. Clamabant illi, ut est apud insignem poëtam.

Heu quantum scelus est in uiscere uiscera condi.

Congestoq; auidum pinguescere corpore corpus.

Alteriusq; animantem animantis uiuere leto

Et cætera quæ sequuntur.

Sed ut à Philosophis discedam, ferunt eos, qui sub Saturno, id est, aureo in sæculo fuere: quo tempore innocentia magis inter homines floruit, fru-gibus tantum & pomis, & alijs, quæ sponte humus funderet, uictum tole-rasse: quod Ouidiano quoque carmine testatum est. Vitam ducebant tunc homines puro & simplici alimento.

Contentique cibus nullo cogente creatis,

Arbuteos foetus, montanaque fraga legebant,

Cornaque, & in duris hærentia mora ruberis.

Et, quæ deciderant patula Iouis arbore glandes.

Nulla tunc erat domi altitium sagina. Nulla uiuaria. Nulla piscina. Alites tantum dulcisono cantu aures mulcebant.

Et præter pennas nihil in pauone placebat.

Ostreaque in conchis tuta fuere suis.

Ferunt etiam sub Pigmaliione, qui in Orientis regnauit partibus, esum carniū ignoratum. Nonne etiam homines accepimus ante diluuium animalibus pepercisse, qui tamen longæui fuerunt, ne quis fortasse pu-tet esum carniū humanæ uitæ necessarium, ac non obsonij gratia rece-ptum, & obsonij quidem delicatioris, quum alia multa suppeditaret tel-lus, quæ obsonij usum præstare possent. Persarum uictus à Xenophonte describitur, quos nihil ad panem adhibere solitos asserit præter nastur-tium (herbæ id hortensis genus) nisi in uenationibus, si quam feram cœ-pissent ipsi uenando, & tenuissimi eorum uictus ea argumēta asserit, quod turpe sit apud eos spuerè & emungi, & flatus uideri plenos, Lacedæmo-niorum mensæ, quàm tenues, quàmque frugales fuerint, & idem Xeno-phon & Theophrastus, & plures alij Græci scriptores prodidere. Nota est Platonis uox, qua uituperans Syracusanas, Italicæque mensas negat sibi placuisse bis in die saturum fieri, neque unquam pernoctare solum, quod sanè indicat Athenienses & reliquos Græcos non nisi semel epula-ri in die consueuisse, uel tenuitatem prandij ad coenam attulisse: quod a-pertè Plutarchus in simposiacis confirmat, dum ait, ueteres Græcos in præ-dio panem uino tantum tinctum sumpsisse, uel quodlibet aliud, quod præ manibus erat nullo apparatu pani iunxisse. His auxiliatur Galenus

in re

in re medica post Hippocratem princeps. Is libro de tuenda ualitudine, sexto, inquit, ubi meminit prandij idest, cibi antemeridiani, se nunquam eo usum, nisi ubi serius lauandum sibi esset, & tunc solum panem sumpsisse sine potu, quosdam autem asserit mella & oliuas & reliqua eiusdem generis adhibuisse, simulque potasse. Hic conijci datur, illos interdum uel nullum, uel leuem & facilem cibum coepisse. Sed Isidorus libro ethymologiarum uigesimo prandia in usu non fuisse, testatur. Et hæc quidem antiquæ frugalitatis argumenta sunt. In templo Eleusinae Cereris Hieronymus scribit Xenocrate in sequutus tria tantum præcepta inscripta fuisse, honorandos parentes, uenerandos Deos, carnibus non uescendum. adiciitque Orpheum esum carniū carmine detestatum. Dies deficiat, si singula dicere uoluerō, quæ uiri sapientes in gentibus quondam fecerint & scripserint, ut detererent homines ab edacitate. Nam medici ueteres nouique admonent, ita nos à mensa discedere, ut nulla sit facietas cibi atque potus, sed auuiditas adhuc utriusque supersit, quod euitetur cruditas origo penè omnium morborum. Vbi enim necessarius cibus sumitur tunc planè nutrit, quoniam confici potest. At ubi superfluous aggregatur, non modò non nutrit, uerùm etiam inquinat & corrumpit, ad morbosque innumeros perducit. Quamobrem uilis tenuisque mensa sanitatis est custos, eam afferens iucunditatem, quam necesse est in bene ualido corpore morari, cui non aliud corporis bonum conferri potest. Ipsi certè Medici primis diebus tenuissimam dietam præscribunt ægrotantibus, & hac sola sæpius grauem morbum discutere, ut dubitandum non sit, quin ea faciat plurimum ad retinendam bonam corporis ualutudinem, per quam amissa instauratur. Damnant etiam nimis plena & obesa corpora quasi natura capax uiuendi non sit, nisi habeat, in quod possit crescere, simul & quia superans materia lædit, quam detraho etiam per uenas sanguine imminuere conantur. Audietis præterea probari ab eis cibos, in quibus non sit multa superfluitas, sed medius aut tenuis succus. Hinc placent aues non pingues, & parui pisces de petrosis eruti riuulis, & tenera animalia, quorum pascua sint in desertis & aridis locis. Reliqua autem nimia pinguedine suffarcinata ex copioso nutrimento, nec sibi ipsis, nec aliis uescentibus sana esse arbitrantur. Et quoniam dictum est superius carniū esum ante diluuium interdictum fuisse, quæret fortasse aliquis, cur factò diluuiò fuerit diuina lege concessus. Hoc discutiendum uenit, & latius quomodo id se habeat aperiendum. Adæ primo humani generis parenti, ubi diuinum miser confregisset mandatum, dictum fuit, quòd in sudore uultus sui uesceretur pane suo, & herbas terræ comederet, qui si in præceptis mansisset, de arborum tantum illarum pomis & baccis uitam fuisset toleraturus, non de terræ frugibus, de animalibus nihil dictum: ex quo conijcitur esum carniū in usu tunc non fuisse, nisi postremis temporibus, quibus Deus inferre diluuium ob scelera undique erumpentia meditabatur. Nam tunc homi-

Q nes in

De Quadrag. Ieiunio

nes in omnem prolapsi foeditatem, hoc etiam addiderunt, quod animalibus interdictis uescerentur: diluuius iam factus loquens ad Noe Deus dicit se omne, quod mouetur, tradere hominibus quasi olera uirentia, quod neutiquam dixisset, si animalibus uesci antea licuisset. Causa concedendi uidetur fuisse (quantum ego sentio) quoniam praeuidebat, quod homines post uenturi non abstinere ab animalibus sicut paulo ante diluuius non abstinuerant priores; ideo maluit ne peccarent concedere, quemadmodum quoque post diluuius libellus repudij propter duritiam Iudaeorum concessus fuit, quum antea nihil tale fuisset. Ergo indulgens cupiditati humanae Deus esum carniū tradidit, & tanquam id parum esset, uini pariter potu eisdem donauit: Nam eo ueteres fuisse usos non constat, & illud etiam indicat quod post diluuius Noe primus dicitur uitem posuisse & coluisse, & uini deinceps ui captum impudice iacuisse, tum quum iridente Cam uno ex filiis, alij duo melius cogitantes intrauerunt ad eum auersi, nudataque patris foemina texerunt. Illud autem affertur, cur uino ebrius sit factus, quia antea uir sanctissimus uini potentiam incognitam inexpertamque habuisset. At quod olim licebat assidue nulla dierum distinctione, nunc moribus nostris quandoque non licet: quanquam non omne, quod licet, idem semper expediat. Audistis quot saecula, quot aetates, quot populi, quot uirorum ordines carniū esum reiecerint, & quam uixerint abstinentes, & quantum id conferat ualitudini corporis, rectisque moribus & sapientiae percipiendae. Sed quid has ratiunculas, quid externa profero exempla? si quidem mos ecclesiae, auctoritas patrum, gesta maiorum sufficere sola deberent. Est hoc quidem ita. Veruntamen, ut calcar adderetur quoque curretibus, ostendendum fuit haec eadem gentibus placuisse, nam si illi lumine tantum mentis inducti exiguitatem & uilitatem ciborum probauerunt, quod magis & corpore & animo ualerent: quid nobis faciendum, qui sapientia coelesti imbuti, qui maximorum sacramentorum participes effecti sumus, quibus hoc praecipue propositum est, ut Deo placeamus? quis non labor, quae non opera sumenda, ut accedamus ad diuinam charitatis complexum? quae mox illis nos immortalibus & coelestibus praemijs beabit. Deo autem placuisse ieiunia tenuemque uictum, illud ostendit, quod quum magnis editis miraculis eduxisset Iudaeos de Aegypto in uastas solitudines Mose duce, populum illum pascebat manna tantum coelesti, & aquis de petra fluentibus, quumque postmodum desiderassent carnes & ollas Aegyptias, & stomacharentur super manna, tanquam leuissimo cibo, immisit illis Deus coturnices ad saturationem, sed magno eorum malo, nam adhuc carnes in dentibus, & percussit eos Dominus (ut scriptum est) plaga nimis magna. Iterum exorto murmure contra panem illum coelestem, renouatoque carniū desiderio, immissi ignei serpentes, qui noxio afflatu & tactu multitudinem perimerent. Helias quum fugiens Iezabel iram & minas perrexisset in desertum uiam unius diei, eumque iam ui-


ta poeniteret, & demum sub Iuniperi umbra lassus quiesceret, suscitatur ab Angelo, ei que dicitur. Surge & comede. Respexit, & ecce ad caput eius subcineritius panis, & uas aquae. Quid? non poterat huic Deus fercula per Angelum mittere copiosa & uoluptuosa? poterat, sed non uult ille suos talibus delectari ferculis, non etiam sanctus ille uir lautioris mensae consuetudinem nouerat. Similiter poterat Deus, Danieli inter Leones sedenti de regia mensa epulas mittere opipare instructas: nihil fecit huiusmodi. Abacuch diligitur, qui homini ferret messorum prandium, agreste scilicet & rusticum. Et ne sigillatim omnia enumerando sermonem nimis producam. Christus rex & regula humanorum actuum ieiunauit. Ieiunarunt, qui eum praecesserunt Prophetae, & qui mox sequuti sunt Apostoli. Ipse Paulus in catalogo laborum suorum ieiunia multa recenset. Ioannes Baptista Euangelii praecursor, quo nemo inter mulierum natos maior surrexit, tam arcte se se exhibuit in eremo, ut dictum sit à Domino uenisse eum, non manducantem nec bibentem. Et quando eremum sermone iam intrauimus, quis monachis nostris eremum incolentibus uixit districtius? quorum erant quotidiana ieiunia in pane & aqua, aut in paucis oleribus, aut arborum baccis, quorum plures sine ulla refectione biduum aut triduum continuum, plerique & solidas hebdomadas trans mittebant. Xerophagiam autem maxime probabant, id est non iurulentum, non uiuidum, non unctum, sed siccum & aridum cibum, cui sententiae accedere uidetur Hieronymus noster, qui fortissimum ieiunium asserit esse panem & aquam. Dicit uix potest, quanta monachorum examina id ieiunium per omnem uitam impleuerint. Ut enim reliquis uirtutibus ita & in hac parsimoniae laude Christiani reliquos omnes mortales superauimus. Nemo autem dubitat, quin hi, qui sibi ieiunium uerterunt in naturam, (obtinere autem consuetudo naturae uicem) fuerint ceteris fortiores, atque adeo feliciores, quia maius est non egere, quam plura habere, quibus egeas: non enim utendum alimento, nisi ut quotidiana corporis ruina fulciatur, quo remedio, qui non eget, uel leuiore eget, fortunatior censeretur debet. Quae quum ita sint, hortor ego quoscumque, qui integra & aetate sunt & ualitudine, & quos durioris operis labor haud exhaurit, ut sacratissimum hoc quadragenarium ieiunium Christi exemplo institutum, ab Apostolis traditum, consuetudine populorum retentum absoluant. Magna ieiunii uis ordine & ratione tolerati, ingens meritum, immensum praemium. Nullum ferè in ueteri lege ac noua arduum aliquod inuenietur opus patratum, nisi praemisso ieiunio. Nam Christus ipse, cuius nunc ieiunium effingimus imitando, non ante ad Euangelij praedicationem accessit, quam illud ipsum ieiunium quadraginta dierum & noctium impleisset, & actione sua consecrasset. Moses lapideas tabulas duas detulit de monte ad populum Dei digito notatas, in quibus lex continebatur, sed antea tamen hoc eodem dierum numero ieiunarat. Helias quoque quum se totidem dierum ieiunio praeparasset,

211

Q 2 uidet

uidet Deū in monte Oreb, audiuitq; ab eo, quid hic Helia? Multò familia-
rior (inquit Hieronymus) ista uox, quàm illa ad Adā facta. Adā ubi es? Illa
pastum terrebat & satura: hæc ieiunanti famulo blandiebatur. Habere
omnino uidetur in ieiunio peculiare quiddam quadragenarius hic nume-
rus, quem & duo hi maximi uiri in ueteri testamento & in nouo Saluator
seruauit. Sed quid non impetrat ieiunium? equidem nihil tantum ar-
bitror, quod non possit. Nam Anna Helcanæ uxor diu sterilis ieiunio
meruit, ut conciperet, atque ita uentrem cibo uacuum filio impleuit:
& hoc quidem uoto unius profuit mulieris. sed ecce tibi alia mulier,
quæ ut Holophernem, uniuersasque eius copias prosterneret, ieiunio se
aduersus illum armauit, nec frustra, ut mox apparuit: nam uirtute unius
fœminæ & caput ipse amisit, & exercitus eius cæsus fugatusque est, & ci-
ues obsidione liberati. Quid Hester, non ne ieiunans mentem Asueri re-
gis inflexit ad clementiam & populum Hebræum iā neci destinatum ser-
uauit, & pœnam in caput auctoris retorfit? mulieres loquimur Hebræo-
rum. Quid populus uniuersus quoties aduersus hostes pugnaturus ieiui-
nauit, & uictoriam consequutus? Itaque quos arma superare non poterāt,
hos ieiunia fregerunt. Ieiuniorum pro merito imbecillitas fortitudinem
egestas copiam, paucitas multitudinem superabat. Daniel quoque dum
ieiunat à cibo, obtinuit ne se ipso ieiunos pasceret Leones. Tum primùm
prædam suam famelica Leonum ora timuerunt. Magnum hoc beluarum
illarum ferociam humano ieiunio comprehensam & edomitam fuisse, sed
maius illud, quod idem ieiunium iracundiam quoque Dei aduersus de-
lictâ nostrâ insurgentem mitigat, & fulmen iam iamque paratum abijcere
cogit: quod exemplo suo Ninuiter ostenderunt, qui ruinam ciuitatis pro-
phetico ore clarè denuntiata squallore, sordibus, ipso denique ieiunio
uitauerunt. Similiter Acab Rex impijssimus, ut ultio diuini iudicij com-
minata illum transiret, & transmitteretur in posteros, ieiunio impetravit
& sacco. Sed amat nos Deus. Itaque facilè permittit se superari afflictioni-
bus nostris & superatus gaudet. Quid Dæmones, qui humano generi ini-
micissimi sunt non ne ieiuniū tremefacit, & fremebundos de humanis re-
uellit corporibus? nam Dominus in Euangelio ait, quædam Dæmonum
genera non nisi ieiunio & oratione ejici posse. Ergo ieiunium uim habet
ejiciendi tam feras tam uastas, tanque indomitas, ut sic loquar, bestias;
quæ enim in terris potestas, ut Dæmonum potestati comparetur? & tamē
tantam hanc potestatem humile frænât ieiunium, quid æquè mirandum,
quàm quòd hi spiritus nequiores, qui non edunt ipsi nec bibunt quic-
quam, semperque sunt ieiuni, humana ieiunia ferre non possint? Omnis
igitur pietatis ratio, omnis utilitatis cogitatio ad ieiunium uocat, hoc ui-
tia depellit, hostes superat, animum purgat, erigit, sustollit, & in macie
corporis uberiorem spiritualium saginam ministrat: hoc orationes nostras
gratiores Deo, hoc uota exaudibilia reddit, hoc denique ab isto eiectos
læculo ad cœlestem illam & immoralem, & beatam perducet uitam, cu-
ius

ius nunc quidem est imago, nam illic omnis cibus atque potus corporeus cessabit: animus autem ipse saturabitur, sed latiore & diuiniore pabulo, quàm quòd nunc cogitare possimus. Hæc non mea, sed sanctorum uiro-
Ium est oratio. Verba mea fortassis plura, sed sententiæ omnes ab illis sunt. Ego enim, qui sum? ut rigidus esse debeam ieiuniorum exactor. Nihil est in me triste, austerum, tetricum, unde enim id esset? Sed quod ego dico, illi ante me dixerunt. Nullæ partes meæ in hoc sermone fue-
 runt, nisi colligendi, disponendi, & more meo pronuntiandi: & tamen ta-
 centibus reliquis, qui sunt mei ordinis, ipse quoque faciliè reticuissem, ni-
 si quòd non omnino inutilem futuram operam meam credidi, si quæ de
 tanta hac re per uaria iacebant uolumina, ipso uno ueluti fasce substringe-
 rem, & ea uobis exhiberem; hoc feci ne uererer, hoc nouo tanque insoli-
 to dicendi genere aures uestras occupare. Sed auditorium iam dimitto.
 Illud tantum admoneo summatim, ad quod omnia respiciunt superiora,
 ne pigeat castè & continenter uiuere, & ieiunia uitæ sanctioris gratia insti-
 tuta, & animo & opere assiduè uenerari.





MARCI ANTONII

NATTAE ASTENSIS,

DE POENITENTIA

O R A T I O.



VVM. sæpe & sæpius considero ipse mecum, atque retracto, quæ nam reliquarum gentium, nationum quæ fuerit lex uitæ, qui Dei cultus illos tenuerit, quæ religio mentes peruaferit, è regione; specto quæ sub Christo effulserit disciplina, legitimi itineris dux, nuntia ueritatis, ingentium præmiorum ostentatrix, Christiani populi incredibilem admirabilemque foelicitatem cogor quibuscunque omnibus anteferre. Etenim unaquæque lex tanti æstimanda est, quanti fuerunt illi, qui se ipsos legi totos addixerunt, atque tradiderunt. At qui ut de Christianis agentes de reliquis etiam non taceamus, nullos reperio mortales, qui æquè ac illi terrena abiecerint, calcarint, repudiarint: nullos, qui petulantiam corporis, libidinem sensuum uehementius fregerint, nullos, qui deserto rerum commercio uitam nudam, atque inopem solitudini, lustrisq; mandarint, nullos, qui spiritum erexerint ad contemplationem cœlestium gaudiorum, nullos, qui miraculorum potestate naturæ imperitarint, nullos, qui supplicia ardentius expetuerint diuina in causa, nullos, qui tolerantius exceperint. Hæc mira & maxima, quum à nostris gesta solis magnificèque expleta fuerint, legem illam, quæ in tantam uirtutum segetem suos mitteret cultores: quis non Dei ore effusam diceret? quis uirtutibus militaturus uexillum aliud sequatur? Verum quoniã singulis immorari nolumus, propterea quòd sermo nimium duceretur, illud attentis paulisper animis cogitemus, quanti sit, quòd nobis eadem hæc lex æternitatem uitæ, cœlorum regna pollicetur. Aliarum religionũ iura de cœlo obmutescunt, tetram & horribilem inferorum lacunam fato functis proponunt, tam & si paulò amenioribus & lætioribus campis bonorum innocentiumque manes excipi uelint, hæc uulgus nouerat, reliqui pauci doctrinarum studijs exculi in uarias se diffuderant sententias: horum non nulli interire humanos animos, & extincto homine nihil superesse arbitrabantur: sed quicunque inter Philosophos habiti sunt meliores,

res, hi piorum animas corporum uinculis laxatos perrumpere statim crafsum hoc & concretum cœlum, quod infra lunam est, & facili ac leui lapsu ad puriores ætheris partes subuolare ferebant: unde ex sublimi nullarum rerum indigæ spectacula caperent, mundanarum rerum sideribus sociatæ. Hebræi quidem patres, quibus uera Dei lex effulserat, morte obita ad inferos descensuros propalâ testabantur, quippe foribus diuinæ aulae nondum patefactis. Has sententias, qui nouerit, non ne maximas & infinitas habeat Euāgelio gratias, quum tanta ueris fidelibus præmia polliceatur? Fac pendere nos animis de euentu sollicitos, quem renondum tenemus. Illud tamen iuuat, quod non humili ac fordida, sed gloriosa & inclita spe ducimur: oblectat interim hoc ipsum, quod Euangelium pollicetur. Quid enim pollicetur? homines Deorum numero locaturum, quibus in oris? non in mundi huius, quem cernimus suprema parte, quæ & corporea est & finita, & mobilis, sed in illo cœli orbe, quem diuinum iubar fundit candentissimum, corpore tenuissimo, maximo ambitu, motu nullo. Hoc in templo iustæ sanctæque animæ uoti compotes, uirtutum suarum donaria Deo suspenderint. Hic tota haurient beatitudinis fluenta, ex fonte manantia conspicuæ deitatis. Hic immensorum obruentur gurgitibus gaudiorum, conspicient nanque eum, qui solus ueram, solus immotam æternamque possidet substantiam, conspicient uerbum illud beatificum, quo condita hæc sunt omnia, quod spectaculum tantam præstabit sceleritatem, quantam nunquam cogitare potuimus. Etenim si in sæculo isto luctus moerorisque plenissimo, in hac exule ac tenebrosa sede, magnæ nonnunquam percipi uoluptates uidentur, tum animis tum corporibus, non solum à iustis & bonis, uerum etiam à sceleratis & nocentibus, quātā uideri debent hæc uoluptates, quæ beatis in oris in fulgido ueræ patriæ domicilio delectis tantum sanctorum ordinibus ab æterno numine tribuuntur. At parua nostra sunt merita. Quid refert? Arbores ipsæ paruo semine uberes fructus suo tempore mortalibus fundunt, tellus itidem obsequiosa, pauca grana paucioribus mensibus sibi credita reddit multiplici cum fœnore: sic uirtutes nostræ modicæ in semine ingentes edent fructus cœlesti in patria suppeditante Deo copiamque illis suam suggerente, amplior merces fuerit officio, an non fluxerit tunc ille multitudo in infinita donorum ob quædam benefacta nostra, qui nullo hominum opere expectato ad eorum commodum inanima atque animata, tam multa, tam larga, tanque feracia profudit: stultum est credere esse aliquos, qui uberiora assequantur præmia quàm hi, qui Deum præ omnibus coluerint, & sanctissima eius mandata custodire studuerint. Non enim Deus liberalitate à quoquam uincetur, qui & dare maxima potest & uult: idque facturum speramus & prædicamus. Vt igitur, qui mortalis ac terreni Principis obsequuntur uoluntati, sperant se ab illo capturos præmia, mortalia tamen & terrena, idest exigua & finita, sic æternis & immensis præmijs ditari expectant hi, qui æternum & im-

men-

De Pœnitentia

mensum Deum sequuti sunt: quanquam studium & industria nostra, uoluntasq; rectè agendi nihil Deo conferant, ille tamen, quasi plurimum conferrent, remunerare paratus, nec quid nos suscipere, sed quid illo dignum sit tradere, maximè animaduertit. Sed ecce de dignitate Christiani nominis, & de supernorum ciuium gaudijs dicentè & plura dicere parantem, repète ab orationis meæ cursu repressit mulier oculis oblata mentis, squalida facie, lugubri palla, deiecto crine, fluentibus oculis. Hanc ego intueor attonitus, uos nondum uidetis, quæritis de me, quæ nam eadè quo nomine? unde sit? Dicat ipsa. Pœnitentia uocor inquit, iustitiæ proles, erumnæ ac doloris comes, ad cœlum, quod ostentas dux. Beatus Iohannes Euangelij antesignanus propinquante iam fidelibus cœlesti regno me populis prædicauit. Me postea Dominus in carne ueniens sermonum suorum fecit initium, & ut à me cœpit, ita in me quoque terminauit, iubens Apostolis, ut pœnitentiam in omnes gentes prædicarent. Me Apostoli iussa Domini implentes lætè susceperunt, & undique uocibus suis insonuerunt. Me sanctus omnis uir, & quoque quisque sanctior, eo magis dilexit. Terreor (inquam) specie hac tua tam misera tamque lugubri. Ne terrearis inquit, nam ad illa læta & festiua ueniendum est per grauiam hanc atque aspera. Magnus Christiani hominis honos est, ut à te dictum est. Magna dignitas, sed Christiani gementis, suspirantis, afflictantis se, & ut breuiter dicam, pœnitentis: demùm sic habeto, quod quicunque uirtutis studio, uel delendi peccati gratia horrida quædam & dura suscipiunt, maximè esse commendandos, quia id rectè fiat. Sin autem malè fieri dicunt, quia laboriosè, reuocandi sunt talia opinantes, ut uideant leuissimum laborum ingentem mercedem. Sic forsitan commouebuntur, & de sententia discedent, meque libentissimis animis aduocabunt. Audistis, quæ nam hæc sit mulier, quid uel loquatur. Nutu nunc significat, ut sui præconium faciam, & se uobis oratione conciliem atque commendem, ut deinceps uos bene cognitam studiosè recipiatis. An non uobis quoque uidetur hæc digna studijs nostris? digna, in qua operam diligentiamque omnem impendamus? Non enim pœnitentia cogitanda solum, aut prædicanda, aut exterius simulanda, quorum unum ignauorum hominum est, alterum uanorum, tertium fraudulentorum, sed ut Christianum decet, uerè & fortiter opere implenda. Rectè & sapienter humanis corporibus prospexit Deus, Ille quoniam inualida hæc essent & imbecilla, & in uarios prona morbos, medelas esse uoluit, quibus amissa ualētudo instauratur. Idem in animis effecit, quos quū cerneret, præsentium rerum illecebris delinitos, uitia ueluti morbos quosdā capturos, eisdem medicinæ loco pœnitentiam indulxit, quæ sanaret & restitueret: tam & si inter uitia animorum & corporum morbos ualde intersit, propterea quod hi ingruunt inopinatò, & naturalibus de causis. Vitia uerò non nisi uoluntate contrahuntur, quum rationem de dominatu dei iicimus, appetituique parere cogimus, non minori prodigio, quàm si intra nos beluam, & hominem alere-

aleremus, & homini belua imperitaret. Veruntamen eam uim pœnitentiæ esse uoluit summus ille ac Clementissimus parens, ut omnem fraudem ac malitiam impiæ mentis exhaurire queat. Non est aliud pœnitentia, quâ animi dolor ex peccatorû recordatione sponte susceptus. Si doleamus uerè animo peccasse, utemur animi dolore eâ ad rē, cuius causa mortalibus illū cōcessit Deus. Non enim ob aliud cōcessit, nisi ob delenda peccata, hoc sic licet cōsiderare. Credibile est Deū humani generis parentem non contulisse hominibus mordacem animi dolorem, nisi ut remedium quoddam. Remedia uerò inuenta esse dicendum propter eos morbos, quos curare possunt: non propter eos, quos non possunt. Veluti si unguentum quoddam ualeat duntaxat ad sanandos oculos, meritò dicant omnes id solummodo confectum fuisse propter oculorum morbos, non propter stomachi aut iecinoris, aut alterius membri imbecillitatem. Transferamus id ad dolorem animi, mœstitiā, tristitiā, ægritudinem (ut eandem rem pluribus notem uocabulis) ubi inuenerimus, quod ea nihil aufert ceterorum, quæ grauiā existimantur, unum duntaxat peccatum corrigit, certum erit ad huius sublationem tantummodo datam. Quid hīc ostendam calamitates humanas non posse mentis mœrore extinguī? notius id quā, ut dici debeat. Ecce tibi multatus est pecunia aliquis, afflixit se & luxit diutius, num ideo multam emendauit? amissit ille filium, contristatus est, num mortuum suscitauit? flagellatus est alius, uel alapis cœsus, doluit, num contumeliā reuocauit. Correptus est quidam podagra, calculo, uel ardenti febre, propter quod concidit animo, & in grauissimo mœrore uolutatus est, num morbum sustulit? tantum abest, ut sustulerit, ut difficiliorem etiam reddiderit. Nihil igitur in his proficit animi dolor. Vbi autem proficit? In peccato, ubi quis affligitur, conqueritur, ingemiscit, quod unquam auerterit se à Deo, & maximis sempiternisque bonis exigua & caduca prætulerit: ideo tunc assumendus tanquam ad hunc unum usum datus: nam aliis in causis frustra suscipitur, & nihil plus affert, nisi quod auget calamitatis molestiam. Hanc uoluit uim doloris nostri esse Deus, ut per eum calamitas peccati, quæ est omnium maxima, auferatur. Non eum etiam, qui pereundi causam sibi præstiterit post regenerationis lauacrum, perire uult, sed uiuere resipiscentem. Damnentur igitur ab homine omnino peccata, ne pro peccatis homo ipse damnetur. Est baptismus quidem criminum omnium euerriculum. Verum quoniam hīc iterandus non est, pœnitentiam supposuit Deus, ueluti alteram in peccati naufragio tabulam, qua nixi euadamus. Audite quid Dominus Ezechielis uoce loquatur. Viuo ego (inquit) Nolo mortem peccatoris, sed ut conuertatur & uiuat. Satis erat Deo affirmare pro salute nostra, quā benignus esset. Ille etiam addidit iuramentum, quod magis impellat, ut credamus, & conuertamur ad salutem, nec in peccatorum fœditate iaceamus. Multis alijs diuinæ scripturæ locis clamat Deus. Conuertimini ad me. Agite pœnitentiam,

R

De Pœnitentia

18
tentiam, lugete præterita, caute futura, dimittam crimina, non recordabor amplius iniquitatum uestrarum. Quid plura? id petit tanto studio, & tam crebro, & sub his attestationibus & pollicitationibus, ut parum absit, quin roget: & tamen si rogari expectamus, rogat nos pro eo Apostolus Paulus unus ex principibus cœlestis aulæ. Ille scribens iterum ad Corinthios: pro Christo (inquit) legatione fungimur tâquam Deo exhortante per nos. Obsecramus pro Christo, reconciliamini Deo. Ecce quomodo iste, ut Dei legatus rogat de reconciliatione. Quanta hæc lenitas? Homo ubi læditur ab alio homine, excandescit, fremit, indignatur, non uult prior de reconciliatione uerba facere, sed aduersarii putat has esse partes, ut ad reconciliationem prouocet, & prouocatus sapius non audit anhelans ad ultionem: Deus autem offensus ab homine uocat primus ad reconciliationem, misericordiæ ultro pandit sinum, obliuionem pollicetur præteritorum: ne sic quidem audimus, nolumus ad meliora conuerti. In nullo penitus errare ac falli cuncta exactissimè prospicientem Dei solius est: at crimina effugere, præsertim grauiora, hominis etiam esse puto auxiliante Deo. At non effugit aliquis, imò deliquit, non miror hoc. Video Angelos quoque peccauisse, dum improbissimus ille dixit, Ponam sedem meam ad aquilonem & cætera, & multos habuit sequentes. Si peccatum in cœlo, quantò magis in terra? Si delictum in his, qui solo uigent intellectu, quantò magis in nobis, qui sensuum illecebris corporeæque uoluptatis suauitate titillamur? quorum mentis acies carnis onere obtunditur & prægrauatur? Itaque non miror ego (ut dixi) si deliquerit homo, sed illud mirabor potius, atque adeò molestè feram, nisi deliquisse pœniteat: corrigat igitur dolore delictum: id enim homo ab homine petere potest, adeò tam ualde humana res est pœnitudo, potest aliquis, qui culpæ arguitur, dicere se non peccasse: sed si peccauerit, nunquam dicet non esse opus pœnitentia, quæ sola remedium peccati est. Etenim quicumque in peccato impudenter perseuerat, non tam in cauendo miser est, quàm in iacendo post casum. Nulla expectentur hæc in re scripturarum diuinarum testimonia, hoc ipsum natura humanis insculpsit animis: nihil nouit, quem huius rei notitia deseruit. Loquitur per Esaiam peccatori Deus. Quando conuersus fueris & ingemueris, saluus eris, & scies ubi fueris. Quid est hoc? scies ubi fueris? nisi quia peccantium mens tantis obruitur tenebris, ut ignorent miseri quantis in malis uersentur. Si qui tamen ea uident, non clarè admodum uident, tunc perfectè intelligimus ægrotationis mala, ubi sanitas est consequuta, collatio unius ad alterum clariorem rei cognitionem præbet. Veruntamen quis habens aliquid hominis non intelligat, quàm sordet peccatum, quàm sit fœdum, & quantum coinquinet humanum animum. Veteres Philosophi lumine tantum utentes mentis, nihil in omni uita pertimescendum hominibus prædicabant, præter unum peccatum. Cætera, quæ uocantur mala, uel exigua, uel nulla esse arbitrabantur. Quanto hoc nos diuino

diuino instructi eloquio ualidius sentiemus? peccatum nanque ad uitæ deducit interitum, Dæmonum iungit consortio, & à sanctorum societate diuellit. Itaque hi moerent, illi exultant, quin etiam (si fas est dictu) sancta & indiuidua Trinitas in hominis peccato tota commouetur, quando dignissimum illud simulachrum Maieſtatis ſuæ humanis iniuſtum mentibus ſcelere ſentit pollutum, Etenim pater uirtutem ſubducit & fortitudinem, filius ſapientiam, peccatoremque ruere ſinunt in deteriora præſidio omni nudatum, hoc etiam amplius filius, quod paſſionis ſuæ fructum & eccleſiarum merita non ſuſtinet illi ualere ad ſalutem: Spiritus uerò ſanctus, quàm celeri ſe aufert gradu, ubi humani pectoris ſedem, quam incolebat, è ſanctitatis templo in ſclerum officinam uerti conſpicit? quomodo ergo quiſquam uiribus humanæ naturæ, quæ imperfecta eſt & mutila & imbecilla, quicquam aggredietur maius? quomodo conſidere ſibi poterit deſertus à Deo? Nocuit Angelis peccatum cœleſti in regno collocatis. Nobis in hanc humilem & luctuoſam detrufis uallem non nocebit? At hoc ipſum, quod huc tam miſerabiliter detrufi fuimus è ſublimi illo & florido habitaculo, primi parentis uitio, qui diuinum maledatum conſregerat, ſatis admonet quantum ueneni ſit in peccato: ſi enim alienum peccatum, quod in ipſa pallulauit humani generis radice, tantum nocuit, quantum proprium, quod ſibi quiſque ſponte contraxit, nocebit? Tantum autem nequitia & uirus eſt in hominum peccato, ut propter ipſum & tectis, & urbibus, & agris, & arboribus, & animalibus perniciem inferatur. Si cui hoc uideatur incredibile, meminerit obſecro diluuij ſub Noe facti, quod dum immitteret Deus ab hominum iniquitatem, perdidit uniuerſa, quemadmodum fuerat coniminatus. Quanta enim tunc omnium rerum deſolatio conſequuta ſit, quanta illata calamitas in omnem terram, quis non uidet? nam & deletæ urbes, & tecta, & fruges, & arbores, animaliaque cuncta cœleſtia atque terreſtria: ea duntaxat ſeruata, quæ unius patrisfamilias ſtudio, diuino iuſſu in arca concluda fuerunt. Sed & illud oſtendit brutis quoque animantibus perniciem inferri, ob hominum delicta, quod Deus protulit ad Ionam, qui nimis indoluerat, non euerſi Niniuem quemadmodum prædixerat. Nam argumento dominus ſumpto ab eo, quod circa hederam contigerat. Tu doles (inquit) ſuper hedera, in qua non laboraſti, neque feciſti, ut creſceret, quæ ſub una nocte nata eſt, & ſub una nocte periit, & ego non parcam Niniæ ciuitati magnæ, in qua ſunt pluſquam centum uiginti millia hominum, qui neſciunt quid ſit inter dexteram & ſiniſtram, & iumenta multa: Et iumenta (inquit) multa. Cur? niſi, ut oſtenderet ea pariter cum hominibus peritura, ſi non ſclerum poenitentiam egiſſent. Illud porro quale eſt contrahere peccando offenſam in tantam tamque inſuperabilem potentiam? Si plebeius quiſpam uirum alicuius nobilitatis, potentia, famæ, ſui amantiſſimum, iniuria uiolaſſet, quas ſolicitudines animo? quas moleſtias perferret? ne opprimeretur inimicitijs ſuſceptis à po-

R 2 tentiore,

De Poenitentia

tentiore, atque etiam nullo huiusmodi instante metu, si hominis adhuc aliquid in eo esset, amicitiam discissam doleret, quæreretur communes amicos, per quos rediret in gratiam; supplicaret, ipsius etiam, quem laesisset uultum subiret, genua amplexeretur, petens errato ueniam. Nunc quum flagitio suscepto de pectore auerterimus, fugauerimus, deiecerimus, elementa cuncta moderantem & bonorum omnium largitorem Deum, nihil curamus, non commouemur? Hæc maxima nobis debet esse poena, hoc uehementer nos urere, quod tantam Maiestatem, sapientiam, bonitatem læserimus. Ille Poëta, qui nescio quid in Augustum Cæsarem peccauerat, & ob id in Pontum relegatus fuerat, nonne illud protulit?

Maxima poena mihi est ipsum offendisse, priusque
Venisset, mallet funeris hora mihi. Et iterum idem

Nulla quidem sanæ gratior mentique potenti

Pœna est, quàm tanto displicuisse uiro.

Nos quis sit offensus, non cogitamus, quod maximæ poenæ loco esse debebat. Possumus ne id negligere? Esto, si non aliæ quoque immensæ & æternæ poenæ à tergo imminet sceleribus nostris debitæ: has (ut uidetur) ne respicimus quidem, & (ò rem miseram nobis Diaboloque gratam) malumus in naufragio deprehensi culpæ, tartari inuolui gurgitibus potius, quàm poenitentia tabulam retinentes, uicinam aliquam rupem natando petere, ubi locati peccata, ueluti falsos fluctus à pectore reuoluentes spem salutis teneamus. Nihil tam odiosum esse potest Deo, quàm contumax ceruix, non insecutens se ad dolorem peccati, & eo odiosior, si peccatum etiam ipsum diligatur. Primum quidem omnium inoffenso cursu uitam transmittere in omni sanctitate ac probitate. Proximum corrigere, si in quopiam offensum fuerit ac titubatum. At flagitium tueri, perseverareque in eo, deterrimè, quod malè coeperis, iam istud non est tertium, sed extremum malorum omnium & propriæ salutis demolitio, tam & si istis secus uideatur. Sunt autem nonnulli, quos poeniter secus uixisse, quàm decebat, sed ad breue quoddam tempus: nam intermissa uitia ardentius non multò post repetuntur, unde egressi fuerant eodem reuertuntur. Quid ita? quia non acerrimo peccatorum odio tenebantur, nec satis illos Zelus Dei momorderat, uerissimumque illud, quod est apud Poëtam nescio quem. Malè factam gratiam, ne quicquam coire. Quæ hæc enim hominis conciliatio ad Deum, quæ tam infirmis nixa radicibus tam citò diuellitur? Ecce tibi alij, qui differunt in horas poenitentia tempus, quasi in eorum manu sit, quàm diu uiçuri, aut quò mortis genere perituri, aut etiam tutum sit in extremo uitæ halitu poenitentiam inducere, quæ necessitate ipsa moriendi coacta & expressa uidetur, tanquam peccata magis deferant, quàm deferantur. Non enim potest anima humanis in labris existens libidines suas saturare, minus etiam ignibus proiecta sempiternis. Quid autem differimus in crastinum incertum, quod

quod hodie tuto licet? At uita longa erit, Ipsa longa bona sit. Cur enim diu in malis uersari uolumus? utique si longa erit, commendatior fuerit diuturnitate bonarum actionum, si brevis contigerit, benefactum, quod ad uirtutem celer facta est conuersio. Multos ante canitiem, quam sibi promittebant, subita mors oppressit. Inde propria illos iniquitas tradidit Iudici, Iudex ministro, minister, in carcerem. Non est sapientis facere cras, id quod si etiam heri fecisses, nimis serum fuisset: non dominamur crastino, unumquemque uitæ diem, ut postremum obseruare conuenit: & si non sit, quia esse potest: quamobrem, qui heri malus fuit, profit sibi, quod hodie uiuens possit fieri bonus, crastinum non expectet: primò quia forsitan sibi non illuxerit, nam ne illud notum quidem quid uespera fecum ferat: deinde illud meminerit fuisse plures, qui dum assidue dicerent cras cras, tamen illud cras nunquam illis fuit inuentum, aut ad eos uenit tanquam in extremis terræ regionibus hæreret, aut alicubi longè esset petendum: quod enim quisque diutius progreditur in peccatis, arctius premittitur ob longiorem peccandi consuetudinem. Frangenda sunt semel hæc uincula.

Sed propera, nec te uenturas differ in horas.

Qui non est hodie, cras minus aptus erit, Ut præclare Pelignus cecinit Poëta. Item alius Poëta dixit:

Non bene distuleris, uideas quod posse negari,

Et solum hoc dicas, quod fuit, esse tuum.

Fatemur uberem esse misericordiam diuinā, nullo excludi loco aut tempore: nunquam neque frequentia peccatorum neque peccantium multitudinem delassari. Videndum est tamen, ne tanta lenitate abutamur, ne mora temporis, quæ ad salutem data est, frustra teratur, & difficultas resipiscendi augeatur, aut supremus subito aduentet dies, qui non expectabatur. At sunt, qui illud proponant in latrone, qui à fauce itineris aulus in crucem cum Christo pariter actus est, seram fuisse poenitentiam, non tamen seram ueniam. Cur enim uenia esset, aut diceretur, si uocata non ueniret? Nolite uos met quæso istis consolari. Fuit enim nouo more actum illud, ut Christus à uiuentibus destitutus discipulum morientem moriens & ipse inueniret; nouo quodam genere poena coepit in latrone, & consummatur in Martyre. Et diuinam quidem ueniam aduentare semper poenitentibus confido: sed uidendum est, an uerè poenitentes habendi sint hi, qui ad extremum usque spiritum pertrahunt emendationem culpæ, quo tempore non peccata magis hominibus, quam homines moriuntur peccatis. At quomodo leues quidam uidentur diuinæ nimis pietati confidere, sic contra reperiunt, qui conterriti criminibus incipiunt diffidere. Superiores spe ueniæ audacius peccant, isti audacia peccatorum ueniam desperant, sed nihil æquè fugiendum quam desperatio: quoniam & summo animam affligit dolore, & Deo multum ingrata, cuius & natura misericors, & benigna uoluntas, & indulgentiæ sinus redeuntibus paratus.

Hæc

De Pœnitentia

Hæc autem quo uobis exemplo probauero? Sumam Apostolum Iudam hoc enim nemo nobis notior futurus est: quis enim negauerit pœnituisse criminis Iudam, qui pecuniam refert, fatetur peccasse se in sanguinis iusti traditione. At non resipiscentia erat illa, sed furor quidam potius cæci doloris. Videtur Diabolus, qui cor eius antea apprehenderat, ab eo paululum diuertisse, & locum dedisse criminis agnoscendi: uerum sicut muralis machina retroacta ualidius obuia disperdit, sic tali mercede Diabolus deseruerat, ut duriori peccato regrediens illigaret. Nam agnito crimine præsto iterum illi fuit, & tristitia abundantiori absortum ad nullam spem uenæ impulit. Ergo desperans, & sibi ipsi nimio plus displicens laqueo guttur strinxit, & spiritum, quem claudere uidebatur, exire coëgit. Sic uitam scelestus profudit, & eo deterius factum, quod corporis morti grauiorem animæ interitum addidit. Magnum omnino crimen, quod liberalem in se Dominum & amantem sui magistrum tam multis antea beneuolentiæ significationibus editis, hostibus prodidit nummulis correptus, sed non eo cōtentus auget malè cœptum facinus eodem impellente Diabolo. Nunquam enim se ipsum de spe diuinæ misericordiæ omnino depofuisset, nisi illum antiquus hostis more suo circumduceret, priore facinore iam captum. Negauit Iudas omnino Deum ulla pœnitentia placari posse tanto in crimine, & diuinam misericordiam uelut angustiores accusauit, tanquam latitudinem omnis peccati exorbere nequiret. Si quem igitur tenet ob multa magnaque delicta desperatio uenæ (potest enim id contingere) hortor ego, ut sanctos & religiosos adeat uiros, omniaque cum illis conferat, uidebit eorum lacrymas, preces pro se fusas audiet, ex hominū miseratione, qui secum in peccatis colloborarent, quàm latior sit illa Dei, discere poterit, animum spe meliorum eriget, quod non fecit Iudas, qui gessus suos uertit ad Phariseos, ad consortes delicti, à quibus contemptus & reiectus confugit ad laqueum, scelus quod corrigere sanctis actionibus oportebat, ultus est scelere, ne illam sibi quidem ueniam dedit, ut uiueret, quia nec à Deo desperabat. Sed neminem uestrū credo tactum desperatione mortem cogitare. Illud potius aliquis secum uoluit. Quandoquidem plus deliqui, quàm ut mihi ignosci possit: fruar uitæ huius uoluptatibus, ne amittam hoc sæculum, quod teneo, & illud aliud, quod credo: uiuam nunc ut uolo, pascam meas cupiditates. Iniquus sermo, detestandus, hunc alterum potius assumat præclarum & salutare. Equidem grauius me habeo de sceleribus meis, sed ad quem confugio? nempe ad Omnipotentem, ad beneficentissimum medicum, coram quo nullus languor consistere potest: peccator sum terribilissimus, at pro talibus Christus est mortuus: quid ueniam desperem, quam ille crucifixoribus suis patrem exorauit? Ego animo quandoque proteruo pater atque oculis indomitis fui, erraui, lapsus sum, pœnitet, ueniam peto, si nemini id pollicitus, arroganter peto, si omnibus, quicumque ueris cum lacrymis ad te suscipiunt: erige iacentem, porrige dexteram, quam

quam spondidisti, dexteram (inquam) hanc tuam cæteris rebus inuictam, solo peccantis gemitu superabilem. Hæc esset oratio uerè se afflictantis, & grauius poenitentis, propterea, quòd Deum ualde offendisset, & præcupiditate temporalium horum & exiguum bonorum sempiterna illa & immensa gaudia deseruisset. In peccatis (inquies) omnem contritiuitatem. Si poenitentiam egero, putas, saluabor? Valde. Vnde hoc mihi liquet? ex multorum exemplis, qui quum grauissimè deliquissent, ad poenitentiam conuersi, pristinam recuperarunt gratiam & habitudinem. Dicamus de uno Dauide plurimis noto. Ille adulterio iunxit homicidium, geminum crimen & utrumque magnum, quod etiam augetur ex persona eius, quia talia patrauit. Erat enim Propheta, multa iam præclare gesserat, multis à Deo fuerat beneficijs cumulatus, nec tum adulescens, sed in grauiore ætate constitutus. His adiecit, quòd adulteræ maritum id est, iniuriam passum, quòd amicum, quòd pro eo in acie contra hostes stantem interemit. Ergo siue crimen, quòd commissum est, siue uirum, qui deliquit, siue eum, in quem peccatum fuit, inspiciamus, grauissima hæc omnia illa in causa fuerunt. Attamen quum hæc essent, sperauit ille sibi posse ignosci, luxit & afflixit se, uidit ad uirtutem reditum patere, uidit etiam lapso ad meliora mutationem concedi, non esse immutabilem malitiæ conditionem, nec imitem & efferum esse eum, cui pro uenia supplicandum esset: nec uana hæc eius cogitatio: nam quum audisset à Nathan Propheta, quàm ualde illa faciens peccasset, agnouit peccatum, doluit & reconciliatus est Deo. multi alij commemorari possunt, quibus pro eo quòd fleuerunt, mœsti fuerunt, cilicium induerunt, dimissum fuit peccatum: sed protrahatur nimium, si id faciam, sermo. Non igitur peccatoribus intractabilis Deus, non inexorabilis. Amplius aliquid dicam, in medio eius furorè teneri potest. Nam quum Hebræus populus uitulum sibi aureum conflasset, & sacrificijs & alijs cæremonijs coleret, dixit Deus famulo suo Mosi in monte coram eo stanti. Valde & descende: peccauit populus tuus, amarè dictum populus tuus, quasi diceret, non iam meus, & continuans sermonem. Dimitte me (inquit) ut irascar & deleam populum istum. quid est hoc, dimitte me? quis est iste tam magnus, tanque ualens, qui uim irati & furentis Dei non modò sustinere, sed etiam coercere possit? & tanquam in occursum illius ueniens frenare. Certè preces lacrymæque seruuli impediabant, ut sibi uideretur Deus tanquam ualentioribus uiribus & lacertis constrictus teneri, ne quòd irrueret, ne impium populum perderet, meritaque morte mulcicaret. hinc illa uox, Dimitte me: at non dimittebat ille, sed largiores adhuc fundens preces & magis se prosternens arctius tenebat & coarctabat. Aut dimitte eis hanc noxam: aut si non facis, dele me de libro uitæ. Videte quàm ardens fuerit orantis affectus, ut diceret malle se cum illis nisi ignoscere, perire. Sunt autem nonnulli, qui rem coniectura huc trahant, & ita interpretentur Deum querentem quomodo ad misericordiam se inflecteret,

De Pœnitentia

40
fleeret, interpellasse Moſem ſilentio coram aſtante, ut dimitteret ſe ad ultionem iam paratum, quò ſcilicet Moſes anſam ſermonis arripiens pro populo ſe proſterneret & ſupplicaret: quod faciunt quoque interdum patresfamilias, qui nolentes filios uel ſeruos acerbius punire, admonet ſeorſum amicos, ut delinquentes de ſuis manibus eripiant, & pro illis ſupplicent, quò in iſtis timor crefcat ſupplicii, & flagelli durities mitigetur. Sic ſibi ipſi miſericordiæ occaſionem quaſiuit tunc Deus. Nolens nanque nimia indulgentia relaxare populo licentiam iterum peccandi, oſtendit noxam illam Moſis precibus condonata magna ex parte fuiſſe. Uſque adeò Clemens eſt ille, ut propter iuſti alicuius merita multorum peccantium miſereatur, nam dixit ad Hieremiam. Circuite, & uidete uias Hieruſalem, & quaerite in plateis an inueniatis uirum, qui faciat iudicium & iuſtitiam, & propitius eius fuero. Quin adeò mouet undiq; omnia & quaerit Deus, ut à pœna liberet, ut ſi neminem inueniat uiuentium, cuius meritis condonare queat aliorum flagitia, confugiat ad defunctos, & per illos aſſerit ſe remiſſurum peccata, quemadmodum dixit Ezechia. Protegam ciuitatem iſtam propter me & propter Dauid puerum meum. Quod ſi in tanta facilitate Dei & clementia Moſes tunc non ſuis, ſed alienis, non paucorum, ſed multitudinis peccatis ignoſci obtinuit, idemque poteſt unus aliquis iuſtus, non ſolum uiuus, uerum etiam mortuus. Quanta ſpes hinc effulgeat unumquemque pro ſe met ipſo placare atque exorare cœleſtem parentem poſſe. Scriptum eſt, ſepties in die cadet iuſtus & reſurget. Videte quomodo ne iuſti quidem nomen amittit, qui poſt ruinam reſurgit: nec moueat quenquam quòd ſcriptum eſt ſepties, nam ſeptuagies etiam ſepties deliquenti, ſi ingemuerit, peccata condonantur: firma amicitia eſt, (ut dixit quidam) idem uelle atque nolle. Quamobrem ſi peccatum noſtrum nobis diſplicet, hoc ipſum nos coniūgit Deo, quoniam id, quod illi, idem quoque nobis diſplicet. At qui bus placet, amant id, quod odit ille. Sed non impune ferunt. Primum ipſius impietatis maculam (quæ grauiffima eſt pœna) ſuſtinent. Nihil fordidius, nihil horribilius, nihil deformius peccato. Sin autem peccantes non ſentiunt, hoc aliud eſt ab eo, quod nunc ago. nam & ſi non ſentiunt, non ideo minus ſequetur eos peccati ſœditas: tantum autem abeſt, ut ſœlicitas ulla ex parte eos contingat, quia non ſentiunt, ut ſint eò inſœliciores, quò ſentiunt minus: nam nec in furore poſitus ſentit furorem, & eò minus ſentit, quò furit magis, ſed ſac reſipiſcentem, agnoſcet deformitatem, & eius pudebit. Verum furenti ignoſci poteſt, quoniam furor inuoluntario contigit corporis uitio: non ſicut peccatum, quod animi uoluntario motu contrahitur. Exiſtimetur recto iudicio peccati ſœditas, grauior uidebitur, & intolerabilior, quàm omnis pœna, quæ infligi queat corporibus. Hinc poëta ille, quem ſuperius docui ad Ponti hoſtia relegatum ob offenſum Auguſtum, reſpiciens ad peccatum ſuum clamabat.

Pœnitet

Pœnitet ò si quid miserorum creditur ulli,
 Pœnitet, & factò torqueor ipse meo.
 Quumque sit exilium, magis est mihi culpa dolori.
 Estque pati pœnam, quàm meruisse minus.

Sic agunt quicumque considerant, quàm fœdum sit à ratione discedere,
 & prauis innecti cupiditatibus: urit eos quàm acerrimè suo nomine im-
 pietas & criminis turpitudine. Veruntamen si qui sunt, qui hanc contem-
 nant, quia non intelligunt, (quis enim posset intelligens contemnere?)
 supplicia illa ad sensum manantia, quæ morte obita persoluent, re im-
 mensa, loco acerba, tempore infinita, nunquam, ut opinor, contem-
 nent uel eludent, quanquam etiam sceleratos plerosque præsens pœna
 diuino iudicio inflicta apprehenderit, quod tempora nostra, ut scele-
 rum, ita & pœnarum fœcunda nimis quoque testantur, ut nulla urgeat
 necessitas annales euoluere, & hac in re tanquam ignota uetustatis uti ex-
 exemplis. Sed parua huius temporis caduci pœna, si quidem posteriori
 conferatur æternæ. Equidem initio orationis meæ posui de præmijs cœ-
 lestibus quædam, sed tamen ut scitis, duobus locis censentur receptacula
 animarum post mortem (ut omittam de purgatorio interim dicere) lon-
 gè inter se distantia maximeque contraria, quorum unus ubi piorum iu-
 storumque animæ degunt, supra omnia mundi corpora locatus: alter,
 quem facinorosi & nocentes incolunt, profundissimam sedem idest, me-
 dium terræ, quod centrum uocant, obtinet. In supremo loco uirtuti &
 pietati pulcherrima præmia. In infimo sceleri & maleficio acerrima sup-
 plicia persoluantur. In supremo bonitas Dei affluit. In infimo iusta ultio
 sonat. In supremo admirabilis lux effulget. In infimo dēfissimæ tenebræ
 inundant. In supremo atrium suum Deus. In infimo carcerem locauit.
 In supremo latissima Angelorum: In infima fœdissima Dæmonum socia
 agmina. In supremo pax, amor, charitas, tranquillitas. In infimo odiū,
 ira, discordia, formido. In supremo gaudium, lætitia, uoluptas. In in-
 fimo luctus, mœror, ægritudo. In supremo denique nihil desideratur,
 quod non inueniatur. In infimo nihil inuenietur, quod desideretur.
 Nos igitur, qui uiuentes peregrinam hanc incolimus sedem, in medio
 positi, deligere possumus sursum ne an deorsum post mortem feramur:
 nam defunctis misero & fatali uitæ huius cursu salua sunt crimina: nisi
 quæ pœnitentiæ uis deleat. Itaque si pœnitentiam apprehenderimus,
 ubi ex his locis euaserimus, optimum & iucundissimum; sin aliter, teter-
 rimum & infestissimum domicilium nanciscemur. Non est quod quif-
 quam deinceps irascatur Deo, quod in tam infesta supplicia dimittatur:
 Deus nanque uult saluos fieri, maxima nobis ostentat præmia, & quan-
 tum in ipso est, dare paratus. Quod si nos met ipsos his indignos iudi-
 camus, dum malumus illo contempto ad peccata deflectere, nec malè
 etiam gestorū pœnitet, conspicua tunc redditur Dei bonitas & nostra
 iniquitas: liberos creauit, & ut liberis legem amoris sui præscripsit, quam

S non

De Pœnitentia

non implentes meritò plectimur. Minatur Deus æterna incendia, flammarum flumina, foedissimum carcerem, indelebiles conscientia morsus, infestissima supplicia, nisi cauerimus. O maximam humani generis curam. O amantis Dei uocem. Nemo incitatus odio in aduersarium & percutere uolens clamat, caue caue, hæc uox eius est, qui inuitus descendit ad plagam, & mallet, si fieri posset, parcere: hoc exhibet hominibus Deus, iam tanto ante sanctissima scripturarum uoce denuntians, in quæ detrulerit acerba, nisi nunc cauerimus: quid ita? quia inuitus percutit, & molestè (ut sic dixerim) fert, quòd illum peccata nostra in pœnas ire cogunt. Ne igitur cunctemur. Nunc tempus est uenia obtinendæ, dum hunc spiramus aërem, & actionum nostrarum Domini fumus. Vbi uerò hinc migrauerimus, non plus iuuabit pœnitentia, quàm medicina ægro tantem mortuum, & ars gubernatoria fracta iam naui submersum. Trahemur illuc ubi nec finis, nec modus ullus fuerit suppliciorum. Ille parens generis nostri in floridum illud Paradisi habitaculum inductus, propter unum utique delictum illinc detrusus, & tantis obiectus malis, quanta nunc cuncta eius sentimus posteritas. Nos uerò, qui amplioribus digni habiti sumus honoribus, quibus iam apertum est cœlum, quibus concredita hæreditas cœlestis unà cum unigenito filio, quam ueniam sperare possumus, si non modò delinquimus, sed ne delictorum quidem pœnitet? Adæ tunc dictum fuit, Terra es, & in terram ibis, & terram operaberis. Nobis uerò nunc, ex Euangelio non illa priora, sed exteriores tenebræ, insolubilia uincula, inextinguibilis uermis, indelebiles lacrymæ, horridi dentium stridores, igneæ fornaces proponuntur. Et meritò quidem: nam qui inter tanta beneficia meliores redditus non sumus, iure summa illa & extrema tormenta experiemur. Deplenda hîc igitur peccata, ne alibi interminatam pœnam defleamus. At durum est cupiditates suas relinquere, tradere se luctibus, terrena despicere, castitatem & ieiunia sibi inducere, eleemosynas nonnullas elargiri, quid ais? hæc dura & graua sunt, imò facilia ac penè mollia, si cogitare uoluerimus, quæ subeant homines, ubi pro capitis reo petitur, Imperator ut ignoscat, pecunia profunditur, maria transmeantur, procellarum incerta subeuntur, hi & illi blanditijs, precibus, muneribus, ut faueant, appellantur: timemus etiam inimicos ne id audiant & quouis modo rem impedian. Supplicatur deinceps per homines homini, & tamen incerti sumus an ille flectatur, & ut bene succedat, mors corporis ad breue quoddam tempus uitatur, & hanc animi abiectionem multi contemnent. At è dignitate hominis est prosternere se Deo, & supplicans miser ille saltem certus est de indulgentia peccatorum, seque per eam assequi perpetuam animæ salutem, quod uel ipsa corporis morte rectè emeretur. Breui etiam res conficitur sine pecunia, sine impensa, sine rescripto, sine alterius impedimento. Deus etiam ubique adest, & præsens est, ne quis fortè dicat, non possum petere ueniam à Deo in Oriente, quia ad Occidentem profectus est,

est, aut non possum in Occidente, quia in Oriente uersatur: omnem implet ille locum, ut non sit necesse huius rei gratia tibi de loco decedere: ac ne illud quidem dicas oportet, non noui cubicularios, per quos mihi sit aditus, uel non habeo potentes aulae, qui me deducant, per quos concilier, tu tu ipse ingredi potes omni tempore ad summum hunc regem, non in luce modo, sed & nocte: tantumque abest, ut opus sit internuntiis ullis, ut ne uoce quidem propria tibi sit utendum, satis est corde ingemiscere de admissis, corde supplicare pro uenia, quoniam internos ille quoscunque hominis affectus prospectat, hoc si durum uidetur, quid fieret, si primis ecclesiae nascentis temporibus nasci contigisset, quibus publice poenitentia peccatoribus asperior iniungebatur? Extat Epistola Stephani quinti Pontificis maximi ad Astulphum nescio quem uxoricidam. Quae te inquit (malum) res impulit, ut legitimo tibi iunctam thoro portionem corporis tui gladio necares? quam non insidiantem uitae tuae, neque cum altero nefariam rem facientem reperisti: ita ne agendum, ut filii tui te non parentem, sed praedonem putarent? quos tam foede omni bestia truculentior matre orbasti. At parum fuit spiritum & lucis conspectum miserrimae mulieri abstulisse, nisi sceleris mortuam accusares, habes testem tecum facientem: Quid ergo? unius testimonium ualere debuit? non modo impediens legum sanctionibus, sed etiam aduersus gentium ius, diuinæ uocis auctoritatem, quod si uni credendum fuit, num etiam ei credi debuit, qui & adulter sit & homicida? Agere poenitentiam & miserere animae tuae infelix, si fortassis Dei clementia refrigerari potest, & à tanto scelere recreari, antequam æternis gehennae prematur incendiis. Post hæc præcepit Pontifex, si quidem domi immorari suæ decreuerit, ac nolit (quod utilius esset & laudabilius) monasterii claustris includi, ac abbatis manum relicta propriae uoluntatis libertate subire, ne latus unquam ense muniat, ne carnes edat, aut uinum bibat, balnea uitet, conuiuuiis ne intersit, à comunione corporis & sanguinis Dominici præterquam in uitae extremo abstineat, flere uelit uberius, eleemosynas impartiri, largius porrectusque ante ecclesiarum fores sacco indutus orationes fidelium ultro citroque comitantium suppliciter postulare: denique intelligat perenniter in pane, aqua & sale sibi esse uiuitandum. Satis ne uidetur iactatus peccator iste conuitio Pontificis? si tamen conuitium dici potest uox grauitatis, constantiae, auctoritatis, uox plena salutis: posuit ante oculos homini Dei iudicium, terruit cruentam conscientiam, poenitentiam iniunxit, nemo id existimet crudeliter factum. Nulla est crudelitas Medici, qui ferro & igne uulnus aggreditur, ut hominem feruet, quem perderet, si uulnus palparet. Itaque ut foeditate & putredine uulneris iste aliquando careret, iussus est tenuitatem uictus cultusque obseruare, quæ multi olim uirtutis & gloriae causa in illis etiam gentium tenebris fulceperunt, acerbiora manerent, si carne posita cum anima nuda tantam labem expiare transitorio igne oporteret.

De Pœnitentia

portet. Nec solum in una hac dūtaxat causa, sed in plurimis alijs uigebat bonis quondā temporibus in ecclesia tā elegans, tāq; nobile correptionis flagellum. Nā qui incestu se macularant, qui deierarāt, qui sacro manus admorant, hos oportebat ad salubrem pœnitentiæ medelam conuolare. Presbytero, qui se in aliqua effuderat libidine, durior adhibebatur ultio, quoniam decem annorum curricula in summa uictus egestate transmittere debebat, permittitur tamen gratiæ causa, ut possit pisciculis, leguminibus, uino mensulam suam die festo exornare: denique pro quolibet graui & infami crimine sanctorum Patrum institutis septennio pœnitendum erat, & ita, ut per singulas hebdomadas bis aut ter in pane & aqua ieiunia ducerentur: quin etiam in proditum est de illo, qui latronem sua rapientem aggressus fuerat, & huiusmodi Diaboli membrum interfecerat, ubi commodè comprehendī poterat, ut nonnullos dies pœniteret, non erubescerent pœnitere, qui pœnitenda committere non erubuerant. Nunc uerò (quæ temporum peruersitas est & ignauia) nulla publicæ pœnitentiæ facies apparet, omnia seueritatis priscae uestigia obsoluerunt. Hic dicet aliquis, si reditus patet in gratiam, ubi agnoscens peccati turpitudinem ingemui, & rædunt uixisse secus quàm decebat, cur adhuc me poena manet? quo enim hæc reconciliatio gratiæ, quæ ita molesta & importuna est, ut parta supplicio afficiat amicum? non respondebo prius, quàm eum, qui hoc dicit & cogitat, interrogem. Cur Torquatus Consul filium aduersus edictum cum hoste conferentem manus, securi percusserit? An simultates pater cum filio ullas? cum milite Imperator gerebat? Incredibile est sine aliqua animi afflictatione ad supplicium sumendum uenisse. Strabant in conspectu hinc liberum charitas illinc militiæ disciplina. Accusat hæc iuuenem Imperatori, excusat illa patri, explicat hæc uirgarum fasces & secures, illa implicat, trahit una ad supplicium bellatorem, retrahit altera uictorem. Tandem illum, quem natura cogente diligebat, qui hostem singulari congressu lacescentem occiderat, quem eximie fortitudinis nomine à cuncto exercitu commendari uidebat, uita priuauit, ne ius legum, maiestasque imperij illo uiuente occideret. Maluit eam reip. partem unde Ro. Imperij summa stabat, quàm heredem familiæ uidere incolumen. Maluit se ipsum filio, quàm iustitiam orbare suo decore atque fructu. Quid de Zaleuco referam Locrensi, qui quum Legislator electus à ciuibz legem tulisset, qua adulteros utriusque oculi amissione puniebat, filiumque eius adulterij damnatum legis poenā subire oporteret: eāq; poenā tota ciuitas in honorem patris remitteret, aliquādiu repugnauit. Tandem precibus populi euictus, unū sibi, alterū filio oculū iussit erui, ne publicæ uindictæ ius periret, & delictū sua lege damnatū impunitum relinqueretur: partitus poenā inter se & filiū effecit, ne quid legi deesse uideretur: non enim aliena, sed domestica corpora poenam illam sustinebant, & quamuis delinquens filius minus iusto fuerat punitus, ipse tamen plus, quia innocens erat. Ergo in magistratu hoc fecerint

fecerint patres publicam disciplinam priuato anteponentes dolori? Quid de Deo omnium genitore putandum est? à quo uirtutum omnium exempla manant: num iustitiæ eum suæ oblitum putamus aduersus illum, qui tot eius salutifera mandata neglexerit, contempserit, infregerit? nullamne sceleri poenam deberi putabit? Iustum est enim, ut qui sibi cupiditati busque suis indulserit, plusquam debuit, patiatur aspera quædam contra quam cuperet: sic enim res redigitur ad æqualitatem, quæ iustitiæ propria est. Non respuit ingemiscientem Deus, pauentem, manusque ac os ad coelū tollentē, sed benignissimo intuitu miserrimū respicit peccatorem. Verumtamen in tanta clemētiā ubertate iustitiæ pariter meminit, nec in tali unquā opere inferior homine reperietur. Quid enim obtendere contra potest aliquis iustē, cur diuina iussa non impleat? num quia impossibile? an quia obscurē tradita? neque bene intellecta? uel num quia non habuerit ad implendum, quod temporis esset satis? uel forsitan, quia si ea impleuerit postmodum sine præmio discedet? nihil horum, quid ergo aliud fuit in causa, nisi quædam acris & indomita libido, qua impulsī cornua sustulimus aduersus sanctissimam disciplinam, cuius summa est, ut Deum & proximum diligamus, ad quod trahimur omnes duce natura. Nulla enim, ut opinor, tam barbara, tam immanis, tam effera est natio, quæ non intel ligat Deum præ omnibus amandum ac colendum esse, quæ non sentiat cum omni humano genere societatem sibi esse quandam, cuius iure alterum non lædere, sed iuuare potius deceat. Non factum est id, sed multa per iram, auaritiā, cupiditatem, superbiam peccauimus, poenitet, ueniam petimus. Quid hic Deus? ueniam concedit ille quidem petitam, per quam reconciliatio fit gratiæ, attamen iustissimi regis more maleficia ultione digna censet, utque uirtutem hominis, pudorem, bonitatem affluētibus præmijs ditabit, sic iuuat illum in delicto aliquam animaduersionem nostram uidere, quam utinam in sæculo isto dum licet, sponte ad arbitrium nostrum subeamus, ne deinceps corporibus elapsi alio in loco, quod deberetur, duriorē conditione persoluamus. Est enim istud diuinæ prouidentię institutum, quo iste mundanarum rerum status pulcherrimē duceretur, ut peccatum semper poena sequatur. Hoc etenim deposcere uidetur ratio, quemadmodum de me nuper audistis, & sancti Patres literis tradiderunt, ut pro eo, quod quispiam egerit cupidē cum uoluptate, aliud patiatur inuitus cum dolore. Ergo poenam delicto respondentem non remittit ille, idque ex nobilissimo suo instituto, quod edidit. Sed & illud quoque cogitandum est, quod si peccata gratis remitterentur absque ullius poenæ solutione, leuiores ea arbitramur, & in deteriora indies prolaberemur: Nunc si non ob aliud saltem de poenarum mensura peccatorum grauitatem magnitudinemque expendimus, cautioresque & uigilantiores efficiamur, ne post hac tale quid admittamus: nec uerò ob hoc imminui & uiolari gloriam Christi dicendum est, imò potius augeri, si iustitiam suam ad ultionem peccatorum ualere patitur, & ignorat ne-

mo

De Pœnitentia

mo satisfactionem omnem, qua peccata eluuntur, in Christi sanguinem referri: nam extra ecclesiam positus nulla pœnarum supplicia ad redemptionem peccatorum sufficere notissimum est. Istud exemplo liquet Dauidis quod diuinæ nobis proponunt literæ, de quo etiam antea dictum fuit. Is quum adulterio homicidium copulasset, correptus Prophetæ uocibus ingemuit & fleuit, condonatum crimen reseruata pœna: nam statim infantem amisit, quem ex adultera susceperat, & deinceps alium sensit rebellantem filium, uitæque suæ & regno insidiantem. Ipse Moses, qui placasse uidebatur in monte Dominum pro uituli adoratione, tamen ubi in castra descendisset, circiter tria millia hominum interfecit: sic enim pepercit Deus populo, ut eum tamen aliqua animaduersione percuti uellet. Ergo si tanta fuerit interior cordis afflictio, ut sit sufficiens ultio peccati is in quo illa fuerit, crimine liberatur. Sin uerò illa tanta non sit, nec præterea quicquid gestum est exterius sancti operis ieiunando, orando, misericordiam exercendo, quod satis sit in peccati uindictam. Deus, qui & peccatorum nouit & pœnarum pondera, & hæc illis uult respondere, idoneum adjiciet flagellum: præponderant autem nunc minimæ quæque pœnæ uoluntate susceptæ his, quæ post alio in sæculo maximæ necessitate persoluentur. hinc nos non quoslibet, sed dignos admonet Euangelicus sermo pœnitentiæ edere fructus, qua in re unius cuiusque conscientia cõuenitur, ut qui plura & grauiora deliquerit, acerbior dolore mordeatur, uitam studeat futuram sanctioribus laboribus implicare. Promittitur eodem Euangelico sermone debitori è carcere exitus, sed non prius quam reddiderit omne, quod debet usque ad nouissimum quadrantem: quo sane sermone significatur minimorum quoque delictorum luenda esse supplicia. O uerè foelicem, cui libuerit uiuenti uetera obruere mala, nouorum multitudine benefactorum, qui quum inspexerit gemebundus, & secum reputarit, quam foedè iaceat, quanta ex dignitate propter peccandi uim exciderit, quomodo ueluti membrum à reliquo uitali corpore, cuius Christus caput sit diuulsum computrescat: appetet ecclesiæ uelut piæ parentis gremio condi, sistereque statim se uolet sacerdoti, ante cuius pedes locatus, uberrimis affluens lacrymis fatebitur quid in Deum, quid in se, quid in alterum admisit, non parens iussionibus diuinæ legis: euomet inquam illo loco omnis nequitie suæ uirus, deinde ubi ab eo discesserit peccatorum uinculo solutus, discutiet, quid alienum possideat, ut reddat, tum omni studio, ieiunijs, eleemosynis, orationibus uacabit, ut pœnam persoluat peccatis debitam, simulque uberiorem Dei gratiam promereatur, uirtutumque in se dona augeantur, nec iuuabit sic commissa lugere, ut lugenda iterum committat, sed cautionem adhibebit in posterum summam ne labatur. Erit ille quidem placidus & quietus mente, secunda moderatè, aduersa latè ferens, uultusque rigorem frontis obunbrabit, serenitas gaudebit de mentis dolore, quem pœnitentia delictorum inusserit, ingemiscet tamen, quòd nullos illo nomine

mine antea gemitus edebat: cum omnibus idem bonis humanitatem, pudorem, modestiamque seruabit, bellum cum uitiis unicum geret, acerrimè, nulla cum ijs pax, ne induciæ quidem. Iniquorum hominum, sibi que ipsis indulgentium familiaritates, & consuetudines, quibus antea implicatus tenebatur, declinabit fœminarum consortium impudicarum tanquam pestem quandam fugerit, illarum aspectum, tactum, sermonem repudiabit, nec ut auis impura ad cadauera, quæ semel dimiserit, reuolabit: oculos custodiet suos, ne quid liuidè & sordidè spectens, linguamque frœnabit ne uano sermone diffluat, ferculis & modicis & uulgaribus utetur, sibi uinum & se uino temperabit, quo uenerem continentia frigore repellat: omnia demum obseruabit rerum, temporum, locorum momenta, per quæ reficari animus, & ad uetera, quæ damnauit, compelli posse uideatur. Hæc ubi præstiterit ueteri squalore deposito, nouum hominem admirabili luce fulgentem induerit, nemo tanta morum mutatione facta agnoscat eundem: hinc nobis non rectè uidisse uidetur Propheta Ionas conquerens Ninuiem post quadraginta dies euerfam non fuisse, sicut prædicare à Deo iussus fuerat. Imò uerò O Propheta prænuntiata uenit euersio, uera loqueris, testæ eadem, & mœnia manent, at mutatos spectato mores, deleta est luctu & mœrore ciuitas illa uetus peccatrix, hæc noua est alia Niniue uirtute poenitendi instaurata. Et hæc quidem ad Prophetam solandi gratia dicta sint. Sin autem Dei mentem contemplamur, noluit subuertere Niuiem, sed minatus est subuersurum, ut resipiscentes illi non subuerterentur. Vtinam Niniuitarum poenitentiam imitari uellemus, & postrati uolutaremur in lacrymis, in ieiuniis, in cilicio, in cinere, non tam acerba mala urbes agrosque nostros inundarent. Quando enim aduersus cunctam Italiam ira Dei acrius exarsit? ualida pestis populos exhaurit, debacchatur gladius bellici furoris uniuersa penè metens, tellusque ipsa, quæ communis dicitur esse parens, ceu infesta nobis, quòd eam toties humano cruore foedauerimus, malignè frugum alimoniam ministrat, uisitat acerrimis his flagris Deus peccata nostra, ut est apud Prophetam. Quid ita? quia nos afflictionis corde & doloris oculis non satis ex dignitate illa uisitamus: non enim dici potest modica illa & exigua esse delicta: nam quum fames, pestilentia, bellum uno tempore ingruant, nonne res ipsa clamat tantos adolescere uitiorum morbos his in oris, ut ad illos obterendos parum fuerit unius generis hostem adhiberi? Illud omnino fatendum est, arduam esse poenitentia uiam & laboriosam, sicut reliquarum uirtutum, eaque de causa terreri plures ne ingrediantur, sed si magnum est bonum exui peccatis, & diuinæ reddi gratia, aut negligendum est id bonum, aut si assequi curamus, suscipienda est omnis molestia, qua ad illud peruenitur. Similis est poenitentia baptismo, quia utrunq; hominem innocentem statuit, sed dissimilis in eo, quòd baptismus momento id perficit omni sorde abluta, at poenitentia diutinum laborem desiderat, ut par satisfactio pro peccatis

peccatis reddatur. Itaque quidam ueteres non absurdè pœnitentiam laboriosum quendam esse baptismum dixerunt. Neminem autem tam rudem esse existimo, ut putet de uno crimine pœnitentiam agi & ueniam præstari, alio in delectatione retento, nec per confessionem exposito: nā quem peccare adhuc delectat, bonus nō est, & si bonus nō est, non placet Deo, & quū Deo nō placeat, quomodo ueniā impetrauit? Mihi uerò iam hæc impietas uidetur, si quispiā nō omnia peccata deferēs, sed in quibusdā adhuc permanens, audet sperare ab eo, qui summè iustus est, de omnibus ueniā uel de quibusdā, quasi uenia diuidi possit: Deus autem aut totū dimittit, aut nihil, nec hominem partim accipit, partim reijcit, sed eū, qui nō stat totus pro illo, deserit; nec dignū habet, quē æternæ salutis præmiis adornet; potest aliquis, qui alteri plura harū externarū rerū debeat, impetrare salua amicitia à creditore liberationē unius aut duorū ex pluribus, quæ debet. Non idem in eo, qui pluries uel pluribus de causis apud eundem offenderit: ridiculus enim esset, qui in plurium offensarum accusatio ne unius tantū, aut alterius peteret ueniam reliquis prætermisissis. Simulata uideretur esse hæc ueniæ petitio: nam si uerè ex animo fluere, eandem de offensis omnibus oportebat esse petitionem, quoniam eadem pe rendi esset causa, quod scilicet is. offensus esset, qui minimè offendi debuit. Simulatam igitur dico eorum pœnitentiam, quos quorundam & non omnium pœnitent admissorum. Scio notatos à sanctis Patribus eos, qui patrata lugentes, iterum lugenda patrarent, tanquam ueniam non poscerent subditi, sed subsannarent superbi. Omnino nihil foedius, quàm canis rediens ad uomitum, & sus ad pristinum uolutabrum. Non enim ob hoc quis accipit ueniam præteritorum, ut existimare debeat peccandi licentiam sibi in posterum datam, sed interdictam. Si quis tamen quodam tempore de omnibus admissis uerè & fortiter pœnitentiam egerit, & postmodum similia, uel grauiora facere aggreditur, non est dicendum priora crimina, quæ semel dimissa fuerint & deleta, reuerti; nouorum tamen criminum reus tenebitur, ad æterna relegādus supplicia, nisi rursus pro istis ad pœnitentiæ medicinam sibi ipsi, uel peccatis potius iratus cō fugiat. Non enim semel tantū pœnitentia prodest, sed sæpius, si quoties crimina repetuntur, toties illa repetatur. Nullum unquam peccatum indelebile pœnitentia reliquit, magnaquē Dei benignitas, magnumquē in eo humanæ salutis studium, qui quoties hic hostis nascitur, toties illū hoc gladio iugulari permiserit. Ergo si quis etiam sæpius ceciderit, non desperet de salute, sed de pœnitentia confidat, & ad eius medelam confugiat. Non est tam graue uulnerari in prælio, quàm post susceptum uul nus se ipsum negligere. Mercator & si naufragium fecerit, non desistit à nauigatione, sed reficit rates quassas indocilis pauperiem pati; atque ita pristinas reuocare nititur diuitias. Multos etiam in certaminibus uictos cernimus coronam postmodum meruisse. Iam uerò miles, qui in acie uim hostium impetumquē pertimuit, & fuga se se eripuit, acrior sæpe redit

dit ad pugnam, uictorque discedit. Quod si isti conantur refarcire detrimenta leuioribus in rebus suscepta, quanto magis nos conuenit laborare, ut post multos etiam lapsus resurgamus, & dignitatem animæ recuperemus unâ cum salute, obtenta ab indulgentissimo parente remissione peccatorum. Ista est remissio peccatorum, quæ tantum fit in ecclesia ob Christi sanguinem: hanc Christus secum aduexit, & Apostolis tradidit prædicandam. Alijs extra ecclesiam degentibus peccatum quodcunque imputatur, quia quomodo illud deleant, non habent, nullum infidelitate nequius peccatum. Hoc uno peccato reliqua retinentur. Existimauerunt olim ueteres in illis gentium tenebris crimen homicidij purgari ablutione corporis, quos unus illorum Poëta increpat dicens.

Ah nimium faciles, qui tristia crimina cædis
Fluminea tolli posse putatis aqua.

Crediderunt alii consecrationibus quibusdam & deuotionibus & sacrificijs solutionem fore scelerum, sacrificulos nescio quos, & uates & circulatores, & nonnunquam magos adhibentes, quæ omnia malorum Dæmonum arte illis fuerant inculcata. Illud tenendum, quod pœnitentia delictorum fidelibus duntaxat fit salutaris, pro quibus Christus suum pretiosissimū effudit sanguinē & mortuus est. Hoc unum est sacrificium, quod cœlestis parentis irâ aduersus nos iam ab initio generis nostri commotam placauit. Hoc illud est, quod abluit fœditates nostras, sanguis scilicet agni illius cœlestis: huic uni remissio omnium delictorum nostrorū debetur. Nec me latet in lege ueteri animalium sacrificia pro peccatis oblata fuisse, sed eodem res redit, quia illorum sacrificiorum ministerio peccata tunc delebantur, propterea quod figuram gerebant huius ueri sacrificii, quo se Christus uictimam in ara crucis pro uniuerſi generis salute obtulit. Quemadmodum olim statuæ Imperatorum ad ipsas confugientibus erant contra iniuriam subsidio, non quod uis ulla inesset statuis, nam uel æs erant, uel marmor, uel ebur, uel aliud quid huiusmodi, sed quia referebant imaginem principalem. Sic sacrificia illa uetera opitulabantur, non quia ipsa per se essent aliquid, sed quia in similitudinem huius maximi & uerissimi sacrificii fuerant formata, eiusque exemplum præferebant. Natura tamen humana adhuc ueluti ægra iacebat. Nemini ante Christi mortem ad cœli ianuam aditus fuit. Vt enim tempore ueteris legis diligeret Deus uiros sanctitate fulgentes, uniuerſam tamen adhuc nostram oderat naturam, donec aduentauit iste, qui meritis passionis suæ hanc illi conciliaret. Cæterum ne quis tantum credat pœnitentiam peccantibus aptam, Ioannes, qui præcursor Domini extitit & Baptista, cuique ab uteri usque materni latebris sanctitas diuini tus inusta fuit, ita ut capitale quicquam nec uellet nec posset admittere, qua tamen asperitate uictus Iordanis coluit fluentia? eremumque infudit? non alia ratione id uideri debet factum, nisi quia illa ad uitæ ornamentum pertinere uidebantur. At contra Paulus gentium doctor corpus

T castigabat,

De Pœnitentia

castigabat, & in seruitutem redigebat, ut uitis occurreret: uoluptatem metuebat titillantem, eiusque sensibus suauiter affluentem, quam ut pro sterneret, & laborabat unus plurimum, & uigilabat: & continuata idem ieiunia ducebat. Ex quo apparet non modò his, qui corruerunt, sed si qui stare cupiunt & in uestigijs innocentiae permanere, salubrem his etiã esse pœnitentiae modum, quem sancti etiam uiri, ab omni grauiori crimine agentes procul, ad illustrandum tamen eorum uitam arctè tenuerunt. Latitiam uerò in cœlesti regno ingentem agitari inter Angelos super peccatore pœnitentiam agente, Euangelico sermone patefactum est: sua igitur stationem, uigiliam, praecepta monitaque salutis sæpius ingesta ualuisse, patriamque cœlestem nouo ciuium incolatu exaugeri latantur. Vtinam eorum explere uotum tamque sancto frui consortio, & unà in beato illo regno diuinæ Maiestatis potentiam, bonitatemque collaudare mereamur. Parum mihi uideor dicere, si dicam, quòd tunc regnabimus, sed uerbi causa ita dicatur. Nunc non huc intrauimus, ut regnemus, sed ut sub diuo trepidisque in rebus, duremus, & aduersus antiqui serpentis insidias, sensuumque illecebras pugnemus, & ita uiam ad futurum regnum nobis paremus. Legi in tractatibus quibusdam nonnullos dicere sine lacrymarum decursu & fluxu perfectæ pœnitentiae munus expleri non posse, nulla re melius, quam lacrymis interceptam reddi astruit salutem, quasi lacrymarum undæ de oculis ubertim cadentes aeterna incendia peccantibus supposita restinguant, seu quasi apud Deum, ueluti in codice annotata sint crimina, spongia autem quædam animi sit dolor, quæ fletu turgida literas nostræ turpitudinis abstergat. Laboraui inquit pœnitens Propheta in gemitu meo. Videte quales & quàm crebri gemitus, propter quos laborasse se dicit: non est satis, quid in posterum polliceatur, audiamus. Lauabo per singulas noctes lectum meum, lacrymis meis stratum meum rigabo. quod stratum? quem lectum? nempe, ut opinor, libidinis suæ uolutabrum. Ecce pium Prophetam irrigui lacrymarum fontibus sordes abludentem suas. Ecce cuius oculi continuis noctibus à fletu nunquam conticescunt, donec ira, fororque & minæ cœlestis Iudicis conticuerint. Hoc Princeps præstitit Apostolorum Petrus, qui abnegato Christo egressus foras fleuit amarè, hoc & Maria Magdalena, quæ dolore concita peccatorum super conuiuantes ingressa est, & lacrymas Domino inter epulas obtulit. Ad has lacrymas, quoscunque peccatores uocant, siue in risu sint, siue in fletu: monendo alteros, ut risum lacrymis, alteros, ut lacrymis lacrymas, uel lacrymarum potius causam commutent. Quid ego hîc asseram, nisi illud Poëticum?

Et lacrymæ profunt, lacrymis adamanta mouebis.

Recteque Hieronymus, qui lacrymarum uim insuperabilem, & ad omnia impetranda efficacissimam penès cœlestem parentem arbitratur. Satis durus uidetur, cuius mentis dolorem grauem fluentes oculi non declarant. Veruntamen multos suspicor his auditis illud Plautinarum literarum

rarum allaturos in medium, Pumex non æquè aridus est, sicco cūlūm genus nostrum semper fuit. Clamabit hīc quispiam, quò me uocas? quò impellor? non mihi putres possunt esse oculi, non uuidum pectus, lacrymarum defluxu, arent mihi hæc loca, num me naturæ uim afferre iubes? At illi lacrymas petendas suppliciter & enixè à Deo dicunt, quas tribuet, si tanto munere dignos iudicabit, eliciet impulsus diuinus ex lapideo corde lacrymarum flumina, sicut & eodem auctore petra quondam in deserto Moīis uirga percussa euomuit sitienti populo undarum fluentia, quod, si quum omnia fecerimus, lacrymula exprimi nequeat, has sitienter appetere, harum ardore flagrare, non minoris meriti esse putant, quàm interdum illis abundare: quibus omnibus, & si assentior, ut quæ ab illis prolata sunt uiris, qui & uitæ & doctrinæ sanctitate fulserunt, attamen istud, ut non contemnendum, sic non tam magnum esse arbitror. Non enim solum dimittuntur peccata, si quis luctu, lacrymis, lamentatione se ipsum confecerit, aut etiam ieiunijs & abstinentia carnem macerauerit & arefecerit; sed multis quoque alijs rationibus remissio delictorum in ecclesia contingit. Nam in baptismo & in passione martyrij dimitti quæcunque peccata, dubitat nemo. Similiter in eleemosynæ largitione, dicente Salvatore, Date eleemosynam, & omnia munda uobis erunt. sed si peccata ex corde fratribus nostris dimiserimus, peccata quoque nostra dimittet nobis cœlestis Pater. Item quum peccatorem quispiam ab errore impietateque reuocauerit, non solum animam illius, uerum etiam suam saluam faciet. Credibile est etiam per abundantiam charitatis fieri remissionem peccatorum: nam ipse Dominus dixit. Remittuntur ei peccata multa, quoniam dilexit multum. Et Apostolus. Charitas operit multitudinem peccatorum. Hoc fit ubi quis inimicum dilexerit, eumque beneficio prosequutus fuerit. Vel si pastorale gerens pedum posuerit animam pro ouibus. Arbitror quoque dimitti peccata illi, qui mala humanæ uitæ tanquam à Deo iure sibi inflicta æquanimiter tulerit. Non enim frustra dictum est à Domino. In patientia uestra possidebitis animas uestras. Videtis quot & quantis modis pœnitentes redimere queant peccata: non adeò truculentus Deus, ut non multipliciter languentibus subueniat, licet his, uel illis uti medelis, quemadmodum occasio tulerit; alia alijs meliora. In primis ego censeo (si quis me uti uellet consiliario) ut uerè pœnitens propriæ mentis motus, per quos tanquam per effrœnes equos in deuiam raptum & attractum se uidet, studeat abiicere penitus ac præcidere, ut nihil illorum supersit. Alexandrum magnum Macedonum regem, dum per iracundiâ & uinolentiam in conuiuio familiares quosdam suos & amicos trucidasset, postquam se collegisset, ferunt id factum tam ægrè & acerbè tulisse, quòd sibi ipsi manus penè inferre uoluerit: quod si fecisset, non cruore suo unâ cum uita effuso culpam eluisset: sed malum facinus deteriore facinore cumulasset. Non in corpus sæuiendum erat, sed in mentis libidinem, quæ ad facinus impulerat. Debut ille igitur per-

T 2 specta

De Pœnitentia

specta & pertractata sceleris sui natura, odio teneri acerrimo humanæ ne-
 quitia & imbecillitatis, quo odio ueluti fulmineo gladio armatus uolun-
 tatis suæ motus capite mulctaret, ita ut ea parte animi immortalis Ale-
 xander nihil appetere, nihil concupiscere posset, ea tantum faceret &
 tractaret, quæ mentis ratio, quæ diligens disquisitio, quæ prudentiores
 amici censuissent. Sic faciendum bonis omnibus, & his præsertim, qui
 iam offenderint, ut uoluntate propria abiecta, uel odii potius illius, de
 quo ante dixi mucrone transuerberata, nihil agant aliud, nisi quod
 mandata Dei loquantur, non habere arbitrium mentis suæ putent, sed
 operarios tantum se intelligant diuinæ uoluntatis: quod minatur Deus,
 timeant: quod postulabit, tribuant: quod immiserit, fuscipiant: qua i-
 re iusserit, eant: quæ relinqui mandauerit, abiciant: & demum, quæ
 præceperit, exequantur. Multi profitentur se se mortuos esse peccato,
 qui deinceps inuident, cupiunt, rapiunt, ambiunt, superbiunt, irascun-
 tur, quorum nihil mortui faciunt, nec facere possunt. At rem tam neces-
 sariam, tamque utilem re ipsa non nudo tantum nomine habere oportebat.
 Frustra teritur corpus inedia, frustra facultates bonorum elemosy-
 narum gratia exterminantur, nisi sensus motusque mentis nostræ sæculi
 carnisque blanditiis immoriantur. Cogitandum assidue crebraque me-
 ditatione uoluendum, quam uanum, quam inutile, quam fœdum, quam
 insanum peccare honorum, pecuniarum, uoluptatis causa: contra, quam
 honestum, nobile, fructuosum sequi toto pectore Deum, qui uirtutum
 omnium fons & origo, qui tum singulis, tum uniueris hominibus tot &
 tanta dilargitus est, quanta & difficile esset cogitare, & arduum enume-
 rare dicendo: moriamur ergo nobis metipsis: denuntiemus amicis & fa-
 miliaribus nostris nos esse mortuos, uitam nostram totam iuxta Pauli sen-
 tentiam in Christo abditam & inclusam manere; si quærant, illic inuen-
 tores, eosque ut idem faciant, adhortemur. Cætera multa, quæ propo-
 nuntur ad salutem, partem eorum differre, partem omittere possumus,
 hoc unum à peccatis resipiscendi & Deo se se ipsum iungendi statim & ne-
 cessario arripiendum; & omni studio amplectendum, ita ut nunquam di-
 mittamus, si modò, qui nunc terrigenæ sumus, calicolæ aliquando fieri cu-
 pimus: & ueræ illius immortalitatis immensis perfrui gaudiis cogitamus.



MARCI ANTONII

NATTAE ASTENSIS,

IN FESTVM PASCHATIS DIEM

O R A T I O.



ANDEM illuxit & ad nos redijt ille dies, qui Paschatis nomine signatus ad meliora assidue transendum docet, & gratissimarum nobis rerum memoriam instaurat, & qui dies Domino dicatus octava quaque luce renouatus gratissimum sui conspectum mortalibus exhibet & ostentat. Nulla rerum mentem inficere hoc tempore molestia debet nulla aliqua esse cura, quæ conturbare possit. Et animum, & uultum, & sensus, domosque totas exilare oportet, & clarissimum hunc diem diuino donatum munere cum coniugibus & liberis omni lætitia & comitate celebrare. Nam si immortalitatem animorum nostrorum auidè complectimur, deque ea re tam libenter credimus, & audimus, quòd adueniente fato extingui meliorem nostri partem nolumus: non minore lætitia, ac gratulatione spem resurrectionis corporum nostrorum hodierno die oblatam retinere debemus, atque haud scio an prope maius istud debeat esse gaudium: propterea quòd animi nostri perenniter uiguerant, nec ad interitum peruenerant, corpora autem à morte fœdata corruptionem induerant, quæ ad officia uitæ reuocari proponuntur. Quòd si ante actis diebus propter memoriam Dominicæ crucis ingentem animo dolorem hausimus, ac in acerbissimi luctus mœrore uersati sumus, piæquæ lacrymæ squalentia per ora fluxere, miserantibus nobis, quòd innocens & æterna persona mortalium causa, & alieni sceleris nomine tam grauiam tamque acerba pertulerit. Vberem meritò & summam ac inauditam lætitiàm afferre debet is dies, quo Christus amor delitiæque nostræ inferno iam exhausto ac perditò à sepulchro uiuum se efferens de uicta morte triumphauit. Fides, quæ moriente Domino unà cum illo defecerat, nunc pariter cum eodem reuixit, & quam fœda & infamis crucis mors abstulerat, hanc ingens & inauditum nouæ resurrectionis miraculum retulit atque etiam auxit, uberioremque multò & ornatiorem effecit. Quodque quadragesimali ieiunio palluimus, nunc largioris uictus remissione

In Festum Pasch. diem

remissione uti possumus, quin etiam ubi lucere cœpit, in sanctissimis delubris, inter ipsa nitentia altaria, ante augustissimas diuorum effigies cœlesti pabulo saturati sumus. Ac mihi quidem cū festa omnia summa religione ac pietate colenda uidentur, quorum initium non mortalium cogitatio, sed diuina iussio attulit, tum maximè istud quo ad sacratissimæ mensæ dapes admissi sumus, sanctissimum ac religiosissimum uideri debet. Quod si quotannis summo atque eximio studio ac apparatu, atque ingenti populorum concursu Hierosolymis quondam hoc tempus Hebræa gens celebrabat, quò hostias offerre in templo & sacrificare, & agnū per domos solemni more manducare solebant: quanto nos ardore lucendi, quanta animi pietate impelli oportet, apud quos uera omnia extiterunt, quorum illi simulachra tantum ac formas tenebant: quin etiam sanctissimi iam ante Prophetæ, quum istum diem aduenientem præuidissent, exultauerunt, ut eximium & salutarem futurum. Nos quiprehendimus & tenuimus, quo mentis iubilo, quæ spiritus dulcedine, quæ nunc gesta sunt, conuenit uersare atque contemplari. Hic dies ingentem attulit lætitiā Angelicis choris, hic sanctis Patribus de inferno lacu erutis; hic Mariæ, hic Apostolis, discipulisque Domini; hic infinitis alijs Christi cultoribus summa pietate præditis, cum quibus nos decet gaudia copulare, non de re gesta solum, sed de illorum quoque gaudijs uoluptatem capientes. Mihi uerò non uos tantum & reliqui fidei alumni, sed animata cuncta & inanimata, quæ oculis menteque circumspecto, commouere se lætitiā, & in gaudium quoddam prorumpere uidentur: ridet templi huius parietes, hæc aræ, ridet cœlum, ridet ær, iste purissimus, ridet ipsa quoque tellus uernans iam floribus, Sol quoque ipse, qui moriente Domino obscurior factus est, mihi nunc uidetur solito fulgidior illuxisse. Neque uerò ego in hoc cōuentu, qui & dignitate amplissimus, & frequentia celeberrimus, & iudicio eruditissimus est, mihi nunc assumo, ut explicem, quæ in resurrectione Dominica sunt gesta, quemadmodum incesta & perfida Hebræorum gens sepulchrum Christi lapide, lapidem custodibus munierit, ut terremotus factus, perterriti illi discesserint. Angeli mulieribus cadauer quærantibus se ostenderint, resurrexisse nuntiarint quomodo deinde Christus ad Apostolos processerit, contrectandumque sese præbuerit, atque etiam cum eisdem sessarit, cibumque unā sumpserit, quò ad omnia certiore nouatæ uitæ fidem facerent: hæc enim iam uobis Euangelica lectione innotuerunt. Attendere tamen licet, ne quis à quopiam ficta, uel temerè credita posset criminari, iccirco & à pluribus uisum Dominum IESVM, & ab eodem plurima ueræ resurrectionis argumenta allata. Ille enim qui tam admirabile opus uno tempore effecerat, uariè hæsit fidelium cordibus, & mulieribus quidem cito, maribus tardius resurrexit. At mulieres illæ, quæ cito crediderunt, sibi multum, posteris parum consuluerunt. Apostolorum & discipulorum cunctatio, & curiosa disquisitio calumniantium ora obstruxit, effecitque, ut nihil erro

ris

ris interuenire posse uideretur in causa tam diligenter ab illis cognita & explorata. Ipsum nanque Dominum quoties uiderunt? quoties audierunt? nonnulli etiam tangere uoluerunt. Non possum hoc uobis narrare planius, quam ipsa Euangelica prodat lectio. Venit (inquit) Iesus & stetit in medio eorum, & dixit. Pax uobis. Ego sum, nolite timere: Et quum conturbati & conterriti illi existimarent se spiritum uidere, dixit eis: Quid turbati estis, & cogitationes ascendunt in corda uestra? Videte manus meas & pedes, quia ego ipse sum. Palpate & uidete, quia spiritus carnem & ossa non habet, quæ me uidetis habere. Sed huius quoque rei Ignatius, qui tertius à Petro Antiochenam rexit ecclesiam, in epistola ad Polycarpum Smirneorum Episcopum præbet testimonium (quemadmodum à Hieronymo quoque relatum est) Afferit nanque se Christum in carne uidisse etiam post resurrectionem, & unà affuisse cum Petro & alijs, quum dixit. Ecce me. Palpate & uidete, quia non sum Dæmonium corporale. Et statim tetigerunt eum, & crediderunt. At non semel, sed sæpius id factum, ut dixi. Illorum ergo obtutus, noster obtutus fuit, noster etiam auditus, noster quoque attactus, si quidem per ea, quæ tunc gesta fuere, tantæ rei necessariò credendæ fidem hausimus certiorē. Hæc est gloria fidei nostræ, quod is, qui in æternum extinctus credebatur, tertio reuixit die, tanquam non mortem, sed somnum induisset. Mortuus est, quia uoluit, surrexit, quia potuit: quorum alterum immensæ clementiæ, alterum inuictæ uirtutis fuit, utrunque fuit in eius potestate. Ipse iam antea ad discipulos loquens dixerat. Potestatem habeo ponendi animam meam, & potestatem habeo iterum sumendi eam. Mortuus est quando uoluit, cuius rei argumentum est, quod quum emisit Spiritum uoce magna exclamauit, quod hi, quos infirmitas ad mortem compellit, facere nequeunt: uirtute ergo propria posuit animam, rursus eadem uirtute recepit. Hanc resurrectionem ueteres Prophetæ cecinerunt: nam in Psalmorum opere legitur. Ego dormiui, & somnum cœpi, quoniam Dominus suscepit me. Quid? Putamus Dauidem regem eundemque Prophetam, sicut magnum aliquid pronuntiasse, quod somnum cœperit, & deinceps exurrexerit, quod quotidie contingit omnibus, stultè profecto ita loquutus fuisset, nisi ad corporis mortem, eiusdemque resurrectionem illa uellet referre, quæ transpositis nominibus sub imagine somni & exurrectionis dicuntur; nec de se illa loquitur Propheta, sed per eum hanc uocem emittit homo ille, quem Dei uerbum ita suscepit, ut unà cum eo fieret Deus. Et alibi idem Propheta ex eiusdem persona loquens. Propterea latatum est cor meum, & exultauit lingua mea, insuper & caro mea requiescet in spe. Quoniam non derelinques animam meam in inferno, nec dabis sanctum tuum uidere corruptionem. Hic apertè canitur descensus Christi post mortem ad inferos, ut non sit illic futurus perpetuò, utque corpus eius in sepulchro iacens more cæterorum cadauerum non corrumpetur. Non mortuum colimus, quod olim infideles re-

ligionis

In Festum Pasch. diem

ligionis nostræ hominibus exprobrabant, sed uerè uiuentem, imò ipsius uitæ auctorem, qui facilius de sepulchro mortuus, quàm alius de lecto surgeret soporatus. Non expressiore ullo signo Christi diuinitas comprobata est: Veteres Prophetæ alios quosdam, at non se ipsos, & illos non in perpetuum, sed ad breue quoddam tempus à morte reuocarunt. At se ipsum Christus restituit iam mortuum in perpetuam uitam, quod effici non potuisset, nisi ab eo, qui Deus planè & homo fuisset. Hinc quærentibus quandoque Iudæis, ut manifestissimum aliquid afferret Christus, quòd se filium Dei ostenderet, ad futuræ resurrectionis miraculum illos reiecit, insinuans id tunc magis, quàm proloquens apertè: dixit enim quod nullum traderet signum, nisi Ionæ Prophetæ, qui triduo beluæ præcordiis retentus, postmodum integer effusus est. Rursus soluerent templū illud, quod triduo ipse reficeret: De templo autem corporis sui ille dicebat. Ionas uerò ita fuit in uentre Ceti, ut depositum & non præda esset: Sic Christi corpus terræ utero receptum fuit, ut custodiretur ad breue quoddam tempus, non ut etiam absorberetur. Triduo antea pendente in cruce Domino Iudæi caput agitantes dicebant. Si filius Dei est, descendat nunc de cruce & credimus ei. Noluit descendere, quod poterat, ne conuictorum dolore commotus, uideretur illud fecisse. Nunc quid possit, ostendit, nam quàm facile non moreretur, nisi uellet, qui iam mortuus, ubi uoluit reuixit? uoces insanas Iudæorum antea patientia, mox potentia superauit. Ostendit se Dei filium, non de cruce surgendo, quod illi quasi uictis illudentes poscebant; sed quòd est admirabilius, de sepulchro. Apollonius Tyanæus, quem è gentibus quidam ausi sunt impiè Christo domino comparare, ob mirabilia quædam, quæ fertur effecisse: Is apud illos tantus, tamen non solùm se ipsum, sed ne alium quidem quenquam in pristinam uitam reposuit. Sed quid unius Apollonii meminimus? Nunquam in gentium literis legi, quenquam Deorum suorum opè ab inferis retractum, sicut in codicibus nostris Dei summi inuocatione à Prophetis & alijs sanctis uiris factum legimus. Orcum irremediabilem esse dicebant, & Plutonem inferorum regem inexorabilem, ut quenquā remitteret, & priori uitæ redderet: quanquam Plato finxit quendam reuixisse, finxit uerò, ut ex eius persona narraret, quæ apud inferos fieri ipse putabat; maximum certè opus resurrectio, soli diuinæ potentie assignatum. Hæc paucis isto in sæculo contingit, quæ in fine sæculorum omnium omnibus dabitur, ut forsitan inferius disleretur, Deo maximo illud peragente, Dæmonum autem, aut alterius cuiusuis potestas ad eam rem concipiendam, inualida est penitus & inepta. Sed, ut ad Christi resurrectionem redeam, uidetur ille non subobscuris tantum sermonibus, sed apertis prædixisse sæpius Iudæis, quòd morte illata, in diem tertium resurgeret. hinc illa addita custodia sepulchro usque in tertium diem, ne ablato cadauere resurrectio fingeretur. At prænuntiata explens ille tam uiuus de tumulo hodie prodijt, quàm olim de matris utero, tam & si inter

ter illam natiuitatem & hanc resurrectionem plurimum differat: natus enim cum mortali corpore doloribus obnoxio, resurrexit cum immortali & incorruptibili, quod opus solius est Dei. Nunquam id antea factum: nunc primum humanum corpus immortalitate circumfulgens apparuit, & in conspectum multorum oculis se dedit: ergo clarissime nunc diuinitatem ostendit suam, & spem etiam resurrectionis corporum egregiam nobis tetendit. Hebraeis tanta in re, quid faciant non habentibus, neque se recte explicantibus. Nam si factum affirmant, quod nos factum plene ore asseueramus, diuinitatem Christi resurgentis & mortem ipsam, ut ita dicam, perdentis agnoscant necesse est, sin negant, quod facere uidentur, reddant Christianis petentibus & omni conuictio efflagitantibus cadaver, imò re tunc recenti proferre, & uulgo ostendere debuerunt: nam ne clam surripi, uel aperte eripi possit, tumulum obsignauerunt, horribiles armatorum custodias circumdederunt. Accidit peropportune, quod nemo antea illo sepulchro conditus fuit, ne qua dubitatio nasceretur, quisnam illorum ibidem sitorum surrexisset. In petra etiam excisum illud monumentum, nam si humatus Christus fuisset, exacuentes ingenia Hebraei fingerent fortasse discipulorum quosdam subterraneos ad tumulum egisse cuniculos, suffosaque humo per occultos meatus auertisse. At enim milites (inquiunt) illic positi nobis renuntiarunt ipsis dormientibus uenisse discipulos, & clam corpus tulisse. O' præclaram uestram responsionem Hebraei, risu publicitus eiiciendam. Quid est hoc? Dormientes testes producit. Verè ipsi magis dormiebatis, quam somniculosi hominibus custodiam delegastis, nunc etiam stertitis, qui postulatis iis credi, qui in somnio uisos sibi discipulos in sepulchro uersari retulerunt: nam uigilantes, ut dicitis, illa non uiderunt. Quid præterea illa uolunt sibi linteamina & sudarium illic relictum? An non facilius potuit à discipulis, si furtum meditarentur, corpus uinctum unà cum linteis auferri, quam mortem sibi ipsis nequere in soluendo? quum furum sit properare, ne deprehendantur. Adde quod ne facile quidem forsitan fuisset auelli linteamina à corpore myrrha & aliis unguentis delibuto, sicut erat tunc mos Iudæis sepeliri. Totà igitur res commētitia nullo probabili clauditur exitu, quod si de fraude discipulorum adhuc querantur, mirabor, si misericordia ducti in illos animaduertere noluerunt, qui inuisum cadauer tot custodiis septum furto amoliti dicerentur. Quam pro se uocem potest ueritas fundere clariorem? Christum mortuum esse omnes uiderunt: nam mors eius publicè spectaculū præbuit. Itaque nō possūt Iudæi dicere, quod clā alicubi uiuus occultatus morte simulata triduo postea tanquā rediuiuus prodest, quin etiā sepultum fuisse, negare non audent. Nam Iosephus & Nicodemus uterque ex hebræa gente, ambo iusti, ambo cogniti, illud pietatis munus impleuerunt, denique ipsi, ut sepulto custodiam addiderunt, mox die tertio sepultus resurrexisse palàm nuntiatur. Quid facere oportebat eos, qui fidem eleuare huius resurrectionis uellent? Nonne

V proferre

In Festum Pasch. diem

proferre in medium cadauer sepulti, qui de uulneribus, deque tot plagarum uestigijs facile agnosci potuisset, uel si qui furto subduxisse uiderentur, nonne tanti criminis reos ad magistratus suos producere, iudicio persequi debuerunt? Cur non compulsos ipsum fateri furtum, atque adeo prodere, ludibrio habuerunt, uel potius exterminarunt? Quum nihil horum hi fecerint, qui religionem istam extinctum iri cupiebant, quod facile factu fuerat, quum ciuitatis essent Principes, & magistratus obtinerent: res ipsa indicat resurrectionem uerè factam, cui nemo aduersariorum, nisi nudis uerbis repugnare ualeret. Cur autem id diligentius exquirere & examinare noluerunt? Illud profectò in causa, quòd timuerunt, ne hæc resurrectio, tanto certiore fidem caperet, quanto uehementiori studio explorata fuisset. Itaque silentio & obliuione eam tegere & paulatim euanescere malebant; sed non id passi Discipuli, non Apostoli, qui iussi à Domino fuerant hanc resurrectionem cunctis gentibus prædicare. Testimonium ferebant illi undique, quòd Christus resurrexisset, nam post crucem, postq; triduanam sepulturam uiderant uiuentem: Res autem euenit ipsis contrà, quàm putabant, quin perpeffi sunt, quod perpeti solent plerunque hi, qui diuinæ prouidenttiæ reluctantur: nam per quæ reluctantur, ijs prouidentia sibi locum facit: sicut in his, quæ circa Ioseph olim gesta fuerunt, apparet. Venditus fuit à fratribus ne illum adorarent: at ea uenditione factum est, ut adorationi præuisa esset locus. Sic isti nolentes resurrectionem fingi, monumentum signauerunt, custodes adhibuerunt: at ea fuit causa, ut nullo modo ficta uideatur: nam si neglectum fuisset, & incustoditum cadauer, potuissent alioquo sermone dicere fuisse illud furatos discipulos & occultare, idque illis fuisse facile non signato lapide, nullo adhibito custode. Nunc tam diligenti solertia armantes se aduersus discipulos, nihil in illos obijcere ualent, & relinquitur illud factum, ut resurrexerit Dominus, cui rei latissimum Apostoli & certissimum perhibebant testimonium, ut potè quod ipsi uidissent & tetigissent: & quanuis uniuersa non crederet multitudo, crediderunt ex Iudæis tamen plures, nam quum Petrus Apostolus concionatus apud eos esset de hac resurrectione, uno die tria hominum millia, altero quinque millia ad Christum conuersa sunt. Iosephus quoque Hebræus, qui uel iisdem temporibus, uel non multò post fuit, in duodeuigesimo antiquitatis Iudaicæ libro Iesum fuisse Christum in lege prænuntiatum fatetur, eiusdem prædicans resurrectionem: nam hoc maximum miraculorum omnium fuit, idque Christi diuinitatem potissimum, ut dixi, ostendit: commodius fuerit ipsius Iosephi uerba recensere, describens nanque ea, quæ in Iudæa sub Tiberio contigerant. Fuit (inquit) iisdem temporibus IESVS sapiens uir (si tamen uirum cum appellare fas est). Erat enim mirabilium operum effector, & doctor eorum hominum, qui ueritatem libenter audiunt. Multos quidem ex Iudæis, multos etiam ex Gentibus sibi adiunxit. Christus hic erat. Hunc quum accusatione primorum

morum nostræ gentis uirorum Pilatus in crucem egisset, non deseruerunt hi, qui prius eum dilexerant. Apparuit enim eis tertio die iterum uiuus, prout hæc & alia plura de eo stupenda Prophetæ diuinitus efflati prædixerant. Videtis ne quemadmodum iste doctrina & ingenio præstans inter Hebræos ueritate compulsum, non potuerit tacere aduentum Christi, & quomodo eiusdem resurrectionem palam asseueret, quam etiam præuissam dicit & Prophetarum ore prænuntiatam. Dicebant Apostoli Christum resurrexisse: Dicebant unà cum his plures alij, qui uiderant: (nam ut alias eius manifestationes omittam) semel uisus est plusquam quingentis fratribus simul, res occultari nullo modo poterat, credita ab his tantum, quibus datum fuit desuper, ut crederetur. Hanc Christi resurrectionem, quod maximum est miraculum, & fidei nostræ caput, tanti fecit ecclesia, ut Iudæorum sabbatum remouerent, & primum hæbdomadæ diē, quo Christus resurrexit, summis cæremoniis, summaque animi pietate omnem per annum celebrari mandauerit: hoc enim diē ad templa properamus, Euangelicam repetimus lectionem, cœlestique intersumus sacrificio. Donique festum hunc diem læti agamus uacuis animis omni serui opere remoto; nec mansit uetus nomen: nam qui erat gentibus Solis dies, nos qui illum Domino consecrauimus Dominicum appellamus: ut uel ipsa appellatio nominis nobis diem ipsum commendaret. Nihil atque Apostoli post mortem Christi prædicabant, quàm hanc resurrectionem. Quomodo quod dicebant incredibile uideri poterat Iudæis? penes quos Pharisei optimum & populare sacerdotum genus hanc corporum resurrectionem ponebant. Saducæis tamen reclamantibus, ita ut nō mediocri inter se odio iracundiaque certarent. Nobiscum commodius agitur, quibus non quiduis, sed aliquid unum pro certo tenendum. Etenim ut multa alia, quæ sunt magna, pulchra, admirabilia, ita & carnis nostræ resurrectionem fixo & immobili dogmate profiteamur: & quod alij pugna fuerat, nobis fidei est articulus. Num etiam Philosophorum aliquis lumine utens rationis, de hac resurrectione uerba fecit? Democritus quidem fertur & plerique alij, sed premitur Democritus conuictio Philosophorum urgentque in primis illum omnes hac interrogatiuncula, cur non resurrexit ipse? Vellem idem Philosophi adessent, ut intelligerent aduersus Christianos nihil hac argumentatione conclusum. Christus caput & norma fidelium resurrexit: idem nos sectatores, & qui huius capitis membra sumus, exspectamus. Quemadmodum Christus hominibus similis effectus est olim mortali in corpore assumpso, sic homines similes efficiuntur postmodum Christo immortalis in corpore reassumpto. Homines nasci & mori notissimum erat, quod assidue cernitur, resurgere nunquam morituros difficillimè credebatur, quia exemplo carebat. Ecce præcessit Christus in hac resurgendi uia. Ille corpus ostendens gloriosum erutum de mortis laqueis dicit omnibus dandum, quod sibi ipsi iam dedit. Si simulachrum, si exemplum tantæ rei quæritur, non deest. Mor-

In Festum Pasch. diem

47
 reus est Christus post multos, resurrexit ante omnes. Quid ita? quia quod cuncto humano generi naturæ lege impendebant, satis erat quandoque subire. Sed quod effici non potest, nisi diuina ui & fieri non posse multis uidebatur, eratque si fieret, magnum & gloriosum, id ipse Princeps opere impleuit, nec mirum uideatur, si ipse primus sit tanto donatus munere, quoniam ipse quoque primas laborum omnium & dolorum partes tulerat, ut humanum genus à peccatis erueret, & ab exilio ad patriam reuocaret. Legimus Apostolum Paulum, quum Euangelicum semen per orbem terrarum spargeret, ut fidelium multitudine tanquam segete efflorescente illam deinde tam pretiosam annonam in cœli horreo collocaret. Sed illum Græciæ oram peragrantem legimus Athenas florentissimum disciplinarum omnium domicilium diuertisse. Illic uir cœlesti doctrina imbutus cum Philosophorum gregibus pedem dicitur contulisse. Idem ad populum productus nouas res audire cupientem, quum Christum à Deo missum pro mundi salute diceret crucifixum, hunc uerum esse Deum & colendum asseneret. Athenienses mirari, & Paulum dicere nouorum Dæmonum inuentorem, nec iniquo tamen animo talia audiebant assueti colere multitudinem Deorum? At ubi unumquemque consurrecturum è tumulo, & ad carnem suam rediturum, atque ita ossibus, neruis, uenis compaginatam, artuatam denique, ut tunc esset futurum ostendere cœpit, enimuero subfannabant alii, & simul discedentes de hac re, te (inquiunt) aliàs audiemus, alij contineri non poterant, quin stomacharentur, uel apertè irriderent. Homines Græci humana tantum luce præditi hanc nouam corporis instaurationem non tulerunt: nos sacer Dei populus diuinis præmoniti oraculis, quauis mortalem carnem circumferimus, de eius tamen immortalitate præsumere audemus: Etenim quod collapso cadauere nobis uidetur esse cinis in sepulchris, id humana est caro Dei notione? non enim mirandum est, quod perito unum, aliud imperito uideatur. Veluti si quis rudem aliquem & imperitum adduceret inter eos, qui uenas montium rimantur, increparet forsitan illos, quod terræ effodiendæ gratia tantos exciperent labores, at qui effodiunt, non terram, sed auri, argenti, uel æris metalla eruere se intuentur. Sed non quicquid tantum de humanis corporibus in puluerem collapsum est: Sed quicquid ignis rapuit, fera absumpsit, humor eliquauerit, aurarum spiritus exhalationibus collegerunt, reddetur omne Deo summo qualia ea sint internoscante, & singula quæque ad loca propria conglobari iubente. Arduum opus prorsus si ab homine ac non ab omnipotente Deo factum diceretur. Mirum uidetur si emortua corpora ope diuina sublata in ueterem formam redigantur. At arbores uidemus excisas iterum pullulare, & easdem hieme aridas, uere ineunte reuirescere, quis credat nisi usu edoctus malum, quod sterile uiderat inter pruinâs, mox alio tempore ueluti ubertate quadam iuuentæ reuocatum iri: quod primum gemmis turgescet, deinde ornabitur

tur floribus, uestietur & frondibus, postremo pomorum foetu exuberabit, atque ita in pristinam redit faciem solitumque nitorem. quod si hæc mirra resurrectionis species in arboribus humani uictus causa inducitur, quo tandem studio uitam corporibus nostris elapsam Deus redditurus est, & pristinam speciem concessurus? Quid granorum semina, quæ mortali manu sparguntur in agros, non ne prius putrescunt intra ipsius terræ uiscera & corrumpuntur, sed uiuificantur postmodum: nam radices primum emittunt, in uirentem herbam deinceps consurgunt, & in segetem mox efflorescunt, & tandem in aristarum culmos euadunt, & per tot circuitus exhibent se grana, qualia prius fuerant: nec minor de humanis corporibus cura Deū tenebit, nec plus naturam per se infusam rebus, quam se ipsum ualere patietur. Et forsitan id rationi uidetur consentaneum, ut animis propria reddantur corpora, è quibus ui detrusi eiectione fuerunt: animorum enim proprium est hæere corporibus: ad hoc enim creati fuerunt, ita etiam primo tempore collocati: urgentur deinceps fatali quadam necessitate deferere suas sedes, destituere carnis societatem, poscit animorum causa, poscit, ut aliquando eò restituantur, unde decedere coacti sunt. Nullum enim uolentum, (ut quidam dixit) perpetuum. Hinc aliud quoque argumentum futuræ resurrectionis ducitur, si quidæ ponimus, quod negat nemo, quod sapiens hoc & solers & prouidum animal, quod homo uocatur, non ex animo solo, nec ex corpore solo, sed ex utroque simul iuncto constituitur, equitis instar, qui pariter ex duobus idest ex uiro insidente & equo componitur. Si igitur animis à corpore iam seiunctis corpus iterum non reddatur, non erit amplius homo ille, qui prius fuit, iam dimidia tantum ex parte animal istud relinquetur: quod si absurdum est dimidiatum esse animal & non integrum, societatem carnis animis restitui dicendum: quemadmodum & equum latrocinio ablatum quilibet diceret equiti restituendum, ut munere ille suo fungatur. Falsum igitur illud magni Poëtæ, qui quum morientem quendam in acie bellatorem describeret, addidit: In æternam clauduntur lumina noctem: imò quisquis ille fuit, si modò fuit, pristinis aliquando hauriet oculis lucem, quin etiam cruorem omnem in acie fusum recuperabit. An non persuasum est uobis capillos capitis uestri esse numeratos, sicut Euangelicus fert sermo? Si capilli numerati sunt, puto facilius in numero esse ossa, & dentes, & reliquas corporis particulas: frustra autem numeri ratio haberetur, si aliquid ita pereat in corpore, ut non idem reddatur. Saluator de inferno loquens dixit. Vbi est fletus & stridor dentium. Erunt igitur illic corpora animis iuncta. Ego enim nunquam uidi aut audiui, quod animus dum nudus spiritus est flet, aut dentibus strideat. Veniet (inquit Saluator) hora, in qua qui in monumentis sunt, audient uocem filij Dei, & procedent. Audient scilicet auribus, procedent pedibus. Cætera scripturarum testimonia quid refert colligere, quum uulgo nota sint, & tam clara etiam & aperta,

ut

In Festum Pasch. diem

ut nec mea nec alterius interpretatione indigeant. Nonnulli tamen ex nostris hominibus è Philosophorum scholis prodeuntes huic uno articulo de corporum resurrectione tardius adhibent fidem, quam negant naturalibus rationibus comprobari, quasi potens sit usque eò Deus, quò ad naturæ rationes, quas ille rebus indidit, ferant, & eisdem finibus & cancellis circumscriptus sit, de cuius uirtute & immensitate illud uerissimè dictum est, Deum esse locum omnium, & omnia non esse locum Dei. Hic tu mihi quæris rationes plausibiles, & ad naturæ partes ualde accommodatas, quibus ostendatur futurum, ut resurgant corpora. Quid? si nullas habeo, ideo ne minus erit resurrectio? quàm multa herbarum & radicum genera, quàm uaria animantium membra ad medelam apta & leuationem ægritudinum? quorum tamen causa & ratio, si disquiratur, nulla inueniri potest. Fontes perhibentur esse nonnullæ admirabili natura, quarum una in Aphricæ ora meridie gelida, sole oriente & decedente referuescit. Altera quicquid mergitur lapidescit, & ad silicis rigorem perducitur. Fuit & tertia in Dodone, quæ incensas faces extingueret, extinctas incenderet, his de fontibus plures auctores tradidere. Quis scit, uel scire potest unde hæc fiant, & plurima alia, quæ diuersis in locis miranda conspiciuntur? Illis nos uoluit uti Deus, causas, quæ illa mira parturiunt abdidit, sed nulla causarum ignoratio facit, quin uim suam illa retineant & prodant, Nec ob hanc ignorationem commouemur, ut ea falso literis prodita opinemur. Similiter resurrectionem à Prophetis præuisam, sacrarum literarum eloquio exhibitam atque monstratam amplecti debemus, etiam si in illius prospectu deficiat omnis humana ratio. Nam si naturam intelligimus occulta & ignota mortalibus uia progredientem multis locis, magnis in rebus ad mira quædam peruenire. Cur non hoc magis uel diuinæ uoluntati quæ tribuatur? Etenim tanta res, quanta resurrectio uidetur, humanam rationem ut uincat, diuinam nunquam superabit. Cælum terram, mare, oculorum acie, at quomodo quum antea non fuissent, subito emerferint, ne mentis quidem lumine uidemus: Unde enim hæc deducta? quomodo fabricata dicemus? quum nulla materia præiaceret, nulla rerum forma species uel extaret. Hæc cœli tanta pulchritudo, quam interdum sol flagrantissimo lumine incendit, & noctu uarij astrorum splendores exornant, quibus effici potuit machinis, ferramentis, uel ætibus, ministris, sunt hæc tam uasta & grandia, ut humanis nequeant examinari ponderibus. Ne sit igitur cælum, nec terra, nec mare, nec mundus denique sit nullus, quoniam hoc opus, quomodo & unde tam repente emerferit, nescimus, quum antea non fuisset. Nemo ea hominum fieri uidit, nemo ratione perspicere ualet, quomodo de nihilo aliquid effici potest. Quòd si dicis solo Dei uerbo condita, sicut sanctæ scripturæ docet auctoritas, & fides habet cunctorum, assentiar libenter, & illud addatur posse Deum eodem illo uerbo corpora mortua excitare, & ad ueterem formam reuocare, si quidem maius est nulla subiacente materia omnia condere,

condere, quàm quædam condita, mox dilapsa componere, & ad partes suas reuocare. En illud est, quod sæpius est dictum, & uerissimè dictum, nos non tam magnis quàm nouis & insolitis commoueri. Hanc orbis speciem, hunc ornatum, hæc elementa nemo ab ipso summo Deo facta miratur: maximum sanè opus & admiratione dignissimum, sed huic assueuimus. At ubi resurrectio corporum proponitur ab eodem formanda Deo, admiramur, & forsitan tunc animis pendemus, non quòd maior sit res hæc resurrectio, quàm illa fabrica: sed quia alterum iam factum est, & assidue oculis occurrit, alterum nondum contigit uidisse. Cogitate quàm iniqui æstimatores rerum sumus, & quàm absurda sæpius fiant. Nam ut communem resurrectionis causam relinquam, si nunc unum aliquem eorum, qui à uita desierant, reuixisse dixerò, id què possim ostendere, quantum id uideretur omnibus? quàm admirandum? quanta omnium prædicatione celebraretur? quum tamen interim tot homines, qui antea non fuerant extare, & uitæ limen ingredi nota dignum non ducatur: & tamen operosior uideri debuit hominis creatio, quàm instauratio. Ego ingenuè fateor mihi magis admirabile uideri, quomodo humanus animus, qui omni prorsus caret materia, huic tam graui terrenæque moli potuerit illigari, quàm quomodo dissipati illi, (ut ita dicam) numeri, qui compositione sua hominem antea faciebant, rursus ad eandem ueterem summam explendam redire cogantur. Facilius quippe fuerit semel institutum opus contexere, quod defluerat, quàm diuersissimæ substantiæ res duas nodo uno copulare, & tamen istud, quia assidue fit: (homines enim nascuntur quotidie) contemnitur: alterum de resurrectione, si fieret, magnum quiddam & præclarum uideretur, & si minoris sit operæ, quia raro factum. Nos autem (si sapimus) recto utemur nunc iudicio, æstimabimusque artificis potentiam & magnitudinem, non ubi sunt noua, sed maxima: deinde illud uidebimus eum, qui maiora præstiterit, posse minora, ubi uisum fuerit, præstare. Quanquam hic mihi uideor errare uerbis, qui de Deo loquens facilius aliud, & aliud difficilior, maius opus & minus pono: habet enim Artifex iste latissimam potestatem nullis circumscriptionibus, ut eadem facilitate ab eo cuncta tractentur: Solo enim nutu tractat, & annuere non opinor difficilè, nec impossibile quicquam, quod ille posse uoluit. Verum illud est: nos enim uitioso quoddam more ex humana facultate diuinâ sæpius metimur: modica, breuia, angusta, temporalia conferimus his, quæ sunt maxima, latissima, immensa, æterna. Videmus inter ipsos homines quantum periti distant ab imperitis, nam quod illis faciliè est factu, istis non modò difficilè, sed impossibile redditur. Similiter à uiris plurimum distant pueri, quia quod ipsi præstare nequeunt, ac ne cogitare quidem possunt, illi præstant facillimè: Sic quodcunque impossibile est hominibus, id facillimum Deo, imò uerò nō sic, quia maiore interuallo distat ab hominibus Deus, quàm inter homines ab imperitis periti, & à pueris uiri. Occurrat igitur illud

In Festum Pasch. diem

illud de resurrectione cogitantibus non fieri illam humana ui, sed diuina, quæ specimen sui præbuit in condendo hoc opere uniuerso, quo continemur in creandis cunctis animantibus, quæ uidemus. Simon magus, qui baptismo suscepto crediderat, postea à fide descierat, contendit Romæ cum Apostolis Petro & Paulo resurrectionem mortuorum prædicantibus, nec contendit modo uerbis, sed etiam libris super ea re editis. Verùm ut Dionysius tradit in libro diuinorum nominum, demetissimè sentiebat, quamuis sapientem se existimaret: non enim oportet eum, qui rectè sentiat, manifesta sensuum ratione pugnare contra omnipotentissimam rerum causam, sed omnia ei concedere, ubi de uoluntate non dubitatur. Est resurrectio quidem mortuorum contra naturam hanc scilicet rebus creatis inditam, sed non contra diuinam naturam: ipsi enim nihil contrarium. Habet resurrectio sufficientem sui demonstrationem, immensam scilicet promittentis potestatem. Omnes inimicos Christus suis subijciat pedibus, siue homines sint hi, siue Dæmones, omnes perduelles domabit: nouissimum autem omnium hostem mortem destruet. Enimuero animi non impiorum modò, sed illorum quoque, qui splendidè uicerunt mundum, & nunc foeliciter cum Christo regnant, mortuorum hominum sunt, nullus inuenitur, qui non spoliatus fuerit corpore, quem denique mors non uicerit; omnes tyrannidi adhuc mortis subiiciuntur, hanc prosterneat, euellet, dissipabit Christus redditus unicuique propriis corporibus. Sic hostis hostem gloriosè uincit, ubi illum iugulans spolia ante amissa recipit. Poterat Christus mortem sistere, eiusque cursum frænare, & efficere ne quenquam post eius crucem attingeret, sed quò magnificentior splendidiorque foret uictoria, permissa est mors absorbere omne mortale genus, ut sic deinceps ex eius rictu omnes eruerentur. Maioris enim uirtutis iam ab hoste captum atque detentum se explicare, prosternereque iam uictorem, quàm intra præsidia castrorum stantem, aut loco tuto se tenentem incolumitate potiri. Peccatum Adæ corporis mortem (sicut nostis) cunctis intulit. Hoc peccatum quum Christus morte sua deleuisset, tandem mortem quoque, ut opus ipsius peccati soluet, nec plus Adæ peccatum, quàm sui gratiam ualere patietur, ergo resurgent pii & impii receptis suis corporibus: sed pii ad præmia, impii ad poenas: licebit his, qui uocati sunt ad æternam uitam, illo die splendidè exclamare. Vbi est mors uictoria tua? Vbi stimulus tuus? Christi morte mortua es ò mors, certè iam in nos nihil habes imperii, non iam amplius tui iuris sumus. Et ita quidè nostra habent se dogmata. Quòd si ad Philosophos ueteres res reuocatur, eorumque iudicio standum asseueratur, dico id fieri minus oportere, quoniam illos à diuinorum mysteriorum cognitione procul positos fuisse scimus: & nihilominus si humanam consulamus rationem, probabile magis, quod à nobis, quàm quod ab illis dicitur, uideri debet. Excellentissima auctoritate inter Philosophos Pythagoram & Platonem fuisse constat, & posterores

riores, qui horum disciplinam tenuerunt: reliqui horum splendore ob-
 scurantur. Isti animos hominum post mortem elapsis aliquot annorum
 spacijs asseuerarunt reuolui in alia corpora atque alia, non hominum mo-
 do, sed etiam bestiarum, & hunc circuitum assidue procedere, ut ex uiuen-
 tibus fiant mortui, & ex mortuis uiuentes. Suscipiunt isti isti in hoc qua-
 stionis genere, id quod difficillimum est animos scilicet reuerti ad corpo-
 ra, reliquum est, ut discutiamus hoc suscepto, utrum credibilius sit re-
 uerti eos ad propria semel, an multoties in aliena. Sed quis tam mentis
 inops, ut non uideat concedendum magis esse, ut suum, quod deposue-
 rant repetant, & regrediantur unde discesserant, quam ut quicquam no-
 ui moliantur, idque honestius, ideo potius credi debere, praesertim quod
 hoc diuina oracula, illud ora protulerunt humana. Aristotelici hanc cor-
 porum resurrectionem nulla ratione concoquere ualent. Putant necessa-
 rio consequi: mortuus est, igitur non reuiuiscet, quoniam a priuatio-
 ne non sit reditus ad habitum. O stultitiam singularem, hoc argumento
 contendere aduersus Deum, qui saepius cum per sanctos suos multos, tum
 per Dominum Iesum caecis uisum, surdis auditum, mutis loquelam, clau-
 dis gressum, & mortuis demum (si hoc audire expectant) uitam reddidit.
 Praeludit ille (ut mihi iam uidetur) resurrectioni omnium futurae, dum
 quosdam e mortali hac uita elapsos in eandem restituit uitam, & pristi-
 num eis munus resignauit. Mortuum (inquit) semel est corpus, ideo non
 resurget, imò nisi mortuum fuerit, non resurget exemplo frumenti, de
 quo antea dictum est, quod in terras sparsum moriatur prius necesse est,
 ut in laetam segetem resurgat. Memini, quod quum olim adolescens, de
 his, quae in fide traduntur, uerba facerem cum Aristotelico quodam ho-
 mine erudito & prudenti, dixit ille nobilem, grauem, elegantem sen-
 tentiam, dignam, quae in quolibet conuentu audiatur, ideo eam uobis
 notam esse cupio: Dixit enim non oportere, nec debere, nec fieri omni-
 no posse, ut ad fidei mysteria naturales rationes adducantur: proprijs e-
 nim & suis argumentis unamquamque rem esse exquirendam & demon-
 strandam. Haec autem diuina, quae a mortalium sensibus posita sunt pro-
 cul, percipi & cognosci diuinitus uel applicatione purae & castae mentis
 ad Deum, uel sacrae scripturae testimonio, quae prodita fuit ad tardiores
 quosque edocendos. Quicquid illic tradatur de Deo qualecunque sit,
 id pro certo tenendum, quoniam nihil refert utrum Deus loquatur, an
 is, qui Dei correptus fuerit spiritu. Deum autem pro arbitrio quacun-
 que commouere, flectere, inuertere, qui omnia condidit, cunctis infi-
 det rebus, qui de se uniuersa pendentia uidet. Ad hunc modum, quem
 solidum esse & uerum & germanum censebat, dixit fidei dogmata inue-
 stiganda, errare autem & delirare, obliquoque & deuiò itinere progre-
 di, quicumque his manufactis ad illa uolunt deuenire, possumus tamen,
 (inquit) in his etiam diuinis naturae pariter adhibere significationes, si-
 cut doctissimi olim patres fecerunt, sed non ut illis innitamur, uerum

X quò

In Festum Pasch. diem

quò facilius ueluti quibusdam gradibus scandentes ad maxima illa tollamur. Insunt nanque in rebus his creatis similitudines quædam diuinorum illorum mysteriorum, sed rudes & impolitæ, & imperfectæ denique, uerùm ab his imperfectis ad perfectissima illa scandere ualemus, nam si in naturalium rerum progressu mira quædam effici sapius cernimus, quid de diuinis existimandum? Hæc illum dixisse memini, mihiq; persuasit, etenim neminem nostrum ad tam diuina tamq; altè petita mysteria per somnum euehi posse, aut quòd de Ganimede Poëtæ tradunt, raptu Aquilæ conuolare perspicuum est. Opus est proiecto corpore, contemptisq; terrenis assidue meditari diuina, hisq; toto seruire pectore, deum diuino numine afflari, sic forsitan ea per nos ipsos inspicere quomodo possemus. Si tales sumus, rectè est, sin aliter, habenda his fides, qui inspexerunt, ne incredulitatis pœnas luamus, quæ enim excusatio obtendi poterit? Nos de his, quæ longinquis in oris posita non conspeximus ipsi, aliis credimus, qui uiderunt, & quamuis sint talia, quæ à regionis consuetudine procul abhorreant, adhuc tamen talibus fidem nostram mandare æquum putamus, nec solum nostrorum, sed etiam aliorum corporum sensibus plurimum scientiæ nostræ additum fatemur, quid de his, quæ animis sentiuntur: est enim etiam illis suus sensus, unde sententia nomen accepit, nonne sanctos uiros audiemus? quorū mentes diuino collustratæ lumine illa maxima & admirabilia perspexerunt, nec perspexerunt tantum, sed sicuti solent orbem peragrantes, quæ noua & singularia penès exteras nationes apprehenderunt, scripto persequi, & memori manu notare, sic illi, quæ flante Deo acceperant, uel in illo clarissimo uniuersitatis speculo deprehenderant, literis mandauerunt. Resurrectionem corporum Prophetæ prædixerunt, Apostoli prædicauerunt, quin Christus ipse pollicitus est: Illud uerò iam opus non uerba, quòd prior ipse exempli gratia resurrexit, & cum eo unà plures. Hæc sacris mandata literis credere dubitamus? si testimonia hominum accipimus, quantò magis diuina, quæ grauiora firmioraq; sunt? quòd si de præteritis futura æstimare uolumus, sicut illa iam impleta sunt, ita & ista implebuntur. Quicquid ad Christi conceptum, natale, uitam, mortem, resurrectionem, ascensionem pertinet, prædictum est antea & impletum credimus, prædicta sunt ecclesiæ tempora, quòd reges & populos primum iratos haberet, mox fauentes. Vtrunque impleuit, & Martyrum infinita pœna, & quæ sequuta est orbis ad fidem conuersio, prior ætas pro idolis aduersus Christum, posterior pro Christo aduersus idola pugnavit. Non tacuerunt prophetæ, quòd ecclesia domestica hæreticorum seditione laboraret, quod nunc etiam fieri oculata tenemus fide, prædicta quoq; corporum resurrectio in mundi clausula, uenturumq; iudicium, quo digna dignis tribuentur: & boni bene, mali malè excipientur: tam id nõ deerit, quàm nec priora defuerunt. Si quidem eiusdem spiritus afflatu pronuntiata sunt omnia. Ergo resurrectionem corporum crediderunt, qui

cup X

qui nos præceſſerunt fideles, & credimus, qui nunc ſumus, & credent poſtmodum, qui conſequentur. Hæc reſurrectio credita effecit, ut minus timerent Martyres in eculeos, in ardentès laminas, in ungues ferreos, in flammas, in cruceſ, in quoſlibet demum cruciatus ire. Videbant enim ſantiſſimi illi, nunc etiam foeliciffimi, quòd corpus proprium, quod tunc patebat ad laniatum carniſici, aliquando reciperent, non incolumè modò, uerùm etiam grandi dote ornatum, & eò ornatiùs, quòd tetriora fidei cauſſa perferrent. Huius reſurrectionis fides illud etiam præſtat, ne in chariſſimorum morte nimio mœrore defluamus. Quis ueſtrum non aliquem ſibi chariſſimum defunctum eluxit? Hic parentes, propinquum aliùs, aliùs amicum: nemo non alicui morienti lacrymas doloremque ſuum præſtitit, atque haud ſcio an non rectè: non enim amiſiſtiſ, ſed breui temporis curriculo à uobis dimiſiſtiſ. Noſtiſ nanque animoſ noſtroſ poſt mortem ſuperèſſe, & immortaleſ manere. Caro eadem illiſ aliquando reponetur, ita, ut nihil deſideretur. Quamobrem eoſdem habebitiſ, eoſdem ſuiſ rigenteſ neruiſ, propria obductòſ cute uidebitiſ. Non enim moſ corpus occidit, ſed medium tantùm quoddam ſpaciùm occupans priorem eiùs futuramque uitam diſcriminat, quaſi ſomnuſ quidam nocturnuſ inter heſternuſ craſtinuſque diem coniectuſ. Itaque inualuit in eccleſia conſuetudo de ſacriſ ducta literiſ, eoſ, qui de hac uita deceſſerunt, dormientiuſ uocare nomine, quaſi iterum cum corporibuſ ad uigiliam alteram ſuſcitandi ſint. Genteſ quoque olim de mortuiſ pari ſermone utebantur, ut dicerent eoſ ſomnuſ cœpiſſe, ſed eum unicuſ atque perpetuū: non enim reſurrectionem expeſtabant. Tale illud eſt, quod legitur penèſ Virgiliuſ.

Olli dura quieſ oculoſ, & ferreuſ urget
Somnuſ, in æternam clauduntur lumina noctem.
Et apud Horatiuſ illud quoque lego.

Ergo Quintiliuſ perpetuū ſoporē Vrget.
Rurſuſ aliùs Poëta cecinit

Nox eſt omnibuſ una dormienda,
Huiuſmodi plura in Gentiuſ literiſ reperiuntur, quæ tamen minus propriè ab illiſ dicuntur, nam ſi nulla eſt corporuſ reſurrectio, & erepti ſemel ſenſuſ corporiſ nunquam reſtituuntur, non eſt dicenduſ homineſ in morte obdormiſcere, ſed animo tantùm ſuperſtite animal ipſuſ concidiſſe: ſed ſi ad propriuſ reddituruſ eſt corpus quicuſque hinc à nobiſ diſceſſerit cum immortalè animo, ita ut priſtino more copulatuſ uigeat & ſentiat, tunc uerè exiſtimanduſ ille non occubiſſe morièſ, ſed dormiſſe, tanquam ſenſuſ corporiſ non fuerint ei erepti, ſed ueluti ſomno in tercepti, & conſopiti. Hinc Saluator in Euangelio, de puella mox ſuſcitanda dicebat: Non eſt mortua puella, ſed dormit. Eadem ſignificatio-
ne dixit. Lazaruſ amicuſ noſter dormit, ſed uado, ut à ſomno excitem eum. Apoſtoluſ Pauluſ, idem quod ipſe nunc proponebam perſequèſ,

X 2 cenſet

In Festum Pasch. diem

85
 censet non esse lugendos mortuos ob spem resurrectionis, eosque dormientes uocat. Nolo (inquit) ignorare uos fratres de dormientibus, ne contristemini, sicut & ceteri, qui spem non habent: Hæc in epistola prior ad Thessalonicenses. Alijs locis passim uocat mortuos sub dormientium nomine. Et Christum appellat primitias dormientium in resurrectionis mysterio, quod primus omnium resurrexit. Interest tamen inter hunc somnum & uigiliam, quam quotidie induimus, & id quod tunc fiet, quoniam hæc duo nunc alternant, & sibi ipsis inuicem succedunt: nam de somno ad uigiliam, & de uigilia ad somnum transimus; at ubi semel cum corpore reuiuiscere, & reuigilare (ut sic dicam) coeperimus, nunquam deinceps amplius dormiemus. Vos igitur ad sepulchra adhuc flebitis? non facietis, si memineritis illa esse cellaria, ex quibus charissimorum rediuiua corpora proferentur. Hoc sic habere, uel unum illud, quod circa Iob gestum est, acutè cernenti ostendit: nam quum huic uiro Deus ob singularem patientiam eorum, quæ antea possederat, duplicia omnia reddidisset, oues, camelos, boues, asinos, & reliqua, filiorum tamen numerum non duplicauit, sed eundem restituit, quasi quos prius habuerat non amisisset, sed ad resurrectionem præmisisset. Nemo tamen existimet communi uita tunc uiuendum esse, & unicuique ad lares proprios & sua ueluti postliminio quodam esse repedandum, sicut olim in terra Mediolanensi contigisse dicitur, nam illic quidam letali ægritudine detentus, quum impelleretur à Monachis, ut propriam domum eorū ecclesiæ legaret, negauit se facturum, quia nollet, quum resurgeret aliena tecta, mercede habitare. Hæc ille aut credidit, aut finxit credidisse, cum summo omnium, qui aderant risu. Quando igitur hæc fiet resurrectio? quid uel tunc agetur? Non obscurum est id euenturum in ipsa penè temporum conclusione, quandoquidem non multò post uniuersus hic rerum status, totusque mundus, uelut rogo illatus ardore deflagabit, tunc uiuorum & mortuorum Iudex Apostolico Senatu comitante Christus sedebit. Illo tempore, quum resurrectio corporum definet mira uideri, quoniam æquè omnibus contingeret, ad beatissima cœlorum præmia iusti & pii uocabuntur, reliqui impij, nocentes, qui aut in se, aut in alterum, aut in eum, quem sibi iratissimum præsentem facinorum uindicem uidebunt Deum, iniusti quicquam perpetraverint: nec ea crimina pœnitendo deleuerint, æternis flammis incendijsque tradentur. Dubitate etiam nunc si potestis resurrectionem futuram, nam quum ad diuinum iudicium uniuersis spectantibus progredi necesse sit, nonne idem homo exhiberi debebit? equidem quum nouissimum illud tempus ante oculos pono, exhorresco: fiet enim tunc acerrima discussio de singulorum factis atque dictis: non enim quæretur, utrum huius urbis domus, quas ueluti testas quasdam ad nos contegendum compegimus, saluæ futuræ sint, sed figulus ipse rebus omnibus nudatus in extremum discrimen pertrahetur: ne illud quidem poscemur, ut dicamus, cur cœlum

lum

Ium contrario motu aliter atque astra feratur. Cur flumina perpetuo cursu manantia, per multa terrarum spacia in mare deinceps omnia tanquā in immensum laticum quendam uentrem diffundantur: quæ sidera in cœlo, feræ in syluis uoluantur. Illud dicendum potius quā pij, quā religiosi fuerimus, quot pereclitantes fame saturos dimiserimus, quot teximus nudos, quot collegimus uagantes, quot subleuauimus iacentes quot demum egenos opis & consilij, fraterna charitate recreauimus.

Multa nūc honorant, quæ tunc forsità grauius premēt, ueluti diuitiæ, genus, amicorū cunei, populi fauor, magistratus, imperia, ingenij uis, memoriæ foelicitas, doctrina ingēs, & exūdans eloquentiæ fons, hæc inquā tunc fortè lædant, quibus nunc iuuari uidemur, quia uel ea malè cœperimus, uel non ita usi fuerimus, ut oportebat, & diuina eloquia flagitabant.

An putatis, quòd in illa turba gloriabuntur sic homines? Ego in sæculo agens tot iugera terræ possedi. Alius, at ego Philosophus excellens. Tertius, at ego, quod superat omnia: Pontifex maximus fui. Nemo hæc pro se efferet, nisi dum haberet, spectauerit in his, & Dei laudem, à quo suscepit, & hominum salutem, quibus auxiliari tenebatur. Olim fuere multi, & nunc forsitan sunt nonnulli, qui diuinam de rebus auferūt prouidentiam, uel de ea malè existimant, dum uident mansuerē, & castè & iustè uiuentes calumnijs premi, inuadi, torqueri, diripi, lacerari, & eorum plurimos uix necessarium uictum habere; sæpe etiam morbo longo & graui macerari, & demum omni carere subsidio. Et è diuerso maleficos & pollutos homines planeque flagitiosos affluere diuitijs, deliciari, nitidis uestibus amiciri, longam clientulorum cateruam post se trahere; magistratus gerere, multa à regibus dona prouilegiaque referre. Hæc ubi uiderint, indignabundi exclamant. Vbi nunc est prouidentia illa? Vbi iustum iudicium? Sobrius & innocens malè agit, intemperans & sceleratus foeliciter. Hic uenerationi est omnibus, ille contemnitur, hic uarijs fruitur uoluptatibus, ille summis affligitur angoribus. Horum omnium sic clamantium ora obstruit supremus ille resurrectionis dies, in quo & lætissimis iusti præmijs, & tristissimis iniusti afficientur supplicijs. Non enim res humanæ æstimandæ sunt solum ex his, quæ in hac uita contingunt, sed ex illis multò magis, quæ in altera, propterea quòd diuturnior est, uel potius sine omni carebit. Præsentia sunt iustis uiris certamen & ueluti stadium quoddam angoris luctusque plenissimum. Futura uerò, quæ? nihil tale, sed horum contraria, præmia, coronæ, gaudia, honores. Itaque oportet illos ut athletas hîc & in sudore, & puluere, & æstu multo, & uarijs in laboribus ærumnisque uitam agitare, & cuncta perferre uiriliter; existimantes pro his immensa sibi reposita fore munera & stemmata. Si quos uerò impiorum conturbat præsens & momentanea foelicitas, hi perpendant quales & quantas in posterum daturi sunt pœnas. Enim uero & hîc uidemus fures, latrones, siccarios, falsarios, prædones, antequam ad Iudicem trahantur, multis perfrui delicijs iam locupletes & abun-

In Festum Pasch. diem

abundantes ex aliorum calamitatibus effecti : at ubi uincti audiunt Iudicis sententiam, & extrema excipiunt supplicia, miseros illos & infelices iudicamus. Sic qui nunc uidentur feliciter agere impie uiuentes, ubi unigenitus federit Dei filius nouissimo die, cunctosque mortales ante illud horribile tribunal adducet : cernemus istos falsa nunc felicitatis opinionione corruptos, summis calamitatibus ærumnisque premi, dum cunctorum exortes bonorum in flammis proiicientur sempiternas. Nemo unquam extitit tam uehemens diuinæ prouidentiae accusator, qui non apertissime tunc intelligat cuncta consilio gubernari, quum uiderit rectissimo iudicio & iustos post graue certamen coronari, & impios post illicitas uoluptates affligi. Hoc præstat cuique nunc intelligere, ut iam uideat, quid magis expediat, & simul ne audeat impium quicquam aduersus Deum proferre : nam rem factam stultus etiam intelligit, tunc quum nihil admodum prodest intellexisse. Illud uerò egregium, quod nihil omnino latebit eorum, quæ aut ritè aut perperam dicta fuerint, gesta, cogitata, palam erunt omnia, etiam illa, quæ in tenebris & solitudine tractantur. Quid ita? quia non peregrina aduersus nos proferentur testimonia, sed nudati ipsi ante omnium ora sistemur, unusquisque conscientia sua tantum pro tegmine quodam utetur : non uacabit tunc alia de re disceptare aut alteri suffragari : causam inspiciet quilibet propriam, & de ea sollicitus erit. De Iudice dictum est : Iudicabit enim iste resurrectionis nostræ auctor, & qui in ipsa resurrectione nos tam longè præcessit, demum, qui & homo pariter et Deus est, cuius sanè iudicium nemo aut pecunia corrumpet, aut acumine circunueniet, aut mendacio fallat, aut ui perfringeret. O miseros illos, & plusquam dici potest miseros, quos premet conscientia sui ipsius accusatrix. Illo supremi Iudicii die miseri illi & infelices fugient uultum iratissimi Iudicis, nec tamen effugient; nihil erit in illis, quod non horrore, formidine, trepidatione quatiatur, nusquam consistere poterunt, pauebunt undique: ne furorem quidem diuinæ iræ, quo torquebuntur, audebunt deprecari, ac ne optare quidem, ut remittatur. Quid deinceps fiet, quum Iudicis tanti ore in loca ultima, tetra, formidolosa detrudentur præmij loco pro facinoribus susceptis? ubi uberrimi fletus & lamenta sonant immensi doloris, ubi supplicia nec modum nec tempus norunt, ubi nulla fatigatio, nec tormenta, nec tortores tenet, nec tortus deficit : quid hîc aliud, quis dixerit, nisi in uita illa mortem esse acerbissimam, morte tamen carentem. Hoc triste est & seuerum quoddam orationis genus, quo forsitan tam læto & celebri die uti non debui: quamquam nō omnia protuli, quæ infelices peccatores in infernis perferrēt; nam uel illud pessimè eos uret, quod uidebunt se à conspectu Dei longè latèque proiectos uero bono caruisse & in æternum carendum esse. Sed iam desino. Illud admoneo sic fingendos nunc mores & componendam uitam, ut non quolibet resurgentes, sed non nisi in bonorum grege collocemur : hoc enim ualeat non solum ad fugiendum molestissima illa, uerum

rùm etiam ad assequendum beatissima. Nam si in bonorum parte steterimus, illud primùm aderit, quòd uenientem Iudicem non modò non metuemus, sed inter nubes sublatis tenuatis corporibus in occursum eius ueniemus. Attendite nunc & considerate, ut inualidus & imbecillus humani corporis sit status: quem morbus deijcit, uis & ferrum labefaciat, mors diripit, labor atterit, dolor affligit, fames ac sitis assidue uexat, ipsa denique dies post medium ætatis culmen imminuit, ac per singula penè carpit momenta. quid hæc crassitudo terrena, num mediocriter in corporibus offendit? quæ ab omni luce muta, tarditatem motus consequuta, in imum deprimit, ut nos, quorum gratia hic mundus & coelestis ignium ornatus effectus est, ne sideribus quidem, quantum ad corpora attinet, simus pares, quæ immenso fulgore nitida & leuitate ipsa sublimia incredibili celeritate mouentur. At Beatorum corpora ubi consurgent, si splendorem quærimus, sole ipso lucidiora, si subtilitatem, uim assequentur subtilissimorum corporum; ita nec erunt oneri, & per qualibet densa facillimè introrumpent, quid dicam de agilitate, propter quam penè subito, ac penè sine temporis interuallo uniuersum cœli ambitum transmittent, ut stultum sit tigridis cursum, sagittarum auiumque uolatum, & si quid his fugacius, conferre. Ad hæc nihil laboriosum, nihil asperum, nihil contumeliosum patientur, nec ullo cibo potuue egebunt, quo corporis ruina fulciatur, quia incorruptibile fuerit & immutabile, animi tantum nostri cibum & potum requirent, qui fuerit illis in Deo paratissimus, hoc reficientur, de hoc uluptatis fonte potabunt. Non celebrabuntur nuptiæ, quia nulla noua proles supponenda fuerit nemine moriente, & omni humani generis numero ad suam summam perducto. Postremò nulla intercurrent uetustas, quæ pulcherrimus corporum illorum ornatus dilapsus occidat. Illa erunt corpora cœli digna habitaculo, illo se gaudebit animus domicilio collocari. Est natura quidem insitus amor nobis erga corpus, isque minimè nequit auelli, adeò ut sanctorum animi Dei intuitu iam beati adhuc appetant carni suæ sociari, illiusque ueluti reddito connubio lætitiæ suam perfici. Nunc uerò quis nostrum odio corpus suum prosequitur? Non enim si minus illi indulgemus, & laboribus assuefacimus, id ullo fit odio, sed ut corpus ipsum obsequijs animi reddamus habilius, quòd si etiam sunt, qui dicant se malle omnino carere corpore: ij non sentiunt, quod loquuntur: non enim corpus, sed imbecillitatem huius & grauitatem detestantur. nam si interrogarentur an corpus agile, nullis obnoxium offensionibus habere uelint, scio, clamabunt omnes id esse, quod optabant, tale autem resurgentes habebimus in iustorum partem traslati, quale ne possimus nunc quidem uoto melius optare & sermone fœlicius depingere. Vidi plerisque mirari corpus cuiusdam mulieris, quasi omnem pulchritudinis legem teneret. Tale olim Venus habuisse dicitur, quòd quum Momus culpam non posset, ne tamen & ipsa sine reprehensionis morfu discederet,

eius

eius fertur culpasse scandalium. Helenam Iouis & Ledaë filiam tradunt fabulæ mulierum omnium fuisse pulcherrimam, ut meritò propter tantam pulchritudinem Asia atque Europa uenerint in certamen, diutinoque bello confixerint. Sed quid hæc pulchritudo ad illam, quam iustorum recipient corpora illo ipso resurrectionis suæ die? Nonne quicquid pulchritudinis hic in corpore haberi potest, uile erit & exiguum, & turpe quodammodo, si ad ingentem illam beatorum corporum pulchritudinem cōferatur? Si cui pulchritudo curæ est corporum, istam præuidere animo & prospectare debet, & dare operam diuinis parendo nunc mandatis, ut postmodum resurgens in se ipso assequatur: non enim magnum est aliena mirari bona, sed magnum, ipsum ea possidere. Rectè loquutus est, quicumque dixit, omnia diligentibus Deum cooperari in bonum. Corpus mortale, quale nunc nos gerimus, & si sit oneri, adiuuat tamen gloriam nostram, dum in tali corpore uirtutis opera exercemus: mortuum nihil uiuat, sed exonerat animum, quem premebat, suscitatum delectabit, nec amplius oneri erit: nam regentis animi imperio faciliè obsequetur. Sunt nonnulli, qui in proposita resurrectionis materia quæstionibus se se inuoluunt & impediunt. Quomodo (inquiunt) infantes, qui decesserint? Quomodo iuuenes? quomodo senes resurgent? an una in ætate omnes? Ergo recipiunt aliud, quàm quòd fuerunt, uel si in diuersis resurgunt ætatibus, erit in infantibus & senibus aliquid infelicitatis. Dicendum his ex sacra scripturæ testimonio, quòd in ætate perfectæ erit resurrectio, pulcherrima nanque futura sunt beatorum corpora quemadmodum dictum est. Nihil indecens his fuerit aut ineptum, quin si quæ antea fuisset deformitas, hæc auferetur, nec dici potest recipere eos aliud, quàm fuerunt, si qui in infantia uel senectute discesserint, in iuuentute resurgent, quoniam senes iam antea iuuentute fuisse constat. Infantibus quoque aderat iusta illa ætatis magnitudo ueluti in semine, licet nondum per articulos temporis euoluta. Quo præterea (inquiunt) dentes si nihil cibi molendum? quòd stomachus si nil concoquendum? quo genitalia si matrimonia non ineunda & proles non suscipienda? quasi uerò non præmij id sit loco, quòd is membrorum officijs carebimus, quæ nunc etiam multi probi uiri nituntur non implere, uacantes ieiuniis & castitati. Nec existimandum ea corporis membra fore superflua, quæ faciunt ad uitam & figuram humani corporis: nam eos etiam, quibus exsecta sunt genitalia minus habere spiritus, & uigoris, & facilius extingui perspicuum. Quærunt quid opus sit dentibus, stomacho, intestinis, genitalibus, si neque cibis, neque concubitu utemur? Ego contrà quæro, quid opus fuerit cibis & concubitu, si resurgent incorrupta corpora, & iustam sortita magnitudinem, & humanum genus quoto numero constare debuit, hunc fuerit assequutum: ut delectemur (inquit aliquis) atque ita his delectationibus beatitudo illa perficiatur: hoc nimirum est illud, quod hanc pugnam commouit, quia plerique nimis corporis sensibus dediti sumus, & nullas

ferè

ferè nouimus uoluptates præter eas, quas corpore percipimus, in quibus hæc ciborum & uenereorum uoluptates præcipuum obtinent locum. Quapropter Iudæi & Sarraceni harum uoluptatum copiam resurgentibus suis pleno ore proponunt. Nihil de uanitate huius sententiæ dicam, nisi quòd ridiculum est quærere corporeas oblectationes, in quibus nobiscum animalia bruta communicant: ubi expectantur maximæ aliæ uoluptates, quæ nobis cum Angelis fuerint communes. non enim etiam Angelos imperfecta dicent frui beatitudine, propterea quòd careant uoluptatibus, quas sensus corporei ministrant: certè melior & ordinatior uita esse debet illorum Beatorum, quàm ea, quæ hîc ducitur. At uitiosum est nunc cibum uel concubitum ob solam oblectationem, ac nò alterum petere corporis sustentandi, alterum prolis substituendæ gratia: natura enim his in rebus, quæ necessitas uitæ huius requirit, uoluptatem immisit, ut hac illecti agamus quæcunque agenda sunt in talibus, non autem ea nos agere uoluit, ut uoluptuemur. Et ut summatim dicam harum rerum actio non instituta fuit propter uoluptatem, sed uoluptas propter actionem. Itaque temperantiæ uirtus in his elucet, qui abstinent ab escis & ueneris, nec plus appetunt quàm quantum fas ratioque permittit, quòd si ita abstinemus tanquam hæc altero in sæculo habituri copiosius & paratius, iam nulla esset uirtus temperantia, uel non esset sincera uirtus si quidem hac ratione & impudica castitas, & gulosa essent ieiunia. Et de his quidem satis. Vellem datam mihi fuisse longiorem temporis moram perscrutarer omnes quæstionum sinus, discuterem libenter singula & pro uiribus explicarem. Nunc missa facio, ne abuti uidear aurium uestrarum facilitate. Multa enim iam dicta sunt, uidendumque, ne tædio sit orationis prolixitas, sed quicumque hæc & talia quædam (incidunt, ut uerè fatear, in quæstionibus plurima) scire expetit, ne in errorem dilabatur, aut hæresim, ne ue animum suum in rebus leuioribus agnitum ad hæc excutienda minorem incassum delasset: Theologos censeo adeat, qui nimis acri studio hæc sibi inuestiganda duxerunt, quibus etiam multa diuinitus innocuerunt. Non enim hæc tanta humani ingenij luce perspici possunt, & tam multa ambigüe & obscurè in sacris literis elata sunt, ut non mediocrem curam, diligentiamque requirant. Atque ego haud sum nescius, quia initio orationis meæ dixerim omni iucunditate hunc diem esse celebrandum, quin multi domum reuersi obruant se uino & epulis, præsertim quòd tam diu à carniū esu abstinuerunt, atque ita accipiant se iucundè uixisse, perinde atque illi, qui quum ornate intellexerint procedendum esse festo die, auro atque purpura nunc fulgent, quasi uerò magnum sit ornari eo, quo & simulachra manufacta teguntur, & parietes uestiuntur. Verus est enim hominis ornatus uirtutum quidam decor, qui in animis positus non nisi animo cerni potest. Vtinam mortalium oculis pateret, non tam hunc externum & aduentitium quæreremus nitorem, quem & si ego non aspernor, in uiris præsertim summæ dignita-

Y tis,

tis, uberioris fortunæ, attamen intelligendum est, si tam sacro die mundi lauti que corpore esse debemus, id in animis multò potius requiri. Nunc etiam priores illos appello & rogo ne me existiment uentris & gutturis patrociniū suscepisse: & si iucundè dixerim modo esse uiuendum: intelligo enim iucunditatem esse suauem quandam animi motionem, nihil sanè ad corporis sensus attinentem, quam lætitiā & gaudium & uoluptatem apello, propriè an secus, nihil ad nos, neque ad hoc tempus: Grammatici uiderint, quorum est superbissimum, ne dicam uentossimum iudiciū, qui ne tam bono quidem die à litibus abstinerunt: illud inter se certantes, an Pascha uel phase dici debeat, quum tamen aperte diuina scriptura multis locis eorum ferulas contemnat, mihi satis est, quòd uel hoc, uel illo nomine transitum significari intelligo, siue quia Christus de morte ad uitam transferit resurgendo, seu ueteris festi nomen retinere placuit, quod quum Christus est passus, celebrabat Iudæorum gens ob eius temporis memoriam, quo Mose duce Aegyptum Pharaonemque fugiens medium pelagus siccis uestigijs altrinsecus retentis fluctibus perambulauit, & ad alias orbis partes penetrarit. Rex ipse Aegyptiorum profugos insequens eodem pelago coeuntibus rursus aquis cum uniuersis copijs interceptus sauitiæ & arrogantiae suæ meritas poenas dedit. Hieronymus autem hoc nomine ab Hebræis factum illud notatum putat, quòd quum Angelus Domini percuteret primogenita Aegyptiorum, uidens tinctas agni sanguine Israëlitarum fores, eos pertransierit, nec unà cum cæteris percussit, hoc causam nomini dedisse ille autumat, quod sacræ quoque nos docent literæ. Habuistis per quadragesimale hoc tempus, quod iam effluxit, diuini uerbi concionatores, homines & religione & sacra doctrina imbutos, qui sapius detonarunt, & aduersus multorum delicta uelut ense stricto infrenduerunt, ego nihil huiusmodi nunc facere meditor, audebo tamen uos ardentes, ut spero, ad ueram uiuendi normam & rectum uirtutis iter adhortari pro frequenti consuetudine horum temporum, quibus multi inueniuntur nihil facere & omnia præcipere. Etenim si homines muneris huius tuendi gratia natos esse & in lucem editos constat, ut Deum toto pectore diligant, uerissimum bonorum omnium fontem; cur non id implemus, quum id fieri nostra intersit? & eò magis, quòd ab illo ad hanc præclaram uim amoris excitati sumus, qui nostri causa carnem induerit, uersatus sit in terris, & aræ crucis se ut hostiam obtulerit, peccataque gentis sustulerit. Si nos tam mirè dilexit Deus, cur nos malumus amare mundum? si amare piget, saltem perspecto illius in nos amoris igne libeat redamare. Ille salutem nobis dedit, semel cum uniuersis, quum humanum genus peccato originis oblitum, & Dæmonum constrictum cathenis supplicio uulneribusque suis redemit. Postea singulis sapius atque adeò nuper, quum peccantes, & diuina illius mandata contemnentes, quia ingemimus, & confessi sumus, respexit in gratiamque recepit, neque illorum, quæ
impie

impie admisimus memorem fore pollicetur, atque adeo non memorem, ut coelum etiam daturus sit. Si pergitur laedere, si redemptos adhuc peccare iuuat, quæ tanta improbitatis, turpitudinis, inconstantiae poterit esse defensio? Etiam ne coelum ab illo oblatum recusamus? O' coeca mortalium pectora. O' Dæmonum artem. Coelum inquam & antiquam illam ac beatam patriam padentem iam ultro limina, & ad se se uocantem spernimus; & his falsis, caducis, mortalibus bonis inhaeremus. Nonne etiam hodierno die Christus animi nostri testis sui praesentia luceque inuisere dignatus est, hospitemque se nobis praeiuit? hospitem dico? imò & in epulum se ipsum dedit. Rem sane nouam, atque omnibus saeculis inauditam: matres plerumque filios, quos in utero laborantes enixa sunt, non suis, sed aliarum nutricum uberibus tradunt alendos. Non sic Dei filius, non sic, sed quos ipse in baptismo genuit sibi filios, hos proprio pascit corpore & sanguine, ut eos sibi quam maxime coagmentaret. Non illum mouerunt sordes peccatorum nostrorum: uenit antea cum peccatoribus mortali in corpore manducare, nunc immortalis factus uenit à peccatoribus manducari. At qui ita uenit manducari, ut sit idem conuiuia & conuiuium: comedens, & comestus, comedit namque is cibus epulatorem suum: & non se illi, sed illum sibi assimilem reddit. Hoc est purum & immaculatum corpus, quod summa illius diuinitatis est particeps, quod in terris agens multa edidit miranda, quod humanum antea mortuum genus uiuificauit, quod inferorum ora abstruxit, & coelorum ianuam fidelibus reuerit. Quanto igitur munere affecti sumus, quod id nobis in cibum praeiuit? Iam uero, quod à mortuis resurrexit, quid aliud facit, quam quod monet, ut nos itidem à uitis resurgamus. Videte quam inter hæc non multum interfit, & si non est mei propositi conferre causas, sed ille impijs aduersus patibulum corpore sustinuit, nos grauiorem animorum mortem induimus à uero bono auersi. Ille exanguis mandatur tumulo, satellitibus circumsessus armatisque custodibus. Nos grauitate uitiorum inferno addicti, ab impia Dæmonum multitudine obfessi tenemur. Vnū remedium salutis, quod Paulus ad Romanos scribens, praecepit, ut omni ueteri nequitia reiecta nouum hominem induamus, & unà cum Christo resurgamus. Antea terrena & mortalia cogitabamus, nunc diuina meditemur, & in diuinis semper sumus, quamque mentem ambitio inflauerat, odium efferauerat, luxuria coinquinauerat, hæc eadem castitati, patientiae, humilitati que dedatur. Incontinens erat aliquis, nunc est pudicus: Auarus, nunc est misericors: Inflatus, nunc humilis: Truculentus, nunc mansuetus. Hic facta est resurrectio, illius scilicet futura prauia. Sed ita resurgere conemur, ut nunquam post hac cadamus, id est peccemus: Stipendia enim peccati mors. Si resurgemus à peccatorum morte, immortalis sit hæc resurrectio, quemadmodum & Christus ad immortalitatem resurrexit, & nostris quoque in corporibus immortalis futura est resurrectio. Vbi audimus ab Apostolo nouum hominem

Y 2 induen-

induendum, intelligamus multam illic uitæ mutationem magnamque innouationem requiri. Ego ab obsequio sui ipsius, indulgentiaque discedatur. Seruiamus Paradisi gloriæ, denique nihil æstimemus antiquius reſtitutione & ſanctitate uitæ. Sic imis relictis ſupera petemus. Sic reſurgenti Chriſto associabimur. Sic illo nouiſſimo die corpora, iam pridem poſita humi que demandata, mira ſpecie pulchritudineque decorata reducemus. Immortales toti effecti ſumus diuino munere, ſiue animos ſpectare libeat, ſiue corpora, & utrique parti immenſæ dotes additæ, quicquid autē ægri & mali acciderit, id culpa acciderit, propterea quod iniuſtus terrēnorum commodorum amor ſœdæque corporis uoluptas ſui ſcabie illexerint, noſque haud repugnantes duxerint ac deprauarint. Aliis gentibus & nationibus ignaris diuinæ legis, nec reſpicientibus in tanta præmia, quid uis dicere & facere, facilius conceditur; nec mirandum ſi poſtmodum contingent iis triſtia, quibus extra eccleſiam ſtātibus non eſt ſalus. Populum uerò Chriſti aberrare fas non eſt, quem Dei ſapientia inſtruxit, nec præcipitari ad infera decet, cui ſupernæ regiæ fores patent. Vos autem, qui huc conueniſtis, quos nam dicam? Num animantia rationis expertia? Mentiar. Barbaros? qui poſſum in hac urbe genitos? at infideles? contumelioſum eſſet ita uocare. Contra habetis ſumas, ut opinor, gratias Deo, quod homines genuerit, quod in Italia, quod in fide Chriſti: ſed quid reſert, ſi deterius infidelibus, imprudentius Barbaris, immanius beluis uitam agitaſtis, nec cogitaſtis quàm ſœdum, iniquumque ſit homines natura genitos inhumanos ſcélere inueniri, & fideles Baptiſmo effectos ingenio eſſe infideles, & in Italia natos præter leges ſasque agere, & Chriſtiani demum nomine retento Chriſto opere reſignaffe. Reſurgamus ergo à uitiorum ſepulchro quot quot peccatores ſumus, atque ita duplicis reſurrectionis diem feſtum agitaſtis: unius, quæ in animis noſtris, alterius, quæ in beatiffimo Chriſti obtigerit corpore, bina hæc erunt gaudia, ſient trina cogitantibus, quod reſurrectionem hanc animorum noſtrorum illa poſtmodum gloriæ ſa corporum ſequetur, quæ in extremis mundi huius ruinis, æterno illi & ſpecioſo cœleſti triumpho animos corporaque ſimul conſecrabit; & quia perfectiſſima illa erit reſurrectio, unicuique tantum eius feſtus dies, ſed perpetuus agetur. Sed iam ceſſandum eſt, ſinisque orationi noſtræ imponendus, ſi prius pauca quædam, quaſi de fama mea dixero: nam ſi antiqui Oratores ingenio maximo præditi, uſu & exercitatione robuſti, & ad forenſis diſtinctionis genus penè facti, quum morralium cauſſas agerent, ſæpe metu exalbuerunt, atque omnibus artibus contremuerunt. Ego, qui non tanta eram peritia, & qui diuina, & quæ in diuinis erant maxima, tractare inſtituebam, iuſtius commoueri debebam, & de rei ipſius euentu animo pendere, ne temere tantam cauſſam, quantam nemo unquam antea populari oratione attigit, in grefſus uiderer; niſi fortasſe magis confidere potui, quod non ut ueteres illi cupiditate laudis, aut alicuius pecunia aut gratia adductus, huc uerba

facturus

facturus processit: sed quia & pietati meæ & religioni uestre conuenire credidi, si quæ materiæ huius diei celebritas requirebat, hanc ipse oratione exponerem, auribusque uestris infunderem. Nec me tamen eius latebat profunditas & amplitudo, sed hoc, quod terrebat, ne tantum munus susceperem, idem, si susceptum minus commodè explesem, spem ueniam pollicebatur: quod enim magis uenia dignum, quàm ingentia complecti uoluisse & nequiuisse? Est etiam in honestis rebus eisdem magnis conatus probabilis, quamuis ad summum non perueniatur, nec sanè tam læto tempore in tanta animorum uestrorum hilaritate quicquam infausti, ac sinistri à uobis mihi fuerat metuendum, quod etiam re ipsa sum expertus. Vobis enim magnæ agendæ, maiores etiam habendæ gratiæ, quòd quam diu uolui & potui dicere, me ipsum benignè & diligenter audistis. Quæ dicendi potestas si sæpius fieret doctoribus uiris, meliora nosceremus, quàm nunc noscimus: animosque nostros facilius à uitiorum labe teneremus.



MARCI



MARCI ANTONII

NATTAE ASTENSIS,

De fuga sæculi & religionis studio,

SEV. DE CHARITATE IN DEI,

Ad nouitium monachum.

LIBER.



V V M humanæ uitæ cursus bipertito findatur, alijs humana, alijs diuina tractantibus, quorum unum in turba fit, frequentiaque populorum, alterum solitudo persequitur, non possum iudicio tuo non eximè gaudere: qui id posterius uitæ genus sequutus es, quod & salubrius, & fructuosius & portuosius, & quod (ut uerè dicā) dignitate & amplitudine meritō maximè antecellit. Nam Cisterciensis ordinis Monachus effectus reiecto retrorsum cū ornatu uano delitijsq; fallacibus sæculo, iure contempsisti mortalia, quando immortalitati eras natus: iure affectas cœlestia, postquam terrena tibi non debentur. Quodd si in sæculo elucerent iustitia, pietas, fides, religio, continentia, liberalitas, fortitudo, reliquæ uirtutes, laudabile foret te humanis relictis ad diuina contulisse. Nunc eò foelicior, quodd offusis undique tenebris, dominante latè uitiorum turba, non prudenter tantum optima suscepisse, sed etiam hæc quæ sunt pessima ac prope deplorata, diffugisse uideris: qua enim in ciuitate, qua in gente uideas probitati, industriæ, pudori, rectis artibus relictum esse locum? Non ne ambitio, scelera, fraudes, atque doli uirtutum præmia occupauerunt? quàm immensam uideas hodie feruere in principibus quibusdam auaritiā? nec solum ut sua tenacissimè retineant, ita ut nusquam ullum liberalitatis uestigium appareat, quodd tamen ipsum quoquo modo concedi possit, sed etiam prædonum in modum rapiunt, quæ possunt. Illud facilius toleratu, quodd quæ non possunt, foedo affectu concupiscunt. Quid non erit illis uenale, penès quos officia omnia & magistratus appenso palàm auro distribuuntur. Si Principes tales, quidd de-comitatu sperandum est? aurum enim ubi imperarit, nunquam ægre ferret, si in eius curia argentum iudicabit. At crudelitas quanta? Non ne
offenso

offenso qualibet de caussa Principis animo carceres, cathenæ, tormenta sonant? exilium imminet & publicatio bonorum? Quid de ecclesiarum dicam pastoribus, quos in suis ouibus nihil deceret, nisi pascua & cubilia meditari, at nonnullos uideas, qui præter lac & lanam in ipsis nihil quærunt: sed clericorum quoque reperiuntur plures, qui non mediocriter student numismati, nec mirum, admonet crucis imago, quam deuotè complectuntur: ecclesia capere aurum dicitur, non ut teneat, sed ut eroget, honesta sanctio: quid enim honestius esse potest ea lege, quæ clericum iubeat moderato uictu contentum, reliqua in egentium usum conferre? hanc legem amplectebantur, antiquitus penè omnes, ut non lex illorum hominum esse uideretur, sed temporum, quid nunc? ualet hæc lex penès quosdam, quos ut in magna laude pono, sic improbo eos, qui sacras opes uel custodiunt tenaciter, uel absumunt turpiter, Hæc quæ dicta sunt de Principibus urbium & ecclesiarum pastoribus & reliquis Sacerdotibus, non de omnibus dicta intelligi uolo, sed de quibusdam duntaxat, sicut posui: nec ea de caussa ordines infector, licet cupiam eos, qui delinquit ad monitos emendari, cur autem infector? Stultum est enim ob quorundam delicta totos ordines summa ratione institutos exterminari uelle. Non etiam de me quisquam conqueri potest, si generaliter uitia carpo: nam generalis sermo neminem tangit, nisi eum, qui de se prius fateatur, & talem se esse agnoscat, quod quum fecerit, conuenit ipsi meliora sectari, non alium accusare: Denique (ut dicam cum Poëta quodam) ipse
Hunc seruare modum nostri nouere libelli,
Sed iam istis omiſſis spectemus reliquos. Vos uos appello Virgunculæ, quæ in teneris adhuc annis crinem fingitis & uultum, & oculorum flagrantiam circumfertis, & libertate sermonum congaudetis, quæ hæc cura placendi alienis uiris? Cur non pudicos mores potius persequimini, qui magis placerent incorruptis animis? sed uos eos non geritis incorruptos, nec habitat in uobis uirgineum pectus, ideo pudorem proiecisti, & significatis inuitas & nolentes pati castitatem. Has, quæ incestos amores de tenero meditantur ungui, quisquam credat maritis iura thori intemerata seruare? Erat matrum officium imbuerè filias optimis & castissimis moribus: hoc enim non solum eis profuisset, uerum etiam uiris, quibus nupſissent: nec solum uiris, sed etiam liberis, quoniam fieri uix potest, ut iusta soboles degeneret à uirtute parentum. Nunc per quor gradus ruina deuoluitur, dum illæ teneræ adhuc & sequaces ad omnem fingentis habitum malè instituuntur. Multa tunc peccant, & hinc magis progrediente ætate, ubi matrimonio fuerint copulatæ. Non illis lex dicta est ulla, nec maritus unus, nam eum, qui legitimo nodo copulatus fuerat, uos fide patet matronæ destituitis. Aut enim pretio palam dato superatis, aut clanculum imponitis, aut in eodem hæſitantem luto contemnitis. Vidi non nullas foecundiores calices uiris sedulo propinare, quo illos uino depone-

rent,

De fuga sæculi & relig. studio

rent, & putres oculos ad arbitrium illuderent. Ludus nunc uidetur Virgines constuprare, adulterijs nuptas inquinare, quoniam tam crebrò patrantur, ut hæc quodammodo licere existimentur, peccantium multitudo peccandi licentiam subministrauit. Vtrum detestabilius nudum ambulare, an stupra & adulteria committere? nemo dubitat, quin hoc illo peius, & tamen sponte audet nemo nudus ambulare ignominiam ueritus: supra uerò & adulteria committere audent omnes, nec audent modò, uerùm etiam exoptant. Vnde hæc uarietas? nisi quia consuetudo nuditatem corporum non admittit, recipit autem stupra & adulteria, quæ adeò in quotidiano sunt more, ut penè pudeat ea non admisisse. Et de his quidem, quæ cum fœminis geruntur, minor querela, sed maiora portenta ubi mares mutuos in amplexus inardescunt, quum inter ipsos nullam natura corporum copulam esse uoluisset. O' miseram puberum illorum conditionem, qui masculi nati fœmineæ sortis patiuntur uices, & peragunt nihilominus secundum id etiam, quod nati sunt, quomodo hos appellem nescio, nisi quod ambiguum quiddam in illis cerno. Sunt penès Grammaticos nomina, quæ illi incerti uocant generis, propterea quòd masculinum & fœmininum suscipiant genus, sic isti inter homines in incerto ponendi uidentur genere, utraque sede prostantes, & utrobique uersatiles, dum & auersi maribus succumbere & aduersi fœminis incumbere norunt, nec dum tamen ad extremum uenit libidinis scabies, quum alia supersint impudiciæ exempla, tetriora quidem & turpiora, quàm ut pudenti lingua liceat nuncupare. Sed ne diutius singulis nimis immorantes prolixiorẽ edamus tractatum, tendamus ad reliqua. Volo enim iam scire, quibus nam artibus diuitiæ comparentur. Licitum est iure ciuili contrahentibus se inuicem circumuenire, & quod pluris sit, minoris emere, & quod minoris, pluris uendere: num id tamen officium boni uiri est? minimè, imò ne leges quidem id permittunt, si calliditate quis & dolo alterius deceptus fuerit, quæ præterea hæc est peruersitas non agere, quod probetur, captare tantum, si in aliquo humanæ leges ocij conseruandi causa conniueat. Decebat quidem hominem uel hoc ipso, quòd homo esset, non inferre alteri homini iacturam, nolle quicquam iniuste in se nec in alium admittere: sed (O' nimis acrem, nimisque uiolentam diuitiarum cupiditatem, imò uerius. O' nimis stultam diuitiarum admirationem) Vix reperiẽs ista tempestate, qui contrahentem secum nolit ferri præcipitem, imò qui non in errorem si possit impellat, nihil iam in hominum commertiis bona fide geritur, nec quid æquum bonumque uelit, spectetur; sed quid in præsens utile apparet, quisque augere queat rem familiarem. Non pudet humanæ societatis iura diuinæque simul leges uiolare: id nascitur omne ex immodica (ut dixi) diuitiarum admiratione. nec mirum si quicunque constituerunt sibi solum illum finem, ut plurimum habeant, nihil deinceps referre putant unde habeant. Dicitur mercatorum explorata esse fides, attamen quam

quàm multa isti inculcant mendacia lucelli sui causa. Si quid appenden-
dum est & metiendum, ut in eo ipso fallunt? Hæc fraudem & fallaciarum
germina in tantam eunt latitudinem, ut per singula discurre nequeat.
Quis enim singula hominum & artificia & negocia memorarit, etiam si
mille corda cum totidem linguis habeat? omnibus, qui arripere neque-
unt, antiquissima semper cura fuit fallere: si qui autem rapere possunt, mi-
nus curant callida commenta. Ergo, aut ui, aut fraude res geritur, præter-
quàm à fœnere. Nam hic non fallit: non enim dissimulat improbum
se quæstum petere, sed profitetur, ac ne dissimulans quidem lateret, uim
autem nullo modo adhibet, ut qui de mutuo dando soleat rogari, ac ul-
trò peti, & tamen ob fœnus magnam ad se se trahit pecuniam, sit celeri-
ter multarum ædium & plurium fundorum dominus. Non locatur nunc
quidem argentum mutuuum fœnore palàm, uerùm huiusmodi contra-
ctus, ut nihil, aut non multum differant à fœnore. Emptio, conductio,
depositum celebrantur, atque inter hæc tam præclara naturæ nomina,
dum aliud uerbis agi uidetur, grauiore re ipsa usuræ extorquentur, &
egentium facultates miserorumque absorbentur. Ita lepidè se rem quæ-
rere putant, quasi usurarum nomen ac non factum ipsum sit detestabi-
le: quærunt etiam prouidi uiri, quæ ratione usuræ prohibita: non e-
nim æquum erat illorum iudicio. Si Euangelica lex præcipit, si de-
lapsus in terris Deus illud edidit ueritatis oraculum, gratuitum fieri pe-
cuniæ mutuuum oportere: quid quæris amplius? non tanta te cohibet
auctoritas, rationem magis flagitas. Quid ergo? tu te hominem arbi-
traris, qui ex alterius hominis necessitate tam auidè prædaris? quantò il-
lud æquius, recipe quod dedisti, nihil amplius, & beneficium tuum inco-
lume maneat. Quòd si non tam, quid humanitas suadeat, quàm quid na-
tura postulet considerandum est, isto acquirendi modo non minus natu-
ra uiolatur, quàm humanitas: non enim natura nummus nummum pa-
rit, ac ne ob id quidem inductus, ut pater fieret, sed ut commutaretur pro
rebus, & pretium esset omniū distrahendorum. Multæ prohibendi caus-
sæ, sed haud scio, an maxima illa sit & iustissima, quòd pecuniæ usus sub
fœnore menstruo uel annuo non subleuat, sed atterit potius inopiam. I-
taque ubi ornatum aliquem patrimonio uideris usuris se subiecisse, (licet
enim uidere quotidie plurimos,) insusurrare ei id potes, quod Flaccus in
amatorem detorsit. Ah miser quanta laboras Caribdi, res omnis ab ita se
exulatum, non ad lenonè, (ut Plautinus ille conqueritur adolescentulus,) sed
ad auarū diuitem. An leue auaritiæ crimen ducam, cuius nomine rei
capitalis diuino in foro damnatur? Quodque Apostolus Paulus non in
feriori loco & ordine inter peccata duxit, ut plerique uulgari sensu, sed
altius ille incedens opposuit primo præcepto decalogi, quo alienos habe-
re Deos uetamur, dum auaritiæ idolorum astruit esse seruitutem. nam
quod quisque amat uehementius, plenoque animi affectu, id illi est
Deus, præcipue autem illo sermone uidetur Apostolus notare eos, qui-

Z bus

bus non usus placet nummorum, sed forma, nam qui signata numismata, qui monetata æra altius animo suo inseruit, quasi religio sit illis care-re, quid aliud quàm idola, id est, simulachra & sculptilia uenarari creden-dus est? quemadmodum autem idolatra non audet idolum suum tange-re, nec mulctatum eum capite aut aliquo membro uidere uult, sed eius potius cultum exaggerare conatur: sic nonnulli ubi semel æra signata ar-cis incluserunt tanquam idola auaritiæ suæ, non audent deinceps manus ini-cere, ut utantur; nec imminuere audent ea, sed summa addita assi-duè augere moluntur. Iam uerò quid nephanda pecuniæ cupiditas pa-riat, longum esset memorare, & fortasse superfluum, quis enim uberri-mam mali messem de huius cupiditatis semine surgentem nescit? Quo enim proditones spectant? quo latrocinia? Quo iniusta iudicia? Quid porrò sibi sicca & uenena uolunt? Quid testamentorum suppositiones? Quid falsa testimonia? nempe cogit in hæc mortalia pectora auri sacra fa-mes, ut Poëta dixit, quæ si nulla esset istis temporibus, ne crimina qui-dem essent illa, quæ passim uigent: effecit hæc uesana plus habendi libi-do malis cuncta replens, ut ciuitates nihil ad habitandum solitudine sint meliores. Decreueram de furto tacere, sed commouit me quino capite prodiens monstrum: Primum est furtum simplex, quod est paupertatis cuiusdam & indigentia. Proximus huic decus & titulus summatum pec-culatus, sequitur durius longè & grauius sacrilegium, quartus pastoralis ipse abigeatus, ad extremum plagiatus, ut non sit mediocriter miran-dum, uel dolendum potius uni improbæ rei tot nomina, tot gradus, tot capita addita, atque inuenta fuisse. Faciunt hæc, ut sibi profint, sed num prodesse est se ipsos perdere, & in extrema dimittere supplicia? Quid enim ait Euangelium? Omnis arbor, quæ non facit fructum bonum exci-detur, & in ignem mittetur. Horret animus hanc tractare sententiam, & hunc uersare dicendo locum. Nam si in ignem mittetur sterilitas, quid sibi speret rapacitas? si sic ardebunt, qui desides nullum fructum extule-rint mortalibus, quid recipient, qui proximis damna & pauperiem per fraudes intulerint? Si iudicium sine misericordia reddetur in illos, qui non fecerint misericordiam, quid erit eis, qui fecerint & sæuitiam? Si maledicti uocabuntur extremo iudicij die, qui esurientem non aluerint, qua asperitate notabuntur, qui maleficio ipsi & scelere pascuntur? Si in æternum ire ignem iubentur, qui nudum non uestiuerint, quomodo: qui uestitum nudauerint excipientur? Hæc cogitat nemo uel uanè chartis Euangelij illita credunt. Itaque si ullo unquam sæculo, hoc certè magna prædandi cupiditas humanis pectoribus insedit. Nonnulli illud afferunt pro excusatione se parum quid rapuisse, quasi uerò uoluntas non sit in cri-mine. Nemo modica contentus est præda, sed eam nihilominus interci-pit, ne frustra maiorem expectet: quicunque inuadit æs alterius, liben-tius aurum & argentum diriperet, si possit. Spolians latro uiatorem pau-perem quantò auidius grasseretur in diuitem, si eius sibi fiat copia? Quæ deinceps

deinceps est hæc excusatio accusatione digna? Ita ne uerò diluitur crimen non ex propria innocentia, sed si ostendatur modicitas delicti, & dicatur alios peiora fecisse? Rectè sancti & religiosi uiri admonent à leuibus cauendum esse peccatis: nam si leue etiam peccatum sit, non tamen nullum, leuè quippè comparatione dicitur grauioris, atque haud scio an leue dici possit, quod contra diuina præcepta admissum animam interimit, æternisq; tradit incendijs. Ita enim quod interdicitur, transgredi mors est, si cuti facere, quod iubetur est uita. Visu & gustatu nihil uidetur esse leuius aut inanius. Veruntamen ille primus generis nostri parens in sublimi constitutus Paradisi sede, quia uetita gustauit, in hæc ima detrusus, seque & posteritatem totam magnis incommodis affecit. Vxor uerò Loth, quia respexit unde uetebatur, uersa est in salis statuam. Non igitur tam ponderandum est quantum sit, quod præcipitur, quàm quantus sit, qui præcipit, & ita intelligetur præceptum nullum, quamuis minimum neglectui habendum. Nondum opere completur scelus, & iam animus de cogitatione fit reus: quòd si cogitatio tenetur in crimine, quid ubi uel modicum additur opus, dicendum? quicumque fratri dixerit, fatuè, damnatur de sententia Saluatoris. Si sermo non est innoxius, quomodo securus quispiam impellet manu alterum, & de loco detrudet? quantò minus licebit colaphum incutere? quantò adhuc minus ungue cutem lacerare? & quum hæc, quæ uidentur esse leuia, atrociter puniantur, quid fiet grauioribus, quæ passim admitti à singulis conquerebar? At si priuatis peccatur in domibus, respublica saltem commodè administratur. Age, expedi, qui ciuitatum status, quæ forma rerum publicarum. Nulla Italiæ ciuitas, quæ in factiones non sit secta duas, quarum uera pudet referre nomina: sed perinde res est, ac si alteri albos se dicerent, alteri nigros discretionis notandæ causa. Effet bonorum ciuium illud agere, ut patria opibus firma, copijs locuples, laude gloriosa, uirtute esset honesta. Isti uerò tristissimis contentionibus & grauissimis odijs inter se afflicti sunt, & alteri alteris superesse cupiunt, ut queant arbitrio suo res ducere, nec certamina ista æquitate ulla, sed funeribus exilioque multorum sæpius diiudicantur. Nam qui armis plus pollent, ex aduersarijs alios necant, tanquam nimis tardante lethi necessitate, alios expellunt profugosque esse iubent, tanquam angustus ibi sit ad manendum locus, atque ita summam rerum tenentes libertate populis erepta licentiam factionum omnium fautoribus suis tradunt. Vidi quandoque in ora aliqua factionem alteram eiectam, quid facerem non habebam; ingemui tamen, carebat nobilis urbs magna nobilium parte, carebat populosa ciuitas magna popularium manu, hoc qui è rep. factum dicunt, illud quoque dicant fieri ex usu nauis, ut dextrum sinistrumque remigum latus inter se concertent, utrum ipsorum remis impellere nauigium debeat, quasi commodius agatur alterutris eiectis; & non si in remigando conspirarint. At qui tantum prodesse concordiam, quantum obesse discordiam dictum

Z 2 est

est sapius, & forſitan ab omnibus cognoscitur. Illud tantum dicam breuiter, melius eſſe paruæ ciuitati, quæ concordēs habeat ciuium animos, quàm magnæ, quæ diſcordijs agitetur: illa enim creſcet aſſiduè, & è paruâ fiet magna; hæc imminuetur in dies, & è magna uertetur in paruam. Illa ſufficiet ciuibus, hæc deficiet. Quodam tempore Athenienſes, qui tunc Principes erant terræ Græciæ, ciuilibus ſeditionibus & domeſticis malis afflictabantur. Venit ad eos Leo quidam Bizantiuſ à ciuitate miſſus, Philoſophus (ut aiunt) egregius, cuius tamen corpus nimia adipe mirum in modum exuberauerat. Itaque ubi ſuggeſtum conſcendiſſet legationis exponendæ cauſſa, mirari primùm populus formam hominis tam obeſi, & in tantum dilatati, poſtea tacitè cum gaudio ſpectare, tandem cachinnos tollere, quo animaduerſo, ille, quid eſt inquit Athenienſes? quid ridetis? An quòd in hoc homine tantam corporis copiam uidetis? at qui domi uxorem habeo bis tanto corpulentiorẽ, quàm ego ſim, cõcordes tamen leſtulus unus ambos capit, diſcordes, ne domus quidẽ tota. Parum ne declarauit uir prudens in tempore coniunctis animis quilibet grata & magna, diſunctis ingrata omnia & irrita fore: at tantum hoc diſcordiarum malũ, quod efficit anguſta quæcunq̃ue, etiam quæ latiſſima ſunt, reperire nunc eſt undique in ciuitatibus. Quid hæc bella à Carolo & Franciſco potentiffimis Regibus iandudum ſuſcepta, nec dum confeſta, quam calamitatem, perniciem, miſeriam, tum ſingulis, tum uniuerſis non intulerunt? Credo uidiſſe Deum ſcelera delictaque noſtra, & uelle, ut poſterior quæque hora antecedente ſic calamitoſior. Tunc irarum nubes collectæ ab his, quos modò memorauimus regibus, in hac Italiæ parte diſciſſæ ſunt, & increpuerunt hybernũ. Etenim uaſtati agri, urbes direptæ, ædificia incenſa, fana ſpoliata, uirgines ingenuique pueri uiolati, alij uitam pretio redemerunt, plures gladio ſinierunt; uidit hæc ætas tot mala, ut ludus uideatur fuiſſe ſuperiorum temporum calamitas, & ſi plura quis dixerit, adhuc tamen ſupereſſe ſibi ſentiet orationem, uincit omnem ſermonem procellæ magnitudo. Hac miſeranda bellorum ſortẽ; quæ iam per tot annos uiſceribus inſedit, huius ciſalpinæ Galliæ pulchritudo deformata eſt, fœcunditas exhausta, robur exciſum. Non agam argumētis, ſed ut in iudicijs ſolemus, teſtes citabo. Teſtes igitur ſententiarum mearum Mediolanum, Papiæ, Alexandria, Nouaria, Aſta, Comum, urbes olim florentiſſimæ, nunc penè urbium cadauera: Videmus proſtratas paſſim domos, uacuas ciuium uias, incultos horrere agros, feracium camporum deſertas latitudines, rara ſtabula, pauca pecora temerè oberrantia & agreſtium inopiam. Superfundere ſe quondam Italiæ, tum uariæ, tum feræ gentes ab extremo orbis cardine reuulſæ, quæ per multarum ſibi urbium excidia has ſedes parauere. Si reuiuifcerent tempora illa perpeſſi, ſimilem ferè nunc Italiæ ſquallorem agnoſcerent. Illud uerò egregium, quod bello aliquando ex his oris depulſo & tranſalpes immiſſo, ualida peſtis conſequuta eſt, quæ plures extinxit, nec pepercit his, quibus bel-

lum

lum pepercerat. Superest annonæ penuria; quæ minimè defuit, quæ res sanè indicat tantos uitiorum adoleuisse morbos his in regionibus, ut ad illos obterendos non sufficeret unum hostium genus, sed plures fuerint diuerso in genere immittendi: ruunt omnia, ut ruant peccata, quæ tamen in plurimis, non nisi cum uita extinguuntur, nulla ex poena emendatio, imò quasi ex calamitatibus malitia hominum prouocetur, crescit quotidie, quod puniatur. Denique nihil mitigat malitiam nostram, nondum tot flagellis meliores effici possumus, magis autem nolumus. Non defuerunt, nec defunt quidam uiri sancti, qui populos quotidie admoneant in concionibus, & exhortentur, ut se à sceleribus reuocent, & continentia, iustitia, pietati, reliquisque uirtutis tradant partibus, sed non audiuntur. Illi uerò contempti ingemiscunt: quorum sanè gemitus Deum pulsatur, qui statim prouolans contemptores legatorum suorum corripit acerbius immissis tristibus, nec aliter agitur, quàm ubi pedagogus nihil proficiens admonitionibus in puero uocat nutritium, uel patrem, qui deinceps seuerius puerum aggreditur, & docet illum malo suo, quanti sit pedagogo non parere. Ergo egregiè ipse & sapienter fecisse putaris, quòd ut tantam hanc scabiem & colluionem morum ac temporum uitares, in monasterij claustra declinaris: laudarem etiam, si feruidas arenas, scopulosas rupes, densissima nemora uastæ & spaciøsæ solitudinis persequutus esses, ne hæc, quæ sunt quæque impendent, uidere uel audire cogaris: quanquam altior quædam (ut arbitror) ratio mentem impulit tuam, ut te totum monastica uitæ mancipares. Illud enim institutum est tuum, ut humana seposita ratione Angelicam uitam duceres in terris, idest quantum fieri posset te à corpore sagregares, mentisque acie Deo copulares. Etenim Philosophi ipsi profitentur sapientem, si liceat totam uitam in contemplatione positurum. Nam reliqua, quæ sibi uendicant homines, sunt illis penè cum mutis animantibus & rationis expertibus communia, in quibus si non uirtutes ueræ & solidæ, insunt tamen simulachra quædam uirtutum, ut in Leonibus magnanimitatis, in Elephantis prudentiæ, in apibus ciuili societatis, in turturibus uolucrisque quibusdam temperantiæ. Quis non miretur feras, dum longioris inopiæ metu escas recondunt, & latibula parant in plures exitus disparentia uitandi periculi causa? at ubi inter se ipsas dimicant diffidio hostili, non ne norunt sua tela? norunt dissidentium partes? nec sua tantum callent commoda, uerum etiam hostium aduersa? sciunt occasiones legere & temporum & locorum, per quæ aduersarius facillimè uim patitur. Denique negabimus simile aliquid rationis illis inesse, quæ ipsos homines insequentes uarijs sæpius artibus illudunt. Sed hoc interest, quòd anima tota beluarum proiecta ad corporis sensus affectu quodam cœco ducitur impellente râtummodo natura ad uitam tuendam & propagandam, & ad alia quædam famulantia uitæ officia. At hominis mens per se tota erigitur, quemadmodum & corpus, cuius non eget assiduè instrumento, ut placita, & concupita speculetur, quin potius elu-

atur

Etatur cum sensibus ipsis & naturæ corporis repugnat. Itaque hoc propriū uidetur hominis frui mentis acie, quā diutissimè, quæ sola diuina est in nobis. Sed ad quid, & quomodo hoc proprio nostro bono utemur? Venit enim in mentem Anaxagoræ, qui Solis uidendi caussa natum se dixit. Inflarunt alij resonantius, qui se in hanc uitam uenisse asseriebant, ut totius mundi spectaculum caperent, eiusque & quæ in eo essent, uias, progressus, rationes non ignorarent. Hæcque primorum Philosophorum erat prouincia, ut perspicerent unde quæque orirentur, quo uere recederent, studioseque siderum traiectiones, magnitudines, interualla notabant, & quæ Poëta ait decantata in conuiuio, hæc persequebantur.

Vnde tremor terris, qua ui maria alta tumescant

Obicibus ruptis, rursusque in se ipsa residant.

Quid tantum oceano properent se tingere soles

Hyberni, uel quæ tardis mora noctibus obstet.

Laudandi sunt omnino antiquissimi illi sapientes, qui Philosophandi uiam nullius antea uestigijs impressam cæteris aperuerunt, non tamē perspexisse uidentur totum id, quod perspicendum erat: nam quum constans rerum ordo perennisque earum uicissitudo admonere posset, non hæc fortuito nata, sed arte quadam & sapientia perfecta, alterum illum mundum, qui in mente sedebat artificis, ut meliorem isto & digniorem contemplari potius & magis celebrare debuerunt. Deinde cogitandum erat, si hæc tanta, quantus ille, qui fecit, quoniam nemo artifex est, qui non simulachris suis & operibus sit longè præstantior. His gradibus peruenire ad Deum potuerunt, sine quo manca est omnis cognitio ignorato rerum Auctore & Moderatore. Nam ubi res iam apparet, & uenit in medium, non solum quærendum est quomodo facta sit, sed primum quis fecerit, deinde quare & quorum caussa fecerit. Tum illud est postremum, ut quæretur quomodo: caussa enim, quæ respicit facientem, & cur quod que fiat, præcedit dignitate & tempore eam, quæ circa materiam uersatur & formam. Res perinde se habet, quantum ad istos Philosophos attinet, ac si quispiam in solitudine aliqua inter nemora & arenas sub dio diutius educatus nunquam domum uidisset; ostensa deinde sibi maxima & ornatiissima domo cum ministris plurimis uarij generis & artificij, quales solent esse Principum & Regum domus, existimet, se scientiam domus tenere, propterea quod sciat domum illam è cæmentis, lignis, lapidibus, auro, marmore compactam: & eius domus membra alia esse rotunda, alia quadrata, alia oblonga, alia triangulata. Sed cui non apparet hunc magna ignoratione domus teneri, si hæc duntaxat sciat? nesciat autem, quo consilio constructa sit domus, quis construxerit, uel construendam mandauerit, quis præsideat domui, quis regat familiam, quis illic cuncta disponit, & pro arbitrio quæcunque conuertit, hæc inuestiganda sunt omnia & per noscenda ei, qui scientiam domus profitetur, turpis autem est ignoratio si nescit, & turpior adhuc si adeo nescit, ut quum uideat illic homines & iumenta

iumenta certis fungi ministerijs, certis quoque locis & temporibus pute
 illa casu fieri, & nulli domino seruire. Eiusdem ignorationis rei tenentur
 Philosophi, qui illud modò nouerunt mundum hunc elementis quatuor
 constare, & quid sola, quidque sibi ipsis commixta efficiant, tenuerunt:
 sed præsidem mundi & rectorem Deum non intellexerunt, qui hæc tanta,
 tamque mirifica opera, prouidentia excogitauit, uirtute constituit, ratio-
 ne perfecit, nunc eadem spiritu sustentat, potestate moderatur. Adeò
 autem non intellexerunt, ut uel hæc ab æterno sic stetisse credant, uel na-
 ta fortuito. Mundanum hoc (inquiunt) opus magnum atque præclarum,
 fateor, sed multò tamen maior & præstantior, qui condidit & moderatur,
 quæ sunt igitur partes meæ? hæc, ut opinor, non ut opus ipsum tantum se-
 quar & admirer, sed illud magis, ut artificem ipsum, qui infinitis parti-
 bus dignitate, præstantia, uirtute cuncta antecedit, præsertim quum o-
 pus hoc, quod admirantur cum eximia significatione erga homines be-
 neuolentiæ procrearit. Illud quanti est, quod regit, sustinet, portat, mo-
 deratur? An parua res est regere & moderari? non in domo certè (ut ali-
 quid de his minoribus inducam) ac ne in nauigio quidem. Num si isti
 Philosophi nauigarent, nauem tantum amplecterentur, propterea quòd
 summo esset artificio fabricata, ac non potius humana ingenia unde illa
 ortum fecisset. Quid si secundum cursum tenuissent? remotissimas gen-
 tes adiunxissent? spectaculum multarum magnarumque rerum cœpissent?
 tunc in honore nauem haberent, quod illius ornamentis nauigassent, tan-
 quam nunquam animaduertere potuissent, quis fuisset ille, qui quiete
 sedens medios inter fluctus clauum temperasset, rectam nauem præbuis-
 set: id fecerit Poëta is potius, qui in exilium actus à Cæsare summis at-
 tollit præconijs nauem, qua deuectus ponti subijt ostia: nihil ingenijs ho-
 minum aut operæ tribuit, cui omnia erant tribuenda, sed Poëtis conce-
 di quidlibet potest, quorum unum est opus hominum, aures canendo
 mulcere. Isti autem sapientiæ studium professi turpiter aberrarunt, dum
 mundano affiguntur operi eo dimisso, qui nutu temperat, qui uerbo por-
 tat omnia, cui soli reuerentia omnis & gratia debetur. Quanquam tenui-
 ter nimis mihi nunc agere uidear, qui Deum uniuersa regentem compa-
 rem rectoribus domus uel nauigii: nam paterfamilias, qui in domo re-
 git pars est familiæ, cuius est caput; similiter gubernator nauis pars est
 nauigantium: non enim extra nauem positus moderatur. Isti ergo rebus
 his continentur, quibus præsent, Deus autem nulla pars est mundani
 operis, ita continet omnia, ut non contineatur; ita intra res est totus, ut
 extra eas etiam sit totus: nullo includitur rerum factarum ordine, sed su-
 pra mundum est, & supra omnia, quæ condita sunt: nec uno tantum con-
 trario differt à reliquis rebus, quòd hæc creata, ipse increatus, sed aliis
 plurimis: nam hæc mutabilia, ille immutabilis, hæc finita, ille infini-
 tus, hæc temporalia, ille æternus, hæc composita & multiplicia, ille in-
 compositus & simplex; quomodo igitur dici potest istos Philosophos
 cœpisse

cœpisse rerum notitiam ignorato eo, qui non dico pluris est, quàm reliqua omnia, sed qui solus uerè est omnia: nam cætera quodammodo non sunt, si illi comparentur, à quo effigiem suam & speciem sumpserunt, sicut pictus homo quodammodo non est, si pingenti comparetur, uel ei cuius imaginem præfert. Etenim quum recipiant creata omnia motum, finem, tempus, mixtionem, non potest eorum natura, nisi manca esse, debilis, impura, imperfecta, quæ si aliquibus magna uisa est, id contigit ignorance eius, quod uerè est magnum, uelut argentum uideatur magni inter metalla esse momenti ei, qui ignorat aurum: at prolato auro eiusque splendore & pretio perspecto nonne uile quiddam argentum existimabit? Similiter lunæ & reliquorum fulgor astrorum potuit magnum quid nobis uideri, si candentissimus solis orbis perpetuò latuisset, nunciata ad illum collata splendorem omnem suum, & quicquid antea dignitatis & gratiæ habuerant, amittunt. Sed iam missos Philosophos faciamus, à ueritatis documentis alienos, aduersus quos longius & ualidius institue rem certamen, si starent, ac non iam pridem fugati campo cessissent. Nunc ad te unum mea tendit oratio, qui stemmata familiæ tuæ amplissimæ tantquam magnam ignobilitatem, & florentes diuitias, quibus abundabas, tãquã summã paupertatẽ contempsisti, quò nobilior fieres uirtute, & ditior morũ sanctitate: quæritur enim illud in primis in eo, qui se religioni addixerit, uitæque monasticæ, ut quantũ humana patitur imbecillitas, Deũ mente sequatur, huic totis uiribus hæreat, totis uisceribus diligat. Hoc ut assequatur, cogitandũ quanta Dei sit maiestas, uirtus, præstantia, dignitas, potentia, qua de re nũc aliquid breuiter perstrinxi; nam plura dici potuerunt uberius. Sed nihil æquẽ prodest ad inflammandum diuino amore peccatus, quàm si crebrius & attentius cogitemus, contemplemurque, quanta ille munificentia, largitate, bonitate tractarit humanum genus. Nostri causa supernè cœlum extendit, Solem & Lunam & tot flammantes siderum oculos accendit: terram solidauit, aërem tenuauit: mare diffudit, immotas quatuor anni temporibus leges dedit. Iam uerò animalia omnia siue ea repant, siue gradientur, siue natent, siue uolitent, uisibus subseruiunt nostris: nam uel eorum carnibus uestimur, uel uestimur uelleribus, uel dorso uehimur, uel medemur morbis de ipsorum membris, uel uenatu corpus exercemus. Quid de arboribus dicam? quarum nulla est, quæ uel non cibos suppeditet, uel umbram, uel odorem, uel liquorem, uel materiam ad ignem, aut fabricam. Idem sermo maneat de herbis, quæ opitulantur remedijs contra morbos, & pabulo contra famem. His additi flores colore & odore præcipui ad uoluptatem & ornatum, nec nõ & gemmarum auri & argenti nitor. Hæc quum ad humanos usus paraauerit & protulerit summus ille parens, nonne eum summo generis nostri amore teneri dicemus? At ipsum hominem, cuius causa reliqua condita, quantis muneribus instruxit & ditauit? Mitto præstantiam formæ uniuersi corporis, partium singularum, oris articulatũ & distinctũ sonum, fabulatri-

fabulatricemque linguam. Illud quanti est, quod homini mentem dedit, qua & cogitare, & ratiocinari, & uisa effingere, & species rerum percipere, & reminisci ualeret, in quibus elucet similitudo eius, qui dedit. Cur ad id processit? non enim homo conferre aliquid potest Deo, quo sit ille beator, sed bonitas eius diffuebat. Excitiat quilibet diligenter causam ortus sui, hoc est unde habeat hoc ipsum, quod homo sit, & prodierit animal mente pollens, & uideat, si inuenerit aliam causam præter hanc, quam dixi diuinæ bonitatis, sed non inueniet: nam hæcenus, quicunque aliquid aliud dixerunt, ridicula dicere uisi sunt. Bonus igitur erat Deus, nemo autem bonus eius ipsius boni, quod in ipso est, inuidet alteri, sed commune facere paratus, hoc ille commotus effigiem suam nobis impressit, mentisque ornauit lumine, quo sanè munere non aliud potuit esse præstantius. Quid enim tantum est in terris, quod cum humanis animis conferri queat? quorum ea uis est & potentia, ut præsentia intelligant, præterita meminerint, præuideant futura, quorum in reliqua animantia luce illa diuina orbata cadere nihil potest. Multarum quidem rerum sensus nuntios habemus & ministros, sed cunctorum arbiter animus, qui qualia sint, & quomodo se habeant, quæ sensus accipiunt & renuntiant, diiudicat aded, ut eos sæpius coarguat falsitatis. Nam solem ipsum iudicat infinitis partibus esse ampliorem, quàm uideatur, cuius etiam radiata species & rotunda uideri pulchra non posset, nisi pulchritudinis antea notas quasdam & leges comprehensas animo perceptasque teneremus: sed reliquas quoque eius efficientias, quas annuo ille cursu conficit, cognouimus. Reliqua animantia splendorem uident solis, sentiunt calorem; sed quis præter hominem noscit, quod sol sit? quis perspicit quantam utilitatem & gratiam rebus afferat? hæc luna est; quis uultum huius mutabilem breuissimumque cursum explorauit? Hoc est coelum; quis circuitum eius, ortusque coelestium signorum atque obitus contemplatur? hoc est mare; quis nauigandi rationes in eo inuenit? hæc est terra; quis cultui & sationi aptam animaduertit? hic est ignis, quis eum infinitis usibus applicauit? Hæc omnia nonne à ratione, quæ diuinitus nobis collata fuit, profecta fuere? affinitas igitur & cognatio quodammodo nobis contracta est cum Deo propter rationis præstantiam, quam ille hominibus non inuidit, quod quum ita sit, quomodo tantam Dei bonitatem præterire possumus negligendo, ac non inducimur potius redamare colendo? Quid, quod idem uoluit humanæ mentis claustra libertate, firmare, quam nec ferrum, nec ignis, nec Dæmon ullus, nec Angelus diuellerent, uinci, inflecti, detorqueri hominis uoluntas, nisi à se non potest: sola sui arbitrium tenet & moderationem, nullis necessitatis uinculis astricta, omni nexu soluta. non cogit ad aliquid immensus ille pater, sed hominem in manu reliquit sua, quod rectè factis proposita iure essent præmia, & supplicia peccatis. Hic iterum recurrit affluētia diuinæ bonitatis, quæ nuda hominis delectatur uoluntate, quā idem

AA primò

primo excitauit, deinde ope sua comitatur, nam ubi ad opus arrectos uideret, præstò est, adiuuat, nec deferit impigrè laborante, sed statim auxiliaturus occurrit. Ipse enim Deus cassæ uoluntatis ex alto miseratus affectum impartitur uim hominibus cœlestem, & in alijs quidem distillat, quorum scilicet perexigua in rectis operibus uoluntas, at quorum dilatatam propositum, in his pleno gurgite redundant fluentia uerarum magnarumque uirtutum de cœlo ubertim diffusa, ita ut non ipsis solis sufficiant, sed ad alios quoque nec finitimos modò, sed etiam longinquos perueniant; sed non quemadmodum in re gerenda uoluntas est à nobis, perfectio operis à Deo, sic quum peruenitur ad ferendum præmium, uoluntas dicitur esse nostra, opus alienum, sed suscipimus à Deo pro utroque præmium, id est pro uoluntate bona & opere bono, quia præsidium ille suum nobis non imputat, nec impropert, quod dedit, sed perinde coronat in nobis sua munera, ac si nostra essent merita. Eum igitur, qui tam longè fuit in muneribus & præmijs, hoc est in tribuendo & retribuendo, qua prosequi beneuolentia oportet, si modò ingratitude culpam effugere decreuimus? non enim si referre gratias non possumus (nam non eget nostri ille, sed nos illius) ideo non conuenit non habere, quas possumus, & non aliquas amoris uices rependere. Amat nos Deus, præuenit beneficijs, prouocat ad amandum, tum his, quæ dedit muneribus tum maioribus alijs, quæ daturus est: cur in amore non respondeamus? præsertim, quàm id non illi, sed nobis profuturum sit: nec hoc etiam ille appetat sua causa, sed nostra: ipse enim summum est bonum, nullius egens, cui uno tantum amoris nodo copulari possumus. nam amor ipse præsertim uehemens & flagrans tantæ est potentia, ut animam appetentem, in rem, quæ appetatur, ualidissimè inducat: & ita connectit, ut penè cum amato amans unum atque idem efficiatur. Coniunctio igitur est hominis ad Deum, quæ hîc amoris ui fieri incipit, postmodum in cœlo perficietur, quum iam non in ænigmate illum, sed sicut est, spectabimus: non erit illud bonum Dei, sed hominis sic speculantis, sicut nec bonum est lucis, sed oculi, quòd oculus eam uidet, nec bonum est fontis, si quis de fonte biberit, sed bibentis. Ergo Deus uel hoc, quod iubet se præ omnibus diligere, maximè ostendit, quòd nos diligit, quum dilectione nostra nihil illi, sed nobis omne bonum acquiratur. Est enim ille huiusmodi, ut præcepta sua ad nostram quietem, salutem, gloriam componat, ac ne sua quidem, quæ à nobis proficiscuntur, in suum usum conuertit. Non dubito quin superiora omnia crebrò meditata atque uentilata, qua decet animi pietate, excitent in nobis amoris flammam erga Deum, quæ cognoscimus beneficiorum testimonijs magnam erga nos amoris uim & copiam profudisse: nam quemadmodum ignis igne, sic amore amor concipitur. Quòd si patrem colere, uenerari, diligere denique debet filius, non solum quia genuit, uerum etiam quia multum amat, quantò magis à nobis amandus est Deus, qui nos tam summo amore dilexit, etiam antequam

tequam essemus? Necdum tamen proloquuti sumus, quod primum esse debuit, quemadmodum mortalem hominis naturam suscipere uoluit salutis nostrae causa, qua in re æstus quidam diuini amoris erga homines ostenditur, quod altitudo illa & immensitas ad infima hæc nostra & angusta uenerit, ita ut esse id uellet, quod nos sumus. Ita ne uerò ad humana descendit Deus? Quid in causa? nihil habeo, nisi, quod illud quaesuit, ut homo ascenderet ad diuina. Videbat humanum genus regno cœlesti depulsum, illuc reuocare eos uoluit uerbo, exemplo, morte denique sua. Deus homo factus est, magnum uidetur. An magnum, quia durum, sed existima, quod amabat, & nihil amanti durum, quid deinde? Factus ille homo, sic inter homines uersatus est, ut unus de multis: nam nullo ditior fuit, aut potentior, attamen præcepta salutis aperuit, regnum cœlorum docuit: mysteria legis ueteris impleuit. Postremò ut labem humanæ genti inditam deleret, se in cruciatus sponte dedit. At quos cruciatus? Reuolue quæso animo speciem Domini morientis. Aspice confixas manus utrinque stillantes cruore. Aspice terebratos pedes, quos beati rigat sanguinis unda. Aspice cruentum pectoris latus immiti apertum cuspide: quomodo autem tanta & tam tetra mortis imago inuasit fontem uitæ? horret spinea uallatum caput corona, defluit fessa ceruix, squallent regiae genæ, arent diuina labia, reliqua corporis nudata membra liuent flagellis. Hæc cur suscepta, nisi ardore humanæ salutis? hunc ne obsecro ardorem existimas leuem fuisse? an uerò tantum, ut dicendo nequeat explicari? quis enim pater filio dedit unquam tale, ut culpam eius fluuio sanguinis luere uellet? Hic non iam sua Deus, sed se ipsum pro nobis impendit. Omnia illa supplicia debebantur nobis, quæ in se recepit. Quis non existimet ferrea illorum esse pectora, quos facer ille cruor tanto ardore profusus commouere nequit ad amorem Domini, qui tanta pro se tulerit? Etenim si friges, rimare perforatum Christi latus, & tantæ pietatis pectus ingredi, & quum uideris totis uisceribus & præcordiis ardere humanæ gentis salutem, illius appulsu calesces. Magnum beneficium est, quod creauit nos Deus, maius, quod redemit, non solum quia nascimur sine sensu, conseruamur cum uoluptate, ut inclitus ait Orationis, sed quia nascentibus uitam tribuit, redemptis beatam uitam. Hic nos met ipsos nobis tradidit, illic se ipsum dabit: hic militia est, illic militiæ præmium. Quod si homo debet se totum Deo, quia ipsum fecerit. Quid addet pro eo, quod refecerit. Non enim tam facile refectus, quam factus, fecit illud uerbo Deus, sicut reliqua omnia: sed in reficiendo multa dixit, atque adeo gessit, & eo deuentum, ut dura plurima & acerba perferret. Magni igitur existimandum refectiōis beneficium, tum quia per se summum est, tum quia summa erga hominis Dei charitate profusum: hoc tam præclaro redemptionis munere humanam naturam non modo extulit ille iacentem, uerum etiam amplificauit, cuius esse præmium uoluit & præmium. Non Angelos & Archangelos (inquit Apostolus)

AA 2 stolus)

De fuga sæculi & relig. studio

stolus) sed humanam naturam apprehendit, in quo duo maxima fecit, & quòd ipse in imam humilitatem se detruxit, & hominem ad summam sublimitatem euexit: Est enim ipse caput omnium fidelium, quod sanè caput tantum est, ut supra omnia excelsa longo interuallo collocatum sedeat ad dexteram parentis; & illud omnes Angelicæ turmæ uenerentur. Quamobrem quæ tanta illa erit ignauia si tantum caput negligimus, ac non in ipsum potius totis amoris uiribus feramur? Non debet autem uideri redemptionis beneficium minus, propterea quòd redempti cum uniuersis sumus: nam non ideo minor contingit salus, nec æquum est aliorum saluti inuidere: quanquam (ut egregie ait Chrysostomus in commentarijs ad Galatas), non recusasset Christus eadem perferre, uel si unus tantum esset redimendus, pari namque charitatis iure singulos amplectitur, quo uniuersos, neminem negligit, cuius rei argumentum præbet ouis illa de Euangelio, quæ à nonaginta nouem aberrarat: hanc unicam non contempsit pastor bonus, sed quæsiuit, inuenit, & inuentam gaudens collo imponit, & ad pascua sua reportauit. Et subdit Saluator similitudine hac proposita, nolle patrem cœlestem, ut uel unus de pusillis pereat. Victima quidem pro tota oblata est natura, & sufficiebat omnibus seruandis, sed tamen non est usui omnibus, sed ijs tantum, qui credunt, & uitam puram, integram, piamque prosequuntur. Sed non modò quum blanditur muneribus & allicit pollicitationibus Deus, uerum etiã quum minatur, terret, irascitur, percutit, amor in causa: quoniam cupit esse saluos. Nos illum sæpius offendimus peccatis obuoluti, & quiduis potius, quàm sanctissima eius mandata implentes. Auerfamur uocantem. Ille quemadmodum feruidi amatores solent, qui & si contemnuntur ab his, quos diligunt, permanent tamen, nec ab amore recedunt, conatur deuos ad se retrahere. Itaque benigno frequenter afflatu mentem commouet, ut redeamus, sæpe etiam peccandi occasiones surripit, nec his contentus mittit sanctos uiros ueluti legatos, qui increpat, moneant, minentur, & demum adhortentur, ut præteritorum poenitentiam agamus, & in posterum melius uiuamus. Quòd si hæc despiciamus omnia, ne sic quidem desistit, sed flagella admouet, si forsitan in his respiscamus. Non nunquam, ut amans nimio æstu percitus conqueritur, merita proponens sua, quò duritiem flectat nostram, & ad mutuum amorem impellat, quale illud Micheæ ore prolutum aduersus Hebræum populum. Popule meus quid feci tibi? aut in quo te contristauit? Responde mihi. Num quia eduxi de terra Aegypti, & de domo seruitutis liberaui? & reliqua, quæ sequuntur. Terroris autem uerba sunt plurima: ueluti quum de omni ocio so uerbo reddendam rationem dicit: & ei, qui uel fatuum fratrem appellarit, gehennam proponit. Iustum autem terret, quum acerbissimi scenaratoris more sortem se ab eo cum usuris exacturum minatur; proposita similitudine serui illius, cui talentum fuerat commissum, idque defoderat. Diuites uerò quomodo percutit? dum ait, Facilius esse camelum ingre-

di

di per foramen acus, quàm diuitem in regnum cœlorum: dum illos duos ueluti contrarijs ex partibus introducit, epulonem diuitem, & mendicum Lazarum, & quid in uita & post mortem utrique euenerit, describit. Horribiles sermones, attamen salutis nostræ causâ suscepti ne præcipientes eamus. Nemo potest dicere se non cohortatum, non præmonitum, non bene comminatum fuisse. Subseruit gehenna quodammodo humanæ salutis, dum plerique eius metu temerarias frœnant cupiditates, & ad ipsum salutis auctorem reuertuntur. Multum ualeat in humanis animis cōminatio: multum suppliciorū terror: multum illa admonitio: hîc est fouea seruaua, ne incidas. Quū cuperet Deus saluam fore Niniuem, misit Ionam, qui eius euerfionem prædicaret. Hoc Niuitæ audito mutarunt uestem, fleuerunt & ieiunarunt, conuersi sunt ad Dominum, & non perierunt: tantarum fuit uirium illa prædictio. Ex quo intelligi etiam potest quàm sollicitè cuncta tentet Deus peccantium gratia, nolens eos perire: & de terroris quidem uerbis hæc dicta sint, quæ certè ab amore proficiuntur. nam ne pater quidem filio semper blâditur, sed si uidet ruentem, terret & minatur; & ubi his nil proficit, uirgæ quoque non parcit. Illa sunt uerba solantia, quod quicumque dederit in nomine eius calicem aquæ frigidæ, recipiet mercedem. Credo quod magis recipiet mercedem dans calidam, ubi lignorum sumptus accedit: quantò adhuc amplius quoties quis non de flumine aut puteo, sed de penu aut arca dederit. Illud etiam non parum oblectare potest, quod si dimisserimus peccata fratribus, nostra quoque se nobis dimissurum pollicetur. Et quod si quis fratrem conuerterit ad salutem, utriusque animam saluabit. Hæc omnia ut dicat & faciat Deus, impellit amor, qui non iccirco in partes scinditur, quia ad plures deferatur. Fertur enim totus in singulos, quos genuit: nam mortales parentes, si unicum habent filium, amant acrius tanquam cordis sui oculū; si alter additur, ut duo sint, iam ueluti bipertita cura amant minus singulos: si quatuor erunt, multò etiam minus, sin alicui quinquaginta contingant liberi, ueluti Priamo & Danao, tunc necesse est tenuari amorem tot riuulis diductum: & hæc quidem mortalibus contingunt, qui aliundè capiunt amorem, Deus autem ipse amor est. Si igitur frangi, scindi, diuidi Deus potest, eadem opera & amor eius potest, quod quoniam nephas est dictu, sequitur, ut unumquemque quem diligit, toto amore foueat: at immenso quidem si toto, quoniam & ipse immensus est. Adde quod hunc tantum amorem non negotiorum occupatio interpellat, non requies, non somnus, floret semper, uigetque nec unquam ueluti fatigatus remittitur. O diuine amor, quem semel iure complexi nunquam dimittamus. Tu cuncta de nihilo creasti. Tu foedera pacis mundo seruas. Sine te res ipsæ subsistere nequeunt. Magna hæc, sed illa maiora, quod Deum homini copulare, quod supplicij tradere, quod cruci affigere potuisti. Efluis tu quidem liberè de fonte diuini arbitrij, sed eo impetu & tam copiosè fluxisti, ut torrentis in morem ui quadam rapi uidearis. Hæc & talia quædam

De fuga sæculi & relig. studio

dam mi pater curricula erūt meditationum tuarum, cum his habitantem pernoctantemque curis ciuitas omnis colemus. Vt enim miseros & infœlices dicimus, quos aut libido mulieris, aut ambitio honorum, aut pecuniæ cupiditas incendit: Sic fœlices illi, quorum præcordia Christi amor præacuto iaculo uulnerauit, hi nihil animi sui causa gerunt, sed omnia referunt ad nutum diuinæ uoluntatis, quam quocunque trahat, aut retrahat sequuntur; quod etiam mortalium amicitia pariunt, ut nulla sit distractio, sed summa sit & omnis inter duos plures uel mutuo amantes consilio rum, uoluntatum, studiorumque consensus. Etenim mulier flagrans amore uiri sic mores, opinor, temperaret suos, quemadmodum se illi posse probare confideret, ne si offendat, diuortio excludatur: sic animus hominis erga Deum succensus, omnia persequitur, quæ illum uelle arbitrat, ne si secus fecerit, diuinus ipsum fauor deserat, non diuitias quaerit, quibus affluens ornetur, non opes appetit, ut colatur à multis, non gloriam, ut à cunctis laudetur, non honores, ut præter cæteros conspiciatur, non corporis uoluptates, ut per eas dissolutè lateatur. uident sanctissimi uiri maioris esse uirtutis talia contemnere quàm quaerere, præsertim quum illa & si non semper, at sæpius, quod si non sæpius, at certè plerumque sunt instrumenta uitiorum. Cauentque illud in primis, ne uberior ille & uehementior erga Deum perceptus amor uitietur, si uel paululum in hos riuulos humanorum commodorum diffluere cœperit, quinimo maiorem adhibentes cautionem, quum præsentium rerum illecebris & specie sensus deliniri posse uiderentur. Optimum factu uisum est sæculo relicto, intra monasteriorum septa se se concludere, sicut ipse fecisti: aut eorum uitam uastitati solitudinique terrarum mandare, quod ueterum Monachorum institutum fuit. Sic ne si illa quidem uiderent, facillè eis posse carere intelligebant. Est enim ferè tota oculorum libido. Corpus restabat, quod neque abijcere, neque relinquere ualerent, quippe, quod sit animi ipsius ueluti uas quoddam & receptaculum. Illud ergo, quia insolens esse potest & petulans in carnis motu, ieiunijs, uerberibus, uigilijs, frigore, æstu, & alijs crucis partibus frangunt, ut tam malè habitum affectumque corpusculum, uix audeat insultare, & sibi quicquam molle ac delicatum deposcere: quemadmodum enim Tarquinius priscus, quum capitolium summo Ioui consecrare uellet, multitudine Deorum repletum, concedentibus tum cæteris dijs Ioui, Terminus & Iuuentus de loco migrare nollent, postquam eijcere illinc non potuit, simulachra eorum depreffit & obscurauit, ut uix apparerent: eadem ratio est istorum, qui mentem cōsecrant Deo tanquam templum, ut quos eijcere nequeit motus carnis, turpes & lasciuos, hos comprimant, deijciant, obscurant, & quodammodo extinguant. Si quis (inquit Saluator) uult uenire post me, tollat crucem suam & sequatur me. Suam (inquit) noli dicere quorundam more, Christus mortuus est pro me; nihil mihi superest agendum: possum quomodocunque uiuam, consequi uitam æternam. Fallax spes,

sumptum

spes, nam propria quoque crux unicuique tollenda, qui in partibus uelit esse Christi: quod ipsum quoque Paulus admonet. Quicumque (inquit) Christi sunt, carnem suam crucifixerunt cum uitiis & concupiscentijs suis. Dic dic illud. Christus mei causa mortuus est, & ego pro illo mori debeo. Christus quaecunque mei causa dixit, fecit, pertulit. Ego quoque ut uicem reddam, omnia illius causa dicere, facere, perferre debeo. Duæ cruces: una Christi, communis electorum omnium: altera uniuscuiusque propria: iunge duas has cruces, & quæ crux Christi est, fiet tua: & quæ tua est, fiet Christi. Hæc una sanctorum uirorum est provincia, hic totus mentis eorum cardo uersatur, ut cohibitis peculiaribus, domesticisque affectibus, omne ipsorum uelle & nolle ad diuini ductus regulam referatur. Istud est enim humanos sensus deponere, diuinos induere. Quod si orationibus precibusque infinitis, multoque fletu profuso & ipsius Dei benignitate & miseratione assequantur, quæ tanta calamitas, tanta laborum uis mentem eorum poterit à proposito reuocare? quin cruciari, uri, torqueri Dei causa optabunt, ut in tali certamine fortitudinis, patientiæ, constantiæ palmam referant: sed & quaecunque accident illis incommoda, & aduersa (cui autem non accidunt?) hæc sibi importata diuinitus arbitratur, tanquam tentamenta uirtutis, quod indies proficiant, uel ut uant in sæculo poenas admissorum, quas alia in parte, alio in tempore duriores haurire erat necesse. Hinc læsi iracundia non efferuntur, quin oforibus suis potius opera benignè faciunt, non irritantes peccantium nequitiam, sed piè magis subleuant, & ad poenitentiam fructum, si fieri possit, adducunt. Quod si etiam ingrati erunt hi, in quos beneficia maxima contulerint, adeo non ægreferent, ut etiam noua impendere non desinant, quod si ægrè, diceret his Deus: Si fratres uestros, quos ut simulachra quædam mentis meæ spirantia effinxi, quorum etiam scelerà cruce deleui, ut spem caperent cœlestis hæreditatis potiunda, uos illos re, oopera, consilio iuistis, mercedem laborum & benefactorum uestrorum ab hominibus expetentes: quid uobis leuius? Sin mea causa omnia, nihil illorum fecistis, ego me uobis gratum uel gratissimum potius præbebo. An ego beneficiis, liberalitateque uincor, qui tanta & tam multa antequam rogarer dilargitus sum uobis? plurima etiam & maiora (nisi uos non uultis desides capere) daturus. Qualem in me ingratitudinem, qualem paupertatem denotastis? quoniam me dimisso beneficiorum uestrorum gratiam ab alijs repetitis, ac non à me potius, qui illa impendi per uos uolui, & uniuersa hæc nomina cum usuris de me exigere. Mea certè dona influunt uberrimè in singulos homines, & dum hic in sæculo agunt, & ubi illud reliquerunt. Hæc cœlestis esset parentis oratio, qua pro beneficijs in hominē hominum genus collatis à se cuncta expectari iuberet: Illud enim intelligendum est, secundum Deum diligendum esse proximum, sicut nos met ipsos. Proximi autem appellatio hic homines quoscunque complectitur, propterea quod existimandum est non esse alienos,

lienos,

De fuga sæculi & relig. studio

lienos, sed ueluti necessitudine quadam coniunctos eos, qui nobiscum eiusdem rationis sunt participes, eandem incolunt terram, eisdem terræ uescuntur frugibus, eundem habent dominum, easdem coeperunt leges, & ad eadem bona inuitantur. Non igitur iactandum illud Comici. *Quis tu es? Quis mihi es? proximus sum ego met mihi.* Imò nos esse proximos oportet quibuscunq; eiusdem naturæ cōsortibus Dei causā, qui obliquè quodammodo ex humanis actionibus uidetur referre emolumentum, quum rationali animanti, quo ille præcipuè delectatur, auxiliamur, quod aliquando possumus, & non nocemus, quod semper possumus. Homines ille uehementer amat, quos & condidit, & redemit, & quorum causā omnia hæc molitus est. Itaque uult unumquemque nostrum in dilectione cuiusque secum concurrere. Hinc ille ad Petrum ecclesiæ principem. Si me amas, pasce oues meas. Imitatur eos, qui uehementi tanguntur amoris affectu erga quempiam, dicuntque pro eo ad alium. Si hunc diligis, me ipsum diligis: quicquid huic auxiliij tuleris, mihi tuleris. Ergo id agendum, ut quancunque possumus opem proximo feramus. Illa sunt magna, in quibus præter cæteros addicti Deo locupletes exercentur, uescire pauperem in nuditate, alere in fame, suscipere in peregrinatione, eximere in captiuitate, fugienti latibulum, cæco ducatum, debili subuentionem præstare. Terræ quoque ueluti fidæ parentis gemio inhumatum hominis cadauer condere, non in postremis misericordiæ partibus ducitur, postquam abiit ille, qui sui ipsius curam gerebat. Est autem adeo præstans figura humani corporis, quæ quondā domicilium ingenio præbuit, ut non conueniat expositam feris uolucrisque pabulum præstare. De huiusmodi operibus Paulus Apostolus quum loqueretur, uisibus inquit, sanctorum communicantes: ita enim dictum ab Apostolo, ueluti talibus uiris non deceat, quasi indigentibus stipem præbere, sed cum illis censum quodammodo habere debeamus communem. Deinde addidit, hospitalitatem sectantes, quasi non satis sit hospites ad se uenientes colligere, nisi etiam sollicito animo undique perquirantur, & tanquā fugientes apprehendantur. Tantum ille requirit in fidelibus misericordiæ affectum. Nonnulli in ueteri lege patres, dum hospitalitatem undique sectantur, nullum prætereuntes uiatorem, inciderunt in Angelos humana uelatos specie, & eos inscij hospitio exceperunt: foelici sanè casu, nam perinde contigit ipsis ac piscatoribus solet, qui & si piscium duntaxat gratia rectè iaciunt, nunquam tamen aurum extrahunt & alia prætiosa. Sed hæc, ut dixi magna: Illa maiora, quæ non ex arca, sed ingenio eruuntur, iccirco magis ad plures pertinere possunt, solari affectum, dubitanti fidele consilium dare, errantem in uia peccatorum dirigere ad portum salutis, hortari, monere, impellere, minari, agere denique omnia, & uerbo, & opere, & exemplo, ut homines contemptis terrestribus istis & corruptibilibus bonis, desertaque uitiorum semita, hæreant diuinis iussionibus, & uitæ æternæ desiderio teneantur. Etenim si solemus

solemus non amicum modò diligere, sed etiam omnia, quæ illius sunt, & ea præcipuè, quibus ille magis gaudet, Deus, qui à nobis eximie amandus est, nihil tam in rebus suis ducit & habet, quàm humanos animos ueluti sigilla & simulachra suæ mentis. Quid in his appetit? Illud scilicet, ut uitam exigant in omni innocentia & sanctitate ad se ipsum conuerfi. Hæc sunt uirentia pascua, quæ ille gregi suo proponit. Humanos ergo curare animos, & prouidere ne pereant, ne scabie malæ conscientia premantur, ne uitiorum ut luporum inuadat in illos multitudo, ne Dæmones ouile Ecclesiæ obambulantes nocturnorum instar furum crudeliter corripiant, domumque suam abducant, ueri & sancti Pastoris munus est, & uiri amantis Deum. Maius demum opus, homines collapsos ad æternam conuertere salutem, quàm cœlos erigere ruentes, quia hominum gratia cœli conditi, & cœlorum conditor, ut salutem hominibus daret, in dura multa & grauia se se ipsum demissit: hæc imitatio diuini operis salutem hominibus ministrare, quicumque Deum amant, cupiunt eos quoque, quos ille amat, fieri saluos: huiusque rei gratia, nullam operam, nullum laborem recusant. unicum est præceptum amoris ut diligatur Deus: illud secundum, quod huic est simile, ut diligatur proximus, ex hoc superiore fluit, illius causa & origo in primo est. Denique hæc est summa mandatorum, tenentem caput, reliqua membra conseruare. Magna legum caterua, magna uirtutum, sed hæc omnia una Dei & proximi charitas includit. Si hæc tenetur, omnes leges superfluunt, si deseritur nullæ leges satis esse possunt, hæc si aderit uirtus, nihil deesse de reliquis uirtutibus: sin abfuerit, nihil chorus cæterarum uirtutum poterit prodesse. Hinc Apostolus Paulus, quum contra carnis opera fructum spiritus commendaret, fructus inquit, spiritus charitas est, gaudium, pax, longanimitas, bonitas, fides, mansuetudo, continentia, castitas. Ecce quomodo Architectus ecclesiæ in fructu spiritus posuit charitatem, idque à capite, quoniam ab illo reliqua religata penderent. Idem Apostolus ad eò affectus hominum uoluit sibi ipsis esse inuicem connexos, ut iubeat flere cum flentibus, & gaudere cum gaudentibus. Quamobrem si quem uiderimus uirtutibus ornatum, aut honoribus auctum, congratulandam illi fuerit & hilaritatis signa ostendenda: Sin afflictum calamitate pro sceleribus etiam suis, ingemiscendum, quòd talem promeritus fuerit pœnam subleuandusque alloquio & consilio & dolore animi nostri, omnisque misericordiæ affectus impendendus, & illi quodammodo collaborandum, Hoc enim deposcit charitas, lætari uerò in aliorum pœnis inhumanum est, & odiosum, & prouocans diuinam contra se ultionem. nam Dominus quoque mortalis iusto puniens supplicio seruum, si conseruorum alium quempiam uiderit in risum effusum, indignatur, & in illum iram transfert & uerbera. Et quoniam cœpi perfectam uiuendi formulam inducere, quam quicumque sequetur, nusquam (ut opinor) aberrabit, illud etiam addam, oportere confidere diuinis pollicitationibus, & be-

BB ne

De fuga sæculi & relig. studio

ne animatum sperare de magnis præmijs in illa mundi arce capiendis, atque ita fortiter cum perfecto atque absoluto uirtutum munere iter uitæ arreptum decurrere. Operæpretium est itidem odisse uitia, nam quanto magis ea quis oderit, eò uehementius uirtutis bonum è regione positum adamabit. Nec existimandum est minus peccata displicere Deo, quòd serius ea punit, quia quòd serius, eò durius, propterea quòd neglexerit peccator pœnitere, quanquam non potest dici id fieri serò, quòd bene & ordine fit: ratis enim cuncta aguntur ordinibus in illa æternitate diuini consilij, quòd usque eo uoluit redundare, unde iustitiæ satisfaceret, ut filium suum Unigenitum terris immitteret, qui culpam à prima radice contractam, quam nemo hominum posset eluere, ipse humanam indutus carnem fluuiio sanguinis aboleret. En iterum dico: (non enim tanta res satis pro dignitate dici potest) magna uis charitatis effusa est, quum inita fuit ratio pellendi Dæmonum Tyrannidem, & à laqueo peccati expediendi humanum genus: detinebamur à fœdissimo hoste captiui omnes, peccato ueluti proelio superati. Benedictus Deus, qui nos pristinæ restituit incolumitati, sed quibus consiliis, quo genere telorum pugnatum est? quibus artibus & dolis? Nullo ne stratagemate in capiendo hoste usus Imperator noster? Ille diuinitatem suam sub humana specie occultauit, tum ualidum illum & atrocem crucis fustem bellator accerimus tanquam equum conscendit: spineam coronam ueluti galeam indutus, illi non inermi modo, sed & confixa manu multo cruciatu ferendo auspicio suæ deitatis Dæmones pepulit, imperioque orbis denudauit, sibi mortem hausit, nobis uitæ claustra patefecit; ut difficile sit de impietate eorum, prout causa postulat, dicere, qui ubertatem amoris tantam de stipite crucis manantem percipere nō curant. Hæc & alia plura eodem pertinentia sæpius retractans in hanc cogitationem deducor, ut præclare tecum actum putem, quòd monasterij claustra subieris, idest contemplationi diuinorum te addixeris, idque non tibi, sed Deo ascribe; cuius benigno erga te flatu eò uenisti. Nihil ille maius in terris posuit, quàm mentem suò cultui deuotam & mancipatam: ut enim si muliercula quædā ancillari fungens ministerio, Cæsari connubio iungeretur, efficeretur Augusta non sui merito, sed uiri, & in illo culmine constituta radiis coruscans maritalibus immensum gauderet: sic humana mens per se minus potens sublata ueluti quibusdam pennis diuinarum meditationum, ubi uinculo charitatis summo illi & æterno bono ueluti sponso cuidam iuncta fuerit: tanta in dignitate locatur, quantum nunquam uidimus, tanta perfunditur uoluptate, quantum percipi posse nusquam suspicati sumus. Monachus (crede mihi) præstat antiquitate ordinibus quibuscunq; religionis ergo institutis, exceptis clericis, hunc primum inter Christianos inuenit necessitas fugiendi infidelium sæuitiam, mox utilitas oblectatioque celebrabit, Nihil enim animo puro contemplatione dulcius, contemplationis autem solitudo est comes, uel nutrix potius. Secedebant ueteres illi

Christianæ

Christianæ pietatis ſtudioſi, & in ſyluis atque inter ſpelæa ferarum, (ut inquit ille) uitam agitabant, ut contemplationi liberius uacarent nullo interpellante, arbitantes in turbis & hominum frequentia Deum minus inueniri poſſe, nec temerè à ſolitudine illa in urbes remigrabant, niſi, ut in urbibus eandem facerent ſolitudinem, ideſt multos in idem uitæ traherent inſtitutum, & in eaſdem arenas antraque perducerent. Et hæc quidem in Aegypto Syriaque olim fiebant. Nunc penès nos Monachi in urbibus & agris paſſim occurrunt, quorum qui ſunt probatiſſimi, captant ſilentia nemorum & tectorum, ut ibidem obeant contemplandi munus uacuo animo atque ſoluto, quod ſanè munus, qui negligit inter Monachos Monachus, non eſt in officio, & huic timendum, ne in deteriora prolabatur. Nam qui præſtantiam, dignitatem, uirtutem, bonitatem Dei non contemplatur, is naturam diuinam non intelliget, nec quid ualeat, uelut ue Deus cognoscet, nam ſicut non uideas id, in quod oculorum aciem non direxeris, ſic nec intelligas, niſi in res ipſas, quæ ad intelligendum præſtò ſunt, mentis aciem inſixeris. Quod ſi non intelligit, ne amat quidem: eſt enim principium & fons amandi cognitio, quum incognita impoſſibile ſit appetere. Ergo ſi Deum non amauerit Monachus, quid potius in amore ſequetur? quandoquidem ea uis eſt animi, ut ſine appetitu nequeat ſubſiſtere, mihi uidetur, quòd amabit tunc ſe ipſum obſequioſè & indulgenter, ſenſuumque motus ſequetur: quæ res generat omnem intemperantiam & cupiditatem, ex quibus uitia & peccata naſcuntur. Neceſſe igitur ſi peccata deuitare uelit Deumque pernoſcere, contemplationem, ut colat, ſine qua illa eſſe non poſſunt, eiusque omiſſionem turpem, indecoram, flagitiolaſam eſſe, putet. hoc propoſitum Monachi uel ſolum, uel præcipuum mentis iungere aſpectum ſapientiſſimè cum ſumma illa & ineffabili luce, quod ſanè ſuauiſſimum eſt pabulum, ſed nec ullam inuenies rationem melioris uitæ: quid enim præſtabilius, quàm humana delinquentem ſectari diuina? Quid magis lucroſum, quàm reiectis terrenis inhærere cœleſtibus? ſi ſpectaculum mundi, & rerum, quæ in eo uoluuntur, ita detinuit Philoſophos, ut pro eo abijcerèt quaſcunque corporis uoluptates, & ſimul externa omnia commoda deſererent, hac una capti ſcientiæ dulcedine: quid faciendum his, qui Deum omnis ſœlicitatis, beatitudinis, bonitatis auctorem ſequuntur? Quicumque ergo te à tali contemplandi munere auocant, quod multos facere uideo propinquos tuos, ij te à uero perpetuoque bono auocant, ad quod te contemplatio deducit. Si negant, ſimiliter faciunt, ac ſi quem fodere & iacere fundamenta prohibeant; & dicant ſe illi tecti poteſtatem non abſtuliffe. Proponunt nobilitatem & diuitias, quibus florebas, quaſi tu ſolus diues & nobilis, ſæculi perfuga ad religionis caſtra deuolaris: aut turpe ſit tali uiro cingulum Chriſti ſuſcepiffe, eaque res maculam afferat generi tuo; aut quaſi parum compertum eſſet hæc ornamenta diuitiarum & nobilitatis, quæ gloriola in uulguſ redolent, non fuiſſe multis cauſ-

De fuga sæculi & relig. studio

fas ad interitum potiusquàm ad salutem. At enim concedere dicunt, ut Christo seruias in sæculo manens, hæc ratio, quæ pro suis utuntur partibus, aduersus ipsos conuertitur: nam quum de re conueniat, idest de seruitute Christi, cui te additum esse, paciuntur: quæ tamen seruitus quolibet regno est potior, minus honestè possunt de conditione seruiendi recusare, præsertim quum in sæculo positus uix id posses. Multa enim hæc impediunt, multa reuocant à sancto proposito: plura uidere contingit, uel audire, quæ laceffunt sensus ad spem improbæ cupiditatis. Nunc solitarius effectus & silentio humana transmittens, nihil uidens, audiens uel eorum, quæ in sæculo geruntur, frueris animi placidissima pace, quæ te ad maiestatis Dominum crucifixum deducere potest, cuius imaginem induis quodammodo, ubi te sæculo nudum mortuumque præbes. Omnis tibi prærepta peccandi materia in his, quæ ad sensus spectant: non fœminam uides, non pecuniam tractas, non litigas, nō conuitia audis, non emis, non uendis, nō locas, non conducis, non permutas, non præcario rogas, non rogaris, demū nemo tibi quicquā exhibet negocij, nec tu alteri faceffis, quod nisi turpium cogitationum molestia confisteris Dæmonum astu excitata, nulla pugna maneret, quæ manet tamen, ut de inimicissimo, & infestissimo hostium genere iustissimū agas in patria triumphum. Non enim solum aduersus carnem & sanguinem (inquit Apostolus) sed aduersus spirituales nequitias nobis est colluctatio. & manifestè dictum est à Petro, quod aduersarius uester Diabolus circuit tanquam Leo rugiens quærens quem deuoret. Et à Satana tentatus est ipse Dominus: & idem Dominus ad discipulos suos. Expetiuit uos Satanas hac nocte cribare tanquam triticum. Legimus etiam in Euangelio, Diabolum misisse in cor Iudæ, ut traderet Dominum. Et in actibus Apostolorum dixisse Petrum Ananiæ. Quare tentauit Satanas cor tuum mentiri te Spiritui sancto. instant, urgentque assidue suadelis, ut ad aliquid pertrahant illicitum, sed impressione, ui, impetu, claustra uoluntatis humanæ perfringere nequeunt. Formidolosus ne hic hostis, an contemnendus potius? cuius omnis uis est in suadendo, qui uincere non potest, nisi uolentem. Illi tamen plus assequuntur si suaferint, quàm si ui cogerent, idque possent, quoniam ui cogens corpus, suadens etiam animum capit. Vigilandum igitur & acriter resistendum prauis eorum suggestionibus & machinamentis, nam oberrant assidue & omnes tentant aditus, ut corrumpant, & è bonis seruis malos, & è malis faciant deteriores. Quod si salutem assequi non possumus, nisi per summam custodiam & pugam, quomodo qui quæstuosos uacant negociationibus, quomodo qui delitijs indulgent, non oportet magis ac magis periclitari? Non inficias tamen ierim quin ubi quispiam maioribus effulget uirtutibus, illum Diabolus acrius urgeat & impugnet: non enim alia ratione conuertit se contra Adā in Paradiso constitutum, nisi quod illum multa dignitate uidit conspicium. Nec tamen in hoc certamine, quod aduersus tantam bestiam suscipitur

scipitur, deest nobis Dei præsidium; imò ipse totum bellum conficit, contentus nos ea in pugna studij aliquid & laboris attulisse, ut habeat unde præmia tradat amplissima: perinde ac si nostra opera totum bellum fuisset confectum. Non secus hîc fit, quàm si Rex aliquis cupiens filium ad triumphum perducere, ipse totius belli curam suscipiat, & omnia moderetur. Interim uelit filium cuncto exercitu spectante procurrare in hostem, & iacula quædam intorquere, ut hinc uictoriam illius faciat, iubeatque triumphare. Similiter nos uult Deus repugnare Diabolo, prompto ac sollicito animo pro honore suo nostraque salute, ipse deinceps illum deiecturus & fugaturus, & nos postremò ueluti strenuos milites ad præmia uocaturus. Præmia autem non qualia in ueteri lege, terra, lacte & melle fluens, longæ uæ senectus, numerosa soboles, frumenti uinique copia, pecudum armentorumque fecunditas, nihil huiusmodi, sed adoptio in filios, cum Christo fraternitas, hæreditatisque cœlestis societas, demum beatifica illa diuini conspectus sublimitas. Quæ sanè tanta sunt præmia, ut pro illis uel unico die fruendis rectè centum millium annorum labores sustineretur. Facilior autem foret uictoria, si hic hostis apertè ac non sæpius ex insidijs pugnaret: nam uel obtentu uirtutis ad impietatem occultè trahit, uel sua det contemptum minorum delictorum, ut ab eis paulatim serpens ad grauiora deducat. Ecce risus immodicè effusus leue aut nullum forsitan delictum esse uideatur, sed ab immoderato risu fit gradus ad scurrilitatem, à scurrilitate ad detractionem, à detractione ad conuiuium, à conuiuium ad grauiora denique crimina; quæ humanis etiam legibus atrocius puniuntur. Plerisque castitatis mundicies placuit, nec malè quod placuit, sed quod nimium placuit, adeò, ut ausi etiam fuerint in cæteris matrimonia damnare: sicut etiam nonnulli alij dum nimis abstinentiam ad esu carniū probarent, illum omnibus interdictum crediderunt. Dolere de peccatis necesse est, si uolumus salutem assequi; sed non tantus debet esse dolor, ut ad impatientiam & desperationem uenire impellat, quod multi perpeffi sunt, hoc aditu idolatria quoque priscis inducta temporibus: nam dum uiri quidam magni & potètes multitudini gratiosi uiui & mortui plusquam oporteret, honorarentur: factum est deinceps, ut simulachra eorum fingerentur, & ipsi in Deorum ordine collocarentur. Hæc omnia antiqui serpentis uersutia contigerunt, quam tu, ut opinor, uirabis. Ipse pauca hæc ex multis exempli causa memorauimus, ut tu deinceps toto genere perspecto de his, quæ ad te pertinent, particulatim cogitares. Scio de bello aduersus Dæmones, deque eorum fraudibus plurimam haberi à uestris orationem. Persuadeo mihi te in hoc tuo Tyrocinio nondum prauas animi cupiditates fregisse atque extinxisse: fieri non potest, quin uehementius impugneris recordatione, præsertim prioris uitæ & antiquarum deliciarum. Sed resistendum est acriter, & quemadmodum hi, qui Hierosolymæ muros sub Dario instaurabant, una manu opus faciebant, altera telum gestabant, quo irruentes hostes propulsarent, Sic & tibi faciendum

De fuga sæculi & relig. studio

dum utrunque, ut aduersus uitiosas cupiditates pugnes, & in diuinis exercearis. Non enim omnia iniusta & infesta suggerit Diabolus, sed multa illorum à nobis profiscuntur: hoc ipse (ut opinor) sentis: non tot infrugiferas & nocentes educat herbas tellus, quot & quantas concipit humana mens noxias & pestíferas cogitationes: quæ in ipso semine elidendæ sunt, ne quid deinceps deterius contingat. Verum ut redeam ad id, quod in hoc meo sermone fuit propositum, postquam ostensum fuit Christo omnino esse seruiendum, rectè id uitæ genus à te delectum dico, quod præstantissimè id efficere ac præstare potest. Nam, quum quilibet hoc unum proponere sibi debeat, ueluti ultimum actionum suarum finem, ut Deum toto pectore, totisque uiribus diligat, & eadem dilectione serueat in proximum propter Deum: tu ut istud melius consequerere, non solum tibi præcepta legis, uerum etiam consilia euangelica seruanda putasti. Præcepta sunt, sine quibus non contingit illa dilectio: consilia, cum quibus tutius & perfectius contingit. Quantò enim magis cæterarum rerum imminuitur cupiditas, tantò feruentius fertur affectus in Deum, & in illum quem is summè diligit proximum. Nec aliò sanè spectant assiduæ lectiones, crebræ uigiliæ, continuata ieiunia, nuditas corporis, durum cubile, extrema paupertas, nisi ut contemptis terrestribus bonis sola amentur cælestia: castitas non præcipitur, sed suadetur: appete coniugium, minus amaueris Deum, melius igitur abijcere, quoniam (ut inquit Apostolus) Qui sine uxore est, sollicitus est, quæ sunt Dei, quomodo placeat Deo: qui autem cum uxore est, sollicitus est, quæ sunt mundi, quomodo placeat uxori. Idem maneat de honoribus, diuitijs, delitijsque omnibus sermo, ut qui hæc persequantur, necesse sit eis minus amare diuina. Si cui proposita esset una corporis ualetudo secunda, huic profectò necessariò sumendus cibus: nam sine eo non contingeret ea, quam exoptat ualetudo. Quid si idem apperat frui pleniori ualetudine, & in ea cogitet firmitus permanere? huic scilicet obseruanda sunt plurima, quæ illi medicinæ ars suggeret. nam nò quemlibet cibum sumet, sed non nisi eum, qui iussus fuerit, & certas exercitationes corporis præstitutis temporibus sumscipiet, & alia aget, quæ periti artis iniunxerint. Hæc ad te refero, qui in diligendo uitæ genere, non quæsisisti necessaria, sed quæ essent meliora. Nam si satis fuisset tibi amare qualitercunque Deum, poteras domi manens, tuisque perfruens opibus, præcepta legis seruare, quæ in medium proposita sunt omnibus. Sin autem cogitasti firmitus & feruidius, atque adeò foelicius amare, tibi non solum seruanda sunt, quæ imperantur necessariò quibuslibet, sed ea etiam, quæ paucis suaderi possunt assumenda, ut uoti compos reddaris. Relinquenda domus, destituendi affines, sermo familiarium deferendus, diuitiæ repudiandæ, honores ablegandi, nihil de connubio meditandum. Si uis perfectus esse (inquit Saluator ad eum, qui se cuncta legis mandata impleisse iactauerat) Vade & uende, quæ habes omnia. Cur, ut habeam mihi pretium? Non: sed

da

da pauperibus. Durum id quidem; sed nondum hoc satis: subiicit enim: ueni, & sequere me: qua uia? qua ego scilicet gradior, patientiæ, pauperratis, castitatis, humilitatis. Denique, ut hunc concludam locum. Si id, quod alto animo exaggeratoque fecisti contemptis amplissimis opibus & reiectis, uiderem à te leuitate iuuenili & ardore inconsulto susceptum, hortarer tamen, ut ad quam uiuendi normam semel animum applicuisses tuum; in ea permaneres, fortiterque cuncta ferres, etiam si uiderentur atrocia nimis & acerba: quoniam tanta in re tuenda tibi esset dignitas, & constantiæ seruiendum. Nunc autem quum nihil feceris, nisi maturo iudicio, re bene explorata, cedat ueritati opinio, & que rulas amicorum molestias iusta animi tui iracundia repellat. Ego enim, & si dum nobiscum esses, redderem ex consuetudine tua lætior, & consilio prudentior, & opera fructuosior, denique magnam spem præsidiumque rerum mearum in te uno florentissimo & nobilissimo collocassem, quem sciebam amicitiae leges, tum exactè nosse, tum diligenter seruare, tamen sic cœlestem hereditatem capiam, sic Christo tecum frui liceat, ut tibi faueo meliora sequuto, post habita ratione commodi mei, ita ut iam uitæ tuæ singulariter ducendæ spe cogitationeque delecter. Quæ enim illa aderit uirtutum cæterua, dum Christum conaris imitari, uestigioque eius affigeris? Tu noctis mediæ curriculo, tu in lucis crepusculo, tu ad primam diei horam, ad tertiam, ad sextam, ad nonam, tu uespere, tu in ipso noctis uestigio diuinas laudes cœlestis pica decantabis. Te cum Deo magis, quàm cum hominibus colloquentem rarus sermo, crebra oratio delectabit. Hoc sanctissimo orationis thure aram uirtutum, quam in tuo pectore diuino numini strues, quotidie adolebis. Te longiori nocturni spacio lectio magis quàm lectus detinebit. Tu nihil iniuria, misericordia multum mouebere. Tu obedientiæ iugo colla submittens alterius uoluntati potius obtemperabis, quàm sequeris tuam. Tu pauperiem colens, nihil habebis tuum, nec habere uoles, sola locuples uirtute. Tu carnis petulantiam, tu libidinum stimulos ieiunijs franges, uerberè coercebis. Mirum fuerit uidere Christum in pectore tuo cubantem, nunc quietè, nunc differentem sublimia cœlorum mysteria. Mirum perspicere animum tuum nauis instar inferius clausum ad terrena, apertum autem à summo, & parentem ad cœlestia. Quid? ubi oppressis corporis sensibus contemplari cœperis? quomodo tunc deorsum non feres, sed sublimia cuncta pura mente lustrabis? quomodo Dei assistens conspectibus, beatificeque illius lucis radijs percussus, non cœlestium illorum gaudiorum gustum aliquem captabis? At ne hîc quidem omni uoluptate aurium oculorum uel carebis, nam quod suburbana inter prædia cellulas uestras teneris, mirè nos oblectabunt lapsus auium inter frondes, & cantus, tum purissimi fontis speculum, & immurmurans riuus, & lasciuiissimæ arborum comæ, prætaque insuper uirentia depictis ornata floribus, ex quibus non dubito, quin uos maximè afficiant purpurei, qui

De fuga sæculi & relig. studio

qui colore referunt Christi uulnera: possunt itidem ad purum candidi sanctissimæ Dei genitricis Mariæ admonere, quæ uita talis fuit: nam etiam dum illic fueris, retinendus animus erit in custodia bonarum cogitationum, & ut inter herbas uaganti in singulis penè passibus uiperini Damonum allapsus timendi: Memor quid & quantum inter supernas Paradisi delicias callidissimus serpens in primos generis nostri parentes potuerit. Sed & cœli ipsius siue diurnus, siue nocturnus conspectus memoriam diuinæ magnificentiæ reuocare potest, cuius illa ipsa est sedes, tot flagrantium siderum radiata luminibus. Denique quicquid occurrerit sensibus id cœlestium mysteriorum cogitationes commouebit. Omninoque illud tenebris Crateris Philosophi, qui intra mentis penetralia nunquam cum homine improbo colloquendum esse dicebat. Non enim amat nos Christus semibonos, uel consortem alium perpeti potest: magno nos emit, ut solus haberet. Itaque ubi in mentis nostræ regno uidet qualemcunque locum Diabolo traditum, indignabundus abscedit, & totam ditionem ad uersario relinquit. Hanc firmissimam habeo causam, cur multi labantur Monachorum, quia per multa & uaria uagantur animo: nam ad opes, ad potentiam, ad pecuniam, uel ad alia quædam animum inflectunt: unum uerò præcipuum, ad quod cætera dirigant, non habent. Omnium autem actionum & meditationum finis tibi erit propositus, una res, de qua tam multa diximus, charitas scilicet Dei: in hanc cætera omnia respicient tua in hoc ueluti immobile signum omnes mentis diriges sagittas. Multa uaria & diuersa agit & tentat medicus, nec ad multa tamen, sed ad unum respicit, bonam scilicet ualeitudinem, & firmum corporis habitum. Quid Ductor exercitus, quanta parat, miscet, aggreditur, molitur, unum & ille spectans, hostium scilicet uictoriam: sic & tua multa, quæ ages, unum erit, quia uno fine clauduntur: qui autem multa agentes ab uno recedunt, inutile exitum forsitan & pestiferum sortientur. Narrat Dionysius Areopagita in libro ecclesiasticæ hierarchiæ ritum, quem primum Christianorum ecclesia seruabat initiandis Monachis. Inter cætera solenne fuisse scribit, ut sacerdos initiandum Monasticæ uitæ interrogaret, num uellet uitæ diuisibili renuntiare. Hoc ego dum legerem, sollicitus aliquandiu fui, quam uitam uocaret ille diuisibilem: sed tandem occurrir diuisibilem uocari uitam, quæ per uaria funderet hominem negocia: huc illuc raperet, qualem obeunt sæculo utentes. Sed non solum diuisibili uitæ utrum renuntiaret interrogabatur, sed diuisibilibus quoque cogitatibus & affectibus, id est, qui per diuersa illum distraherent: Sic etiam tum cognoscebatur Monacho per uaria non esse uagandum, ut in professione Monasticæ uitæ hoc ipsum polliceretur, quod etiam in Euangelio indicauit Saluator dum Mariam intentam contemplationi diuini uerbi plus laudat, quàm Martham satagentem circa frequens ministerium. Porro, inquit, unum est necessarium: Sed nec diuisum hominem amat Apostolus, dum deterres à connubio in prima ad Corinthios inquit, ut proxime

uita diuisibilis

isp

mè retuli. Qui sine uxore est, sollicitus est, quæ sunt Domini, quomodo placeat Deo. Qui cum uxore est, quæ sunt mundi, quomodo placeat uxori, & diuisus est. Vides qualiter homini coniugato exprobrat quodammodo diuisionem Apostolus quasi amorem, quem unicè debet Deo, cum uxore partiatur. Quæ ego omnia idcirco differui, & longiore sermone protuli, quod allatum mihi erat, quàm tibi gratum essem facturus, si scripsissem ad te aliquid confirmandi animi tui causa, in susceptaque sententia roborandi. Feci quod potui, lapidemque omnem ad eam rem tenendam, ut dicitur, admoui: nam initio sermonis memoranda temporum & morum iniquitate, eò tetendi, ut docerem te monasteriorum inclusum latibulis mala plurima & præsentia & impendentia declinasse. Deinde altera parte ostendere uolui, etiam si bona essent, quæ reliquisses, te tamen melioribus adhæsisse: siue enim sæculi fluctus impotens ferre animus in cœnobio, ueluti in portu quietis anchoram iecit, siue ad opes collatas respiciens, quæ magnificum te facerent possessæ: magnificentius putasti illi decedere religionis studio, utraque ratio proposito tuo confirmando ac retinendo aptissima. Neque tamen ego dum Theologica illa tractarem, uolui ego riuulus tantulæ aquæ fluentis meis pelagus uestrum inundare, quando, quæ ipse properanter, & ueluti præteriens aspexi, tu quotidie à peritissimis essem auditurus, & è libris sumpturus, & usu periclitaturus. Sed nescio quomodo traxit me rerum ordo, serpereque coepit longius sermo meus, quàm putaram: & quum tam ualde delectarer ipse in scribendo, putauit etiam tibi non iniucunda fore ad legendum. Si profecimus aliquid lætabor, tollensque ad cœlum manus gratias agam immensas cœli Domino, qui tantam uim infuderit scriptioni isti, ut potuerit nutantem labentemque mentem tuam in re minime pusilla confirmare. Sin actum est nihil, quoniam immorari omnino & immoti proposito decreueras melioribus certioribusque argumentis ductus: Laudabo hanc præclaram & egregiam animi tui inductionem, nec minus gaudebo, quando in amicissimo uiro satis neruorum, satis præsidij in se ipso ad religionis susceptæ cultum tuendum cognouerim.



MARCI ANTONII

NATTAE ASTENSIS,

DE VITA PERFECTA

ORATIO.



ICTVRVS de Monachis, illud primū egregiæ co-
rum laudi ascribo, quod non sermonibus sed uita
ostendunt omnibus, qui æternam foelicitatem adi-
pisci student quid agendum, quodque iter ingre-
diendum sit: nam quum reiiciant, quantum fieri po-
test externa commoda, & corpus uariè affligant,
quò expeditius ad uirtutis usum habilisq̃ue red-
datur, illud ueluti in commune proponunt, ma-
gnas subeundas molestias, magnos exanclandos labores, ut ad magna
foeliciaq̃ue præmia perueniatur. Non enim hos uiros Deo plenos id factu
ros credibile est, nisi facere expediret. Ausi sunt è gentibus quidam hanc
sententiam ueluti præclarum quiddam circumferre: optimum homini esse
non nasci, proximū, quam citissimè aboleri. Videbant humanam uitam
omnibus fortunæ telis esse obiectam: uidebant timorum stimulis, dolo-
rum cruciatibus, laborum molestijs, libidinum facibus agitari; hinc hu-
mani generis primordia desebant, hinc se materno utero tanquam inscri-
bi noluerant, & abradi quamprimū cupiebant: quæ sententia, quàm in-
ualida sit uel illud indicat, quod sibi parum constat: nam si hi, qui non
nascuntur, non sunt, & optimum est illis non esse natos, id quod non est,
dicunt esse; & (quod maius est) tradunt ei optimum esse. possunt ne sibi
ipsis magis repugnantia proferre? non enim intelligi datur, quomodo
non dico summum, sed uel paruum bonum insit ei, qui non sit: nam si in-
est, illum esse oportet tanquam excipientem, quod infunditur. Deinde
mollis hæc & delicata sententia nihil neruorum & roboris tribuit animis
ad tolerantiam malorum, per quam uirtus humani pectoris magis explen
descit. Ad hæc qui se homines natos conqueruntur, illud molestè ferunt
se simulachra esse diuinæ mentis, se ingenio, rationeq̃ue pollere, sibi col-
loquij uim, sibi urbium societatem, sibi uariarum artium inditam disci-
plinam, sibi denique traditam uiam æternæ beatitudinis comparandæ.
At ea aspera est uia, ea scilicet gratia, ut uirtus animi prodeat, exerceatur,
nam

nam uirtus nullis tentata periculis, nullis examinata difficultatibus pondus non habet: sed inane quiddam & cassum esse, dicitur. Ergo aduersus istos humani generis extinctores clamant Monachi non uoce, sed opere, homini optimum nasci, non si in corporeis uoluptatibus & in omni abundantia fortunæ molliter & eneruatè uixerit, nulla interpellante asperitate: sed si ab adolescentia humilitatis iugum sponte exceperit, & pietatis studio multa tulerit acerba: hoc itinere perueniri ad cœlestia præmia, quæ nulli constituta sunt, nisi acri bellatori: cunctis enim mortalibus colluctandum cum fortuitis casibus, cum uitiorum illecebris, cum antiqui serpentis insidijs: quam sanè colluctationem nemo ritè diffugiat, nisi si fugiendum est uincere, & uictorem conspici cum fulgida corona. Hæc præclarissima Monachorum uox, quam tacentes profundunt ad eos, qui non uerba, sed rem inspicere solent, excitare potest quoslibet. (de his etiam loquor, qui à Monastica ratione procul absunt,) ut molesta difficiliaque multa, quæ humana circumfert uita, non absque diuino nomine, non modò æquo animo excipiant, uerùm etiam parato, quasi per hæc sit iter ad præmia, quæ fideli cuilibet in cœlesti regno pro paruo finitoque opere, infinita immensaque persoluantur. Nos etenim, qui sæculo utimur, & si grauia sæpe toleramus, non grauiora tamen, plerumque quàm Monachi, qui ieiuniorum, uigiliarum, orationum, paupertatis, afflictionis, luctus principem locum tenent: idè etiam finita uia splendidam admodum & magnificam, multisque claram gemmis referent coronam. Volo autem intelligi me sermonem habere de his, qui uerè sunt Monachi: nam multos hodie nouimus, qui amictu, & alio externo cultu, & magna cæremoniarum frequentia Monachos uideri se student, quum tamen eorum more à uetere illa Monachali dignitate atque austeritate absint longissimè: horum cupiditate, auaritia, arrogantia, libidine magna legitimo illi Monachorum nomini calumnia imposita est. Veruntamen scio, quòd si quis uerum Monachum proprijs obdlexerit coloribus, is simulachrum perfectissimæ uitæ ostenderit, quod bene pernoscere pertinet ad eos etiam, qui nec propositum Monachi, nec institutum sequuntur: nam quum cognouerint, aperteque perspexerint, quis sit ille perfectissimus humanæ uitæ status, intelligent simul, quem gradum ipsi teneant: ne forsitan per incitiam ima pro medijs, uel media pro summis habeant, Accedat & illud, quod optimum quoque unusquisque ad imitandum sibi debet proponere, quia fieri potest imitatione optimi, ut indies proficiat, & ad summum euadat: quòd si uiribus destituatur, studiū tamen illud tendendi ad optima laudabile est. at is, qui deteriora ad imitandum sibi sumpsit, creditur ascendere noluisse, & potuisse forsitan altiora, si ea tentasset. Nihil enim prohibet in sæculo agentem, si non in cunctis, at aliqua saltem ex parte, id quod in Monachorum eminet uita, æmulari. Igitur facturūs operæpretium mihi uideor, si accuratè orationem descripsero, quam olim Monachum Bonifacium talibus de rebus

CC 2 habuisse

monib

De uita perfecta

habuisse ferunt, hominem non sanctitate modò uitæ insignem, Deoque plenum, sed qui etiam scientiarum omnium artibus nobilitatus non minus humana studia, quàm diuina teneret. Is exoratus semel à Monachis, qui frequentes de industria conuenerant, ut formam cunctis uitæ melioris proponeret, quam formam inquit? cuius uitæ? nam si telam alterius cuiuspiam uitæ texere uoluero, uelut principis, uel patrisfamilias, uel agricolæ, satis ineptè, si placitura alijs uobis exposuero; sin illius, quæ ad nos spectat, satis superflue, post multorum literas, quibus Monachi munia descripta sunt. Neque ego sanè uelim, aut debeo præcipere alijs, quæ & si scientia fortasse, moribus nondum apprehendi exemplo prius loquendum est cætui, deinde ubi res tulerit, sermonibus. Tum qui aderant seniores, at qui (inquiunt) res nunc tulerit. Vides ipse multis locis collapsam Monachorum disciplinam, quæ forsitan opera nunc tua restitui poterit. Trahuntur innumeri ueluti torrente quodam malæ consuetudinis ad pecuniam, & alia professioni huic non satis apta: alij dubitant, quid expediat, nonnulli quid liceat, & quorsum sit progrediendū. Tu uerò legitimas illas Monachi partes nos edocueris, ut qui in his diutius fueris uersatus, & nihil ferè aliud tota uita commentatus. Neque uerò uir omnium prudentissimè nos, quos charos habes, ad libros relegaueris, nulla ea causâ est, ut uelis aures nostras, & hæc fratrum pectora nomini tuo deuotorum, uocis tuæ fructu fraudare. Primum pauci ad libros adeunt, non omnes literarum studia tractare norunt. Deinde quàm multa confusa in quibusdam & obscura, & repugnantia interdum, ut sæpe melius fuerit talia scripta non tetigisse. Tum etiam illud, quod non tam commouent paginæ spiritu, & actione carentes, quàm uox & uultus solet ardentis in oratione & fulminantis uiri. Adice huc, quod si quid à magistro paulò obscurius fuerit prolatum, uel à discipulo minus perceptum, demum occurrat aliquid, in quo hæreat auditor, licet adire, & percunctari, & de quibusdam planius edoceri, & se se à dubitationum laqueis eximere: his enim omnibus opportunam operâ commodat magister. A libro nihil tale expectes, qui nunquā cōmutat, uocem sed eadem semper dicit, nec si quid interrogaueris, respondet. non enim profert uerba, sed uerborum imagines: quamobrem rectè dictum est de libris, illos mutos esse magistros, ut melius sit quandoque ab illis recedentem, quærere alios loquentes, quantò etiam melius eloquentes: quod si magister eloquens petendus nobis fuit, neminem te potiozem habeamus. Finge, quos nos esse uelis: Si ignari, doce ignaros, si prudentes, inflamma prudentes. Nam quod postea subiecisti exemplo uitæ prædicandum esse omnibus, id libenter agnoscimus, sed inter exempla hoc quoque, quod quærimus positum, prædicatio scilicet uocalis regni coelestis, quod & à Christo, & à cæteris magna cura sollicitudineque munus impletum est: petimusque à te, ut hoc exemplo prædicationis, quæ uiuæ uocis instrumento profunditur, tantam Monachorum multitudinem

dinem id sitientem atque exposcentem erudire ne graueris. Nequaquam (inquit Bonifacius) sic fieri oportet. Ignoscite quæso timiditati meæ. Vos etenim mihi onus iniungitis, quod non modò tollere, sed uel paululum attrectare quiuis prudens perhorrescat. Nam quum Monachalis uita apex sit ceterarum, hanc ad ultimam sui speciem normamque redigere, quantum est? scio si id possem, nihil pulchrius aut perfectius ostendi ualeret. Sed & ætas uestra, quæ multa est: & scientia, quæ summa & auditorum conuentus, qui futurus est maior, haud uulgari orationis genere tractari se uolent, unde autem id mihi? Itaque petitionem hanc uestram comprobare nequeo: sed ne uultus quidem mihi hic uester placeat, qui in quibusdam nimis deiectus, in alijs etiam est minax. De uultu quæror? quale autem id interpreter, quòd uniuersi corporibus me circumstatis, tot ualidi imbecillum senem, non missuri, ut uideatur, nisi uotis uestris obsequutus fuero. At indignum fratres uestra gloria, si indicta pertrahor causa ad tam graue munus, nec excusandi fiat potestas, & non liceat obtendere saltem seniles hos annos, qui non corporis modò, sed animi quoque robur fregerunt. Quòd si cogere, uim afferre mens fuerat, miror ueteris moris obritos, nam quum Monachos austeriori uitæ disciplina conspicuos, Christoque, ut ita dixerim, foetos Episcopi ad Sacerdotium uellent protrahere publicæ utilitatis gratia, succinti pluribus Diaconibus & ministris occasione qualibet comprehendebant, & summa sollicitudine os eorum teneri iuebant, ne elabi cupientes per Christi nomen, ut mitterentur, adiurarent. Hæc erat forma inuitos & reluctantes ordinandi. Quanquam talibus rebus beatus Hilario frangi non ualuit, cuius iter, quum à frequentibus Palestinæ populis obsideretur. Vir autem sanctus solitudinis amore flagraret, ubi precibus abitum non impetrauit, ad minas uersus. Moriar inquit ante pedes uestros hoc loco, nisi mittitis, non diutius spirantem habebitis, iam iam cadaueris huius sepulturam uobis relinquam. Hæc & talia loquens senex turbationi fronte feruidas scipione discutebat arenas: cunque cibo abstinuisset usque in diem septimum: moti tanta mentis peruiacia hominem missum fecerunt. Hoc ego non tentaro, sed quod imponitis negocij, humillimè potius deprecabor. Vnum illud uobis expromere possum desiderium meum: quo iam diu flagro. Vtinam ad fidei nostræ incunabula & nascentis ipsius ecclesiæ primordia reuolueremur, quo tempore quenquam è grege nostro nequam inueniri uix fas erat. Diffundebatur Christianum nomen per omnem ætatem, sexum, ordinem, omnia Christicolæ impleuerant, urbes, insulas, castella, municipia, conciliabula, castra, tribus, decurias, palatium, forum, curiam: templa sola reliquerant idolorum cultui mancipata: & tamen infinita illa multitudo omni studio religioni seruiebat, uno fratrum nomine censebatur, quæ hodie ad paucos uestri similes reducta sunt: at præcipuum erat temporum illorum studium antelucanos cœtus habere, peruigilias totarum noctium crebro duceres, non solum ad canendum

De uita perfecta

canendum Christo, uerum multò magis ad collationem disciplinæ, qui mos si perenniter teneri potuisset, non incuria & obliuione mores delapsi fuissent. Interrogauit aliquando Christus discipulos, quem esse illum crederent, quorum unus Petrus apertè se indicauit. Tu es (inquit) Christus filius Dei uiui. Vnum hunc sermonem, quem extulit piscator, tot in numeri uiri sequuti sunt, quem tantum abest, ut mutauerint in uita, ut uita ipsi suam ne mutaretur, proiecerint. nullis unquam irrogatis supplicijs tyranni illud delere potuerunt, quid gladios, compedes, carceres, catenas, rotas, eculeos, caminos, sartagines, flammæ, uncas, cruces, bestias, & mille alia commemorem? quibus adiciebantur corpora fidelium: tenuit uerbum Petri aduersus hæc inuictam patientiam, deque crudelitate & sæuitia tyrannorum gloriosè triumphauit. facilius fuerat pharetram exauriri tormentorum, quàm filium Dei non habere in se credentes: exquisitior quæque crudelitas illecebra erat maior sectæ, ubi plures cadebant impiorum manu demissi, illic uberior credentium exoriebatur seges. Etenim spectantium animi mouebantur, & intra unum quenq; obloquens tacita cogitatio hæc erat, nisi uero niteretur Euangelium, nunquàm tot homines deuotis corporibus astarent: nemo profectò tam ardenti, tamque alacri animo uaderet in in mortem, nisi pro meliori uita uideret se moriturum. Hæc cogitabantur, & talibus testibus signantibus, quæ dicerentur proprio cruore inducti mortales causæ se ipsos iungebant, & qui alios miserati fuerant cadentes, mox & ipsi eodem nomine cadebant. Magnum esset dicere quanto ardore illa gererentur, nam non uirilis modò, sed infirmus ille fœmineus sexus adeò pro fide concaluerat, ut dilaniatis corporibus Christum faterentur: non acerbitate suppliciorum, non spe retinendæ uitæ adduci poterant, ut uocem & actionem obliquarent. Iam præclarum erat Cathecuminorum uidere constantiam, qui fidei candidati nondum ad eius honorem ingressi, pro ipsa tamen fide ad supplicia uolentes trahebantur. Sæua aliquis putaret illa esse tempora, ego uerò beata iudico, quando crebro Martyrum uictimæ feriebantur, quando cruentas illorum funerum exequias miserando affectu Christi plebs prosequuta ad ecclesiam mœrens reuertebatur. Omnis tunc illa quidem multitudo lugebat, sed omni risu & cantu luctus ille erat fœlicior. Hic terror, hæc flamma, quæ aduersus Christianum nomen exarserat, attulit initium Monachatus nostro, ut de hoc etiam aliquid tanquàm præteriens dicam, nam nonnulli, ut fugerent sæuitiam illam, & ne uiderent, quæ fiebant, in solitudinem concesserunt, sed quod primum necessitas inuenit, mox utilitate rei perspecta uoluntas celebravit. Itaque pluribus confluentibus illustre Monachorum nomen redditum, mirante sæculo ausos esse homines relicto omni humano cōmercio solitariam uitam inter feras agitare. Nam præruptas rupes, nemora, antra, arenas incolebant, & tantum delectabat eos solitudo, quæ terret cæteros, ut quò horridior esset regio & desertior, & minus humanis passibus peruia, eò libentius

bentius ueniretur. Magnis erat in delicijs præterfluens riuius uicinus
 tecto, qui potum præstaret & huic iunctus palmae stipes, qui folia in ue-
 stem, & baccas in cibum proferret. Cæterum in sacris hymnis & canticis
 & meditatione diuinorum tota ducebatur ætas, corpus erat neglectui,
 ac acerrimo studio excolebant, quod in illis cœleste fuerat atque diuinū.
 Itaque hæc uita, quæ uidebatur ferarum esse socia, quantum tunc lucem
 intuebatur? quibus intererat cœlorum arcanis? & quàm ualde beato An-
 gelorum consortio fruebatur? Vellem ut ad initia sermonis huius redeā,
 desiderio inspiciendæ tantæ uirtutis, uel illis me natum temporibus,
 uel hæc nostra illorum esse simillima, quibus facere homines optima,
 quàm dicere aut audire mallebant. Quamquam non noua quidem
 instituta uituperanda sunt, si quis in eis rectè permanserit, uetera ta-
 men istis antepono. Hic quum tacuisset Bonifacius. Tum illi, Non
 est istud desideria nostra restinguere, sed incendere: quantum anti-
 quitatis in te est? quantum exemplorum? Expone igitur nobis qua-
 lia uetera illa fuerant, uel hæc noua, qualia esse debeant, effice ut fru-
 mur aliquando ubertate doctrinæ tuæ. Da hoc precibus nostris, ad quas
 officio iusto impellimur, da multorum fratrum indigentia, da charitati
 Christi omnia grauiā & dura ferendi: attēde, quod cōserui Christi, quod
 commilitones Monachatus sumus, quorum salua pietate commoda reij-
 cere haud potes. Cur igitur dicturum non polliceris? quid hæres optimè,
 quod suspexisti cœlum, nam hinc tibi descendet auxilium, quod si per-
 tinaciter nos reijcis, non afferemus tibi quidem uiolentas manus, nec
 te ore clauso ad suggestum pertrahemus, illicque ad dicendum consti-
 tuemus; sed tamen minamur tibi ne illud frustra de minis dixeris, ia-
 cula orationum nostrarum, rogabimusque prostrati Dominum, ut te
 uerbere aliquo admoneat, quantum mali sit fraterna desideria, præ-
 fertim talia frustrari, & forsitan tunc intelliges, quàm bellum sit sponte fa-
 cere quod oportet, & non compulsus: nam post plagā suscipere id uoles,
 quod nūc recusas. En minā, en tela, quibus cōficiēris, nisi caueris. Ad hæc
 Bonifacius. Nihil est (inquit,) quod miremini me in maiorū gesta oculos
 mentis intendere: equidem nihil libentius facio uel ad animi requiem, ad
 ueluti euanescentem uetustate, cuius formam non modò ipsam colori-
 bus reponere, sed uel extrema lineamenta ducere, arduum puto. At enim
 urgetis uos, ut genus ipsum aggrediar Monasticæ uitæ, uel quale olim fue-
 rit, uel nunc esse debeat, & nisi id fecero, mihi & Deum, & Orationes, &
 spicula minitami, quibus configar: hæc profectò uis est, & magna qui-
 dem, nam maiori ui utitur, qui terret animum, quàm qui manum inijcit
 corpori. Sed & charitatem ad me allegastis & commilitium Monachale,
 ueluti Oratores quosdam placitos & facundos, quibus religio sit quicquā
 denegare. Concedendum est igitur, ut opinor, & faciendum quod peti-
 tis: malo enim uoluntati obsequens uestre impudentiæ notam subire,
 quod

De uita perfecta

quodd supra uires onus sustulerim, quàm si recusaro, uideri non satis pius & ab humanitate alienus. Et quoniam melius est sumpto ad cogitandū spacio paratius dicere, diem ad eam rem commodo uestro sumite: nam tunc copiam mei faciam, & loquar ut potero, studioque uestro permotus senectutis meæ imbecillitatem uincam. Si ueri & perfecti Monachi uitam uiuerem, uel saltem tantæ laudi proximus essem, cupiditatibus uestris plenius responderem; & possem tunc apertius legitimi Monachi partes ostendere. nunc à uobis illud petendum uidetur, ut quum rem tractare capero, animum tunc magis meum, quàm rem ipsam emetiāmini, simul cogitetis me tantum munus non appetiuisse, sed à uobis impositum sustinuisse. Ita fiet, ut si quid deliquero, facilius ignosci possit. Veruntamen, quoniam omnia, quæ ad Monachos spectant, uno sermone explicare impossibile, uidendum est uobis, quid de illis potissimum me loqui uultis. Tuum sit arbitrium (inquiunt) de quibus loquaris, modò de magnis. Atego (inquit) de paruis, angustis, humilibus cogitabam, quibus tamen credo uos magnopere delectari. Quid enim tam paruum, quàm paupertas secum pauca ferens? quid tam angustum esse potest, quàm ieiunium modico saturum apparatu? obedientia quid humilior, quæ suam uoluntatem alienæ semper inflectit. In horum & similium sermonum stadio decurret eloquutio nostra, nisi uos aliud quid censeris, quod quoniam annuitis, illud etiam respiciendum, num his quoque Deus annuat, sine quo non modò tanta res perfici posset, sed ne minimi quidem muneris ulla pars rectè attingeretur. Rectè mihi nunc uideor alium ad dicendum sumpsisse diem, quia interim orationibus me uestris penes Deum humillimè fufis iuuare poteritis, idque à uobis uicissim, ut faciat peto; rogandus quippe est Dominus, ut illo die adsit, & sacro spiritus afflatu ita linguam moderetur, ut ea dicantur, quibus æterna uita salusque animis pariat, charitasque in illum nostra feruentius incendatur. Non respiciat ille ad delicta mea, sed ad postulata uestra: nam & si ego indignus, qui de tanta re loquar, uos tamen forsitan non indigni ob tantum studium, qui audiat. Nec mirum (ut opinor) fuerit, si orantibus uobis aliquid tunc proficerem dicendo, detque mihi ille uim cotis, quæ & si inhabilis sit ipsa ad secandum, habile tamen ferrum ad sectionem reddit. Antea terrebatis me orationibus uestris, & earum mihi iacula minabimini, nisi obsequer. Nunc postquam obsequor, nulla causa est, quin iisdem protegar armis, quibus antea, ut aduersarius petebar, nam quantum his ualeatis iam professi estis, nisi forsitan cupitis magis lacerare, quàm iuuare, & ultrices tantum copias, non etiam auxiliatrices habetis. His ultrò citroque iactatis, quum prædestinata dictionis fama, ut fit, percrebuisse, rumorque celebris Bonifacij nomen circumferret, de quo certi erant homines ætatis non modò suæ, sed multò superioris Monachos cunctis laudibus anteire, dubij utrum sanctior, an doctior accidit, ut plurima Monachorum turba ex omnibus ordinibus, ex omni

ni

in provincia confluere in diui Secundi delubrum Calendis Septembribus. Eo die ferunt Bonifacium magna quadam & pulchra de Monastica genere uitæ diſſeruiſſe, quæ nos à quibuſdam, qui interfuerunt Monachis ſtudioſè excepta, ſi non iſdem uerbis, at paribus ſententis tranſpoſuimus, ut nihil grauiorum rerum præteritum appareat: nihil non ſuo ordine relatum. Aſſerebant enim, qui hæc nobis tradiderunt Bonifacii uerba, quamuis longo poſt interuallo, eorum adhuc auribus inſonare, uultum loquentis & geſtus omnes adhuc in oculis eſſe, quò fit, ut uberior illum & ardentius multò & explanatius dixiſſe putem. Nos ſicut potuimus iſdem uestigiis inſtitimus, nolentes orationem pluribus profuturam perire: quod proſectò accidere neceſſe erat, niſi literarum monumentis cuſtodita ab obliuionis interitu uindictetur. Ergo quum editiore loco Bonifacius conſediſſet ingenti Monachorum auditorio circumfuſo, oratione de more præmiſſa, magna auiditate audiendi, magnoque omnium ſilentio illum in hunc ferè modum loquutum accepimus. **I N T E R** magna & multa admirabilia ſumma Dei bonitate indulgentiaque mortalibus conceſſa uirtus principem & excellentem locum tenet, ut nemo unquam tanta & tam incredibili floruerit facultate dicendi, qui omnes eius laudes pleno ſatis ore potuerit enarrare; ſi quidem uirtus illa eſt, quæ ſicut nominis ſui ſono indicat, omnia uertit in tutum. Hæc humanarum mentium meritum, animorum iubar, ſancti propoſiti neruus atque robur iubet repudiatis illecebris uoluptatum unumquenque tendere, quo ſpirante Deo uocatur: hæc eum, quem inſederit, ad ingentia facta perducit, nec uires animi remolleſcere finit. Hæc cœlo demiſſa beatitudinem non huius ſæculi, ſed ipſius cœleſtis regni donat ſuis cultoribus: & ducem ſe præſtat ad eam uitam, quæ mortem omnem noſtram abſorbet. Quid autem melius, aut elegantius cuiquam hac in uita contingere poteſt, quàm ſi rectè ſuo fungatur munere? id autem à uirtute petendum. Virtus enim hominis (ut iſti aſſerunt naturalium rerum inueſtigatores) nihil eſt aliud, quàm habitus quidam, quo homo bonus eſt, & opus ſuum rectè perficit, atque abſoluit: ſicut nanque oculus bonus eſt ſua ipſius uirtute, efficiturque per eam, ut bene uideamus. ſic humanus animus bonus eſt ſua ipſius uirtute, efficiturque per eam, ut bene uiuamus id eſt iuſtè, rectè, officiòſè. Itaque hortor ego uos dilectiſſimi fratres, ut hanc amicam uobis & familiarem reddatis, huic ſtudeatis: nullum præterfluat tempus ſine ualida atque forti uirtutis tractatione. Quod ſi diligentius explorare uoluerimus, qui ſumus ipſi, unde uenerimus, quò tendamus, ne tum quidem liquidò apparebit mediocri uirtute nos contentos eſſe debere. Cur enim Monastica clauſtra adiuimus? Cur ſolitariam hanc ſtationem captauimus? Cur ſocietati & collegio ſanctorum fratrum intexi uoluimus? Cur religioſam induti uestem? Cur illa tria ſolemnia uota profeſſi? ſi ueluti plebs & uulguſ hominum uiuimus, ſi nihil aut non multum uitæ merito diſtare ab his cogitamus, quos ſæculi fluctus &

D D exun-

De uita perfecta

exundantium negotiorum turbines excipiunt atque exercent. Alia illorum, alia nostra ratio est. Illi mortalium operum procurationē suscipientes satis habent aduersus uitia uirtute duce superiores euadere. Nos impigro magis gradu uirtutem sequentes, postquam diuinis tantum insistere uoluimus, non uitia tantum atterere, sed etiam ab omni affectuum terrenorum contagione animum expedire debemus: oportet nos, quamuis in carne locatos, carnis oppugnare naturam, ut quiduis potius, quam homines uideamur, non honorum splendorem, non laudum præconia affectare, non odore, non sapore, non tactu, non pulchritudine corporum capi, ludos, ioca, conuiuia, familiaritates deserere: ad omnia denique suauius & iucunda, quæ mundus effert, animo esse lapideo. At qui uidemus nobis terras, nobis maria, nobis solem, uniuersamque astro- rum choream inferuire. Quid ergo? quum cœlestium natura nobis suggerat famulatum, terrenis abstinebimus? & hæc blanda & speciosa, quæ circumstant undique tanquam non sint, inimica manu repellimus? Sed uidendum est, ne secundum inferiorem hominis partem, quæ tenera admodum & mollis est, hæc & dicantur & cogitentur: nam excitato homine, qua parte arduus est totus, idest uirtus refedit, quæ eo pluris est, quod plura contemnit. nunquam profectò præsentium rerum specie delin- niti causam nostram deseremus, nec fit tamen quin uideam, quam dif- ficile sit hos motus, quos natura assidue suggerit exuere. Illud etiam dif- ficilius mores deponere, quos alio uitæ genere assuefacti aluimus, qui robustiorem habent uim & tenaciorem, quam natura, propter pristinam familiaritatem. Difficilia hæc atque aded difficillima, negat nemo, ue- runtamen quod durior fortiorque aduersarius, & quod armis munitior, & quod uiolentius laceffit, ubi summa uirtute & fortitudine repellitur, ui- ctorem latiore facit, & splendidiorem coronam capiti uictoris intexit. Ergo paupertati summum honorem habebimus, cuius custodiæ solemn- nos uoto mancipauimus. Alij molibus iactis & effosis montibus ter- ras æquoribus, æquora terris inferant, erectisque pyramidum fastigiis usque ad sidera, humum cœlo imputent, ueluti naturæ domini: nihil sanè hæc ad nos, qui comperto tenemus Monachum non experimentis, sed de trimentis potentiæ crescere, satis habet Christi famulus, si cutis nuditatē uili tegmine uestiat, & famem qualicunque cibo soletur: nihil aliud quæ rendum. quid ita? quia turpe est, non modò impium charitatē mentis se- mel Christo desponsam, ad hæc inferiora detorquere. Ita ne uerò portio- nem affectuum nostrorum ponet sæculum cum Christo? quid postea? eun- dum ne fuerit ad arbitros communi diuidendo? negatis. Scilicet di- gnitatis causa partitor erit Christus, & quum ex possessione affectuum nostrorum modicum sibi quid sumplerit, reliquum sæculo dependet. O temporum descendam miseriam, pudet dicere, dicendum est tamen. ui- deo ex grege nostro nonnullos diffisis cordibus ac in diuersa diductis, qui ubi paululum religioni operam impenderint, mox reliquis temporibus honores

honores ambiunt, uel pecuniæ student. Hos ubi ad aram accefferint diuinorum sacramentorum, litare dixerim Domino semicordes. Hos puto dimidiatam uotorum suorum hostiam adducere: at holocaustum id est totum & integrum cor hominis deposcit ille cui obtulimus, & ægreferet partim sibi, partim opibus humanis tradi, quas prior ipse reiecit. Miseri profecto, qui in paupertatis domo ante nudati ora crucifixi diuitijs obuiuntur, religionem etiam improbæ cupiditati prætexentes, tanquam pium sit Monachos pecunia abundare: at huc secularium ferri uota uiuorum, quis nescit? quæ si pariter Monachi prosequuntur, non sæculum deseruisse illos, sed uerius commutasse dicemus. Ita enim accidit, ut qui sæculi copijs de relictis nudi & expediti ad monasteria cõfugerant Christo nudo militaturi, mox ueluti nuditatis pudeat, omnibus sæculi molibus opprimi se uelint, oppressi quæ latentur. Ego si quantum Christus, quantum cæteri sanctissimi uiri paupertati tribuerint, explicare uolero, uix hic dies sermoni sufficiet, certè plurimum tribuerunt, nec tamen faciliè inueniuntur, qui sequantur. Fateor enim me assidue pauperes quæsiuisse, ut me illis coniungerem, nec tamen adeò multos inuenisse. Veruntamen quoniam infiniti sunt undique pauperes, non in monasterijs modò, sed in urbibus, uereor ne quispiam uidens me in tanta pauperum turba pauperem quærere stomachetur; nisi prius expreffero, quem ego pauperem amo, & quem inter ipsos pauperes quæro. Illum ego quæro pauperem, qui diuitias in paupertate non appetat, sed ipsam paupertatem animo amplectatur. rarus hic occurrit, nec faciliè inuenitur: nam reliqui fortuna pauperes, animo sunt diuites, quos totos dies noctesque id agere uideas, ut rem quærant, licet eorum propositum euentus sæpe destituat. at in sæculo talia agitari, ubi mercatores & negociatores conceduntur, non est mirandum, sed quicunque in monasterijs inhiant diuitijs nihil reueriti monasticam sanctitatem alienissimam professione à talibus, ii proculdubio qui abiiciendi sunt, quòd & in se ipsos crimine, & in alios peccant exemplo. Scio olim nonnullos Aegypti, Syriæque Monachos fuisse, ut nunc loquimur, proprietarios, nec mirum: nam nec tunc in commune omnes uiuebant, ut ex uita Hilarionis patet inuisentis singula Monachorum habitacula, quorum aliquod, nisi habuissent propria, non esset inter exempla illud relatum de duobus Monachis, parco altero, altero liberali. Itaque uidentur habuisse quidam illorum domos, agellos, uineta, hortulos, hos fateor fuisse Monachos, sed minores tamen Monachos, si animum quoque adiecerunt terrenis istis possessionibus. Nihil tale Antonius, nihil Macarii, nihil is, de quomodo memini Hilario, nihil illi alii plurimi, qui hoc unum habebant opus fiscellas texere, non ut diuites essent, sed ut uacuum ab orationibus tempus honesta aliqua ratione transigerent. Illos uerò prædiorum possessores laudari non comperio, quibus quid tum licuerit, quid uel profecerint, uiderint ipsi. Nobis ne si uelimus quidem id conceditur, qui paupertatis custodiam uoto professi sumus. Nihil pri-

DD 2 uatim

De uita perfecta

uatim prædiorum capere & retinere potestis: in commune diuites estote. sicut Apostolici quondam uiri, quibus commune magnum & uberrimū prædium erat ipse Deus, hoc de prædio immensas cœlestium bonorum fruges metebant. Ausus est Hieronymus de clericis loquens dicere non posse habere eos partem domini, qui quicquam haberent præter dominum, quod si accipimus, quid fiet his Monachis, qui ita dominum habere uolunt, ut per eum habeant cætera; rogantur à Deo diuitiæ, quasi ipsius Dei possessio parum locuples sit. Hæc & alia quædam non audeo uobis impingere, qui adestis, quos equidem opinor pro ingenii rectitudine à turpi lucro auersos. Veruntamen, qui à peccatis maximis, quæ liquiddò peruidetur, declinare scitis, ne leuioribus in rebus capiamini pro uidete. Moneo prædicoque, ne in cellulis uestris auro quicquam illitum, aut purpura tinctum, aut ebore tersum teneatis, nihil habere uelit uel materia uel arte rarum. Eliciunt retenta hæc & assidue spectata amores nostros, impediuntque quantumlibet leuia & modica esse uideantur, ne tota animi libertate æternæ illius pulchritudinis contemplationi seruiamus. Scio quosdam maximas copias & diuitias, plurimaque alia ornamenta, quibus affluebant, abiecisse, ad monasteria uersos. Arsennicos quosdam & Pammachios intueri te diceres, qui è summis uitæ delitijs ad Christi duritiem descenderant. Animaduersum est deinceps minutarum rerum amore percussos, uerbi causa liberculi cuiuspiam, aut picturæ, aut stragulæ uestis, & cæterorum talium, propterea quod illis cultioribus utebantur, quàm quantum oporteret. Quid est hoc? Tu mihi extructos diuitiarum montes contemnis, deinde per arenulas auri guttas sectaris, nihil hoc omnino habet consequentiæ, nihil rationis, ut grandia præter uolans pusillis hære debeat. Veruntamen propter imbecillitatem humani ingenii pusilla etiam amoueamus, quæ paulò libentius spectantium oculos detinerent. Itaque si me audire uolueritis, puri erunt cellularum uestrarum parietes, puræ imagines, purum grabatum, purum oratorium, omnia rudia & uilia exiguo ære parata, sine amittendi metu, sine furtiuæ manus pauore, illudque etiam rationis habebitis, præsidio sæpius uel ad uitam, uel ad ualitudinem tuendam necessariò carendum esse, idque ubi contigerit, magni muneris loco ducendum. Magna laus & præclara nulla rerum iniquitate permotos ad diuinæ bonitatis obsequium armationes inueniri. Tales Christus milites peramans cogitur eosdem affluentia diuinarum uirtutum ditare. An licuit Flacco illud iactare.

Quanto quisque sibi plura negauerit.

A Diis plura feret.

Christianus uir religioni addictus non existimauerit bene nudum atque inopem esse oportere, qui se tegere atque ornare Christo uelit? qui enim unquam bonorum è grege nostro aliter senserunt siue docti, siue ad eò in docti? Quanquam illud Doctorum gratia non supprimo, licere illis suppellectili librorum abundare ad suum & aliorum usum; reliqua alta pauperie

perie inundentur. Nudos (dicendum est sæpius) nudos facultatibus bonorum esse oportet, quia hoc modo, & eum, quem diligimus, gratius imitatur, & eum, quem metuimus, facilius uincimus. Quid enim crucis nobis exhibent uexilla, nisi nudum Christum, quem suis insequi uestigiis debemus. & quid magis horret Diabolus, quoniam ipse rebus exteris nudus inuenitur, quam si uidet cum æque nudo sibi fore luctamen: nam si quem in ueste apprehenderit alicuius terrenæ cupiditatis, hunc faciliè deiccturum confidit. Fœlix igitur paupertas, per quam & hostiles insidiæ uitæ tur, & cœlestes diuitiæ comparantur. At corpori quid faciemus altissimū castitatis propositum proteruis motibus inuadenti? Non enim sicut externarum rerum pompam & delitias diffugere ualemus, ad nuda & inania monasterii habitacula, ueluti ad cautes & saxa exilii quodam iure delati: sic pari ratione corpus deferere possumus, quod hominem, dum homo est, secum trahit. Num manus forsitan sibi metinjicienda? & mors asciscenda extra ordinem nullo proposito? nam si animū de corporis statione extrudere properamus, ne sordibus obuoluatur, aut impudiciæ, aut auaritiæ, quid assequimur tamen? quum & si antea purè se instituisse, hoc ipso tamen, quod malo exit more, fordescit. Rectissime dictum est non oportere de uitæ huius statione discedere, nisi quum legitima potestas, quæ huc immiserat, reuocarit. Sunt ista, ueruntamen nihil prohibet habitantem in corpore frangere petulantiam carnis, & frenare furorem satellitis huius libidinosisimæ. At arma expetimus, quibus frangamus, seu frenum iniiciamus: magnum prælium, durum ineundum certamen, cum atroci hoste res est: qui medullis uisceribusque penitus inclusus sensus intimos titillat omnes, delinimentis & illecebris miris cum omni sua uitate affluentibus: & ecce terra & impura inuadit imago uoluptatum, quæ præter oculos animæ feruntur trepidantis ne feriat, uel scutum præbeto, quò iacula hæc lasciuia repellantur. An ego dilectissimi uelim nudos uos & inermes obicere certamini? Nempe arma Christi milites quæritis, rectè quæritis, pugnare uultis cum impuro aduersario, strenuè uultis, cupitis acerrimum hostem debellare, gloriosè cupitis: sed quas armorum petam officinas? quæ præcepta dem pugnandi? quam spem porrigam uincendi? si libido luxuriæ ea esset, quæ iacula ferri acie munita intorqueret: ego scuta uobis area comparassem, galeasque tremulo cono insignes capitibus uestris indidissem. Nunc quum lasciuis & mollibus pugnat iaculis, uos ex aduerso duritiem uictus & asperitatem opponite: nam & cilicia induenda uobis, & ieiunia continuatis mensibus ducenda, & flagra inferenda, aloris & æstus iniquitas subeunda: præstat esse uiros, ut arma hæc pondere graui, tractatu aspera aduersus insolentiam tam nequam hostis expedire ualeatis: hac ratione clauus clauo retundendus, deposcit sæculi delitias caro, sicuti eius ingenium fert, ego illam inter Christi spineta pertraxero, uerbere laniaro, ieiunio-

De uita perfecta

ieiuniorum languoribus afflixero, pessimis modis accipiam, tum demum frontem mihi audeat tollere meretriciam, doleat continentiae caro, ne arrideat luxuria: in tantum tamen doleat, ne opprimantur uires illius, sed freuentur: hoc enim tantum quaeritur luxuria fluxa substringere: quemadmodum citharam citharædo, nauem nauclero, bigam aurigæ: sic carnem animi imperio subditam esse oportet. Quid si illud præcipio ac mando, ut mulierum consortia declinetis? (non enim possum dicere fugiatis, ne speciem animantis huius detestari uideamini) num ab institutis patrum uidebor longius abire? quorum plerosque solitudini additos scimus, ne muliebrem quidem pallam spectare uoluisset, tantus illos castitatis Zelus momorderat. Vellem adessent matronæ ciuitatis. Illis meo iure præciperem, ut Monachos ad se crebrò commeantes repellerent. at sancti sunt uiri, sermone forsitan & amictu, nam opere, qui credere possumus? quoniam qui sanctitati student, quantum licet ac fas est, foemine as formas deuitant: memores iam pridem fuisse dictum, quod uir foemina uidendo, ergo ut ab igne cauent, ne cum eis commorentur diu: nam quemadmodum ignis non tam lædit tactu, quam mora, sic muliebris forma uix offendat, nisi oculum figas, & hæreas aspectu, & multo detineas sermone. aliud est enim colloqui foeminas paucis semel, aut iterum pro delati negocij facultate, aliud frequenter inuifere, & teneras apud aures longis ambagibus sonitare. Licet (inquiunt) rectis oculis foeminas intueri, & nihilominus animo cœcum esse ad libidinem: lubrica oratio, quæ multos sæpe fefellit, quum putarent animi libidinem extinxisse, quæ fuerat consopita. remoueantur ergo oculi ab illiciti uultu quantum fieri potest, ne dormiens animi libido excitetur: ualidius tentura rationis uires, quò diutius quieuit, nec de oculis tantum præceptum sit, sed de reliquis quoque corporis partibus, ut illis alter sexus ignotissimus sit uoce, tactu, loquutione. scimus sanctissimos uiros dixisse, atque adeò scriptum reliquisse, inter causas, quibus interdictum est foeminis, ne Dei uerbum publice prædicarent, illam quoque iustam, quòd earum sermo inflammaret: quantò hi magis priuata colloquia leuioribus de rebus cum foeminis sumpta improbarent: & quantò dicerent periculosiora? Quid de tactu dicam? Reprehensum ab Abbate Monachum teneo, qui aduentantem mulierem collata dextra excepisset, quum ille excusans diceret sanctam foeminam, sanctiores (inquit) eritis leiuncti, quam copulati. Vides terram & aquam elementa duo, pulchra specie, uelut iucunda, commisce paululum utraque, lutum creant, & nihil tum his inquinatius. Arsennium Abbatem insignem sanctitatis nomine uirum conspicata nobilis genere mulier insequuta est, ut colloqueretur, & cum homini sanè improuiso incidisset, conturbatus ille dicere incipientem uersis passibus dereliquit, clamare à tergo & uociferari mulier ut consisteret, uelle Deum rogari. Tum ille. Libens inquit rogabo Deum, ne te posthac uideam, ne ue meminerim te mihi unquam cohæsisse, sic Peon Antonij discipulus,

Ius, multis à forore fatigatus precibus, ut se graui morbo affectam inuise-
 ret, clausis oculis tanquam fenestris quibusdam foras ferentibus illuc du-
 ci uoluit à puero, ne dum iret, rediret, alicuius muliebris illecebræ oc-
 cursu caperetur. Nos, qui omnibus horis muliebri oculos conspectui da-
 mus, nihil tale timemus: ac ueteres illi patres. cur? an quia minus uirtu-
 te ualemus? Nolite posthac mirari audientes plurimorum fratrum lap-
 sus. Paulus Apostolus dixit. Fugite fornicationem: nos non fugimus ex
 Apostoli præcepto, sed cominus pugnamus aduersus carnis libidinem,
 qua in pugna plures cadunt, quum alij fugiendo superiores euadant: ma-
 gnam (mihi credite) fratres res ista recipit cautionem, ut pudicitia, uelu-
 ti sub signo gemma infracta teneatur. Ille nescio quis in comœdia senex,
 qui thesaurum domi condiderat, ubi cum uicino fabulans in uia audis-
 set quasi ferri crepitum, nam forsitan operarij à quodam cōducti hortum
 in proximo fodiebant, exanimatus intus se recipit, inspecturus, an res sal-
 ua sit: sic uobis non minori solertia excitanda mens, ubi quid blandum
 cogitationibus uestris insonuerit, ne lenocinia uoluptatum subrepant,
 ueluti suffosis cuniculis ad extrahendum Monasticæ continentia opes:
 nam regredi tūc intra nos ipsos oportet citissimè, & breuis saltem ille ser-
 mo proferendus, quis hic fodiat? hei mihi si diripior. Diuites sæculi æ-
 grè ferunt uersari egenos in suis domibus, illosque, quantum possunt,
 abigunt, non quòd pro comperto habeant furis animo eos uenire, sed
 tamen quia egestas suspitiosa est, propendent animo in eam partem,
 quæ cautiore est: sic & uobis non minus suspecta esse debent mulie-
 rum ora, ne alliciant ad se, & prædentur diuinum illud propositum
 castitatis, itaque expellenda procul. Nos itidem si puerum districto
 astantem gladio uideamus, statim accurrimus, & uel reluctanti gla-
 dium extorquemus de manibus, etiam si nondum uulneratum cer-
 namus, cogitantes quàm facillè possit uulnerari; denuntiamusque
 sub mutu uerberum, ne posthac illum attingat. Congruentiori ratione
 idem seruabitur ubi Monachum intentum uidebimus muliebri pulchri-
 tudini: nam statim acclamandum, & curandum, ut desistat, neue ite-
 rum attrectet: quoniam non leue periculum est, ne uulneretur, mentemq;
 tumultu repleat, & per oculos adulteria concipiat. Nec dicat mihi ille,
 non sum uulneratus adhuc, nam præterquam id incertum est, nec faci-
 lè credi possit attestationi tuæ, ego id non specto, an uulnus acceperis, sed
 quàm in procliui sis, ut accipias: non enim extra humanam naturam a-
 leamque es constitutus: non tam mendicita diuitijs ingestis incenditur,
 quàm libido diuersitate sexus animaduersa inflammatur. Aspera sit licet
 & ferrea Monachi uita, tamen tam se rectè mentis uestigiis lubricam pro-
 sternit carnis uoluptas, ut uix à lapsu defendatur, ne dum forinsecus oc-
 casiones quærendæ sunt, quò procliuius ruamus: hac in re, (si me confi-
 lliario utis uitis) tuta etiam pertimescetis. Vberibus ocij turpia cogita-
 tionum ali dicunt, ideo ne uacua mens sibi quicquam fingat illorum,
 uobis

De uita perfecta

401
uobis intentius aliquid operis semper fuerit moliendum. Præceptum est Sapientis in Ecclesiaste, ut opinor, seruos in opere habendos, ne ocio corrumpantur. Vtile & egregium præceptum, quod uobis quoque seruandum est. Et ne forsitan aliquis uestrum dicat se excusans, & cæteros: quid hoc ad me? Monachus sum, seruum non habeo. Imò tu quoque habes, & hi omnes: an non tibi sicut omnibus corpus est traditum? hoc tuum seruum esse dico, huius enim seruitio utimur sub animi dominatu, hic pessimus fuerit seruus, si delicatè uixerit & ociosè: ergo labore & opere assiduè terendus, ne uacet turpibus cogitationibus, ne scèdum corporum complexum, ut naturale quoddam bonum asciscens, corrumpatur, uel te potius dominum suum corrumpat. Sed de castitate hæc enī secundo loco refedit, quam solemniter religiosam ingressuri uitam nuncupauimus. Superest obedientiæ uotum, quod germana quadam societate rectè antecedentibus copulatur: nam postquam externarum rerum magnificentiam ornatumque despeximus, item & sensuum suaues iucundasque motiones affiximus, restat modò, ut liberum mentis nostræ arbitrium summittamus. Horum unum paupertatis, alterum castitatis tuendæ cura dedit: reliquum obedientiæ susceptio præstabit. Appetit unusquisque naturæ impulsu excelsus præstansque uideri, ad imperandum magis, quàm parendum paratus. Et quoniam libertas est posse in his plurimum, quæ decet posse, hac libertate uehementer omnes gaudent, sententiamque suam & operam unusquisque cupit admirabilem uideri, & cæteris præferri; sed hæc agant liberi. Nos seruitium Christi sumus, nobis erepta uoluntas, & in alienam ditionem collata. Quid enim elegantius; quid ornatiùs dici, aut cogitari potest? Quæris de me num uelim concionari ad populum, num declamare aduersus hæresim quandam, num præsto esse proximo opem meam imploranti; num aliquo iter habere. Respondeo: præfulem meum sciscitator quid uelim. Tu ergo quid uelis ignoras: & alius est mihi adeundus pro te? Ita inquam. An ille arca na tui cordis nouit? minimè, sed quod uult ille, efficio, ut ipse uelim: nā postquam semel dedi me in manus præfulis mei, & cum tanta obedientia illi me supposui, cum quanta lutum subest figulo, cera fictori, quacunque ille ducit, sequor; nec alias imagines reddo, quàm quas illa manus mihi impressit. O obedientiam præclarissimam uirtutum omnium, quæ tuo utero larga demittis sanctissimæ humilitatis fluentia. Tu Monachum doces iudicia propria extinguere, maiorum cedere præceptis impellis, ut se prosternat deiiciatque omnibus, nihil se scire, nihil intelligere arbitretur, nisi aliundè acceptum ac traditum. Nunquam qui ad quamlibet rem sibi demandatam obtemperandum existimauerit, & se alienis neruis, ut lignum mobile ducendum putauerit. uana tolletur ambitionis aura, nunquam sua magnificiet, nunquam de principatu contendet. In fratres quoslibet humillimorum impensam conferet officiorum, maiores colet, æquales uerebitur: eos, quos infra se positos credet, (uix tamen

tamen credet) altiori honore prosequetur. Porro quum liber sis, subijcere te alterius potestati, & formam serui induere propter Deum, quid aliud est, quàm eum imitari, qui quum omnium Dominus esset exani- niens se habitum serui sumpsit, & obediens factus est usque ad mortem, mortem autem crucis. quod si tam gloriosum exemplum non moueret, tamen illud urgeret, quod nullus hominum cœtus, nulla societas, nul- la resp. nulla domus consistere potest, nisi maioribus pareatur. Quamob- rem aut dissoluenda monasterii idest Monachorum habitacula, aut si retinentur, obedientiæ iugo colla submittenda, & cogitandum, quod non modo inter omnes, sed supra omnes congruit Monachis humilitatem or- dinemque seruare. Spectabit igitur Monachus in cunctis ad præfectum suum, & tam se ei docilem præbuerit & sequacem, ut uel breuissimo nu- tu ab eo gubernetur, eat, maneat, redeat, uigilet, psallat, sacrificet, comedat, lauet arbitratu Abbatis sui, nihil horum à se impetret, neque tamen omni uoluntate Monachum penitus denudamus, ne animalis ri- tu agi putetur; sed eum hac præcipua & excellenti uoluntate armamus, qua toto animi affectu in Dei amorem feratur. Vita nostra per singula du- citur momenta: non enim est tota simul, sed eam totam simul obtulimus quodammodo Deo, ubi pollicitatione solemnī nos astrinximus, quod in hoc omni uiuendi spacio reliquis præteritis ei soli seruiemus, ipsum quæremus, ipsi hærebimus, ipsi amoris uinculo innectemur. Hic est il- le amor, qui finis est actionum omnium & cogitationum nostrarum, tria hæc, paupertas, castitas, obedientia, ideo suscipiuntur, ut hunc amorem foueant, nutrant, excitent, corroborent. nam ubi externas res, corpô- ris sensus, mentis arbitrium, nos denique metipsos abijcimus, negligi- mus, abiuramus, unus tantum relinquitur, qui ametur Deus, fortius in hunc uidetur amor noster ruere, quo in aliorum curam ueluti riuulis qui- busdam minus deducitur: sed totus simul & conglobatus in illum rapi- tur, uel nos potius rapit. tunc enim ueluti extra nos facti iungimur men- te ei, quem tam ardentem amamus, & in quo quodammodo uiuimus: nul- lum maius uinculum, quàm uoluntarius amor, præsertim si uehemens fuerit & incitatus. Quod si diu ersorum sollicitabit turba negotiorum, e- languescet ille & dissipatæ animi uires segnius ad diuina consurgent. In quo quantus est nonnullorum error, qui in monasteris non tantum suas, sed alienas etiam partes obeunt; non satis habent uersari intra fines mu- neris destinati, sed sollicitudine exeunt in prouincias alienæ fortis, ua- riisque negotiorum anfractibus animum sponte addicunt, quasi sine il- lis nihil rectè geratur. Sciscitantur, auent audire, uel de legato quopiam an corradi potuerit ab hæredibus, quomodo & quorum opera exactum, cui oneri tollendo contributum. De communium præterea prædiõrum cultura, de fructuum dispensandorum ratione infinita est quæstio. nec uerò claustris tantum hæc cura clauditur monasticis, sed prouens ad ur- bana exit ciuium multorum negocia, detrimenta interim non leuia su-

EE scipit

De uita perfecta

scipit diuinæ charitatis flamma. Vobis si quicquam proficere cogitatis, maxima solitudinis & silentij cura inesse debet; quæ duo pariunt orationem, non hanc quidem orationem, quam psallendo fundimus, collectis ex ordine uerbis, & animaduertentes, ne quid prætereatur: sed illam inquam orationem, qua compressis corporeis sensibus attollimur spiritu principique illi ueritati copulamur. Dicite obsecro, non linguæ, non pedum frænare uultis officia, oberrare iuuat, ubi libet gressibus & sermonibus, & quomodo intenti familiaritatibus hominum & locorum diuinæ hære poterimus necessitudini orationibus perenniter fundendis? Sunt qui uel, ut placeant, uel ut animum relaxent, obuios quosque detinent profluis uerborum agminibus; ridicula iacere student, atque hunc morem, (proh dolor) plurimi iam damno profectus nostri asciui-mus. habet ipsa lingua facillimum motum, quum in udo sit posita & ueluti in lubrico, ideo initio motus eius compescendus, quia semel incitata stare nescit. Nihil autem tam facile mentis emollit neruos, quam hæc sermonis proluuius, nihil æquè solit rigorem Monasticæ disciplinæ, quam hæc incitata linguæ uolubilitas, quæ itidem peccatorum comes est. hinc multorum perit profectus, ut non sentiatur, aded suauis ueneno capiuntur. Alij sunt quidem ex alio quodam imperitorum ordine, qui frequentissimè urbem permeant, uel si nihil aliud possunt, saltem singula monasteriorum loca hirundinis more lustrant quotidie, uerentes, ne si uni hæreant cellula angustissima totos dies ac noctes, illis obiciatur, quod incolant uiuentes sepulchrum. Est omnino uiuacis hominis corpus mobile non uno loco circumscribere, sed quid menti fiat, quæ gyris illis & erroribus capta uariis cogitationum formis illudetur? excurret ad spectatas species, quarum implicabitur ardore: hoc quum ageretur, quæ uincula innectentur circumfluxu menti? qui clauus erit iste, qui fluctuantis animæ motus cœlestibus cogitationibus affiget? Quæremus etiā cur ueteres patres orationibus innixi tam familiariter Deo assisterent, ueluti cœli iam municipes, ac non cogitabimus illos silentio & solitudini addictos solis se inferuisse diuinis. nam quum squalida & uasta capefferent eremi loca, garrulum forsitan propter fontem incolebant, non ipsi garruli erant, feras per patula cursitantes forsitan spectabant: non ipsi cursuram exercebant, raros homines ad se uenientes quamprimum dimittebant, non ipsi ultrò multorum amicitiam appetebant.

Rarus sermo illis, & magna libido tacendi. Si quando loquendum erat, loquebantur de ara crucis, de cœlestis Hierosolimæ diuitijs, de summi regis beneficentia, de bello aduersus Diabolum, de quæ eius insidijs; demum de talibus, quibus ipsi unâ cum auditoribus proficerent ad pietatem: quædam etiam de scripturis sanctis sibi ipsis inuicem proponebant & audiebant: eorum autem, quæ gerebantur in urbibus, magna ipsos obliuio seu potius ignoratio tenebat. Quid plura? à rebus externis, à corporis cura auerterant se ipsos, animū totum

totum ab omni mundi fuligine purum detersumque in unum effundebat Deum uera uitae fontem, aeternorum bonorum auctorem, hunc quarebant, cum hoc consistere cupiebant. Ergo simul ac collibuisse, mentem illic affigebat, nihil erat negotii spiritu sublato persequi eum, quem unice diligebant: non satis habebant tenebras effugisse secularium rerum, si starent in crepusculo, & ueluti sub dubia luce nimborum coeli, sed toto die & plena diuinitatis luce perfrui cupiebant, quantum tamen hic consequi datur. Eadem nobis ratio tenenda, eadem uestigia persequenda, si quid Monachi professione dignissimum est, implere aueamus. Non eremus quidem persequuti sumus ac illi, tamen perfectione sanctorum operum non longe à talibus uiris, si uolumus, recedemus. Pythagoras maximam silentii curam habuit: nam sectatores suos tacere in quinquenium, postea non nisi necessario, nec pluribus, quam quot opus esset, loqui iubebat. Illud etiam erat in præceptis, ut intus manerent Aegypti sacerdotes (ut Hieronymus refert ueteres sequutus auctores) nunquam ex templo discedebant, sed illic assidue commentabantur rerum causas & siderum rationem inquirentes. hoc quum illi facerent humanæ sapientiae studio, quid nobis faciendum est, qui infinitam Dei sapientiam apprehendere cogitamus, uerbo uirtutis suae omnia portantem? Num tamen distractos uelim uos uidere assidue, silere semper, prodire nunquam minimè, sed ad tempestatam rationem uelim uos actiones uestras tanquam nauigia moderari, quod ipse eremicolæ, de quibus antea dixi, factitarunt. Etenim unusquisque intra se sic agat, ac loquatur. Ego monasteriis conditus, quò urbis oculos diffugiam, introrsus tamen adhuc recedens monasterijs itidem latebo, at prodibo in apertum conspicuus omnibus, ubi animarum salus & fraterna charitas depoposcerit, societatem hanc ingressus sum institutam, ut ad Dei opera unanimes conflueremus, tali tempore dilapso mecum ero, solitariaeque uitae amabundus. Linguam teneo ueluti cymbalum & æs tinniens, quò personem diuinas in laudes; cauebo ne sacrum hoc instrumentum ad prophana transducam. Hæc seruemus fratres, ut custoditis officiorum uicibus conditi & aperti, soli & sociati, loquaces & silentes inueniamur, atque hanc quidem pulcherrimam ducemus morum concordiam in tam dissona actionum uarietate. Cupimus omnes quantum in hac uita fieri potest Deum uidere: meminerimus dictum esse. Beati mundo corde, quoniam ipsi Deum uidebunt. Cor igitur ab omni inquinamento uitiorum, & omni secularium rerum desiderio mundandum: & ubi id adepti suffragante Domino fuerimus, nondum ab opere cessandum, sed id agendum, ut mundities retineatur. Nemo tam est mundus, quin adhuc eum mundum uidere uelim: hoc non iam præterita respiciens dico, sed metuens futurum. Veluti si æream statuam ab omni ærugine deterfam & iam splendidam spectarem, hortarer adhuc statuæ dominum, uideret ne statua ærugino-fa sit. Et dicente illo se statuam ab omni ærugine nuper mundasse & iam

EE 2 fulgere:

De uita perfecta

fulgere: responderem me non monere de ærugine, quam iam absterfisset, sed de ea, quæ intus latens erumpet in posterum, si deses fuerit, & diligentia in abstergendo defuerit. Similiter non desino uos monere, ut si absterfa sunt omnia inquinamenta omnesque sordes, ne ea res desidiam uobis pariat, sed excitet diligentiam: assidue nanque purgandum cor, purumque ab omni rerum sæcularium appetitione reddendum, & prospiciendum omnino, ne qua deinceps mala illinc cupiditas erumpat. Volo dicere aliquid amplius. Non satis est Monacho accepta & parta bona tueri & retinere, nisi studeat augere, & cumulare aliis maioribus, pergat ire quotidie (ut dicitur) de uirtute in uirtutem, si dixerit, sufficit, ætæ de illo est. Etenim humana mens, uoluntas, cogitatio, uarias semper recipit morum agitationes, uno loco consistere nequit: non domum, non hospitium inuenit ullum commorandi, sed in mortali uitæ huius semita, ueluti perpetui cursoris fungitur uice. Itaque ubi non tendit ad optima, ad pessima contendit; ubi non progreditur, retrograditur; ubi non proficit, deficit; denique definit esse bonus, dum negligit fieri melior, semper autem fieri melior potest, quum nullus finis futurus sit insequendi summum illud bonum, quod & ipsum sine fine est: quum ad ulteriora tendentibus continuò ostendatur, quod adici prioribus possit. Hoc Apostolus sentit Paulus, dum nos iubet, non retro respicere, sed assidue in anteriora ire: ac ne mirandum quidem id accidere Monacho, quod omnibus contingit artificibus. Isti nanque si parumper cessant ab opere, deteriores fiunt artifices, atque omnia eorum retro labuntur. Non aliter, quam qui aduerso uix flumine lembum Remigijs subigit, si brachia fortè remisit, Atque illum in præceps prono rapit alueus amni. Ut quidam Poëta cecinit. Hinc illa pictoris uox, quæ postmodum in pro uerbum uenit, se nunquam sine linea diem duxisse. Quamobrem uigilandum est semper nobis fratres, & intento undique animo circumspectendum, ab oratione non modò cessandum, sed feruidus quotidie insistendum; quoniam maximus ille Monachorum hostis Diabolus nunquam somnum capit, semper eò tendit, ut Monachum de proposito uel gradu deiciat: non enim ille primo tentat ab oratione abducere, sed suggerit, ut remissus oremus, deinde ubi id suasit, tum illud, ut minus frequenter atque ita paulatim Monachum carpit, ut parua uel nulla cura tangatur diuini operis: & ad extremum Monachum esse non sinat. Nouit quòd ubi Monasticæ disciplinæ rigor uel paululum soluitur, humana sibi indulget imbecillitas, & assidue labitur longius, in deterioraque imprudens prouehitur: ideo tentat primò leuiter, mox grauius, & iam inclinatos in grauissimam demum ruinam impellit. O pessimum hostem omni animi prouisione repellendum, nisi forsitan timendum non putatis, quia oculis corporeis non uidetur, at ea de causa magis est formidolosus, quia præuisum hostem facile erat cauere. Is autem hostis, non modò non conspicitur,

tur, sed etiam sub amici persona fallens, & ueluti partium nostrarum fautor dolosa sapius suggerit consilia ad perniciem trahentia: cuius documentum præbere potest communis omnium parens Adam, quem sub melioris spei obtentu decepit, & ab his, quæ in manibus erant bonis detruxit. Nonne etiam pietatis specie leptam induxit, ut propriam filiam immolaret, nephariumque illud sacrificium Domino offerret. Alium impulit quendam, ut manu tangeret arcam ruenti similem: alium ut sacrificaret potius, quàm quòd cœlesti oraculo iubebatur, impleret. Videte quanto cum hoste sit certamen, qui & improuisus & ex insidijs salutem nostram petit, atque ita ex insidijs, ut non insidiari sapius, sed auxiliari credatur. Sed quorsum hæc tam multa de Monachi uita? ut admoneamur scilicet officij nostri, quod si præstiterimus, rectissimè erit, sin aliter, perspicuum est quid euenturum sit: ut mihi non sit nunc necesse triste aliquid dicere uel ominari: uulgius hominum religiosos nos uocat, non quòd sæculares uiri plures piè uiuentes non sint ipsi quoque religiosi, sed id commune nomen attributum nobis, qui religionis studium præter ceteros professi sumus, & in eo ipso nos oportet excellere. quòd si irreligiosè uiuimus contra id, quod profitemur, & monasticæ uitæ fert institutum, quanto odio digni sumus? qui non in re leui, sed maximè graui, non uni aut alteri, sed cunctis penè ciuibus, non sermone, sed factis, non semel aut iterum, sed per omnem uitam mentimur. Meritò quis nos magis auersetur, quàm in sæculo peccantes: illi enim magis stant in lubrico. Nobis diuino munere suppeditata sunt omnia, quæ à peccatis retrahant, & ad sanctitatem uitæ pertrahant. Nos nanque sæculi negocijs desertis in tenui uictu & cultu uitam agimus, quotidie diuinas literas tractamus, sacros psalmos resonamus, exempla sanctorum spectamus, & quod maius omnibus, Deo patri hostiam illam placentem quotidie sacrificamus. Si hanc sanctitatis aram, si hanc sacram militiam, si hanc stationem atque uigiliam ab Imperatore cœlesti creditam nobis atque commendatam impiè uiuendo prodimus, quæ turpitudine maior? quod supplicium tanta turpitudine dignum inueniri potest? Hactenus aspera quadam & rigida uia progredientes tanquàm inter dumeta iter fecimus, dum Monachi uitam plenam laboribus & ærumnis depinximus: quamobrem uereor ne multos magni incepti & diuinarum rerum pertæsos animus destituat, ueluti ingressi uitam fuerint omnis suauitatis expertem. Quid faciam? soler ne uos? & fluctuantibus in salo tranquillam littoris stationem ostentem? Magnum hoc spe duci quietis & dulcedinis sibi parandæ, hoc laborum molestiam, hoc curam mentis leuare potest, quid ergo? credemus fratres sanctissimorum uirorum uitam nulla conditam dulcedine amarulenta omnia experiri? Scilicet doctus ille uir & eloquens, ex disciplinæ cuiuspiam tractatione & ex meditatione dicendi, suauiter animum eius commoueri sentiet, ut reliquas oblectationes rerum & temporum respuat: delinitus una uoluptate studiorum liberalium, Monachum, qui disclusus corpore Deum apprehenderit

hend erit solius animi sensibus, nullos iucunditatis fructus perspicere dicemus? An circi & scenæ gaudia, ut magna celebrabuntur propter spectacula ferarum, gladiatorum, fabularum, & multiplicium aliorum certaminum. In ipso diuinitatis spectaculo, quod mera effundit gaudiorum fluenta, nihil prægustabimus nectaris illius, quod post mortem plenius & abundantius hauriemus. Quæro etiam quid deterius in homine? quæ seculentior sit pars? Corpus inquit, ergo corpore sentiuntur magnæ sapius uoluptates. In animo uero idest nobilissima hominis parte non longè maiora uersari existimabimus gaudia, quum secedit ille in loca pura, fruitorque sedibus sacris. Ut enim initio conuersionis magnum ineundum sit sapius certamen aduersus sæculi carnisque illecebras, ingemiscendum quæ sit frequenter, acclendum, clamandum orationibus, ante Iesu pedes humillimè effusus, tamen ubi paululum assuefacti huius generis pugnae terrena neglexerimus, serpereque coepit coelestium amor, tunc non parua stillabit dulcedo ob præsentiam aeterni numinis: nam profusis exultabunt gaudijs, quorum purificata mens cæteris contemptis ardentè Deo inhæserit. sicut enim qui terrenas sequuntur uoluptates, dulciores suauioresque percipiunt illas, præualido corpore, quàm infirmo, sic cuius purgatior erit mens ab omni asperitate & sorde sæcularium rerum leuigata, effuso in se magis diuino bono uehementius gaudebit. An insuauem arbitrer illius uitam, qui quotidie fruitur contemplatione uerorum aeternorumque bonorum? tantum abest, ut sit insuauis, ut nulla maior humana in uita contingere possit suauitas; rectius crederetur inesse fastidium illi quàm ullum moerorem: quanquam ne fastidire quidem quisquam illa bona possit: ita enim faciant, ut desiderium sui assidue relinquunt. Quana in re quantum differant à sæculi bonis animaduerti potest. nam sæculi bona in propatulo posita, mortalium uota sui specie irritantia, ubi possessa fuerint & pertractata, mox sordescunt, languidiore tenentur affectu, quàm quo quæruntur: angustiora sentiuntur, quàm ut affectus humanos explere queant. contra accidit his, quæ solo mentis intuitu capiuntur bonis, nam hæc recondita sunt quodammodo & latent, nec obuia humanis affectibus eos statim lacescunt, sed difficulter inspiciuntur, difficilius etiam quæruntur: at ubi parta fuerint & possidentur, dulciora in dies & maiora sentiuntur: sola homine digna existimantur, sola saturant, sola dum habentur, adhuc habendi magis desiderio torquent. Sed quò obuertere se possunt sancti uiri, ut non illis lata omnia occurrant, atque iucunda. Num solitudo eremi, aut monasteriorum amara fuerit illis, qui Christi, Mariæ, Angelorum colloquio quotidie fruuntur? qui non sunt putandi eo loci degere, quo corporibus locati, sed quo mentem intenderunt? Num paupertas humana conterreat diuites coelestium bonorum? Num ieiunia diuino pastu saturos? Num uestimentorum squalor clarissima uirtutum luce fulgentes? Sed quid hæc commemoro? quum gloriæ ducant sibi, si pro religionè stantes probro & dedecore fuerint operti: dulcedini, si Christi

si causa acerba tolerauerint. Nihil æquè quondam peramabant sancti
 uiri, quàm patientiam corporum exercere, & ostendere populis per uul-
 nera, dolores, & acerbam mortem, uerum id esse, quod prædicabant.
 Obstupescabant homines uidentes eos studiosè in illa ruere supplicia,
 quod passim tamen initio nascentis Ecclesiæ fiebat, quia sacro afflato fu-
 rore ueluti ebrii ferebantur, ut potè, qui totas diuinæ charitatis lagenas
 ebiberant, atque exsiccarant: parum uidebatur, si mors non esset in pœ-
 nis, nisi etiam mortis esset illis crudelitas in delitiis. quanta cupiditate
 Apostolorum Principem Petrum crucem excepisse credendum, Domini
 membris prius ornatam? Quanta Germanum Petri Andream? qui ueri-
 tus ne populi misericordia descenderet de speciosissimo illo & pulcherri-
 mo pœnarum trophæo exorauit Dominum, ut inter illa supplicia expira-
 ret. quid Ioannes uirginitatis flore insignis, Apostolatu nobilis, & Euan-
 gelij præconio sublimis, num feruentis olei lacum expauit? num depre-
 catus est supplicij genus acerbissimum? quauis fortis Christi athleta in-
 gurgitatus illic non adustus, sed unctus emerferit. uos tamen in illo & re-
 liquis, qui ad supplicia delati præsidio cœlesti ueniam acceperunt, non
 plagas aut uulnera numerate, sed mentem appendite ad durissima quæ-
 que paratam: nam hoc etiam ægreferebatur à plurimis, quod cupienti-
 bus perpeti uesana tormentorum libidinem non licebat. Illi præ mar-
 tyrij decore influere quaslibet pœnas aduersus se optabant, principum
 indulgentiam detestabantur. Videbant sibi nihil eripi posse à Dei causa
 seiunctum: erant enim Christi mancipia, quæ si ferro, uel quouis alio pe-
 stifero cruciata perdebantur, Christo perdebantur, id est inueniebantur.
 Facit hoc omnino uehemens amor, ut hominem non finat sui ipsius esse,
 sed eius, quod amatur. Nihil sic amans inspiciat aliud, nisi quid uelita-
 matus nulla sui ipsius habita ratione. Hæc persequitur, hæc curat, hæc am-
 plectitur sola, tanquam non in se ipso, sed in illo uiuat. Hoc non dissimu-
 lans Paulus dicebat. Viuo iam non ego, uiuit uerò in me Christus. &
 hoc idem in alijs impletum fuisse ostendit, dum ad Colossenses scribens
 inquit. Mortui enim estis, & uita uestra abscondita est cum Christo in
 Deo. & ad eadem Corinthios cohortatur, ad quos iterum scribens, illud
 protulit. Pro omnibus mortuus est Christus, ut qui uiuunt, non iam sibi
 uiuant, sed ei, qui pro ipsis mortuus est Christus & resurrexit. Ignatius
 Antiochenæ Ecclesiæ tertius post Petrum rector, quum sub Traiano prin-
 cipe damnatus esset ad bestias, & ea de causa Romam uinctus traheretur,
 scripsit in itinere epistolam peregregiam ad Romanos, cuius uerba ad ea,
 quæ nunc agimus pertinentia, quoniam digna uisa sunt tanto uiro, digna
 sacræ mentis ardore, digna Christiani nominis triumpho, memoriam
 mandauit. Ad hunc enim modum loquutus est. De Syria usque ad Ro-
 mam pugno ad bestias die nocteque ligatus cum decem Leopardis, id est
 militibus, qui custodiunt, quibus & cum benefecerim, peiores fiunt. Ini-
 quitas autem eorum mea doctrina est, sed non iccirco iustificatus sum.

Vtinam

Vtinam fruar bestijs, quæ mihi sunt præparatæ, quas oro ueloces esse mihi ad interitum, & ad supplicia, & allici ad comedendum me, ne sicut ad aliorum Martyrum non audeant corpus accedere: quod si uenire noluerint, ego uim faciam, ego urgeam, ut deuoret. Ignoscite mihi filioli, quid mihi proficit, ego scio, nunc incipio Christi esse discipulus, nihil de his, quæ uidentur desiderans, ut IESVM inueniam: ignis, crux, bestia, fractio ossium, membrorum diuisio, & totius corporis contritio, & tormenta Diaboli in me ueniant, tantum Christo ut fruar. Hoc Ignatiano sermone fratres nihil ne deprehenditis de ardore patiendi sanctorum uirorum ad Christi dilecti ora per supplicia commeari cupientium? atque ille quidem sic scribebat: at ubi ad rem uentum est, non ferociter minus leonibus se exhibuit inanibus, quam loquutus fuerat, quorum rugitu præcepto, Frumentum Christi (inquit) sum, dentibus bestiarum molar, ut mundum farinæ in me sit. Faciebant hæc & his similia, qui regebant ecclesias, quorum propositum inferioris etiam ordinis uiri insequabantur: Frequentes enim erant, qui pro Christo animam effundere cupiebant, sed & multa Monachorum millia, ut de nostris quoque dicam, eadem tulerunt, quum ne solitudo quidem aliquando à percussorum furore tuta esset. Vt semel finiam, infinita est copia Martyrum, & digna quidem Imperatore Christo spòte se se pro eius nomine & gloria deuouentium, quibus quum amara dulcia uiderentur, ipsa dulcia quanta fuisse creditis? Credunt homines, si piè iustèque uixerint, se ingentia immortalitatis præmia percepturos, sed credunt: nullo enim sensu id nouerunt. Sperant in regno cœlesti maximam beatitudinis copiam præstò futuram: sperant ferrei, uel stulti potius uidetur abdicare uiuentem sibi præsentia bona, & futura sperare post uitam. Itaque tentationis huius pondere sæpe curuatur animus: rursus sacrarum scripturarum auctoritate & Spiritus sancti aura crebescere sustolitur. At si interrogabis eos, qui puri ab omni contagione terrenæ fœdis mentis aciem in superna intenderunt, diuinamque illam lucem intuiti sunt, quid sentiant de præmijs cœlestibus, de gloria sanctorum, ne tantulum quidem dubitationis penès se suboriri dicent, quin uerissima sint, quæ in fide traduntur: clamabunt se spiritu euectos beatitudinem illam, & si non plenè, nec inuolucris reiectis, attamen utcunque uidisse, nec uidisse tantum, sed breui quandoque osculo exosculatos fuisse, mox huc regressos, quòd corporum statio, cui fuerant assignati, diuturniorem moram non ferret. hæc sanctorum securitas talibus oppignorata muneribus quantam alacritatis uim, quantum secundæ auræ statum rectissimis studijs adijcere potest? Etenim penès ceteros rudis & informis fides, at penès hos fixa est & optimè delineata, iustamque effigiem tenet. Quod si opotter summam & cum contemptu inuidiæ uerum liberè dicere, omnis mortaliū fœlicitas, si cum hac conferatur, quæ puris percipitur animis in contemplatione cœlestis boni, summa infœlicitas dici potest; omnia, quæ suauitate

suauitate prima sunt sensibus; luctu & miseria plenissima sunt; si cum hac ueniant in contentionem. Nullius ingenium, cogitatio, eloquentia explicare potest, quantus & quam purus, quanque suavis, sit risus animæ illius, quæ cælum sibi promissum lustrans, quotidie diuinæ lucis radijs perfunditur. Ille quisquis est eo raptus, sensit sibi aliquid plus homine contigisse: magna quædam speculatur, magnis fruitur delitijs, à quibus relapsus in hæc nostratia, luget quidem de tanto descensu, sed spe tamen interim delectatur magnifica, quod nec cuiquam alteri uider longiorem in hac uita moram, sed iam iamque exeundum, & ad illa suprema gaudia, quæ prægustarat sibi ueniendum, & egregium arbitrat in æternam illam foelicemque curiam non ut hospitem & aduenam receptum tunc iri, sed ut notum iam & familiarem. Quid? quod qui perfectioris uitæ culmen ascenderunt, circa se tranquilla cernunt omnia, quæ sunt apud alios turbulentissima? Non enim teneras carnis cupiditates iam temperantiæ ui reprimunt, sed illas penitus obliuiscuntur. non supra dolorum & periculorum metum animum agunt, sed omnino quid metus sit, nesciunt. non superbiam, non arrogantiam, non avaritiam, non inuidentiæ frangunt, sed uitiorum istorum uim ab his multis antea prælijs debellatam iam non nouerunt. non affectus aduirtutes impellunt, sed à uirtutibus impelluntur ad affectus: non iam sub lege degunt, sed ipsi lex uitæ efficiuntur. Iuuat nunc illud exclamare Poëticum.

O Monachum pretiosa quies, ò gaudia solis

Nota piis, dulcis furor, incorrupta uoluptas.

Ambrosiæque Deum mensæ, quis talia cernens

Regibus inuidiat, uel quæ meliora sequetur?

Eia agite fratres excitemus somno discusso uirtutem mentis, & sursum spectantes eijciamus affectus, qui deorsum ferunt, solum I E S U M spectemus fontem dulcedinis & suauitatis, huic seruiamus uni, cui militant creata omnia, imò qui ea creauit, huius aures fletu, gemitu, suspirijs circunsonemus, donec misericordia excitus se totum medullis ossibusque nostris infuderit. An si illi animam nudam obiecerimus, nihil sæcularium affectuum tollentem, non respiciat? non regat, aut uelut fiat? non cœlestium bonorum diuitiis, non se ipso ditabit? non adeò efferus & immanis est Deus iste, non tam miserorum precibus infestus, non tam optimorum uotorum auersator. Illum salutis, illum foelicitatis nostræ cura tenet. Aspicite aspicite crucem illam clarissimum pietatis clementiæque suæ monumentum, qua de sede flagrantissimi amoris, si facem intorserit mutuo corda nostra torrentem, quid præclarior? quid gloriosius? quid lætius? Etenim tunc, quanuis terris hærebimus corporeum induti tegmen, quadam tamen ex parte beatitudo cœlestis uoluptasque sequetur, quæ plena fuerit, ubi nos posito corporis huius uelamine domicilio exceperit suo diuina sapientia, ne-

FF que,

De uita perfecta

que, ut nunc uelatam, sed nudam se nobis spectandam contrectan-
damque præbebit, dulcissima illo tempore inundabunt undique gau-
diorum mella, tenebræ tunc luce, labor quiete, seruitus libertate mu-
tabuntur.

MARCI



MARCI ANTONII

NATTAE ASTENSIS,

DE POËTIS

LIBER.



SAEPE numero mecum agitaui, num de Poetarum laudibus aliquid literis mandarem. Nam si id facerem, laborem meum reprehensoribus non cariturū arbitrabar. Sunt enim quidam, qui infimam & leuissimam omnium artiū Poeticam arbitrantur. Propterea quòd deliniendis tantū auribus nata & inuenta sit. Alii parum utilem prædicant, quia inuentis iam rebus utitur. Nam siue Poeta carmen condat de diuinis, siue de naturalibus, siue de moralibus, hæc ab artificibus aliis petat, necesse est: à sua hoc tantū habet arte, ut ea ad numerum & certam pedum compositionem loquatur. Veruntamen quum hæc, quæ contra poësim afferuntur, considero, in eam sententiam discessi, ut existimarem bonos Poetas non esse sua laude, quæ semper magna fuit, priuandos. Quis enim tam rudis & ignarus rerum omnium, qui non intelligat humanos animos uehementius carmine concitari? Quis tam fero atque immani ingenio, tam è saxo dolatus, ut non moueatur Poetarum cantu? quomodo porro dicitur Orpheus primæuos illos mortales è syluis ad urbes, è ferino uictu ad ciuilem transtulisse? nonne carmine? nam Poetam fuisse constat, ut potè musa matre natum: sacraque Bacchi ex Aegypto in Græciam attulisse, & his homines intiasse. Tres Poetas Theologos extitisse longè ante Troianum excidium proditum est: hunc scilicet Orpheum, Linum, & Musæum; qui ideo Theologi dicti sunt, quòd canerent laudes Deorum, & ad diuinum cultum rudes tum & feros homines inducerent: & hortarentur omnes una intra mœnia coire, & legibus certis uiuere. Illud etiam uenerabiliores facit Poetas, quòd afflatu diuino correpti in fundendis carminibus putantur: hinc dicebat unus ex illis.

Est Deus in nobis, agitante calescimus illo,
Impetus hic sacra semina mentis habet.

Cæterarum rerum studia & arte & doctrina & præceptis quibusdam constant,

FFil 2

De Poëtis

stant, soli Poetæ non cura fiunt, sed natura prodeunt, nec humano adiuti labore; sed diuino correpti furore excitatur. Habere numen creditum est illos, nec nisi cœlesti spiritu afflatos in uersum urgeri. Hinc sibi uatum nomen uendicarunt, quo nomine etiam origo carminis commonstratur. nam metri inuentum est eorum, qui primi mortalibus oracula futurorum euentorum canebant: ante hos non erat carmen, illi numero uersuque fata Regum populorumque euoluebant, sic Sybillas, sic Pythiam Delphicam, sic alios Deos ueteres oraculis suis uentura prædixisse accepimus. Imitata est furiosam tranquilla sapientia, nam quicunque philosophandi ianuam ceteris aperuerunt, Philosophiæ dogmata uersibus professi sunt, Parmenides, Zenophanes, Empedocles, & apud nos Lucretius. Præcepta etiam uitæ quidam uersibus tradiderunt: quoniam, quod numero & ad consonantiam quâdam ordinatam procedit, libentius discitur, & fidelius retinetur. Vitia quoque temporum Poetæ notauerunt: inde Satyræ initium duxerunt, quo in opere latini soli floruerunt. Non igitur ortus carminis humilis, non nuper inuentus, non usus eius mediocris, sed uetustus & in magnis semper rebus sublimibusque uersatus. Hæc omnia disertissimè complexus est Horatius in arte ostendens poematis initium & crescentem progressum. Iuuat carmina ipsa subiicere, ut ostendatur quantum carminis dignitas ualeat ad rem demonstrandam, & quàm faciliè in auditorum animos influat. Ille igitur sic cecinit.

Syluestreis homines facer, interpretsque Deorum
Cœdibus, & uictu fœdo deterruit Orpheus,
Dictus ob hoc lenire tigreis, rapidosque Leones:
Dictus & Amphion Thebæ conditor arcis
Saxa mouere sono testudinis, & prece blanda
Ducere quod uellet. fuit hæc sapientia quondam
Publica priuatis secernere, sacra profanis,
Concubitu prohibere uago, dare iura maritis,
Oppida moliri, leges incidere ligno.
Sic honor, & nomen diuinis uatibus, atque
Carminibus uenit, post hos insignis Homerus
Tyrthæusque mareis animos in Martia bella
Versibus exacuit. dictæ per carmina sortes,
Et uitæ monstrata uia est, & gratia Regum
Pieriis tentata modis.

Sed quid mirum Regum gratiam Pieriis tentatam fuisse modis? quum ipse Deus Omnipotens laudes suas & nominis gloriam carminibus celebrari uoluerit: & spiritum suum sacrum canentibus infuderit. Etenim, ut Arator ait, qui Apostolorum gesta persequutus est carmine.
Metrica res sacris non est incognita libris,
Nam psalmos plyrici composuere pedes,

Exame-

Exametris constare sonis in origine linguæ
 Hieremiæ luctus, Iob quoque dicta ferunt,
 Quanta autem sit carminis dignitas, uel ex eo indicari uidetur, quod ne
 mo (quantum mea fert opinio) soluta oratione uteretur, si assidue uersus
 fundere posset, & idoneos haberet auditores, nisi fortasse ex nimia sui
 excellentia satietatem & fastidium procreet affluens uersuum effusio. cer
 tē ipsa soluta oratio, licet non sit numerus, gaudet tamen esse numerosa:
 & ita ea magni & præstantes Oratores usi sunt, non mulcendarum auriū
 tantum causa, sed quia uehementius pellunt & feriunt animos, quæ nu
 merosē, quàm quæ temerē, & ut accidit, dicuntur: idque propter co
 gnationem quandā, quā humanus habet cū numeris animus, adeo, ut qui
 buisdā animus numerus dicatur. Naturale est autem similibus excitari, dis
 similibus languere. At auctoritas Poetarum quanta? Mihi semper excellens
 fuisse uidetur, quod uel illud indicat, quod magni sapientesq; uiri, quū
 ipsi Poetæ esse nolent, Poetarum tamen carmina scriptis suis inseruerunt.
 Apostolus Paulus diuinorum assertor mysteriorum; in hac eius magnilo
 quentia adducit uersiculos Græcorum Poetarum, & penēs Athenienses in
 Areopago Arati uersum protulit. Plato & Aristoteles summi Philo
 sophiæ uertices quoties Homeri & aliorum Poetarum citant carmina
 ad probationem sententiæ suæ? Quid dicam de Hieronymo & Augu
 stino, & aliis sanctarum literarum interpretibus? Nonne idem factitarunt
 quominus mirādum est ueteres Iuriscōsultos in eorum responsis & disce
 ptationibus sapius ufos Poetarum testimoniis. De honore autem, quem
 reges habuerunt Poetis (quoniā de hoc Horatius admonuit) plura posse
 cōmemorare. Sed ē pluribus pauca dixisse sufficiet. Euripidem insignem
 tragicum Poetam Archelao Macedonum Regi charissimum fuisse cōstat,
 qui, quum fortē periisset discerptus noctu (ut aiunt) à canibus, ossa Pel
 lam domicilium Regium iussu Regis translata sunt: & quum Athenienses
 sapius per Legatos petiuisent, ut sibi ciuis sui reliquias in patriam refer
 re liceret, eorum preces repudiauit. Menandrum in comico socco ma
 gnum ab Aegypti & Macedonia Regibus sapius per Legatos & classe pe
 titum fuisse, testatur Plinius. Scipio Africanus, qui cognomento suo ter
 tiam orbis partem à se deuictam declarat, tanti fecit Q. Ennium Poetam,
 ut eius statuam sepulchro suo imponi mandarit. Homero autem mortuo
 tantum honoris tribuisse Alexandrum accepimus, ut eum sub puluino
 semper haberet: nec in bello lectionem eius intermitteret. Idem quum
 uidisset nuntium quendam ad se festinabundum accedere magna (ut ui
 debatur) cum lætitia: quid (inquit) renuntiaturus es? An Homerum re
 uixisse? Inuenerat inter spolia Regis Darii arculam materia & opere pre
 tiosissimam, & disceptantibus amicis, cui nam rei esse usui possit. Tum il
 le. Donetur (inquit) Homeri uoluminibus. Notissimaque eius uox ad
 Achillis tumulum. O fortunate, qui laudis tuæ præconem Homerum ha
 buisti. Idem iam antea in direptione Thoëbarum Pindari familiæ tectis
 que

De Poëtis

que ob Poetæ honorem pepercerat. Virgilio & Varo Latinis Poetis multa tribuisse Augustum Cæsarem, illud ex Horatio ostendit, dum in epistola ad eundem scribit.

At neque dedecorant tua de se iudicia, atque

Munera: quæ multa dantis cum laude tulerunt:

Dilecti tibi Virgilius, Varusque Poetæ.

De Varo quantus fuerit in carmine iudicare non possumus, quoniam hodie nihil eius extat. Virgilium autem doctissimum Poetarum nostrorum & elegantissimum nouimus, quem sic dilexit Augustus, ut quum ille testamento cauisset Aeneiden suam cremari ueluti rem imperfectam, eam magis Augustus uiuere uoluerit contempto Poetæ præcepto, contempta quæ legum auctoritate, quæ defunctorum uoluntates impleri iubet. Silium etiam & Statium insignes Poetas à Domitiano ad summos honores prouectos fuisse non ambigitur. Denique Romæ Poetas summo in honore fuisse, illud non leue est argumentum, quod Musarum templum in urbe antiquitus extructum fuit, magnoque in cultu habitum, existimatumque eos agrestiore fuisse animo, qui à Musarum consortijs tanquam à gratijs abessent. Collegium Poetarum in urbe institutum auctor est Valerius, qua in re illud memoriæ prodidit. C. Cæsarem dictatorem in illud collegium cooptari uoluisse, & fuisse Accium Poetam, qui uenienti Cæsari in collegium nunquam assurrexerit, quum se in arte superiorem esse consideret, & in illo conuentu non opes, sed ingenium spectari putarent oportere. Sed quid hæc? quum non modò Reges & Imperatores Poetas ornauerint, & carminum studia adamauerint: uerum etiam carminibus pangendis aliquando incubuerint, sicut de hoc Augusto, Nerone, Nerua Adriano, multisque alijs accepimus. Cur autem Reges & ceteri summares uiri non in honore haberent Poetas, quorum carminibus uidebant eorum gesta celebrari, nemo ferè est, qui gloriæ amore non tangatur, qui non expetat memoriam sui nominis fore diuturnam. Ornarunt ipsi Poetas, sed ab illis ipsi quoque uicissim ornati sunt. Nam (ut inquit quidam)

Non magis expressi uultus per Ahenea signa,

Quàm per uatis opus mores animique uirorum

Clarorum apparent.

Quot & quales uiros, & quàm ætate sua gloriosos uetustas obruisset, nisi eorum memoriam à temporis iniuria, Poetarum sedulitas eripuisset. Aeterna esse debebant, quæ summo labore gesserant & industria: Sed quid fieri potest?

Tempus edax rerum, tuque inuidiosa uetustas

Omnia consumitis, uitiataque dentibus æui

Paulatim lenta consumitis omnia morte.

Accessere Poetæ, qui immortalitatem gestis sommorum uirorum pollice rentur, eandem scilicet, quam sibi ipsis & carminibus suis promittebant, hinc illud natum est.

Fortunati

Fortunati ambo, si quid mea carmina possunt,
 Nulla dies unquam memori uos eximet ævo,
 Operis quoque sui æternitatem prædicat Ouidius.
 Iamque opus exigi, quod nec Iouis ira, nec ignes,
 Nec poterit ferrum, nec edax abolere uetustas.
 Et reliqua, quæ sequuntur. Eodem impetu fertur Horatius

- Exegi monumentum ære perennius,
- Regali scitu pyramidum altius,
- Quod non imber edax, non aquilo impotens,
 Possit diruere, aut innumerabilis
 Annorum series & fuga temporum.

Neque uerò Poetas ita commendo, ut omnia eorum uera esse dicam, fabulis delectantur plerunque, sed fabulosa pro fabulosis habenda sunt uel potius cur ea ficta fuerint inquirendum, & ad ueritatem (si fieri potest) res redigenda: qua in re Palephatus operam suam præstitit. Legendi etiam cum delectu, si qua contraria bonis moribus uel religioni asserunt, & putare eos more hominum peccasse, uel temporibus, quibus nati sunt seruuisse, dum Deorum furta & flagitia commemorant: rectè Plutarchus, qui Poetas ex urbe bene instituta non expulit, sed quemadmodum audire oporteat, ostendit libro super ea re edito. non enim censuit genus totum repudiandum propter quosdam, qui in plerisque fœde lapsi sunt, quum in potestate nostra sit, quicquid in eis utile est amplecti, mala autem repudiare. Demum si Poësis ab omni peccato sit pura, cur non admittatur? hoc an sit talis, iudicet non tam Grammaticus, quàm Philosophus. Meo autem iudicio. Si Poësis fuerit non effœminans animos, sed uirilis, si non lasciuia, sed casta, si non uitij fauens, sed acuens ad uirtutem, hæc utilis etiam esse poterit reipub. Platonica, quam ille seuerissimam in libris suis sibi ipsi confinxit. Eos autem, qui minoris faciunt Poësim, propterea quòd rebus iam inuentis utatur, latet se magnam laudem tribuere Poëtis. Nam ut utatur Poeta rebus iam inuentis: attamen ea altiori stylo & magnificentiore & iucundiore portat. Plerunque etiam uberiore, eadem tractat, quæ alii tradiderunt; sed non eodem modo & forma. Tenens summam rei ab illis traditam alio utitur uerborum genere, diuersis sententiis, & nouis dicendi figuris, denique ingeniosè cuncta illuminat, hæc non parua sunt, nisi forsitan parua existimetur laus boni Architecti, & statuarii: nam hi Artifices materia utuntur alibi importata, sed forma est ab illis, quod pretium rebus facit. Addunt etiam iidem oblectatores Poeticen parū ecclesiæ Dei utilis, obliuisci hymnos sacros, qui numeris & ordine pedum constant, inter Sacerdotes cantari. Cur? nisi, ut attollatur animus facilius ad diuinorum contemplationem. Videmus etiam inter missarum solemnia carmina quoque recitari, in quibus de industria elaboratur, ut par sit membrorum mensura, & clausulæ similiter cadant, atque definant, quæ consecratoria uel sequelas uulgo uocant, quod posteriora

posteriora prioribus in fine uocum consonent, & quodammodo sequantur. Veteres quoque Ethnici choros instituebant, qui sacros canerent hymnos, ubi placare Deos, uel ab his sibi concedi aliquid cupiebant. Quo circa ab insigni Poeta in laudem Poetices illud prolatum fuit.

Castis cum pueris ignara puella mariti,
Disceret unde preces, uatem ni musa dedisset?
Poscit opem chorus, & præsentia numina sentit,
Cœlestes implorat aquas docta prece blandus,
Auertit morbos, metuenda pericula pellit,
Impetrat & pacem, & locupletem frugibus annum,
Carminē Dij superi placantur, carmine manes.

Næ igitur inutilis fuerit poetice, si tanta à Dijs impetrare potuit. Sed & illud quoque spectandum est. Multi multa scripsere uersibus non dico de leuibus, sed grauius. Opiāus de piscibus, Macer de herbis, Aratus de sideribus. Scripsit Georgicas Hesiodus, & eius imitatione penes nos Virgilius. In re medica infinitum esset dicere quot & quales uiri morborum remedia uersibus prosequuti sunt. Non uideo si hæc, quum soluta oratione proferuntur, sunt utilia ecclesiæ, cur inutilia reddantur addito numero, & uberiore uerborum fluxu ornata. At iucunda sunt, non ideo tamen sit, quin etiam proficua sint, iucunditatem autem proficua, & in inuidiam, & iniustum odium uocare, cuius tandem est prudentiæ? quum id, quod delectat, non solum teneat & docilem reddat, sed etiam nutriet magis atque pascat. Adde quod Oratori quoque Poetarum lectionem plurimum conferre ueteres existimauerunt, quod ab ijs & in rebus spiritus, & in uerbis sublimitas, & in affectibus motus omnis, & in personis decor peteretur. Illud certè uidebant uim Poetarum esse uehementiorem, quem enim unquam Oratorem audiuius, sic ualuisse acerbitate sermonis, ut inimicos ad laqueum & sui ipsius necem impulerit? quem admodum de Archilocho, & Hipponacte proditum est. Quod si tantum Poetis potest ad perniciem, quantum ei ad salutem (si uelit) licebit. Dicam autem nunc unde sit, quod quidam clamorose insurgunt in Poetas: nam stomachantur in eos, uel quod elati hoc Poetæ nomine ambulant inflatus, quasi omnia teneant, quum pauca admodum sciant: uel quod turpia, flagitiosa, fœda carminibus suis intexunt, uel quod mali Poetæ, uerbis & sententijs parum ualidi, aut non seruantes metri legem, quos fœcli incommoda Catullus nūcupat, hos ego Poetas laudare nec possum, nec debeo; imò nota censoria inurendos dico, & interdicens, ne quid scribant. Tantum autem abest, ut hos Poetas nuncupem, ut ne eos quidem Poetarum digner nomine, qui exiliter scribant: nam se hoc quidem uocat nomine Horatius, quod humili sermonum stylo utatur.

Neque enim concludere uersum

Dixeris esse satis: Neque si quis scribat, uti nos,

Sermoni propria, putes hunc esse Poetam.

Ingenium,

Ingenium, cui sit, cui mens diuinior, atque os
 Magna sonaturum, des nominis huius honorem
 Queritur in bono Poeta, ut sententijs sit egregius, uerbis nitidus, transla-
 tionibus magnificus, figuris iucundus, grandis & canorus carmine, &
 ita plerunque esse debet. Variat tamen sapius aptans se rebus, quas tra-
 ctandas desumpsit. Vt enim mundi huius facies non una est, sed uaria,
 nam coelum ostentat, mare, sidera, terras: hic uallibus depressus est, illic
 collibus supinus: alibi planicie distentus, hirsutus syluis, nitidu floribus,
 ex cultus gramine, squallidus arenis: aridus scopulis, liquidus fluminibus
 riuis, lacubus: denique diuersis constat partibus, & hæc ei uarietas con-
 ciliat gratiam & decorem. Similiter Poësis uaria est, & multiplex, nunc
 familiaris est lectori quotidiano utens sermone, nunc elata incedit altisso-
 nis uocibus, nunc breui tendit ire circuitu, nunc latissimè expatiatur,
 nunc magno fertur impetu torrentis in morem, nunc placidius fluit, blan-
 ditur, terret, minatur, inuidiam, amorem, odium concitat, & quemcun-
 que animi affectum res postulat, inducit, & ut ille inquit, Modò me The-
 bis, modò ponit Athenis. Nec tantum separatis agit hæc partibus, sed
 interdum simul pulchrè commiscet, hæc omnia quid plura? non hæc Poe-
 sis, sed pictura loquens uideri potest, hæc & si illi sunt communia cum o-
 ratione soluta, tamen hoc habet Poësis proprium, quod eadem magnifi-
 centius dicuntur, & illuminatius, & translatis uerbis audacius: habetque
 hoc Poeta admirabile, quòd quum sit numero deuinctus, eadem tamen
 ornamenta persequitur, quæ ab Oratore adhibentur, tantum altitudine
 præstet unus altero, ut Poeta quasi equo inuehi, Orator pedestri sermone
 uti dicatur. Oderunt etiam nonnulli Poetas, quasi maledicum genus, ut
 potè, qui non parcant personis, sed nominatim quoslibet carpant. Sint
 quidam Poetæ tales, sed plures sunt boni, quorum carmina ab omni ob-
 trectandi studio pura sunt: non igitur hos illorum causa odisse debemus,
 & fatuum est putare omnes Poetas iisdem gaudere. Carpere in uniuer-
 sum uitia hominum & temporum concessum est, non autem in hunc uel
 illum suspensiones uel crimina ingerere: iniustum id enim & periculosum:
 iniustum, quia non debet quicquam alteri obijci, ubi non liceat iudicio
 se defendere & crimen refutare. Periculosum, quia læsi carmine quando
 quæ se ipsos manu ulciscuntur. Illi autem pro re leuissima uerborum, gra-
 uissimas luunt poenas. Notum illud Alcibiadis, qui Eupolim Poetam,
 à quo notatus fuerat in comœdia, nauigantem adeptus, in mare deiecit.
 Quum penès Romanos Neuius Poeta in Metellos recitasset in scena uesi-
 culum huiusmodi.
 Fato Metelli Romæ sunt consules.
 Respondit ei Q. Metellus, qui tum fortè Consul fuit, alteto senario.
 Dabunt malum Metelli Neuius Poetæ.
 Is etiam Neuius in Scipionem Aphricanum inuectus est. Demum ob ma-
 ledicentiam in Principes Romanos à Triū uiris in uincula coniectus est,
 G G & in

De Poëtis

& in carcere aliquandiu habitauit: ubi fabulas etiam aliquot scripsisse dicitur. Possem huius superioris ætatis exempla alia inferre, quibus ostenditur, quòd qui pulsarunt alios carmine, ipsos deinde uerberibus & uulneribus pulsatos fuisse. Sed omitto, quia facile est culibet, qui sanis modò sit moribus, ab hac maledicendi scabie temperare. Etenim maledictis certare cum infimo, sordidum: cum pari, anceps: cum superiore, furiosum. Solent, qui de artificibus quibusdam conscribunt, memorare eos, qui in arte claruerunt. Sic oratores memorat Cicero, pictores Plinius, grammaticos Suetonius, ecclesiasticos scriptores Hieronymus noster: quem sequutus Gennadius postea alios addidit. Similiter commemorandum nunc esset, qui & quales olim Poetæ fuerint, & quibus floruerint temporibus, & quale carminis genus sectati sunt. Sed quoniam de Poëtis latinis id factum est ab alijs diligenter, iccirco tanquam præuentus quiesco, nec sanè qui hoc ignorauerit, multam faciat iacturam, sed si neminem eorum legerit, aut imitari neglexerit. Illud forsitan deterrebit aliquos ne uelint fabricandis carminibus incumbere, quod

Mediocribus esse Poëtis

Non homines, non dii, non concessere columnæ:

Vt gratas inter mensas symphonia discors,

Et crassum unguentum, & Sardo cum melle papauer

Offendunt, poterat duci, quia cœna sine istis,

Sic animis natum, inuentumque poema iuuandis

Si paulum summo discessit, uergit ad imum.

Ego uerò satis esse censeo proximos esse primis, sed proximos non longo interuallo: quia in re opus est natura & studio, quæ duo sunt: utrunque adesse debet, alterum eorum non sufficit, nam, ut inquit Idem Horatius, qui mediocritatem in Poëtis improbat.

Ego nec studium sine diuite uena.

Nec rude quid prosit uideo ingenium: alterius sic

Altera poscit opem res, & coniurat amice.

Magna certè res est Poësis, magnum opus, in quo duo maxima concurrere debent, quibus omnia constant, ars scilicet & natura: sed natura primas fert partes, ars secundas: nam & ars ipsa quoque studet naturam imitari. Non inficior, quin adesse oporteat studium, diligentiam, assiduas uigilias, operis amorem: Sed ista parum afferunt in Poësi, nisi naturæ etiam beneficio adsit ingenium uelox, potens, acutum, diues imaginibus, & inuentionibus præclaris, mûsis denique amicum, & ad numeros propensum, ita, ut carmen quodammodo sponte fluat. Tale quid fuit in Homero Poëtarum Principe: cuius ea animi fuit altitudo, ut nec diuitias, nec honores, nec opes, nec alias sensuum illecebras quæreretur, sed cuncta negligeret præ uno carminis fabricandi atque canendi studio: inde tale prodiit opus, in quod ceteri mortales perspicerent, ueluti omni numero absolutissimum signum, nec imitari ualerent. Hoc ostendit Homerum

sacro

sacro furore fuisse percitum, quod neglectis omnibus suis utilitatibus soli Musarum studiis incumbere: quod optimè uidit Plato in Phedro, qui hoc facit furoris genus laudabile, quo Poetarum mentes rapiuntur. Negat sine hoc furore posse ualidam Poesim consistere, quicunque illo remoto humanæ fidei prudentiæ poeticas pulsarit fores, inanem reuerti: furorem autem uocat commotionem uehementiorem mentis à Deo profectam, qua animi neglectis inferioribus ad superna rapiuntur, & altius efferuntur: quod Poetis contingere uidemus, quibus penè solis conceditur.

Curru & equos, faciesque Deorum

Inspicere: & qualis rutulum confundat Erynnis.

Et talia quædam mirifica, quæ eorum carminibus memorantur. Itaque merito dixi ab initio Poetas laudandos & uenerandos esse, tanquam diuino afflatus Spiritu, & ueluti artificum genus quoddam non humano studio effictum, sed de cœlo delapsum. Fatendum est autem uersus eos, quos olim Fauni, uatesque canebant, ut Cicero inquit, ruditer fuisse compositos: erant autem pleraque eorum ad religionem pertinentia; & diu permanserunt, quia mutare non licebat: deinde, ut humana ferè omnia à paruis progressa initijs incrementum suscipiunt. cultior processit Poeticus uersus, demùm ad eam maiestatem & elegantiam peruenit, quam hodie intuemur. Eia agite ò iuuenes, quibus literarum studia cordi sunt, Poetas diligenter legite & euoluite, & si quis è uobis affluit ocio, & ingenio polleat poetico, carmen quoque amabile condar, delecta materia, in qua dignum sit elaborari: hoc enim & spectantibus afferet utilitatem, nec aliis modò, sed ipsi quoque artificum iucunditatem. Nam si quæ arte efficiuntur, delectant artificem, eiusdem quoque laudis Poetica maxime est particeps. O' dulcem illum furorem, quo impellimur in musarum sacra adyta O' incorruptam uoluptatem. O' gaudia his tantum nota, qui experiuntur. Quis tam insanus uel ferreus, ut te ò summum mentium Poetica decus uituperare audeat? quis non potius summis attollere debeat laudibus? Tu Regum & populorum gesta canis. Tu cœlum penetras, & ad Omnipotentis usque Dei solium pertingis. Tu multorum memoriam in longum æuum prorogas. Te uetustam origine: utilitate frequentem, iucunditate assiduam, omnes, qui non agresti, sed urbano sunt ingenio continuè uenerantur.

GG 2

MARCI



MARCI ANTONII
NATTAE ASTENSIS,
IN METRA SVA POETICA

P R O O E M I V M.



C I O antiquissimos illos & probatissimos uiros, qui & maiorum rerum procuracionem suscipere & grauissima quæque literis comittere audebant, solitos nonnunquam ad poeticen descendere, & uersus ducere, non quòd affectarent laudem dictandi carminis, sicut hi, qui principem tali in re operam fumentes, poetas se & haberi & dici cupiebant. Verum quoniam non in ocio ocium querebant, sed oblata quiete suauissimam ingenij agitationem meditabantur; inuitati metri elegantia & uenustate eò se transferebant: & nunc uersu amores suos decantabant, aut quemlibet alium animi affectum exprimebant, interdum laudes summorum uiro- rum attingere, & poscente materia graue aliquod carmen deducere nitebantur. Fortasse quispiam arbitrabitur oratoriam loquutionem & poeticam diuersæ cuiusdam esse facultatis. Iccirco unum atque eundem hominem non æquè bene utranque tractare posse. Ego contra uideo plerosque; & in hac et in illa facultate excelluisse: nec apud sublimes Latinos tantum et Græcos, quorum et ditior est sermo, & affluentior, & rebus omnibus beatior; sed & apud nostros in hac infima quotidiana uulgarique lingua, nec excelluisse olim tantum, sed & hodie excellere, nec id mirum uideri debet. Nam si agri alias alio tempore fruges efferre possunt, si eadem arbores, ubi se induerint in diuersa pomorum genera, multiplices fructus edunt: Cur non hominis ingenium, quo & illa efficiuntur, uaria ex se gignet in studijs? & multiplicia? & destincta? Me certè iuuat quum perspicio doctrinarum opera ex ingeniorum adytis eruta, nunc lege metri constricta in orbem circumagi, & certis gradibus insistere, nunc soluta & ueluti numerorum exuta compedibus liberius excurrere, & quò ferat impetus uagari: quorum unum oratoris est, alterum poetæ, utrunque autem eiusdem hominis, qui utroque studio teneatur. Ac si uerum uel dicere uel audire possumus, finitima admodum & coniuncta est & cognata poesis orationi. Nam & uerbo-

uerborum suppellex ferè eadem, & sententiarum idem reperietur ornatu: distant uerò, quòd oratio libertate pedum diffusior non nisi delectu adhibito in sermonem descendit. At poesis constricta numerorum modo licentius supergreditur: & pro arbitrio magis uerba contorquet, nec tam apta deligit, quàm iucunda conquirat. Quorsum hæc? ut intelligatur me imitatione summorum uirorum aliquando idem fecisse: Ego enim iuuenis adhuc, Poetis euoluendis admodum intentus fui: mouebat me carminis dignitas & uenustas, quæ penès bonos poetas Græcos & Latinos summa est. Nec mirum uideri debet, si ut multi, & ætatis feruore & calentibus adhuc Poetarū studijs adductus sum, ut tentarem quid in eo genere possem. Itaque si prosæ faciendæ magis forsitan idoneus essem, tamen ad hæc Poetica conuersus, ubi per ocium licuisset, commoui me plerunque heroico gradu, & ad numerum aptè uerba ceciderunt. Accedente postmodum grauiore ætate & negociorum multitudine retrocessi: neque nunc iam senex huiusmodi aliquid meditor: non quòd Poeticen contemnerem, de cuius laudibus quandoque scripsi, sed quòd grauiora studia, aliaque ad uitæ cultum necessaria nullum carminibus locum reliquerunt. Attamen quæcunque olim lusi, nunc palàm facere decreui, quia nonnullis eodem poetico furore correptis placere posse, existimaui. Natura enim affert, ut ijs, qui eodem morbo collaborant, & similiter mouentur, faueamus. Cæterum illud Virgilianum si dixero.

Et me fecere Poetam
Pierides, sunt & mihi carmina.

Arrogans uideretur, Ego enim serias addixi lucernas iuris ciuilis sciētiae, nullus unquam me ab hac dies, nulla uox remorata est, quod ex responsum libris, quos edidi, ex magistratibus, quos gessi & gero, satis elucet. Poetam dici non mereor, nec affecto, sicut nec affectaret ille se pictorem uocari, qui unum aut alterum, aut tertium opus effinxisset, quanuis absolutissimè id peregisset. Et quoniam superius facta est mentio Pieridum, quæ alio nomine Musæ uocantur, possem de Musis postquam sermo nobis eas obtulit, & de carminibus agitur, plura dicere. Nam & de origine earum quæritur, & de nominibus, & de numero, deque earum duce Apolline, & quomodo antiquitas easdem uelut Deas quasdam poesis & cætus studiosis uoluit præsidere: sed prætereo, quoniam res longiorem deposceret orationem. Illud non omitto, Musarum nomen non solum pro cantu, sed etiam pro humanitate, doctrina, & literarum studio accipi, nam rudes & illiteratos homines, nullum cum Musis habere commercium, uel à Musis auersi dicuntur: Sed scientia pollere Musas quarumlibet rerum atque memoria, uel illud indicat: quòd finxit ipsas Antiquitas Iouis & Mnemosynas esse filias. Hinc eas etiam Mnemosynas idest memorias uocat Ausonius, & Iouem scientissimum esse tradit Homerus: ob idque, quòd plura sciret quàm fratres, ait regnum cœleste obtinuisse. Et Virgilius in inuocatione Musarum illud protulit.

Et

In metra sua Poetica

Et meministis enim diuæ & memorare potestis. Ego uerò si in hoc uersuum meorum opusculo aduoco Musas in auxiliū carminis (sicubi inueniar id fecisse) non superstitione gentium eas adesse uelut Deas quasdam cupio, quas constat (si aliquando fuerunt) mortales fœminas fuisse, tūm canere solitas, tūm in aliis eruditas: sed ingenium, scientiam, eloquentiam, memoriam aduoco, quæ ab unico uero Deo proficiuntur, qui solus Pater est luminum. Hoc etiam sedulò caui, ne qua lasciua, turpia, impudica, fœda carminibus meis immiscerem, quod etiam apud gentes improbatum est, quæ hac ratione mihi uidentur Musas finxisse Virgines, quòd deceret Poetam pium esse, & castum & pudentem, & quasi Virginali uerecundia, ab omni immunditie & corruptione procul. Scite igitur Lucianus: penès quem Cupido cum matre colloquens, & ueluti Imperii sui reddens rationem, asserit se Musas à suis iaculis intactas relinquere, propterea quòd modestiam earum, grauitatemque, & assiduam simul magnarum rerum meditationem reueretur, & mira insuper cantus dulcedine mulceatur. Prudenter etiam Virgilius, qui quum infaustum illum Aeneæ & Didonis congressum describeret, illud tantum attulit.

Speluncam Dido, dux & Troia nus eandem

Deueniunt.

Vlterius progredi noluit, reliquum malens suspicionibus nostris relinquere, quàm ipse dicere, & fœditatem aliquam legentium oculis ingerere. Sed de his satis, & fortassis nimis multa. Non enim soluta oratione uagari propositum fuit, sed metra Poetica afferre, quod genus literarum iucundius esse solet.

De Mago.



Qy i naturæ causas arcanaq; cœli
Mente agitas, nec scire nequis, te docte precari
Cogor, opemque tuam dubiis exposcere rebus,
Adsis, quidq; petam (nec erit mora longa) docebo.
Carmina si cœlo spargantur dira sereno.
Heu uideas toto gradientes aëre nimbos,

Tum ferruginea cœlum subtexitur umbra,
Impiaque æternam sperant sibi sæcula noctem,
Ipse diem luce incendens, clarusque coruscis
Phœbus equis, tegitur caput atra nube, polumque
Inficit, & magicos haud uult spectare fufurros.
Nec meliora intempesta sub nocte feruntur,
Sidera nulla micant flammis, tum candida Phœbe
Lumine læta, uomens fraternos cornibus ignes

Theffalica

Proœmium. 1161

Theſſalica cœlo ad terras traducitur arte,
Atque ita carminibus rerum natura nouatur.
Stare amnes, uiridesque ſolo decedere ſyluas,
Et uideas toto gradientes æquore montes.
Deque ſuis alios ſegetes diſcedere in agros,
Excitosque imis manes uolitare ſepulchris.
Neu uates finxiſſe putes, Aegyptia quondam
Tonſa (quis hoc credat, niſi ſacra uolumina ferrent,
Aſtruerentque fidem) ſerpentis ſiſtitur ore,
Tergaque conuoluit ſquamoſa ac ſibila mouit,
Quæ uis uerborum tanta eſt? cur Dæmones inſtant
Humano generi, atque oculis illudere certant?
Et uitare artus audent, & uertere mentes?
Redde iſtis cauſas, terrent me monſtra magorum
Chare Pater, ſic ſis ſanctorum in coetibus ingens,
Sic tua ſe ſubdat præcordia ad intima Chriſtus,

Hilario.



IGNA recenſeri præclare imitamina uitæ,
Perpetuo digni celebrari carmine patres,
Qui recti meritis tranarunt æthera, quique
Infudere diem cœca caligine merſis,
Grandia ſed magnis poſt commemoranda Poetis
Prætereo, Aonio uixi procul amne, nec inter
Aſpicio nigros hederam mihi ſerpere crines,
Quicquid erit, ſpacio circum breuiore uagari
Fert animus, nec multiuagos trahet orbita curſus
Tu Princeps, Tu purpureis da lora quadrigis,
Carpere iter iubeas, mox feſſos excipe curſus.
Nobis Aſtenſi eſt genitus Hylario terra
Corpore fuſus humi tacita, ſed mente petebat
Æthera, congreſſusque Dei, & conſortia nota
Sanctorum: Hinc peſtus placido ſuccenſus amore,
Hinc ſperare audax, æternæ & fidere uitæ.
Ergo ubi mortales ruſſum deuectus in auras,
Ingentique ſuper labentia peſtora motu
Excutit, arrexitque comas, & lumina cœlo,
Fata canit, moresque & uitæ incommoda uoluit.
Ora ardent uatis, nec iam mortalia uerba
Et maiore ſono atque auguſtis faucibus aſſans.
Tum terræ affixos homines ſuſtollit in altum,

Et

In metra sua Poetica

Et patriæ reddit ciues, cœloque reponit,
Hunc inquit Solem Deus edidit, astraq; & omnem
Ornatum flammæ, quanto præfulgidus ille
Hos lucis fundens radios, quod cernitur omne
Ipse creat, templique sui, Deus ipse sacerdos.
Aeternas animas dedit, & calcare iubemur
Hoc mortale solum, flammantiaque astra tueri,
Namq; abiecit humi pecus omne in gramina tendēs,
Astr hominem arrexit, cœli, qui pabula semper
Carperet, atque sui signauit lumine uultus.
Quin etiam proprio mortalem sanguine culpam
Abluit, & mortis uictor cœli alta reclusit,
Aereaque aduersæ confregit limina portæ
Omnipotens, pudeat rursus peccasse redemptos,
Mortales, ultroque uocantem auertere Olympum.
Hæc patria: hæc nobis sedes, hinc ducimus ortum.
Huc repetit, cunctosque accersit sacra Dei lex:
Degeneres ne iuuat spirare? hoc uincite Ciues,
Hoc prohibite, nefas, æui sit cura futuri.
Ingenium in nobis uiget, & cœlestis origo,
Quam foedare malum est, sed nos hauri ducimur istis,
Non amor ipse Dei cordi est, non fulgida uirtus,
Sed scelera atra regūt, quæ nā hæc fraudesq; rapinaq;
Iraque, insidiaque, oculorum & multa libido.
Blanda tenent, quæ prima malus sibi sua fuerit ardor.
Exclamare iuuat mihi nunc, quod Persius olim,
O curuæ in terris animæ, & cœlestium inanes,
Foelices, quibus alma datur mandata tueri,
Qui mente affixi superis, fratrumque salutem
Corpora proiecere, & inanis sæcula curæ,
Non epulæ, nec amor uesanus torquet habendi,
Pascuntur baccas, in potum, fluminis hauustus
Sufficit, intextum tegmen dabit ardua palma,
Oblestant uarijs halantes floribus horti,
Et quæ prole grauis frondosa attollitur arbor,
Purior eletroque cadens per deuia Riuus,
Hinc uolucres lapsu per frondea tecta canoro.
O secura quies, non diuitias alienas
Expectant, quibus alma suas natura ministrat.
Neu segnes iaceant, molli fallentia lino
Retia, uel calathos agresti uimine nectunt,
Septenasque die dulci modulamine laudes
Ore canunt, niuei tanquam inter sydera cicni,

Et

Et uideas tendentem aliquem de more supinas
 Ad cœlum palmas, non ullos ducere gestus
 Inflexa ceruice, putes è marmore signum.
 Tantis amor, tanta est orandi gratia diuos.
 Hæc primi monachi fecere, atque inde minores,
 Quis syluæ hospicium, & squalentes puluere campi,
 Rupis & abscissæ filices, collesque maligni,
 Soli etenim ductare ausi procul urbibus æuum,
 Et turbam fugere, & toto se auertere seculo,
 Ipse ego quid potius complectar & insequar ultro?
 Talibus en fateor multum mea pectora flecti,
 Moribus exemploque uirum speculoque teneri,
 Vos miseri, quod uota trahunt? quo'ue impulit auri
 Regnorumque sitis? quod uentris prona uoluptas?
 Ille sui famam succedens nominis, atris
 Hinc facibus tinctus cædemque ac bella ministrat,
 Huic mercis cura, & mendaci callidus ore
 Rem parat: Ille uorat, censumque in uiscera mergit,
 Hic gemmis radians sordet mox numine uerso,
 Iudicis at supplex odit reus ora uerendi,
 Multis occulto crescit res fœnore, multis
 Ambitio atque aurum locupletes præstathonores,
 Conductique reis uendunt periuria testes.
 Vrit amor, torquent niuæ laudata puellæ
 Pectora, porrectæque manus, oculique micantes,
 Heu heu, quod formæ capti labentis amore,
 Delectant terreni artus moribundaque membra,
 Et pecudum ritu commisto corpore fœdus
 Coniugij, & certæ prolis confundimus ortum.
 Ast ubi digressus membris calor ossa reliquit,
 Tartara habent, cœli fulgentis trudemur oris.
 Num saturare queunt mortalia? quæ sitis auri
 Expletur? pacem'ue dabit, quæ copia rerum?
 Sola quia Deus est, atque alti regia cœli.
 Hæc uates (neque enim grauior spes ulla salutis)
 Humano generi uoluit noctesque diesque,
 Nunc placdè incendit, dictis nunc carpit amaris
 Post hæc fata canit, uenturi haud inscius æui,
 Spirantisque Dei perfusus lumine uultum.

Veris tempora.



IDIMVS O'Princeps læta inter pocula uatem
Egregium & clarum meritis, qui tempora lauro
Velatus, fulgens ostro, & testudinis aureæ
Intentans neruos, tales dabat ore loquelas,

Impulſasque ſono cunctorum arrexerat aures.
Fugit hyems, redeunt primæui tempora ſoris,
Purior orta dies campis, auræque tepentes
Aspirant: uiridi tellus ſe gramina uestit:
Nudatæque ferunt ſyluæ iam frondis honorem,
Iam gemmas trudit palmes, iam falce premendus,
Et duræ facies terræ renouatur aratro.
Nec non denſa comis arbor umbracula tendit,
Lilia nunc commiſta roſis, uiolæque leguntur.
Pallentes, nunc puppe ſecant immobile marmor,
Ecce autem gracili modulatus arundine carmen
Hirſutus paſtor niueas agit ante capellas,
Ille per dumos pendent de rupibus altis
Arbuta tondentes, & concita flumina potant,
Cum Sol altus agit currum, nec dum imminet undis,
Sub noctem nam cogit oues, numerumque reducit
Dux gregis, innixus baculo, uel ſtipite querno,
Nec minus interea cœlo uolat ales aperto
Huc illuc pennis trepidantibus, & modo cantus
Ore premit dulces, modo ludit in æthera giris,
Nunc fingit nidos, aut natis colligit eſcam,
Ac propriis ut certa forent ſignanda diebus,
Ipſe Deum genitor deſcripſit quatuor annum
Partibus, & iuſſit ſua per uestigia uerti,
Vndique ſe tollunt pubenti ſemina uere:
Fundit humus latè flores, mox ſtringit ariſtas
Torrida, proque ſuis gratatur frugibus æſtas.
Nec pater Autumnus non foetu exuberat anni,
Poma manu carpunt, & lectas collibus uuas
Agricolæ exportant, nec non coriſosque nuceſque
Caſtaneasque ferunt ſyluis, iuſtiſſima donec
Ipſa ſibi reparat uires iam feſſa ferendo
Tellus, & gelidis requiſcat ſepta pruinis.

Nympha-

Nympharum chorus.



ARMINA scribentem mirabere, & ocia molli
 Ducentem uersu, at ludo, mentemq; reflecto
 Intentam, & dicor magnorum exempla secutus:
 Nec me adeò hinc cupio spectari, ullos'ue laceffo
 Aonios uates, nisi quid magno ore sonandum,
 Ingentemque tuæ laudis conuoluere molem
 Expediat, toto tunc ducam carmina nixu
 Altius insurgens, maioreque numine fultus,
 Primus ego solenne tuum per carmina nomen
 Audebo celebrare, sacrisque intexere chartis.
 Primus ad Astra feram radiantia, nec tibi nulla
 Aut leuis ingenio quæretur gloria nostro.
 Te memorant sacris studiis atque artibus auctum
 Ingenuis, belloque ferunt præstare gerendo,
 Seu sit opus gladio niti, seu uertere fraudes,
 Adde quòd egregias urbes, pelagoque potentes
 Imperio frœnas, quid Gallica pectora dicam
 Pulsa? quid Helueticum immitem, mortique paratum,
 Erectumque manu bina de gente trophæum
 Vim diuinam animi, atque ardentia facta nepotum
 Quicumque accipiet, mirabitur, inclyta dicet
 Sæcula, quæ genuere uirum. Sublimis in ostro
 Ipse mihi uideor medias incedere gentes
 Atque tuis dare per populos spectacula rebus,
 Conueniunt celebres, captant mira auribus acta,
 Oraque uersa uirum pendunt dicentis ab ore.
 Interea tenui sectabor carmine rura
 Pastorum, & celsa pendentes rupe capellas,
 Et liquidos gregibus fontes & gramina riuis
 Sufficiam, latisque intexam uitibus ulmos,
 Pabula lata canam, aut Veneris memorabimus ignes,
 Scilicet & cœlo & terris uis regnat amoris
 Sponte sua: Cedunt uolucres, armenta, feraeque,
 Humanique animi pudor & reuerentia morum,
 Cur non & gracili complectar carmine Nymphas,
 Quis nemora & rupes & stagna liquentia curæ,
 Nam uidi, gressusque Diarum sæpè sequutus,
 Quasque fauere uelim, nunc compellabimus ultro.
 Princeps. quæ fandi doctissima cymodocea,

HH 2 Cui

Cui notæ herbarum uires, quæ sidera seruât:
 Tum præstans citharæ neruis atque arte canendi
 Melpomene; hæc delecta Deo, qui tempora uoluit,
 Scire uetusta potest: nec eam sua sæcula fallunt,
 Mores, & studia, & & populos, & prælia nouit,
 Sæcula, progeniesque uirum, atque exordia mundi.
 Nisæ, Spioque, ligeaque, Phillodoceque,
 Ornatu similes, diuerso at lumine formæ,
 Et succinta manu spargens hastilia Xantho
 Venatrix, ludensque Opis lasciua sub undis,
 Quæ placida sub fronte nigrantes torquet ocellos,
 Lidia, & effusa partu Lelprotides uno,
 Par facies, par forma: parique cupidine florum,
 Altera sed tedas iam dudum experta iugales,
 Cydippe, & Drymo, & Clymene maturior æuo,
 Atque ornata comam lauro uiridante Thalia,
 Astaque pulchra, sed ante alias pulcherrima phyrne
 Flauentas proiecta comas per candida colla,
 Ceu Sol cum spargit radios, modo contrahit alta
 Nube premens, talis si in nodum colligit aurum,
 Ore flagrans roseo nymphas supereminet omnes
 Arrecta ceruice, uomunt & lumina flammæ
 Sidereas, frontique aspirat mollior aura,
 Iuncta choro Dryadum, qualis cum clara cadentes
 Excipiens stellas tenebris aurora fugatis
 Emicat, effunditque iubar toto aurea cælo,
 Auro intertexto molli uelantur amictu
 Membra decora Deæ, celeri nunc concita carpit
 Arua fuga, aut gradiens florentes poterit herbas,
 Densis tecta comis altæ nunc arboris, & nunc
 Dulcè canit uitreæ consistens margine fontis,
 Atque aliquis iuuenum magno succensus amore
 Insequitur, nymphæque legit uestigia, donec
 Conditur in tenebras cælum surgentibus astris.
 Nec tamen in noctem requiescit pectore. Fœlix
 Qui nescit flammæ, uixitque ignotus amori.

Epitaphium.

Epitaphium.



VPER agros lustrans ferali inducta cupresso
 Marmora conspicio, accessi, causamq; locumq;
 Admirans nosco, atq; oculos per singula uoluo.
 Non ego phœbeus uates, nec carmina fundo
 Musarum auxilio, sed si Princeps mihi solus
 Ipse aderis, referam tumulo, quæ lecta notauī,
 Et fortasse feram nonnullum in carmine nomen:
 Nanq; ferunt fama Asinium Hieronymo Adurno
 Extincto ingenti, uitali & lumine functo,
 Post luctum & gemitus, postquam feralia duxit,
 Post consanguineis quam struxit manibus uram,
 Multa quidem, sed & hæc trepida tunc mente loquutū,
 Suspensumque fuit tumulo post nobile carmen.
 Eloquar? an tanta hæc tacitus memoranda relinquam?
 Interitu nam cuncta tuo cecidisse feruntur
 Magnanime Heroum, uix sol immittere flammās,
 Vix fulgēre polo mortalibus astra uidentur,
 Occidis ante diem, uiridique extinctus in æuo,
 Redditus heu serò patriæ, quam funere linquis
 Festino, quæ nam ciues fortuna reuifet?
 Heus Genua ingenti luctu concussa, quid ultra
 Inuenies, quod ames? quis tanta laude superbam
 Afficiet posthac? quo te iactabis alumno?
 Tecta gemunt, mæstis onerati uocibus agri,
 Nunc fora uasta silent, legumque examina pendear,
 Nec quicquam inculat superos generosa iuuentus,
 Flent mæsti, mussantque patres, squallere uideres
 Tempia Deum, & nullis ornatas torquibus aras,
 Vndosumque sonat latè mare, & æquora fundo
 Sollicitat, fluctuque fremens petit astra tumentī,
 Et fera uentorum rabies immurmurat auræ.
 Cuncta rapis moriens solatia: quid tua uirtus?
 Quid nostræ ualuere preces? fata obuia duras
 Exercent leges, dolor undique tollitur ater,
 Te bello Insubres durum genus, almaq; Manto,
 Roma sacerdotum domus, & Ferraria luxit,
 Quique undas colit Hadriacas, Arnique fluentia.
 Non ego cuncta loquor: uires iniuria luctus
 Debilitat, nec habet neruos nunc copia fandi,

Nec

Metra sua

Nec sublimē queunt uates inducere carmen :
Tu tamen interea cum Dijs fœliciter æuum
Exigis, & clari famam uirtutibus implet
Nominis, æternum tua quod post fata relinquis,
Martis eras specimen, nec non Parnasia Laurus
Grata tibi, poteras dicendo inuertere mentes,
Atque armare manus, mox soluere pectoris iras,
Te summus coluit pastor, Rex magnus amauit,
Et datus Augustas sapiens Orator ad aures.
Quid memorem, ut Latij uindex arma undique regum
Excieris, superas Alpes, amnesque ruentes,
Acratas ducens acies, dum frigida torpet
Bruma gelu, & medijs canum caput exeret aruis.
Iam uero insignes pugnas partosque Triumphos,
Mox squallenti auro effingam, uel marmore leui,
Et faciam plenos spumanti sanguine riuos,
Fusaque per campos immania corpora ferro.
Ipsū instare manu, ruerē agmina barbara retro,
Conuersoque fugam tentare per æquora tergo:
Tum uinctæ stabunt gentes, tum denique fundens
Purpureum ore iubar currum sublimis habebis:
Et circum auratis ludens uictoria pennis,
Innumerique uirum plausus; succedere tectis
Incipiet pompa hæc decoris, tunc protinus æra
Verbere pulsa sonum uacuas dispergere in auras
Sublimem incipient, simul ore infrendet ahenō
Machina fixa rotis, gaudebunt pectora matrum.
Hæc excussa dabo molli spirantia forma:
Instituamque pios celebri certamine ludos
Ad tumultum, fuluum ponens uictoribus aurum,
Et niueum Mironis ebur, laurum que uirentem,
Hi cursu, alij luctando, coestibus illi
Decernent; & equis belli simulacra ciebunt,
Inque tuas ibunt certatim carmina laudes
Egregij uates: sed enim uenerabilis aræ
Frondeūti insistent, magnis de more sacerdos
Libabit diuis, huic pura in ueste ministri
Sacra canent, crebris scindentibus aëra flammis.
O qui mortales linquens nunc aurea calcas
Sidera cœli, ades, & nos omine respice dextro.

In Natale

In Natale Domini.

Si uatem diuina licet conscribere, dextra
 Christe faue, & celso surget tibi pagina uersu,
 In que tui aduentum & geniti cunabula tota
 Mente ferar, non iam molles euoluere lusus
 Addecet, aut uacuis dare mentibus Hercules acta,
 Seu Martis Venerisque dolos, Troiæque labores
 Infandos, & quæ perhibent mendacia graij,
 Ipse crucem dextra gestans foelicis oliuæ
 Sacra canam, per sancta pedem mysteria ferre
 Incipiam, & summo mens aspirabit olympos.
 Floreat almus ager latè dum augusta canentur,
 Et fletant maria, & murmur uos ponite uenti
 Immodicum, Auratoque magis Sol luceat ore,
 Ordinar à Maria. Hæbreæ hæc foemina pubis
 Insignis Regi superum se addixerat alto,
 Et placuit pietate & uirginatis honore,
 Non aurum, nec opes, sceptrum, imperium uel petebat,
 Ast humiles uoluit curas sublimia temnens,
 Templum augustum ingens solymis, idque omnibus unum
 Iudæa de gente uiris fulgebat in auro,
 (Clarum opus) argenti que micabant lumine ualuæ,
 Sed multo pecudum tellus perfusa cruore.
 Hæc domus alta Dei, nanque hic & uerba precantum
 Accipere, & dare proicetis oracla solebat,
 Et sacris aderat, iustisque in tempore uotis,
 Hic ancilla Dei iam tum puerilibus annis
 Assuerat, famulamque dabat, longe intima cordis
 Flagrabant, pietasque operis succenderat ignem,
 Sæpe dies, dum mente Deo coniungitur, ibat.
 Vltima labentis uoluntur tempora sæcli,
 Quum Deus affectans hominum fulcire ruinam,
 Collapsamque genus miseratus, inania coeli
 Atria dum lustrat, subit illi dedecus ingens,
 Serpentis que doli, uulgi que, quod exulat oris
 Innocuum patrijs, & gens fraudata triumpho.
 Hæc delere parans sepsit se Virginis aluo
 Immensus, tulit illa utero, quem gesserat olim
 Corde Deum, & nomen genitricis filia coepit,
 Illa nec intra si labefecit claustra pudoris,

Quamuis

Quamuis iuncta toro, mater sine seminis haustu
 Facta, uoluptatis motu non tabuit atro,
 Sensit onus nullum, nulloque excussa dolore
 Virgo uterum, mox quem peperit reuerenter adorat,
 Admiran siubar effusum radiosque micantes,
 Et pueri formam lucem sub nocte cientem.
 At non marmoreis subsistunt tecta columnis,
 Non auro effulgent postes, aut are politæ,
 Nec puer effultus generoso uellere serum,
 Sed stabula alta domus, iacet in foenilibus infans,
 Afflatu fatus bouis & sociatus asello.
 Quis pompam insanam credat? dominator olympi
 Dum studium damnaret opum, sic uenit egenus.
 Ecce manus, (neque enim superi miracula condi
 Tanta sinunt) pastorum adit, & mox regis honores
 Impartit puero propter iumenta cubanti,
 Angelicusq; super pictis exercitus alis
 Obstrepuit, pro pace bonis mortalibus orta;
 O Nox, lata trahis, quæ post te secula, salue.
 Cuius in aduentu solemnia prisca fatiscunt,
 Et trepidant delubra, & partu Virginis horrent,
 Quin etiam fixo radians stella aurea crine
 Barbara corda uirum trahet, & uestigia ducer,
 Signa sed immenso data quis miretur olympo?
 Cætera mota loco? naturæ hic uertitur ordo,
 Factus homo Deus est: & Virgo foemina mater
 Prædicta implentur uatum, tum manibus imis
 Læticia affulsi sperant sibi tradier astra,
 Credo equidem, dabitur patefactum limen olympi
 Cernere, & excussos arato è cardine postes,
 Nec longum sanctorum animæ loca tetra coletis,
 En Deus in terris genitricis fusus in ulnis,
 Qui mortale genus collapsum ad sidera tollit,
 Iste dabit noua secla puer, dominabitur oris
 Omnibus, ipse feret uestigia sicca per undas,
 Rursus, agent animæ se in corpora, languida surgent
 Membra operi, tantum imperij fert ille; tenebris
 Qui demum exactis uitæ aurea dogmata conder,
 Vexilloque suæ depellet tristitia mortis,

In passionem

In passionem eiusdem.



VVM subit illa dies, quā uasti rector olympi
 Sponte sua incubuit fato, turbæ que furentis
 Verbera sustinuit, lusus, iramq; minasque;
 Affixusque cruci, gemitus tunc tollitur imo
 Corde, rigant mœstum lachrymarum flumina pectus.
 Nanque parens primus dia in regione locatus,
 Quæ patribus quondam Paradisi nomine dicta est,
 Illic uer latum, campos quoque purior æther
 Excipit, & fulgent æquantia sidera Phœbum,
 Flumina lactis eunt, pendent de sentibus uua
 Purpureæ, duræque ferunt mella humida quercus,
 Tum Zephyri pennis mulcentes lenibus auras,
 Fusaque per campos uitrea uada limpida fontis,
 Hospitijs uolucres passim frondentibus ora
 Soluere, condensis que pecus colludere syluis,
 Ipse inter tantos pater ut deductus honores;
 Qui fuerat tenues, è limo arrectus ad auras,
 (Nec mora longa fuit) fregit mandata uerenda,
 Serpentis que dolo, monituque (heu) coniugis ausus
 Carpere poma manu, & uetito gustare palato,
 Ausus, & ad superos reditum crudelis ademit,
 Nam noua posteritas traxit contagia fraudis,
 Auditæ è summo uoces, tum uisa moueri
 Ima soli, & foribus constridere limina uersis,
 Moeret opem implorans patrijs gens exul ab oris,
 Nemo hominum æthereos cœli conscenderat axes.
 Ille amor, illa Dei pietas haud fabilis ulli
 Soluere triste nephas parat, & se deuouet aræ,
 O nos ignaros rerum, acceptæque salutis
 Immemores: Nobis Deus in mortalia fusus
 Membra, polos aperit, uitæque beatius æuum,
 Ipse, sed heu moritur fato confectus acerbo.
 Ecquis erit uates, tristes, qui euoluere casus
 Sufficiat, quamuis hederæ pallentis honore
 Tempora nexa gerat, magnoque sit ore, fanoque
 Non ne uides torto laceratum uerberare corpus?
 Liuentesque genas? Tibi enim tibi maxima regum
 Vallatum spinis caput, & diadema cruentum
 Impositum, uiridi mox fixus stipite, nudus
 Tolleris, atque lacer gemina inter crimina pendes,
 II Ecce

Ecce pedes, sparsæ que manus de vulnere foedo
 Sanguineas spargunt guttas, & liquitur atra
 Tabæ cruor, patet ausonia quoque cuspidus ictu
 Pectus, & effundit fluuium mistum que cruorem.
 Quin etiam oblata est ori (ne tristia desint)
 Spongia felle tumens, nostram at sitit illa salutem.
 Prætereo quæ uerba pio tunc fuderit ore,
 Distractos comites ac cætera transeo gesta,
 Quæ uulgata nimis, terras que immissa per omnes.
 Qualis eras ah Virgo parens, quum infanda uideres
 Supplicia, & quanto præcordia concita luctu,
 Fessa iaces. Nunc prona crucem moritura tenebas,
 Sanguineum captans stillantem è stipite rorem.
 Vt que olim cecinit senior, transfixit acuto
 Pectus amans gladio, atque imis dolor ossibus ardet,
 Martyrium immensum sine sanguine, tollite luctum,
 Atque piæ matris moueant tormenta dolor que.
 Tempore quamquam illo sublimia corpora mundi
 Haud commota parum, luctus quoque signa dedere
 Immoriente Deo. cæca caligine Phœbus
 Abdiderat se se, & Lunæ tum expalluit orbis,
 Illa etiam (ut quidam perhibent) quum tota decoro
 Fulgeret uultu, uisa est se iungere fratri,
 Insolitas que uias carpsit (miserabile dictu)
 Hinc lux omnis abijt, tenebræ que sequuntur inertes.
 Aeternam que sibi metuit gens impia noctem.
 Summa que terrarum insolito concussa tremore
 Aequora, nutabant syluæ colles que supini,
 Et uada falsa, amnes fluuii inuexere salubri,
 Tum uererum simulacra uirum iam corpore functa
 Longum uisa queri, & squallentes promere uultus,
 Ossa que sanctorum ruptis errare sepulchris,
 Obstreperè horrendum uetus ara, & scindere uelum
 Humanos fletus referam? quin plurima circum
 Agmina funduntur diuum, qui nuntia portant
 Summa leues, Olli lachrymis ficta ora rigabant,
 Affusi que cient alarum uerbere planctus,
 Ferreus est, qui non tacita pietate mouetur
 Nec Christus pater est illi, nec fide fidelis,
 Ipse crucis lignum complectar, & oscula figam
 Vulneribus, quæ fulgentis cæli atria pandunt
 Ipse dabo supplex fletum, & miserebor amantis,
 Nam fluuii antiquum crimen lauit ille cruoris,

Ante

Ante tamen legis mandata edixerāt, ante
 Tradiderat se ipsum mensæ, ritumque sacraret.
 Solus ego? at potius multorum hæc pectora tangunt.
 Atque aliquis spectans crucifixum talibus infit,
 Christe decus coeli faueas adsisque precanti,
 Morte tua uiuo, tuaque hæc per uulnera feruor,
 Sed delicta premunt, proprius quæ conficit error
 Corruptus blandis, ignosce, dabisque salutem
 Ecce iterum nobis, bonitas tua fertur in hostes,
 Et lapsos reuocare solet, te consequor ultro,
 Nec si uita mihi pro te ponenda, relinquam.

In Resurrectionem.



VNC spirare Deum incipio, nunc pectus anhelum
 Feruet, & immensum iam concipit æthera mente,
 Illuxit q; comæ, labra & sacer ignis adussit,
 Ne polluta darem, aut squallentia carmine ferrem
 Iam mihi nescio quid uideor sublime tueri,
 Quæ nam hæc pompa frequens? Christus rediuiuus ab orco
 Ecce uenit, fulget que suo post funera uati.
 Impositum tumulo est corpus, sed mortis acerba
 Deposuit non præda fuit, nunc uenit in auras.
 Aspicio uolucres diuos, quibus ignea flagrant
 Lumina, & albenti corpus uelatur amictu,
 Anteulant, pennis que secant fulgentibus auras,
 Pars pedibus plaudit choreas, pars carmina neruis
 Elicit, ac dulci non cessant psallere cantu,
 Lætitiæ que fremunt, & ouant Osanna canentes
 Ut que aliquis clara præfatur uoce, resurgit,
 Alleluia sonant socij læto ore sequuti.
 Ecce latro, qui sorte cruci tunc fixus atroci,
 Nunc circum radiis undantia tempora uoluit,
 Hunc delicta uidens Christus sua se que fatentem
 Hanc que fidem admirans, dextra conuersus ad illum,
 Mecum hodie lustrabis ait magna atria cœli.
 Sed nunc signa præunt fœlicia, cerno coronam
 Insignem spinis, rutilum uomit illa nitorem,
 Non iam poena, sed extat honos, tot ab ignibus ardet,
 Non Bacchus dedit, ipse Deus sibi texuit orbem.
 Tum terni clauis, & splendenti lancea ferro
 Emicat; his Christus mortalia damna rependit,
 Auditum, sitio, circum dum spongia fertur,

Verberaque insonuere sacro perfusa cruore;
 Et iam seraphici graditur decus ordinis ingens;
 Ore ardet rubro, & iactatis calfacit alis;
 Candenti similis ferro, quod tingitur unda;
 Qualis ubi ostendit terris se martius ardor,
 Dum rutilos spargit radios, iactatque cruentas
 Ore faces, turbant urbes, tunc Caesar anhelat;
 Sæuus in arma magis, bellumque exfuscitat ardens,
 Italiaque procul detrudit sinibus hostem;
 Haud secus ignescens flammis tunc Angelus ibat.
 Flecto genu, fert ille humero uenerabile lignum;
 Ingentemque crucem tollit. Hæc Dæmonas arce
 Hæc sibi colla Ducum & populorum ingentia facta
 Sternit, & a Gadibus latè extolletur ad Indos,
 Et qua sol oriens, & qua ambit littora Nereus,
 Supplicium seruatorum olim, nunc nobile signum;
 Foelix tam dulci, quæ strata est pondere, & aulæ
 Aetheriæ regnum foelix, quæ retulit arbores.
 Gloria quanta Dei, quam secum & tristia portant,
 Ipse crucem poenamque suam uestiuit honore.
 Currus adest fulgens, recto temone rotisque
 Volucris, biugiue fremunt ad fræna leones;
 Nuntius humanæ pacis missaque salutis
 Gabriel hos flectit, magnique auriga triumphi;
 Et modo fræna premens gemmantes explicat alas,
 Nunc cursu campis quatit afflans naribus ignem,
 Iamque ducis formam uideo fulgere, nouumque
 Eructare diem, & lucem succrescere coelo;
 Argumentum ingens tandi. Nam à morte recepit
 Se Iesus, uictorque uenit, stat cominus axis.
 Ille habet ossa sua & neruos, membrisque coheret,
 Et terrena animam passim per uiscera fundit,
 Ostentatque pedes, fixasque ad uulnera palmas,
 Nec non confossum latus exuit, illa salutis
 Pignora quum tueor, dulces mittentia flammæ,
 Non mihi frigus habet pectus, non cura fatigat;
 Pace fruor, menti que iugor succrescit in horas;
 Haud aliter, quàm quum sub luce cadentibus astris
 Carpere si qua rosas uirgo uelit, illa iacere
 Vda uidet folia, & concluso hæc orbe teneri,
 Ast ubi purpureis aurora inuecta quadrigis
 Imminet, assurgunt paulum, spectantque supinæ,
 Tunc & hiant, funduntque comam, patulumque decorem
 Ad



Ad solis fingunt radios, color eniter ollis
 Aureus, atque rubent latè: Tum candida Virgo
 Postibus occiduas diuum fixura corollas
 Vngue legit, gratis complentur odoribus auræ.
 At quæ sectentur uolucrum lata agmina currum,
 Qui, cœlum & terram torques Deus, hiscere uatem
 Da pater, atque faue, tuus O nunc spiritus afflet,
 Perque means hominis pectus diuerberet auras.
 Post hac pulsa dabo meliori carmina plectro,
 Si uictrix patria, & ciues spolia ampla referrent,
 Tunc ego gesta ducum, ac mauortia dicere facta
 Aggrediar, fufum'que canam sub mœnibus hostem,
 Rapta'que signa manu, postrata'que cœdibus arma,
 Et quod quisque uirum dextra sit fortiter ausus,
 Consilio ue bonus, seu iuuit callidus astu,
 Ipsa oculis exposita palam spectata'que uirtus
 Attollit se se, & numerose uatibus ultro
 Funditur, haud paruo ore canunt, sed protinus afflant
 Pectoribus immensa, & carmen ducitur ardens:
 Ingenii angustis iaceam quum finibus, at tunc
 Assurgam, & uersus mihi fas tractare sonantes.
 Nec minus ingrediar magni si Cæsaris acta,
 Verba'que ad augustas transmittam feruidus aures,
 Tum mihi Pieridum stabit chorus omnis, & ultra
 Quam solet, effudent fluuium Lymphas'que loquaces,
 Dum pectus cœleste uiri & sacra ora uidebunt.
 Nunc diuina mihi cantata est carmine proles,
 Res immensa quidem & quæ uiribus altior exit,
 Ingenii Deus, & uenæ miserebitur orbæ,
 Sed sequar, appropinquans terris iam sistere puppim.
 Princeps ille parens, dulcis quem cœpit imago
 Arboris, huius enim pendebant uertice mala
 Aurea, & in nitido fragrantia molliter horto:
 Quæ pater ut mandit, syluis disclusus opacis,
 Impactus'que solo est imo, loca lumine cassa
 Incoluit moriens magna cum prole nepotum.
 Poena grauis nulli, at luctus gemitus'que sonabant,
 Quod densæ claudant tenebræ: spes incluta cœli
 Torserat egregias animas, lucis'que cupido,
 Succedunt alacres nunc rapti ad luminis auras,
 Nam Christus sua mox post funera fregit auernum,
 Tartareas'que domos, sanctos'que è carcere patres
 Eripit, & spolia ista refert præclara parenti,

En Abel, hic pingues uitulos maetabat ad aras,
 Fraternum hinc subiit mucronem, & uulnere inundans
 Se foedant, terramque ignaram sanguinis ante,
 Atque à cœde uirum puram, sit uictima fratris.
 Pampinea quis nam hic redimitus tempora fronde?
 En ades ipse Noas nobis, ut uitifer almus,
 Latitiæ uinique pater, nam uerius ipse
 Diceret inuentor uitis, populisque dedisti
 Diffundant quo corda mero. Tu lignea fabrem
 Tecta facis, longaque omnem tegis abiete carnem,
 Semina uenturi seclī & primordia seruas,
 Ne defecta nouo tellus segnesceret ortu,
 Mitia conduntur lateri pecuaria puppis,
 Magnorumque cubant illic stabula armentorum,
 Et uarias uolucrum pennas includis eodem:
 Haud mora, subductis descendere nubibus imbrēs,
 Immergi que uadis terram & fluitare profundo,
 Cætera dispereunt, tumidis Arca innatat undis,
 Angustoque ruens tecto diffunditur imber,
 Tum pater ipse Abraam Cananæis sedibus, auctor
 Inguinis excæsi, cui spes est credita prolis
 Egregiæ, hinc scepro stellarum insigne ferebat,
 Flammarumque globos, sublati cornibus ibat
 Dux populi Moses rubri trans littora ponti,
 Fulgidior specie, potuit spectasse supinis
 Collibus ora Dei, contraque attollere frontem,
 Vadit & effulgens, cui cura infixæ sacrorum
 Araon, & sancti custodia credita templi.
 Hic David, Ezechiel, fususque in litore Ionas,
 Et Daniel, uiridis sacrum, quem fecerat ætas.
 Quique Deo uates Christum spirante loquuti,
 Et quicumque habilis uitam ultro effudit in armis,
 Dum patriam seruare student legemque receptam,
 Omnibus his radiis cinguntur tempora puris.
 Quò feror? unde oculis specto Gedeona nitentem?
 Qui licet exiguus numero, magni agminis instar
 Iussa Dei secum trahit in certamina Martis,
 Non ualida hunc acies sistunt, non crebra morantur
 Tela uirum, furit atque metit quæque obuia ferro,
 Ille oculis ac fronte minax, dum feruidus urget
 Hostis iter, tenuit fugientia lumina solis,
 Affixus manet, & cœlo non protinus errat,
 Effulgetque duci Phœbus stans ore corusco,

Ergo

Ergo non uictis obscura in nocte latebra
 Profuit, aut specubus possunt se condere cœcis;
 Horrentes uē petunt syluas, prærutaque summis
 Saxa iugis, pendunt pœnas cœsi undique campis,
 Non Isaac, Iacobque absunt, non illa nepotum
 Progenies, tribubus fecit, quæ nomina certis,
 Et qui pro sacris tulerunt mala fortiter aris,
 Quique suos quondam tenuit moriturus agellos,
 Quin Ioachim propius uideo, Iosephque beatum
 Coniuge, flumineaque habitantem rupe Ioannem,
 Spargeret ut populos undis dextraque ruentes,
 Ah decussa uiro ceruix, proscindit acerbo
 Dum regale nephas odio, nunc omine uerso
 Aureus incedens duplicem fert fronte coronam.
 Quis Iob, Heliamque libens, magnumque Heliseum
 Transeat, audacem Iudam bello que potentem,
 Sansonis quoque uim & non exuperabile robur,
 Inuictos que alios dextra aut probitate uerendos,
 Sed citius quis summa polo, quæ sydera fulgent,
 Et fluctus maris, & campis numerabit aristas,
 Nomina, quàm possit percurrere cuncta uiro-
 rum Qui ueniunt, sancti que premunt uestigia currus.
 Sic modò Christus ouans sacra comitante caterua
 Ad Matrem ingreditur uictor, dein scandet olympum
 (Arrident que ultro dura olim limina) postquam
 Phœbeus terris decies quater arserit orbis.

Gratiarum actio.



AM lux immenso surgens albescere cœlo
 Coeperat, atq; solo tenebras absterferat udas,
 Quū uarijs uolucres mulcentes uocibus auras
 Huc illuc pennis ludunt, quum fortè iuuen-
 cus Expectat iuga, qui glebas inuertit aratro,
 Et quum pastor oues depellere cogitat, & quum
 Dux aciem mouet, & Zephyris signa aurea mandat.
 Tum pius Euadnes deserti littoris oras
 Ingreditur, tollens que manus, ut surgere solem:
 Purpureas que uidet cœlo diffundere flammæ,
 Istis ora modis senior sublimia soluit.
 Sol (ait) æterni sæcli, qui lumina ductas
 Huius, quem spectro: Trineæ, qui luce refulges

Vnicus,

151
 Vnicus, exaudi; nunquam tua sancta precari
 Numina segnis ero, miris'que attollere uerbis.
 Nam quod homo, cœlique domos, quod specto supinus,
 Et quod spiro, tuum est: per te'que animantia bruta
 Parent, & reliqua infamulatum tradita mentis,
 Adde quod arbitrio motus conuertimus omnes:
 Ingenij'que facem, atque animi lucem ipse dedisti,
 Et simulachra tuæ (maius) mihi mentis inusta,
 Idem animo ualeo, ac membrorum robore firmus,
 Munere quippe tuo, nec id est satis. Aliger unus
 Præsidet è diuis custos fidus'que minister,
 Dæmones expellit procul, atque incommoda trudit:
 Incendens'que animum recti ac uirtutis amore.
 Quid quum peccassem, ac factis tua iussa proteruis
 Fœdasssem infœlix? num uindice protinus ira
 Vtus es, aut dirum fulmen iaculatus in hostem?
 Cunctatus placidè indulges mihi tempora flendi,
 Correctus placeo non perditus, orba salute
 Dextra tuî nunquam est: quam tendis sponte iacenti.
 Nonne utero includi, ac mortalia membra subire
 Dignatus? sed enim post illa egressus ad auras
 Pauper eras, non sceptras tenes, regni'que coronam
 Insignem, alta fuit pietas pro diuite cultu:
 Hac duce confixus: metuenda'que funera passus:
 Me me seruasti moriens, ego sanguinis hæres
 Effusi, & partæ consors sine tempore uitæ.
 Tu mihi pollicitus regnum immortale, meis'que
 (Si quicquam potui, aut gessi pro tempore dignum,
 Non ego sum tanti) affulsit tuâ gratia rebus,
 His ego muueribus tantis donisque petitus
 Quas possum soluo grates, nec in omnia uitæ
 Tempora non laudandus eris multum'que canendus,
 Et pater & genitus, sacri quoque spiritus oris,
 Omnipotens Deus, & solus uasti arbiter orbis,
 Hæc repetam assidue, & memori de pectore fundam,
 Atque ideo gratus, gratum quod me facis ipse.

Exultatio

Exultatio Poëta de se ipso.



MORTE pruinoso dum pascua rure peragrat
Edalus, ipse sibi carmen cantabat, & ornos
Aspexi rigidum uati incuruare cacumen.
Ille autem sacro tales dabat ore loquelas.

En ego iam ingredior maturi roboris annos,
Et mihi iam senis nent diuæ stamina lustris,
(Sic fortuna sinat) studijs florentibus aptus.
Inueniar, mentisque immoto robore præstans.
Non superare amnem nando, non spicula dextra
Spargere, non sauo concurrere cominus hosti.
Aut studium fuit usque feras agitare latentes,
Sed me Pieridum chorus, & reuerentia mouit
Fluminis Aonij, suspensaque crinibus ingens
Laurus, & æternos mansurum nomen in annos.
Attractumque sono uulgi grauiore canentis.
Hæc sequor, hæc uitæ pretio tenuisse iuuabit.
O patria, & qui non frustra genuere parentes,
Nomina chara feram radiantia ad astra, neque ullis
Gloria uestra locis ullo'ue tacebitur æuo.
Ecce rapi uideor populo plaudente per urbes
Purpureis inuectus equis, hic sparget odoras
Fama rosas latè, huc illucque per ora uolabit
Quid quum læta uirum mulcedo pectora dictis?
Suspensamque traham cantu per compita pubem?
Si qua fides uati est, celebrabimur inde, feretque
Insignes Musa hæc etiam num frigida laudes.
Sic postquam terris densæ incubuere tenebræ,
Nocturnus cœcis ætherque inuoluitur umbris,
Mane polo nitidum lumen diffunditur, una
Emicat aurora, & roseum iubar excutit ore,
Auratoque diem succendens crine coruscat.

In funere Herculis Asinarij.



MVSAE funeris carminibus grauem
Intentate sonum, tollite laudibus
Ad cœlum meritis Herculem Asinium,
Illum, qui cupiens ætheris ardui
Vindis explicuit lætum animam suis,

Saxo

Saxo hoc destituit corporeum decus,
 Nunc uirtus, pietas, iustitia, & fides
 Desertæ fugiunt sæcla nocentia,
 Quis linguam poterat soluere dulcius?
 Quis frænare loco? quæ scelerum tuba
 Inclamare? sed (heu flebile) concidit
 Aetatis specimen, lux & inertior
 Cœli luce grauem destituit uirum,
 Telum mortis atræ si fugeres minax
 Frustra lenis eras, pacis & arbiter,
 Et frustra pretium nobile temporum.
 Te rupes & agri, syluæ que cognita
 Venatu assiduo, te tanager gemit
 Multum flumineis uortibus tumens,
 Nec non te lacerò persequitur sinu
 Coniunx haud placiti nominis immemor,
 Luctus indocilis ponere flumina,
 Nil mortalibus est perpetuò datum,
 Mutantur que uices, fors regit aspera,
 Vitæ (quid facias?) it uolucris dies,
 Donec morte ruat. Desine fletibus
 Vxor, compositi per cineres uiri,
 Constantem que parum per querimoniam.
 Nam quum iam gelidos umbra reliquerit
 Artus, ipsa fugit iussa, nec acriter
 Inclamata gradum fert cupidum retro.
 Quid sit, quò redeat? non gemitus ualet,
 Non prodest oculorum irriguus dolor,
 Discerptæ ue genæ, non laceri sinus,
 Incassum quid agis te miserum in modum,
 Orato requiem, pacem & amabilem
 Diuum, si sapias, ordine manibus.

Oratio ad Deum.

O PATER ingenite & uasti regnator olympi.
 Omnipotens, æuo que prior, uita omnium & ordo,
 Cuncta uidens, & cuncta mouens, & cuncta gubernans,
 Immortalis, & altitronans, lux maxima rerum.
 Cœlicolum que quies, semen quoque seminis, atque
 Radicum radix, uerbo solo omnia portans.
 Atque creans, numeros cunctos & pondera noscens.

Princi-

Principium sine fine: patens, obscurus & idem.
 Tu iubar æternum, radiantia lumina Phœbi
 Noctiugumque globum lunæ, stellasque creasti,
 Et placidum pecus, atque immania terga ferarum,
 Tum facili uolucres mulcentes ærea cantu,
 Gramina camporum, & saltus, Sylvasque uirentes.
 Fontesque, fluuiosque, & amantem litora pontum,
 Te mortale genus pauet omne, & iussa sequuntur
 Inferni, superique chori. Tu Regibus altis
 Imponis leges, & res miseraris inanes,
 En ego qui fictus sum per te, protinus (ut fas)
 Te peto, te'que uoco, fragilis, miser, atque caducus,
 Heu heu, quàm multo te offedi crimine, quàm non
 Seruauì mandata, tuæ nec fœdera legis.
 Inde fluens lacrymis, ad te mitissime rerum
 Flecto oculos, tendo que manus, miserere precantis.
 Maior nanque tua est bonitas, quàm crìmina nostra,
 Si non peccarent homines, non parcere posses,
 Luceret'que minus Clementia, sis rogo lenis.
 Deliqui, indomitam rapuerunt plurima mentem,
 Et quoniam sine te nil possumus, annue uotis.
 Da Pater, ut uitæ fallacia gaudia uitem.
 Hostis & antiqui infidias, fraudesque, dolosque,
 Speque, fideque sacra teneat, tua iussa capeßam,
 Me'que tui sacro perfusum lumine uultus
 Solare, & fer opem dextræ magnæ atque potentis.
 Te solum inspiciam, sitiam, uenerer'que, colam'que.

Imitatio Virgiliana.

VICINAM extinxit mors improba, luximus omnes,
 Hæc fuerat thalamis nupta Bibalde tuis,
 Vt flos languescit moriens succisus aratro,
 Languida que ut ponit colla papauer humi,
 Si pluuiam ingentem sensit: sic forma puellæ
 Fluxit, sic roseus concidit ore nitor.

In

In Iasonem Orantem.

QUOD mare, quod cœlum, quæ nescit Iasona tellus?
Gloria summa uiri, dum legum ænigmata soluit,
Nec minor oris adest uirtus & gloria fandi,
Aspice, ut eloquio fluat, ut demulceat aures,
Surge uetus Roma, & Præscorum turba Quiritum,
Iam quæ redi quando in lucem Cicero nouus erit.

Epitaphium in Iasonem Mainum Iuricon. Mediolanensem.

IVRIS & eloquij fulsit sapientia quondam
Sed non sub tumulo condita Mainæ tuo.
Nam ueluti in labris fulsit sapientia quondam,
Sic nunc in libris emicat illa tuis.

De Cæsare.

EFFIGIEM gadibus magni quum forte uideret
Cæsar Alexandri, gemitum dedit, heu! miserum me
Qui nihil (inquit) ago natum iam grandis, at ille,
Quot domuit terras, quot uæ aquora floridus annis.

Versus emendati ad pietatem facientes.

VC me foelici descendere iussit olympo,
Hic me non uno uulnere fixit amor,
Fecit amor, caput ut spinarum scinderet orbis,
Pectus ut hauriret lancea, fecit amor.

Solus amor de me potuit perferre triumphum,
Ille pedes clauis fixit, & ille manus,
Si cupis ergo animi mihi signa rependere grati,
Dilige: pro tantis sat mihi solus amor.

F I N I S.





Epitaphium in Iasonem

Epitaphium in Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem

Epitaphium in Iasonem Mai

Epitaphium in Iasonem Mai
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem

Epitaphium in Iasonem

Epitaphium in Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem

Epitaphium in Iasonem

Epitaphium in Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem
Iasonem, quod etiam, quod est Iasonem

